













29,082/8

A. xxxiii o



INTERNATIONAL  
SYMPOSIUM

ON THE MORPHOLOGY  
OF THE

CELLULOSE  
FIBRE

AND ITS  
RELATIONSHIP TO THE  
MORPHOLOGY

OF THE  
CELLULOSE  
FIBRE

AND ITS  
RELATIONSHIP TO THE  
MORPHOLOGY

OF THE  
CELLULOSE  
FIBRE







FRIDERICI HOFFMANNI  
MEDICINÆ  
RATIONALIS  
SYSTEMATICÆ

*TOMVS QVARTVS*

*QVO*

SPECIALIS MORBORVM  
PATHOLOGIA

ET HVIC SVPERSTRVCTA SOLIDA  
THERAPIA

CVM MEDENDI METHODO

CAVTELIS CLINICIS ET MORBORVM  
ENARRATIONIBVS

ADJVNCTA EPICRISI EXHIBENTVR

*PARS PRIMA*

DOCTRINAM DE OMNIS GENERIS  
FEBRIBVS

TAM INTERMITTENTIBVS QVAM CON-  
TINVIS ET ACVTIS INFLAMMATORIIS

PERSPICVA ET DEMONSTRATIVA  
METHODO TRADENS.

VENETIIS,

---

APVD BALLIONEM. Anno 1730.

IVVENI EGREGIO  
**FRIDERICO HOFFMANNO**

CANDIDATO ARTIS MEDICÆ DOCTISSIMO  
STRENVO ET SOLERTI RERVM PHYSICARVM MATHEMATI-  
CARVM ET MEDICARVM CVLTORI.

**FILIO SVO DILECTISSIMO**

NEC NON

OMNIBVS DISCIPLINÆ SVÆ ALVMNIS

DOCTIS ET SEDVLIS

VTILISSIMVM HVNC LIBRVM DICAT

ET PLVRIMVM COMMENDAT

**AVCTOR.**







## PRÆFATIO.

**T**andem prodit in lucem promissus diu  
& expectatus quartus Medicinæ rationalis systematicæ tomus, qui morborum pathologicam & præcticam specialem disquisitionem, cum cautelis & observationibus clinicis, nec non morborum curationumque historiis complectitur, & quidem prima ipsius pars, de omnis generis febribus. Multa quidem scripsi & plura edidi, ex quo per triginta & septem fere annos Professoris munere hac in Academia functus sum; sed a primo statim tempore firmum cepi propositum, maturæ tandem ætati reservare Medicinæ systema, non quod nutanti hypothesium sustentaculo, sed veritatibus inter se connexis & methodo demonstrativa propositis, niteretur, ad artem nostram, multis, in pathologicis præsertim & medendi methodo, laborantem imperfectionibus, perficiendam & certam ipsius rationem adstruendam. Ante decem igitur annos evulgavi primum hujus operis systematici tomum, qui philosophiam corporis humani vivi & sani, & doctrinam sanitatem tuendi vitamque conservandi tractat, ac haud ita pridem auctior & emendatior recusus est. Successit dein secundus tomus, quo philosophiam corporis humani ægotantis tradidi, & varii generis causas, quibus functiones in corpore varie læduntur, congruo ordine, accurate & copiose exposui, ut Medicus rerum insalubrium, quæ morbis inge-  
neran-



nerandis velificantur, cognitionem haberet exquisitam. Novissime in tertio tomo id egi, ut viam sternerem, ad recte ac penitus percipiendam, & pathologiam, & therapiam. Hinc docui, quo pacto morborum historia colligendæ, morbi dignoscendi & perite de iis judicandum, genuinam medendi methodum, ex naturæ legibus, arti imitandis & exsequendis, monstravi, & redactis in generales quatuor classes remediis cunctis, longo usu probata selegi eorumque physico-mechanicum in corpus operandi & dextre applicandi modum, candidè exposui. Restitit itaque adhuc quartus tomus, specialissimam morborum ætiologiam & therapiam, pro tot individuorum & causarum morbificarum varietate, exhibiturus, cujus nunc primam partem, febrium doctrinam habentem, eruditorum & saniorum Medicorum judicio publice expono, in non poenitendum, uti spero, usum eorum, qui in artis operibus versantur. Neque vero me poenitet, editionem practici hujus operis diu distulisse, & ad hoc usque tempus, quo longa & sufficienti experientia instructus, certa ubique cum ratione id elaborare possum. Ego enim non sine animi indignatione & ægritudine vidi, quam temere ludant de hominum corio medentium imperiti & quot quantaque damna inconsulta medicina inferant. Tædet etiam prorsus multorum, immo plurimorum practicoꝝ librorum, qui immaturo adhuc judicio, & insufficiente, aut plane nulla experientia, ex aliis compilati conscribuntur, erroribus decumanis referti, qui sic cum magno ægotantium detrimento in vulgus emanant. Ad condendum vero practicum systema, quod firmis & demonstrativis principiis nitatur, ante omnia amplissimo observationum practicarum apparatu opus esse, quisque judicio pollens intelliget facile. Vera enim pathologia, quæ generationem morborum ex concurrentibus variis causis tradit, genuinum est therapie certæ, in curandis & arcendis morboſis afflictionibus occupatæ, fundamentum ac basis. Sanare quoque nihil aliud est, quam causas morborum proximas earumque effectus tollere, & præservare a morbis idem, ac primas mor-



morborum origines earumque antecedentes causas, avertere,  
 vel per congrua remedia remove. Ideo necessarium quam  
 maxime est, ut causæ nocentes morbificæ, quæ innumerabiles &  
 mirum natura ac operatione differunt, sufficienter & penitus  
 cognoscantur, ut deinceps, remediorum, causis morborum  
 ceu contraria opponendorum, quæ innumera pariter sunt &  
 natura ac efficacia, pro corporis dispositione, admodum di-  
 versa, vires & facultates indagentur & intime perspiciantur.  
 Ad obtinendam autem hanc cognitionem, via datur alia nul-  
 la, quam per numerosa observata clinica, cum cura notata  
 in tot individuis, ratione ætatis, sexus, nativitatis, hære-  
 ditariæ dispositionis, consuetudinis, victus & vitæ generis,  
 sensibilitatis, valetudinis perpeßæ, differentibus, & quod  
 maximum in morbis non tantum simplicibus & solitariis, ve-  
 rum etiam, qui frequentissimi, complicatis. In ipsa cura-  
 tione id utique certum, nec ullum morbum curari posse ea-  
 dem methodo in genere, sed quemvis, propter differentem  
 causarum & individuorum indolem, curandi rationem poscere  
 diversam, individualem scilicet & specialissimam. Quæ quum  
 firmum requirat iudicium, quo observatis & expensis cura-  
 te circumstantiis singulis, quid de morbo sentiendum, quo-  
 modo curatio instituenda, quibus auxiliis utendum & quo  
 ordine ac dosi hæc adhibenda? omnino necessarium est, ut  
 ex numero pluribus observationibus addiscatur hæc & colli-  
 gatur. Interim solæ observationes, etiam curatissime con-  
 scriptæ, neutiquam sufficiunt, ad evitandos tam in iudicando,  
 quam usu remediorum errores, sed clave opus est, qua rerum  
 in historiis obviarum facti causas eruere, detegere, aperire,  
 clare demonstrare, tandemque ex observatis particularibus  
 plurimis, axiomata universalia, magnæ ad pathologiæ & the-  
 rapiæ incrementa utilitatis, elicere possimus. Iam hæc clavis  
 nihil aliud est, quam illa rerum medicarum scientia, quæ de-  
 prompta est ex principiis in sensum & conceptum cadentibus,  
 anatomicis nempe & physico-mechanicis, ita ut illorum ope  
 ea, quæ ad corporis humani ejusque partium intimam stru-

Eturam & ex hac dependentes singularum functiones pertinent,  
 & horum beneficio, indoles & facultates rerum corporearum,  
 quæ non pro arbitrio, sed ex necessitate a summo creatore in-  
 dita immutabili, in corpus agunt, ac unice vitam, sanitatem,  
 mortem & morbos, horumque & præservationem, & cura-  
 tionem, dispensant, cognoscantur. Præ omnibus tamen o-  
 pus est deducta ex his principiis pathologia vera, qua si quis  
 destituitur, nihil solidi, nihil recti, de medicamentorum vi-  
 ribus, an in hoc vel illo morbo & individuo, salubria sint, vel  
 insalubria? judicare valet. Quam manca autem & hiulca  
 sit quamque infirmis fundamentis nitatur, & veterum, & re-  
 centiorum plurimorum pathologia, nemo qui penitius ean-  
 dem sine præjudicio expendit, inficias ire poterit, sed dicere  
 illud & palam scribere, tam odiosum est, quam veritatem  
 eloqui. Ita tamen omnino est. Et ne gravius aut ex affectu  
 forsân scriptum videatur, exemplo sint definitiones, ubivis  
 obviæ. Veras has & reales, genuinum ac firmum esse prin-  
 cipium, ex quo conclusiones & demonstrationes, de essentia,  
 causis & differentiis definiti formandæ, accuratiores Philo-  
 sophi, profitentur & asserunt omnes. Quæ autem in medi-  
 ca disciplina passim circumferuntur, de arte in primis medica,  
 de vita, sanitate, morbis, morte, de febre, inflammati-  
 one, morbo spasmodico hypochondriaco definitiones, ita  
 sunt comparatæ, ut vix ulla sit, in qua non multum deside-  
 rari queat. Quin, quum in physiologicis cerebri & systema-  
 tis nervosi functio & usus, pensî habetur & a plurimis tantum  
 non ignoretur; ultro innotescit, morbos ex horum vitio et-  
 iam ignorari, & mutilam præterea admodum esse, non mo-  
 do morborum, sed & symptomatum ætiologiam. De the-  
 rapia porro, nostro tempore receptæ, imperfectione testimonio  
 est indubio, illa propudiosa inter Medicos vicens dissensio,  
 de remediorum viribus & usu. Lacerantur hac passim maxi-  
 mæ virtutis auxilia, venæsectio, fonticuli, vesicatoria, pur-  
 gantia, emetica, martialia, adstringentia, in primis chinæ  
 cortex,



## PRÆFATIO.

cortex, camphorata, volatilia, opiata & mercurialia, quæ nonnulli in totum, nonnulli sub certa tantum conditione rejiciunt, alii vicissim mire laudant ac concelebrant. Luculentius hanc in therapevticis ignorantiam prodit ingens illa remedium supellex atque farrago, simplicium & compositorum, Galenicorum & Chymicorum, quam tamen plurimi necessariam judicant ad oppugnandos tam multos & varios morbos. Alii contra universalia tantum crepant, & paucissima numero in usum vocanda esse, contendunt. Ab utraque vero parte diætetica & quasi domestica, illa maximarum in chronicis morbis virium præsidia, quibus Veteres, Chymix & Pharmaciæ ignari, gravissimos morbos debellarunt, aqua nimirum, vel pura fontana, vel mineralis, lac, serum lactis, ptisanæ, decocta & infusa specierum vegetabilium, balnea, frictiones, abstinencia quoque & inedia, vel plane ignorantur, vel minimum negliguntur, neque ex merito æstimantur. Sed sic obvios nævos atque defectus Medicinæ, uti hodie fere est, tetigisse sufficiat & iterum inculcasse, quæ satis inculcari possunt nunquam. Iam quo pacto lapsus hi vitandi & quam ego ob id hoc in opere servaverim tractationis rationem, ostendam. Sane quum vita & sanitas res sit adeo pretiosa & inæstimabilis, princeps & præcipua omnino esto cura, ne quippiam admittatur, quod eandem ullo modo labefactare, multo minus destruere, queat. Eo potius summo enitendum est studio, ut morbi & præmatura mors arceantur. In hoc enim præcipuum medentis positum est officium, tum quod magis in ipsius potestate situm, tum quod ex centum, vix unus eam attingit ætatem, ut ex scientia rerum salubrium & insalubrium, præsentem morbum depellere tuto & certo norit. Vt itaque officio suo recte satisfaciat artifex, per remedia, quæ ipsius manus & instrumenta, nihil plane agere debet ex opinione, quæ secundum Hippocratem de decent. orn. in crimen verti debet eam adhibentibus, sed simplex sectanda veritas, cujus genuinus

character, si ex indubiis & inconcussæ veritatis principiis, apta connexionem ita potest deduci & demonstrari, ut animum convincat, nec dubitatio amplius supersit. Vrsit hanc demonstrationem serio jam primus artis conditor, *Hippocrates*, passim. Sic enim graphice scribit *epist. XXVII. ad Athen. oportet non solum dicere, sed etiam demonstrare, quod verum est in Medicina.* Idem *lib. de art. pag. 9.* vult, ut morborum tam manifestorum, quam obscurorum, certæ & infallibiles medelæ sint. Et *lib. de loc. in hom. pag. 398, constans*, ait, & *firma est tota Medicina & doctrina optime in ea composita, minime fortuito casu egere videntur.* Atque etiam ego existimo, medicam disciplinam ad demonstrationes conficiendas omnium esse aptissimam. Magnus enim est numerus causarum naturalium, non naturalium & præternaturalium, quæ concurrere debent ad proximam causam, a qua functiones læduntur immediate & morbus fit. Quo vero major rerum vel causarum series & ordo; eo pulciores, pleniores & perfectiores conficiuntur demonstrationes. Jam, uti supra dictum, secundum optimos demonstrandi magistros, definitiones reales sunt illud principium & fundamentum, ex quo conclusiones firma argumentatione deducendæ, & in quod veritates singulæ tandem resolvuntur. Quare in adornanda hac morborum peruestigatione, hanc mihi præfixi methodum, ut primo loco veram morbi definitionem collocarem, per quam ipse morbus ejusque causa cognosci & ab aliis ratione suæ essentiæ dignosci possit. Dein subjunxi statim generalem morbi historiam, completam cum omnibus necessariis circumstantiis, depromptam partim ex propria, partim aliorum peritissimorum Medicorum experientia, eumque in finem magno cum fructu usus sum ex antiquissimis *Hippocratis & Arctei*, neque minus *Celsi, Coelii Aureliani & Tralliani* scriptis, qui accuratius recentioribus morborum consignarunt historias, e quibus ob id eximiora loca passim inserui. Enarrata historia, in proximam & adæquatam cujusvis morbi causam,



sam, quæ symptomatum genitrix, inquisivi, & simplici simul  
 ac facili methodo cum hanc connexi causas antecedentes re-  
 motas, item naturales & præter naturales, ostendendo apte  
 & intelligenter, qua ratione hæ ad primam in effectum tradu-  
 cendam conspirent. Tum exposui signa e quibus de morbi e-  
 ventu judicandum perite, ac, ut sedes morbi & mortis causa  
 innotesceret, addidi demum, quæ in cadaveribus deuncto-  
 rum reperiantur. Sic tradita morbi theoria, accessi statim  
 ad medicationem & curatorias indicationes, quæ perperam  
 plerumque seorsim tractantur. Curatio enim & medendi me-  
 thodus opponi debent causis, ideoque etiam proxime cum iis  
 connecti, quo eo melius in oculos incurrant & animo infigan-  
 tur. Prisca hæc fuit *Hippocratis* sententia, quam *lib. de flat.*  
*pag. 400.* sic prodidit : *si quis causas corporis affecti probe cogno-*  
*vit, potens est valde ea afferre, quæ corpori commodent, nimirum*  
*contraria, morborum naturam perspecta. Est enim secundum natu-*  
*ram Medicina*, id est, Medicina in naturalem statum debet re-  
 ducere ægrotum. Sed in medicatione merito tenendum :  
 nec Medicum, nec medicamenta, sed ipsam naturam, per  
 quam nihil aliud intelligo, quam corporis machinam potenti-  
 tiis motricibus in solidis & fluidis, nec non ex variis secretoriis  
 & excretoriis artificiosissime constructam, solum sæpe, mor-  
 bum sanare, causasque ipsius debito tempore & ordine per  
 congrua emunctoria eliminare. Hanc itaque methodum,  
 hunc ordinem naturæ & leges, Medicus ceu peritus ipsius mi-  
 nister, cum cura observare & imitari, ac si deficit, in moti-  
 bus eandem juvare, vel si excedit, ad moderamen & æquili-  
 brium reducere debet. Quod, quo pacto recte sit faciendum,  
 leges quasdam, naturæ legibus conformes omnino, tradidi &  
 uberius exposui in *Med. ration. system. tom. III. Sect. II. cap. I. & II.*  
*pag. 388.* quæ tam in ratione fundatæ, quam multiplici ex-  
 perientia sunt comprobatæ. Has qui in medicatione omni  
 observabit curate, peccabit nunquam ; qui autem deliquit,

certissime contra harum præceptum impegit. Quare omnibus & singulis qui artis exercitio manum admoveere volunt, aut jam in eo versantur, sedulo legenda, perpendenda & probe tenenda commendo etiam atque etiam, quæ in citato *tomio tertio*, maximeque *Seçt. II. cap. I. II. III. & IV. sqq.* attuli. Inde enim amplissimum fructum adresolvendas morborum historias & danda salutaria consilia percipient, & intelligent, specialia hoc in opere practica præcepta, niti universalibus illis omnia. Habeant præterea disciplinæ meæ alumni sibi commendatos casus, quo cuivis capiti subjunxi, cum addita epicrisi. Heic enim, ubi recte actum, perspicient applicationem præceptorum, ubi secus factum esse, candide sine ullius injuria dixi, aliorum damno sapere & cautiores fieri discent. Videbunt etiam ex historiis deprompta salutaria monita, amplissimi in similibus casibus usus. Omnia autem erunt incitamento, ut diligentes sint in annotandis curate morborum historiis, e quibus, ope theoriæ solidæ, ad usum accommodæ, ipsi eruere poterunt canones atque cautelas ad incrementa & pathologiæ & therapiæ longe utilissimas. Nolo tamen, ut mea tantum sectentur, sed ut ex aliis etiam decerpant, quæ vera & ad usum scripta eademque cum prudentia sibi imitanda proponant. Quem in finem habeo ut commendem *Hippocratem*, *Arætaum*, *Trallianum* & *Celsum*, ex veteribus, ex recentioribus Gallis, *Ballionium* & felicissimum Practicum *Riverium*; ex Italis optimum *Hippocratis* scholiasten, *Mercurialem* nec non *Lancisium* & *Baglivum*; ex Anglis *Willisium*, *Sydenhamum* & *Mortonem*; ex Belgis *Sylvium* & *Boerhaaven*; ex Germanis *Sennertum*, *Hildanum* ac *Ettmüllerum*, non neglectis eorum laboribus, qui novissime in nostra æque ac aliis Germaniæ Academiis, veris principiis & sufficienti experientia instructi, scripserunt. Hæc tam in genere, quam de scribendi ratione & usu hujus libri monuisse sufficiat. Optassem quidem, ut practicum opus universum, uti animo concepi, luci publicæ simul exponere potuissem,



## PRÆFATIO.

tuiffem, fed late nimis patuit campus, quam ut uno femestri, in tanta ægrotorum, & domi, & foris, confilium & opem exquirentium, in tanta negotiorum & caufarum, ex magiftratu quem gero academico, multitudine, & fub valetudine adverfa, qua fub initium anni longius quam per mensem fui detentus, eundem potuerim emetiri. Selegi igitur potiffimam de febribus doctrinam eandemque in prima hac parte mihi fumfi explanandam. Dabo tamen operam, ut quam primum fieri poterit, reliquorum adhuc morborum, eodem modo inftituta tractatio, & fi DEus vitam viresque concefferit, vertente forfan anno, lucem afpiciat. Interim ut hic no-

fter labor in medentum & ægotantium fructum  
cedat ampliffimum, voveo. Scribeb.

Halæ Magdeb. Idibus Maii, anni

clbcccxxix.

CONSP.



# CONSPECTVS PARTIS PRIMÆ

## SECTIO. I.

DE

FEBRIBVS INTERMITTENTIBVS TAM SIM-  
PLICIBVS QVAM COMPOSITIS ET ANOMALIS CA-  
TARRHALIBVS ITEM EXANTHEMATICIS ET  
MALIGNIS NEC NON ERYSIPELACEA.

## PROLEGOMENA.

DE

FEBRIVM NATVRA IN GENERE.

Caput I. De febre tertiana.	pag. 9
II. De febre quartana.	53
III. De febre quotidiana.	86
IV. De febribus intermittentibus epidemicis anomalis mali moris.	103
V. De febre semitertiana.	111
VI. De febre catarrhali benigna.	124
VII. De febre variolosa.	142
VIII. De febre morbillosa.	185
IX. De febre purpurata rubra & alba miliari.	202
X. De febribus epidemicis exanthematicis catarrhalibus sive petechizantibus.	226
XI. De febribus petechialibus veris.	257
XII. De febre pestilentiali.	285
XIII. De febre erysipelacea.	303

SECT. II.



## SECTIO II.

DE

FEBRIBVS ACVTIS INFLAMMATORIIS, ITEM LENTIS PVTRIDIS HECTICIS NEC NON SYMPTOMATICIS.

Caput I. De febribus inflammatoriis in genere, speciatim de febre acuta sanguinea, Græcis synocha.	pag. 323
II. De febre ardente, nec non cholericæ.	342
III. De febre stomachica inflammatoria.	371
IV. De angina.	389
V. De febre phrenetica, sive phrenitide.	407
VI. De febribus pnevmonicis, sive pleuritide & peri-pnevmonia.	425
VII. De febre hepatica, sive hepatitide.	448
VIII. De febre nephritica.	461
IX. De inflammatione vesicæ.	478
X. De inflammatione & febre uterina.	490
XI. De inflammatione oculorum, cum & sine febre.	521
XII. De febre intestinorum inflammatoria ex mesenterio	537
XIII. De febribus lentis & hecticis.	553
XIV. De febribus symptomaticis.	591





SECTIO I.  
DE  
**FEBRIBVS**  
**INTERMITTENTIBVS**

TAM  
SIMPLICIBVS QVAM ANO-  
MALIS ATQVE COMPOSITIS  
ITEM  
CATARRHALIBVS EXANTHE-  
MATICIS ET MALIGNIS  
NEC NON  
**ERYSIPELACEA.**

THE  
LIBRARY  
OF THE  
MUSEUM OF  
COMPARATIVE ZOOLOGY  
AND ANATOMY  
OF THE  
HARVARD UNIVERSITY  
CAMBRIDGE, MASS.  
1880





PROLEGOMENA  
DE  
FEBRIVM NATVRA  
IN GENERE.

§. I.



I ullus morbus recte meretur <sup>Febris</sup> appellari universalis, certe est ipsa fe- <sup>frequens</sup>bris. Hæc enim universum nervosa- <sup>& gravis</sup>rum partium genus vehementer exa- <sup>morbis.</sup>gitat omniumque in corpore partium functiones graviter pervertit, ut nec solidorum, cordis & arteriarum motus,

æquabilis sit atque legitimus, nec sanguinis reliquorumque humorum progressus liber & naturalis, nec saluberrimæ secretiones & excretiones recte succedant, neque etiam ipse animus sibi omnino constet, sed quandoque febrili impetu turbatus, deliret plane. Deinceps omnibus omnino hominibus ex æquo incumbit hic morbus, cujuscunque sint ætatis, sexus & temperamenti, quocunque sub cælo vivant & quocunque etiam victu & vitæ regimine utantur. Quin epidemice haud raro grassatur multosque simul magna corripit atrocità ac medentibus multum facessat negotiū. Neque tantum per se sanitatem subvertit & morbus est primarius, sed

sæpe etiam aliis passionibus, uti cachexiæ, scorbuto, phthisi, luveneræ, hydropi, accedit ceu symptoma, easdemque acerbiores reddit & periculosiores. Ut adeo, calculo exactius subducto, decima mortalium pars, morbo vix alio tollatur e medio, quam febrili.

## §. II.

*Sæpe tamen salutaris.*

Licet autem febris humano generi tam infestus & perniciosus sit morbus; hanc tamen peculiarem obtinet facultatem, ut motu intestino & progressivo quo absolvitur auctiori, causam suam destruat ac seipsum sanare possit, immo aliis gravibus & longis morbis superveniens, eosdem vincat atque expugnet. Ipse *Hippocrates* & *Celsus* febrem habuerunt medicinam & morborum præsidium, quo magni etiam morbi curantur, paralyse, epilepsiæ, convulsivi motus, affectus spasmodici, sic dicti hypochondriaci, quin consultum duxerunt, suppressa citius febre, novam accendere. Et testantur etiam observationes, quod valetudinarii, post febrem, firmam & longam sanitatem fuerint adepti, quin, quod temperamentum & mores fuerint immutati, qua de re latius videri potest, dissertatio nostra de februm salubritate.

## §. III.

*Febris descriptio*

Quum igitur febris tantam potentiam, tam ad mortem, quam sanitatem habeat; in proclivi est judicare: ipsius veram & intimam, quoad indolem, generationem atque effectus cognitionem, utilem esse Medico & scitu necessariam. Jam, secundum logicas regulas, vera rei cujusdam definitio, naturam, differentiam & causas ipsius comprehendens, verum & optimum est demonstrandi principium, ex quo reliqua phaenomena apte deducenda. Hinc omnino etiam de vera, adæquata & reali febris definitione debemus esse solliciti. Sed pudet & tædet dicere tam multas tamque varias Veterum æque ac recentiorum pro stare febris definitiones; & tamen vix ullam, ullius, aut nonnisi exigui esse momenti, ad genui nam ipsius indolem verasque causas exponendas. Mihi itaque ad veritatem accommodare sic definiendam esse febrem videtur: quod sit  
spasmo-



spasmodica universi systematis nervosi & vasculosi affectio, juncta cum omnium in corpore functionum læsione, orta a causa nervosas partes ad intensiorem contractionem irritante, ita quidem, ut accedente ipsa, fluida vitalia primum ad interiora, cor & majora vasa ab externo ambitu agantur, & postea, aucta cordis & arteriarum systole, celeriter cum aestu per strictiora vasa iterum extrorsum pellantur, donec spasmo laxato excretiones succedant & febris desinat.

§. IV.

Asserò igitur, formalem febris rationem, sive, ut ita lo-<sup>Causa</sup> quar, fundamentalem causam, consistere in spasmodica uni-<sup>formalis.</sup> versi generis nervosi & fibrosi affectione, quæ maxime ex spinali medulla procedit, & successive ab exterioribus ad interiores partes vergit. Docui id pluribus & momentosis rationibus in *dissertatione, de vera motuum febrilium indole ac sede.* Idem vero etiam luculenter arguunt omnia, quæ in febre præsto sunt pathemata atque phænomena, dolor scilicet dorsi, præsertim circa lumbos, horror, rigor, frigus, præsertim extremorum, tremor, unguum livor, vasorum in manibus & pedibus detumescencia, cutis contracta & arida, oscitatio, pandiculatio, pallidus & lividus faciei color, tremens & palpitans cordis motus, præcordiorum anxietas, spiratio ægra, inquietudo, corporis jactatio, sensus ebullientis circa præcordia sanguinis, pulsus contractus, parvus ac debilis, nausea & inclinatio ad vomitum, alvi & perspirationis suppressio, cum urina tenui & aquosa.

§. V.

Hinc prona jam fuit consequentia, quod omnia, quæ <sup>Causa</sup> totum nervosarum & vasculosarum partium systema ad <sup>materia-</sup> spasmos irritare & sollicitare possunt, ad ingenerandam fe-<sup>les varia.</sup> brem sint aptissima. Horum classem ducunt vehementes animi commotiones, terror, inprimis & ira, materia venenata & subtilis caustica, vel intus genita, vel per contagium suscepta, intercepta perspiratio, sudores critici cohibiti, exanthemata retropulsa, materia purulenta ulcerosa, passim in partibus

obhærescens, alimenta nimis acria, corruptæ & biliosæ primis in viis hærentes cruditates, nimia vigilæ, dolor vehemens ac nervosarum partium tensio, in inflammationibus, tumoribus & abscessibus, læsiones nervosarum partium ab acuto instrumento, ab acri & corrosivo pharmaco, balnea frigida & vicissim nimis calida, aut adstringentia. Sed pro differente harum causarum indole & vario quo nervosum genus infestant modo, differunt etiam prognatæ inde febres, ut nonnullæ sint benigniores, nonnullæ maligniores, aliæ intermittentes, aliæ continuæ, simplices, vel compositæ, regulares, vel anomalæ, axanthematicæ, putridæ, hæcticæ, vel lentæ, ut porro quædam facilius, vel difficilius sanationem admittant, quædam citò decurrant, quædam longius extrahantur, quædam etiam hominem perimant. De qua febrium origine earumque causis & differentiis, pluribus egi in *dissertatione de generatione febrium*.

## S. VI.

*Febris duplici motu absolvitur.*

Neque vero omnis celerior cordis & arteriarum systole, expulso frequentiori cognoscenda, & auctus cum calore intensiori sanguinis circuitus, febris est. Sæpe enim talis a vehementi corporis exercitatione, vel sanguinis per calida & spirituosâ commotione, accidit. Sed ille tantum intensior fluidorum circuitus & illa auctior cordis & arteriarum systole, febris dicenda, quæ a causis internis inducitur & sequitur horrorem, rigorem & frigus partium externarum. Duplex enim in febre sociatus motus, unus qui a peripheria ad centrum, sive a partibus externis ad internas, cor & pulmones, vergit; alter qui hunc sequitur contrarius, a centro ad corporis peripheriam. Illi junctus pulsus parvus, contractus, debilis, cum præcordiorum anxietate & spirandi angustia; huic auctior arteriarum motus, pulsus magnus & æstus, extremas etiam corporis partes occupans. Duplicem hunc febrem absolvere motum pridem jam notavit primus artis nostræ parens *Hippocrates*, eundemque disertis verbis fuse descripsit *lib. de flat.* hunc in sensum: in febre per horrorem sanguinem ab extremis corporis partibus, quæ ex sanguine & propter frigus palpitant, decedere



cedere & concurrere ad locos maxime calidos, & ob sanguinis ibi collecti abundantiam suscitari calorem, ad externa demum transeuntem.

§. VII.

Duplex hic motus diversæ plane indolis: atque virtutis. *Vno mor-*  
 Primus ille, a peripheria ad centrum, minus salutaris, sed *na? beso.*  
*isxi.* morbosus, quin interdum mortifer. Qui enim moriuntur  
 ex febre, sive continua sit, sive intermittens, acuta, sive chro-  
 nica, pereunt sub spasmō, frigore, horrore & rigore partium ex-  
 ternarum convulsionibus, quia cor, pulmones & cerebrum, san-  
 guine intus congesto nimium obruta, eundem ob debilitatem  
 amplius repellere nequeunt. Alter vero ab interioribus &  
 centro, ad circumferentiam & minima vascula motus, salutaris *Altero sa-*  
 est & vitalis, immo medicinalis & conservatorius. Sub hoc *lutari.*  
 enim & per hunc, ipsa materia, spasmus febrilem ciens, suc-  
 cessu temporis corrigitur, discutitur, ejicitur & ipsa febris sol-  
 vitur.

§. VIII.

Nimirum quum causa motus febrilis sit spasmus univer-  
 salis, nunquam penitus cessat ille, nisi hic fuerit solutus. *Febris sa-*  
 Hunc autem solutum esse indicatur, si perspiratio sit libe- *lutio.*  
 rior, mador, vel sudor in cute apparet, pulsus antea du-  
 rus, impetuosis & celer, mollior fit, moderatus ac tar-  
 dior, si urina sedimentum ponit & vires successive redeunt.  
 Hæc junctim apparentia, morbi solutionem nunciant & crisis  
 nomine veniunt, quia ex iis medicus judicium de morbo fer-  
 repotest. Hoc etiam sensu exponenda Veterum definitio fe-  
 bris; quod sit lucta cum morbo. Quod si scilicet spasmus, suc-  
 cos ad interiora urgens, validior est cordis & arteriarum mo-  
 tu ad externa repellente, morbus vincit & mors incidit. Si au-  
 tem motus per spasmus retrogradus superatur a vitali cor-  
 dis & arteriarum systole extrorsum sanguinem trudente,  
 morbus abigitur & sanitas redit. Quæ quidem naturæ post  
 luctam hanc victoria, certis, septenario potissimum numero  
 com-

computatis diebus, accidit, qui ob id vocantur critici, quibusque medico de morbi eventu judicandum.

### §. IX.

*Per naturam & artem præstanda* Ineffabilis igitur divina providentia merito celebranda, quæ corporis nostri machinam animalem, tam sapienter potentiis & facultatibus instruxit motricibus, ut ipse morbus, qui nunquam non cum læsione functionum partium & vitæ sanitatisque periculo accidit, ad expugnandam ipsam suam causam suique curationem sæpissime vergat & vergere possit. Atque adeo, quum ipsa natura sit optima morborum, etiam ipsius febris, medicatrix, perniciosum omnino est molimen, febriles in salutem tendentes motus, imprudenter medicina suspendere, suppressere, aut plane tollere velle. Secundandum potius naturæ saluberrimum opus, quod per auctiorem progressivum humorum motum, ad correctionem & resolutionem materiæ morbificæ ipsiusque tandem excretionem dirigitur. Id quod optime perficitur diluentibus, humectantibus, temperantibus, aperientibus, roborantibus & nitro-fis, nec non iis, quæ, tempore præsertim intermissionis, congruas excretiones promovent.

### §. X.

*Conclusio.* Hæc est nostra sobria & rationalis febrium theoria, causis manifestis, intellectui obviis & ex necessitate agentibus, physico-mechanicis, nitens. Ex qua omnia, quæ circa febrilium motuum negotium occurrunt, phænomena, symptomata & effectus, ordine concinno & apta connexionem deduci possunt & explicari. Quod quo pacto sit faciendum, & quæ ratione etiam ex hac theoria methodus medendi congrua eligenda causisque opponenda remedia, uberius patebit ex iis, quæ in speciali quarumvis febrium tractatione, jam dicemus.





# CAPVT I. DE FEBRE TERTIANA.

THESES PATHOLOGICAE.

§. I.



Ulla febris est, quæ tam exacte motus fe-<sup>Tertiana</sup>  
brilis in genere, qui & vasa, & nervosas <sup>qua dicitur?</sup>  
partes infestat, & Hippocrati Græcisque  
rigoris nomine quasi per excellentiam ve-  
nit, naturam ac genium manifestat & quæ  
tam frequenter affligit, nec ulli ætati,  
temperamento vel sexui parcit, quam

quæ alternis diebus cum rigore & horrore invadit, subse-  
quente celeri, qui ex frequentia cognoscitur pulsu, nec non  
anxio & ardenti calore, ac tertiana dicitur.

§. II.

Hæc, præsertim si regularis & legitima, his incedit <sup>Ipsius de</sup>  
symptomatibus. Caput primum dolet, artus languent, <sup>curfus &</sup>  
lumborum percipitur dolor circa primam dorsalem verte-<sup>sympto-</sup>  
bram, qui per dorsi longitudinem versus epigastrium ascen-<sup>mata.</sup>  
dio, cum dolorifico tensionis in hypochondriis sensu alvi-  
que strictura, accedit partium externarum, præsertim na-  
rium & aurium, refrigeratio, pandiculatio, oscitatio & hor-  
ror, membra sæpius graviter concutiens, pulsu simul par-  
vo, contracto & debili, interdum quoque ægro sitiente.  
Sequitur dein nausea, cum inani ad vomendum conatu, vel

(IV.)

B

etiam

etiam ipsa vomitio materiae biliosae & pituitosae, quandoque viridis, juncta saepius tussi molesta cum pituitae refectione, ex stomachi cruditatibus acido viscidis oriunda. Tum universum corpus fervor, sive anxius, ardens & ficcus calor occupat, facies antea collapsa & pallida, cutis contracta & rigida vasaque in manibus ac pedibus inanita resurgunt, rubescere ac tumescere incipiunt, arteriarum quoque pulsus major, plenior & citior micat, inquietudo intensior spiritusque difficilior fit & aegri oculis vix clausis aliena multa loquuntur. Decrescunt postea sensim haec symptomata, aestumitescit, cutis laxatur & madescit, urina emittitur flammei coloris, qualis comparet in destillatione spiritus nitri, vel aquae fortis, sine sedimento tamen, arteriae simul mollius tangentis manum ferunt & sudore prorumpente paroxysmus discedit, qui tamen pro differentia naturarum & causae morbificae quoad durationem varius, ita quidem, ut in quibusdam ad decem vel undecim, in quibusdam ad viginti horas protrahatur. Subsequenti intercalari die; corpus quidem adhuc languet, frigidiusculum est facileque inhorrescit, pulsus tamen sub febris impetucitatus & vehemens, tardius jam & debilis undulat & urina quoque crassior mingitur ac sedimentum ponit, vel minimum nubeculam, quae dispositio ad sedimentum, exhibet.

## §. III.

*Causa  
formalis.*

Sic decurrens paroxysmus febrilis, ipsa symptomatum ratione teste, quamoptime ad motus nervosarum partium universi fere corporis spasmodico-convulsivos referri meretur, quo etiam fit, ut omnia ea, quae nervosas partes ad motus anomalos irritant, uti quidem faciunt animi affectus, fortiora cathartica, nec non cum cibis vel aëre susceptae materiae acres, causticae & venenatae, item omnia adstringentia, frigida & quae nervis inimica sunt, quin clysteres acres, quos purgantia validiora ingrediuntur, tum ad



ad generationem, tum recidivam, vel minimum exacerbationem febris, plurimum omnino conferant.

§. IV.

Causam horum motuum febrilium in tertiana *Ve-*<sup>*Mater-*</sup>  
*lis.*  
 teres quidem bilem intemperatam, ab aliis humoribus se-  
 paratam & extra venas in imo ventre nidulantem, esse cen-  
 suerunt: est vero potius materia quæ illos excitat & fovet  
 excrementitia salino-sulphureæ & activæ indolis, quæ no-  
 stro quidem iudicio, sedem potissimum habet prima in re-  
 gione, partim in biliariis hepatis ductibus, partim in fle-  
 xura duodeni. Scilicet hoc in cavo humores biliosi, sali-  
 vales, præsertim pancreaticus, jam tum vitiiati, mutua cum  
 cruditatibus ex prava digestionem confermentatione ipsa-  
 que diuturniori mora & stagnatione, ejusmodi virulentam  
 gignunt materiam, quæ hinc successive per vasa lactea ad  
 sanguinem & cum hoc ad nervosas capitis, medullæ spi-  
 nalis, ventriculi, intestinorum & nerveas aliorum du-  
 ctuum secretoriorum & excretoriorum tunicas sufficienti  
 quantitate delata, universalem ejusmodi spasmus ciet, sub  
 quo sanguis ad interiora & vasa majora primum urgetur,  
 postea vero aucto systaltico cordis & arteriarum motu,  
 totius massæ sanguinis & humorum progressus intenditur,  
 obstructions in minimis nervosarum partium canaliculis  
 expediuntur, & remittente spasmo relaxatisque excretori-  
 is, febrilis quæ insedit materia per cutis spiracula, perspira-  
 tione, aut sudore opportune ejicitur insultusque cessat, do-  
 nec par rursus hujus excrementitiæ materiæ quantitas ex  
 primis viis ad sanguinem tunicasque nervosas denuo fue-  
 rit translata novumque inducat paroxysmum.

§. V.

Expedita autem hujus materiei ipsiusque tertianæ *Causa an-*  
*teceden-*  
*tes.*  
 genesis est in corpore exquisitoris sensus, cholericæ con-  
 stitutionis, ad spasmos animique motus proclivi, in ætate  
 plus consistente, quam infantili & senili, regnante ætate

nimis fervida & flantibus ex austro & euro ventis, præsertim si potio frigida fuerit ingurgitata vel corpus tempore vespertino, aut nocturno, auræ frigidiori & humidiori, aut plane insectorum minimorum copia circa compluvia & stagna refertæ, diutius expositum, multo magis quando venter cruditatibus oppletus, vel cibi gravis materiæ, aut adstringentis facultatis, & maxime omnium cum nausea, assumti.

## §. VI.

*Et proca-  
rartica.*

Neque minus frequenti experientia confirmatum habemus, corpora spongiosiora tempore vernali post largiorem sanguinis missionem, facile in febres tertianas nothas, vel catarrhales incidere, eo facilius, quando, præsertim grassantibus jam febribus, pluvioso & humido cœlo committuntur & stomachus cibo minus solubil infarcitur. Novimus quoque a purpura frigore externo repulsa, a scabie linimentorum mercurialium & sulphuratorum ope intempestive siccata, ab improvido acidulorum & aquarum mineralium, neglecto simul regimine & assumtis rudioribus alimentis, potu, nec non a percalido Carolinarum, quæ adstringentis virtutis, thermarum, vel aliorum balneorum, corpore præsertim plethorico, impuro & crudelitibus referto, usu, febrem tertianam, interdum continuam, interdum duplicem & anormalam, accessisse.

## §. VII.

*Dividitur  
in legiti-  
mam &  
notham.*

Ex his incunabulis pro gnata tertiana, non semper una eademque facie incedit, sed discrepat ideoque merito a Medicis in varias dispescitur species. Est quippe vel legitima, vel notha. Illa potissimum adoriri solet homines biliosæ constitutionis & sensu exquisitiori pollentes, inprimis sub præcalida aëris æstivi intemperie, acerbioribus etiam paullo stipatur symptomatibus, horrore scilicet, calore, capitis dolore, siti, vomitu & anxietate, urina seceden-



te intensius flammea , breviori tamen temporis spatio solvitur atque discedit. *Hippocrates* quidem exquisitam hanc duodecim horis deservere & septimo paroxysmo finiri , passim asserit , sed tam exactæ periodi febres in septentrionalibus nostris humidioribus & frigidioribus regionibus non observantur , & recte hinc perhibet *Mercurialis prælect. Bonon. pag. 190. rarissime tertiana exquisita Hippocratis invenitur , neque ego vix vidi , & jam quadraginta anni sunt , quod praxin exercui ; id quod ipse etiam asseverare possum.* In notha autem , sive spuria , mitiora quidem præstō sunt pathemata , calor non tam ardens , vomitus non ita frequens , urina non adeo flammei coloris , sed diutius extrahitur & vacuo etiam die virium languor , artuum lassitudo cum inappetentia relinquitur. Adhæc seignioris magis naturæ homines , sequiorem sexum & qui spongiosioris sunt habitus , auctumnali maxime tempore , infestat.

### §. VIII.

Regularis dein est , vel irregularis , sive anomala & confusa. Illa typum servat æqualem , tam ratione temporis invasionis , quam solutionis , longitudinis ac brevitat<sup>Regula-rem & irregula-</sup>is paroxysmi & suctis ceterum incedit symptomatibus. In hac vicissim tempus accessionis inordinatum , mox ante , mox post meridiem , jam circa vesp<sup>Regula-</sup>eram , quin mediam noctem , ipse paroxysmus , modo brevior , modo longior , urina remissionis , vel intermissionis tempore , nihil dimittit , sudor vel nimis parvus , vel nimis largus , vacuo etiam die adest & passiones complicantur insolitæ , pro naturarum diversitate diversæ , ut vel alvi fluxus , vel narium hæmorrhagiæ , vel enormes stomachi etiam subversiones , aut graves capitis dolores , mentis alienationes , anxietates cardialgicæ summæ , artuum dolores ventrisque tormina præsto sint. Et tales irregulares febres quæ typum non servant,

sunt plerumque epidemicæ, ex præternaturali & insolita æstatis vel autumnii constitutione provenientes, ut plurimum continuæ, quales etiam elapso MDCCXXVII. anno per universam fere Germaniam, post intensam atmosphæræ per multos menses siccitatem & caliditatem, populares habuerunt circuitus.

## §. IX.

*Simpli-  
cem &  
duplicem*

Nonnunquam porro simplex, nonnunquam duplex observatur. Simplicis paroxysmi alternis diebus recurrunt, duplex autem quotidie accedit, interdum quoque bis, uno die vacuo. Distinguenda tamen duplex a quotidiana, qua accessionis tempora quotidie servat æqualia, quum in illa paroxysmi recursus alternis diebus respondeat.

## §. X.

*Conti-  
nuam*

Continua quoque occurrit tertiana, his dignoscenda signis: adoritur cum horrore, anxietate, vomitu, æstu & ingenti languore, nec sequenti die symptomata hæc prorsus intermittunt, sed tantum remittunt, pulsuumque manet adhuc frequentia, cum æstu & languente debilitate, paroxysmi autem die, præcedente levi externorum refrigeratione, omnia iterum exasperantur & ingravescent. Et talis febris, si epidemia, durat quandoque per duas vel tres hebdomades antequam in legitimam intermittentem concedat; fit autem crebrius, ut tertiana primum per aliquot dies sit continua & postea in intermittentem bono transeat omine, malo contra, ex intermittente in continuam.

## §. XI.

*Epidemi-  
am & en-  
demiā.*

Plerumque tam simplices & regulares, quam duplices & anomalæ, sunt epidemicæ & ex insolita temporum tempestatumque, æstate imprimis constitutione proficiuntur. Endemiæ quæ audiunt, familiares & quasi propriæ sunt certis quibusdam locis, depressioris scilicet situs, uliginosis,



ginosis, piscinis paludibusque cinctis, culicum & insectorum proventu infestis, ita prorsus, ut incolæ rarius annu a febre immunes transigant & advenæ crebrius eadem exer- ceantur ac difficulter ex toto liberentur.

§. XII.

Omnia hæc febris tertianæ genera mitius primum *Tertiana* accedunt, repetentibus autem paroxysmis vehementia in- *mitior ac-* valescunt, manifesto indicio, inordinatis istis, solidorum *cedit-* & fluidorum sub impetu motibus, magis adhuc inquinari magisque intemperatos reddi corporis succos, qui imminu- to intermissionis diebus perspirationis & excretionum suc- cessu, pejorem adhuc successive indolem contrahunt.

§. XIII.

Singuli paroxysmi, laxata jam cutis compage, ma- *Paroxy-* dore, vel sudore solvuntur, urina die intercalari crassior *smus quo-* mingitur & nubeculam exhibet, vel plane sedimentum *modo sol-* ponit, quod eo copiosius, quo plus corpus sanguine & *vatur &* succis abundat. Si vero sub declinatione sudor non pro- dit, urina etiam tenuis & aquosa die vacuo secedit alvique ficcitas impensior, uti hypochondriacis maxime solemne, adest, valde affectum esse spasms a materia rebelli febrili nervosarum partium systema arguunt.

§. XIV.

Tertio utplurimum vel quarto paroxysmo ulcu- *Febris son-* scula circa labia prodeunt & lotium cum ardore quodam *lutio spon-* redditur, tumque symptomata notabiliter mitescunt. Opti- *anea.* me autem & securissime hæc febris a natura vel sola, vel arte adjuta, ex toto solvitur, erumpente bilioso copioso al- vi fluxu & auctiori excretionis cuticularis die a febre im- muni successu, quod ex magnitudine & vigore pulsus viri- umque incremento cognoscitur. Qui tamen epidemicis & anomalis laborant, soluta licet febre, difficilius conva- lescent & vires recuperant, ideoque diata exactiori in- digent.

§. XV.

## §. XV.

Consumit  
corpus &  
gignit for-  
des.

Nulla ex febrium genere, calore & auctiori sub paroxysmo motu interno, tam celeriter corpus succulentum exsiccat & obesum emaciat, tantamque biliosorum recrementorum, quæ per vomitum, alvum & urinam secedunt, copiam ingignit, ac tertiana, intensiori ac diuturniori æstu stipata. Et hæc fuit procul dubio ratio, quod Veteres febrem hanc a bile intemperata, exsuperante derivarint, licet hæc redundantia potius effectus quam causa sit.

## §. XVI.

Quæ con-  
tumacior.

quæ bre-  
vior.

Longiores & contumaciores sunt autumnales & hiemales tertianæ, tum vero maxime, quando viscera male constituta prima regio spasmis & flatibus referta, alvus strictior, æger vorax multumque, præsertim ante accessionem, ingerit, nec non ubi conveniens regimen in paroxysmo & post eum, supprimendo sudorem, negligitur, vel etiam medicatio perperam instituitur, uti plerumque evenit in plebejis & qui manuum ministerio victum parant, confirmante hæc ipso Hippocrate Sect. I. aph. IX. Breviores contra minusque ancipites sunt, si æstate incidunt, prima regio & viscera ad sanitatem disposita & regimen diæticum æque ac diaphoreticum tempore vacuo rite observatur.

## §. XVII.

Male tra-  
ctata ali-  
os addu-  
cit mor-  
bos.

Licet omnis intermittens non adeo periculosa sit, vix tamen ulla circumspicienti diætæ ratione & tam provida methodo excipienda, quam tertiana & quartana. Quod, si non servatur, in truculentos & immedicabiles morbos adducit ægrotantes, febrem nempelentam, hecticam, subitum pedum tumorem & hydropem, contracturas & acerbos dolores artuum, malum flatulentum & hypochondriacum varique generis morbos spasmodico convulsivos, infantes in lethalem plane epilepsiam, qui omnes morbi facile



cile succrescunt post præposterum ac nimium adstringentium, ante sufficientem materiæ excrementitiæ correctionem & evacuationem, usum. Hinc apprime ad veritatem *Trallianus lib. XII. cap. 6. tradit: tertiana, inquit, facilis quidem curatu, quum autem a Medicis illis, qui non refectione & viamur, male tractatur, non modo difficilis curatu, sed & insaniabilis interdum redditur.*

§. XIIX.

Ex facili quoque tertiana per Medici & laborantis er-  
rorem in aliam febris speciem transit, simplex scilicet in du-  
plicem, quandoque triplicem, immo in quotidianam &  
lentam, vel plane continuam, aut cholicam.

*In aliis quoque febrium species.*

§. XIX.

Crebrius demum & facilius quam ullus alius morbus  
redit tertiana & quartana, inprimis præpostera medica-  
tione suppressa. Simulac enim corpus a febre haud ita  
pridem liberatum aëri paullo frigidiori & humidiori ven-  
toque asperiori ex septentrione spiranti exponitur, vel sto-  
machus copioso, aut insalubri cibo plus iusto aggravatur,  
vel quidam animi motus, ira potissimum aut terror, inci-  
dunt, vel etiam purgans paullo acrius propinatur, pro-  
tinus spasmi febriles, dolor in capite, cum refrigeratione  
partium ipsius externarum, aurium & narium, oscitatio,  
pandiculatio, dolor circa primam lumbarem vertebra,  
languor artuum, hypochondriorum cum anxietate & alvi  
strictura tensio, horripilatio & refrigeratio, cum subsequen-  
te æstu, accedunt, quamvis sub prima repetentis morbi ac-  
cessionem, non secus ac in principio omnis febris intermit-  
tentis, mitiora sint hæc & sequentibus paroxysmis exacer-  
bentur.

*Facile re-  
petit.*

METHODVS PRAESERVATORIA.

§. I.

Quum itaque febres tertianæ plerumque epidemicæ  
(IV.) C. sint per rerū  
n. n. usum

sint & populariter grassentur, earumque causa antecedens febrem ingignens, potissimum in aëris vitio, vel diuturna intemperie, nec non in cohibita excretionem per cutim & cruditatum prima in regione sentina, contineatur; facile patet, tempore quo circumeunt, intemperatum, impurum & vappidum aërem esse fugiendum, vitando maxime omnium vespertinam humidiores auras, neque cibo copioso aut gravi stomachum onerandum, neque potum largiorem, multo minus spirituosum, vel acescentem ingerendum, neque etiam animi affectibus indulgendum.

## §. II.

*Per remedia.*

Inter remedia quæ a febrium insultu defendunt, æstate nimis fervida ex usu sunt pulveres leniter nitrosi, absorbentes & diaphoretici, decocta etiam temperata & diluentia, ex radice cichorii, scorzonæræ, rasura cornu cervi, hordeo mundo, ad potum ordinarium proficua, nec non aciculæ Selteranæ, vel Wildungenses, quæ simul alvinam excretionem liberam reddunt. Expediit porro quoque mane infuso theiformi, ex herba sanguinem depurante, ut scordio, veronica, post somnum excretionem per cutis poros elicere ac promovere. Neque enim facile febris alvo soluta & perspiratione libera accedit, ut potius quodcumque illa præter morem adstringitur corpusque languens & frigidiusculum est, febrem præstolari, haud fallaci judicandum sit angurio.

## INDICATIONES CURATORIAE.

## §. I.

*Quæ indicantur in genere.*

In curatione vero omnis medentis intentio ad causarum proximarum remotionem dirigenda. Atque adeo, quum potissimum tenuis, acris, mobilis & biliosus humor, nervosarum partium & tunicarum vasorum systema universum, ad universalem spasmum & stricturem excitans in causa sit: recte utique colligitur, generales medendi intentio-



tentiones his contineri momentis : 1) ut subtilis illa & caustica acrimonia temperetur & emendetur ; 2) ut correctæ & præparata materia peccans , quæ a perspiratione intercepta in corpore & genita fuit & relictæ , per cutis inprimis spiracula leniter diffletur & evacuetur ; 3) ut vehementia spasmodicorum , qui præsertim sub frigore & horrore sæva concitant symptomata , mitigetur ; 4) ut cruditates acido-viscido-biliose , in duodeno potissimum stabulantes , quæ nidum & hospitium præbent materiæ febrili , tempestive invertantur & expurgentur ; 5) ut vigor motuum post paroxysmum solidis reddatur & excretionum successus fervetur , ne , uti quidem post omnem vehementem morbi impetum & partium nervoso-muscularum spasmus solenne , atonia & motuum languor succrescat , nec inde sanguinis & humorum progressus unacum secretionibus & excretionibus elonguescant & hac ratione de novo materia febrilis generetur , foveatur & accumuletur ; & denique 6) ut , quum hæc febris ex facili redeat , cessante jam hac ipsa , novæ materiæ ad inducendam recidivam aptæ generatio , studio impediat & præcaveatur summo.

## S. II.

Ad obtinendum itaque primæ indicationis scopum , a-  
 crimoniam nempe biliosam , quæ ob intensiorem æstum suc-  
 cos successive collutulat omnes , contemperandam , nihil  
 efficacius nitro , vulgari tantum rite depurato , quippe quod  
 sulphur volatile , a quo motus intestinalis ciatur , figendo ,  
 æstum extinguit & longe præstantioris effectus est acidis ,  
 quæ calorem quidem reprimunt , sed humores simul inspissant ,  
 quum illud eosdem fluxiles potius servet ac tenues.  
 Egregie quoque acrimoniam sulphuream biliosam obtundunt  
 diluentia & humectantia , potui destinanda , cujus generis  
 sunt prisana ex hordeo , radice scorzonera , rasura cornu cervi ,  
 succo & corticibus citri , ex aqua pura debi-

*Humores  
biliosi  
tempe-  
randi.*

to modo decoctis, item decoctum avenaceum, vulgo **der Haber-Trank**/ serum lactis dulce, aquæ Selteranæ, vel etiam cerevisiæ tenues, bene coctæ ac diureticæ. Et hæc quidem in paroxysmo potissimum ex usu sunt.

*Per poros  
evacuan-  
di.*

### S. III.

Ex præscripto secundæ indicationis id agendum mementi, quo humores tenues, excrementitios, biliosos, præparatos nunc & correctos, laxata post paroxysmum porosa & cribrosa cute, blande educat. Perficitur hoc apprime diaphoreticis lenioribus, cerussa scilicet antimonii, antimonio diaphoretico, cornu cervi usto & philosophice præparato, nec non infuso theiformi, quod scordium, vel carduum benedictum & cortices citri habet, item essentia scordii, vel cardui benedicti, probe quidem saturata, non tamen adeo spirituosâ, cum liquore nostro anodyno minerali permixta.

### S. IV.

*Spasmi in  
paroxy-  
simo miti-  
gandi.*

Tertia indicatio vehementiæ spasmodorum ipso in paroxysmo mitigandæ dicata est. In qua quidem explenda præstans utique iam laudatus usus nitroforum refrigerantium, lenium diaphoreticorum & diluentium blandumque madorem elicientium. Inprimis egregia hoc nomine virtus liquoris nostri anodynii mineralis, vel qui ipsi surrogari potest, spiritus nitri dulcis bene præparati, quippe qui blando suo & naturæ amico anodyno sulphure effrenes fluidi nervei & solidarum nervosarum & musculosarum partium motus compescit, eo felicius, quando is vel cum pulveribus fixis, vel essentiis diaphoreticis maritatur & cum aquis, quæ pariter sedativæ virtutis, florum scilicet sambuci, tiliæ, primulæ veris, liliorum convallium, chamomillæ vulgaris, rosarum, acaciæ, ulmarie, item cerasorum nigrorum, propinatur.

### S. V.



## §. V.

Quumque prima corporis regio fordibus maxime excrementitiis & biliosis scatens mineram & fomitem materiae febrili præbeat, eo, ut quarta præcipit indicatio, quam maxime annitendum, quo confluentes huc ex universo corpore intemperati & vitiosi succi attemperentur & eliminentur. Hinc ubi acidæ cruditates exuberant, sola absorbentia, tam terrea alcalina, quam salina, utramque absolvunt paginam, & inter hæc spectatæ potissimum & securæ virtutis lapides & chelæ cancrorum, nec non testæ ovorum, quæ ut teneriora & facile solubilia, merito antefereunda marinis, rudioribus & ægrius liquescentibus cumque acido in adstrictivam plane facultatem transeuntibus.

## §. VI.

Quando biliosa porro præsto est acredo, nitro, uti minimus, nihil superius, si vero lenti ac tenaces, visceri succi intus consistunt, salium neutrorum laudata virtus, tartari quippe vitriolati, salis digestivi Sylvii, ex capite mortuo spiritus salis ammoniaci, ex æquali parte salis tartari & salis ammoniaci, confecti, salis quoque ipsius ammoniaci depurati. Quæ certe, maxime in robustioribus & victui crasso, duro, marino assuetis. Suecis, Batavis, Westphalis, quibus ut plurimum diuturnæ esse solent febres, commendari merentur, opus autem est, ut cum sufficienti aqueo vehiculo diluta exhibeantur. Hæc quippe, si repetita, vel majori dosi præbentur, præter effectum incidentem, alvum quoque movent & sordes efficaciter evehunt, eoque nomine nostro jam tempore haud mediocrem salubritatis laudem adepta salia, ex aquis medicatis parata, Sedlicense scilicet, Egranum, & ad horum imitationem confectum sic dictum Ebshamense sal, quæ ad unciam dimidiam & plus in aquæ mensura liquata, viscidas & excrementitias primarum viarum sordes detergendo & exturbando, spectati ad-

*Sordes primæ regionis acidæ ob-*  
*tundenda*

*Biliosa & viscida corrigenda.*

*Et evacuanda per inferiora.*

versus intermittentes & qui ex ventriculo oriuntur morbos sunt usus. Idem præstat detecta a nobis aqua Sedlicensis amara, ad mensuram dimidiam, diebus intercalaribus ter vel quater hausta, ut vel hac sola tertianas sæpe curatas viderim. Quandoque tamen tenerior ventriculi constitutio & spasmodorum in ipso cum acidis ponticis succis frequentia, uti solenne in infantibus, senibus & passione hypochondriaca & cardialgica affectis, salium, præsertim copiose datorum, usum interdicit, eaque propter, mannâ tantum ad unam vel duas uncias, cum, vel etiam sine rhabarbaro, adjecta una vel dimidia terræ foliatæ drachma & aliquot olei de cedro guttis, potius offerre expedit.

## §. VII.

*Superiora*

Vbi demum ipsum duodenum copioso, bilioso & vitioso humore oppletum, vel plane biliarii ductus lentis & pravis succis fæcti, ut per superiora emeticorum ope evacuatio instituitur, e re est. Hunc in finem tenerioribus exhibenda radix ipecuanha nodosa, robustioribus autem hæc tartaro emetico ad granum unum vel duo admixto, ipse quoque tartarus emeticus solus, vel, qui melius adhuc, julepus noster emeticus, ex aqua corticum citri spirituosâ, *vel utraq;* julepo rosarum & tartaro emetico soluto confectus. Quod si vero non tantum superiora, verum etiam inferiora intestina a recrementis liberare, in ingluvie maxime deditis, necessarium, utrumque commode obtineri potest infuso mannato, quod unciam unam vel unam cum dimidia mannæ, terræ foliatæ tartari drachinam & tartari emetici unum vel duo grana, habet.

## §. IIX.

*Debiles**partes roborandæ.*

Correctis sic & evacuatis noxiis per varia excernicula humoribus ad quintæ indicationis normam eo dirigenda medicatio, quo universum solidarum partium, maximeque ventriculi & intestinorum systema, ob diuturnos spasmos

smos & paroxysmos a robore dejectum firmetur iterum. Versatur in hoc rite perficiendo præcipuum curationis intermittentium momentum, ita prorsus, ut usurpatis quantumvis diu alterantibus, aperientibus, amaris & evacuantibus, paroxysmus tamen nihilo secius persistat, accommodis contra roborantibus debito modo usurpatis, remittat ac cesset. Scilicet reddito nervosis, vasculosis & musculosis partibus robore, non tam pronæ ac promptæ sunt ad concipiendas humorum stagnationes, spasmodum insulantium causas, sed liberior potius sanguinis omnisque generis succorum fit circuitus, pulsus auctior & respiratio cum secretionibus & excretionibus vegetior, ut non modo paroxysmi sistantur, sed & nova febrilis spasmi minera dispellatur, quæ alias, languente vacuo die perspiratione pulsusque tardo, succrescit.

## §. IX.

Ex omnibus vero, quæ huc usque innotuerunt speci-<sup>Optima</sup>ficis antifebrilibus, adstrictiva viagentibus, corticibus nem-<sup>per corti-</sup>pe & radicibus adstringentibus, nec non ex marte vel a-<sup>cem chi-</sup>lumine confectis, quin etiam paullo calidioribus, nullum<sup>na.</sup> quod magis accommodatum, temperatum, omnibus ætatibus, temperamentis & sexui idoneum ac vel mille auspiciatis experimentis comprobatum, quin tota, ut ajunt, substantia medicatum pluribusque indicationibus satisfaciens, quam cortex ille Peruvianus, China Chinæ nomine notus, quippe qui, si convenienti tempore, modo ac regimine usurpatur, ut excretiones naturales non sufflammet, sed potius promoveat, propter terreum lene adstringens elementum & balsamicam amaritiam, omnibus aliis palmam præripit, & aliquot dosibus tantum vel ad miraculum, febriles compescit paroxysmos. Longe tamen efficacior est in pulvere & substantia, quam in decocto, infuso, essentia, aut extracto, ipsoque sic ceteris paribus tempore vacuo  
exhi-



exhibito, pulsus fit vividior, calor cum perspiratione auctior, alvus, præsertim in cholericis, fluidior, manifesto faustæ operationis indicio. Mihi quidem in frequenti usu electuarius, cujus ope innumeros febrientes persanavi, hac ratione concinnatum: Recipe rob sambuci unciam unam, corticis chinæ drachmas quinque, pulveris florum chamomillæ vulgaris drachmas duas, extracti centaurii minoris, pulveris caryophyllorum ana drachmam semis, sirupi acetositis citri unciam unam semis. M. f. electuarius. D. Admiscere etiam quandoque ad facilitandum perspirationis successum soleo antimonii diaphoretici, theriacæ veteris, vel etiam salis ammoniaci drachmam dimidiam, & finito paroxysmo, singulis binis horis, ejusmodi electuarius ad drachmæ dimidiæ pondus exhibere. Iis autem, qui tenerioris naturæ & stomachi, cortex in formam liquidam redactus, propinandus, hunc in modum: Recipe corticis chinæ unciam unam, corticis chaccarillæ, cinnamomi acuti, salis tartari singulorum drachmam unam, aquæ florum chamomillæ vulgaris libram unam, vini tantundem; digerantur leni calore, colat. adde sirupi corticum aurantium unciam semis. M. D. S. Potio antifebrilis, binis quibusvis horis ad unciam unam sumenda.

## §. X.

*Recidivæ  
præca-  
venda.*

Ad præsciendendas, quod sextæ indicationis scopus, admodum frequentes intermittentium & maxime quidem tertianæ recidivas, certior vix datur ratio, quam qua omnia quæ ad generationem febris faciunt evitantur ac monita superius in præservatione inculcata curate observantur. Et quum exhausto per febrem corpore, appetitus hac discedente impensior esse soleat, ventriculus autem & natura adhuc imbecillior, sæpius certe evenit, ut novus cruditas primis in viis fiat proventus & febrî vel lentæ, vel superaræ recidivæ ortum præbeat. Hinc consultum omnino ducimus,

cinus, ut qui mox a febre convaluerunt, levio-  
rem coenam & facilis digestionis cibos assumant, ac præterea ad fulcien-  
dum ventriculi robur, ducendas prima ex regione sordes, nec  
non detergendas, si quæ supersunt, morbi reliquias, effica-  
cibus utantur præsidiiis. Nos quæ hunc in finem commen-  
demus habemus potissimum moderatum, sed eo crebriorem  
usum pilularum nostrarum balsamicarum confortantium, de-  
glutiendo alternis singulis diebus mane, vel vesperi, novem,  
vel undecim earundem. Totum quippe corpus inde robur  
nanciscitur, flatus summa cum euphoria discutiuntur & alvus  
clementer movetur, aucta subinde sub pulsu vegetiori ipsa  
perspiratione. Deinde egregii etiam usus elixirium stoma-  
chum roborans, sumendum ante prandium XXX. vel XL. gut-  
tis, eamque in rem elixir nostrum balsamicum, in notis ad  
Poterium descriptum, elixir stomachale Michaëlis, in adjun-  
cto clavi Schroëderianæ thesauro pharmaceutico invenien-  
dum, vel nostra methodo præparata essentia stomachica, aut  
etiam essentia gentianæ rubræ, salî volatili oleoso nupta, ap-  
prime proficiunt.

*METHODVS MEDENDI SPECIALIS.*

§. I.

Quando saburra vitiosorum humorum in stomacho ac  
duodeno efficacem postulat depletionem, quod ex prægres-  
sa ingluvie, præcordiorum anxietate, nausea, ructibus & oris  
amaritie conjiciendum, mox in principio, finito primo vel  
secundo paroxysmo, die vacuo offerendum emeticum, qua-  
le supra commendavimus. Vel, si firmior ventriculus & non  
modo per superius, sed & inferius os vitiosa sentina extur-  
banda, talem etiam præscripsimus formulam: Recipe salis  
Sedlicensis, vel Ebshamensis unciam dimidiam, tartari eme-  
tici grana duo, vel tria. M. F. pulvis, dissolvendus in libra  
una aquæ puræ tepidæ & duabus a finito paroxysmo horis  
sumendus, facilitando postea evacuationem successivo lar-  
giori potu jusculi avenacei tenuioris, pinguedine liberalius  
(IV.) D imbuti.

num ele-  
ctuario.

imbuti. Recuperatis autem post evacuationem quodammo-  
do viribus, sine mora electuarii superius descripti  
anifebrilis aliquot doses sumendas suasi, quo sapissime fa-  
ctum est, ut in prima quasi herba iugulata febris cesserit, &  
subjuncto exquisito in regimine & victu moderamine, nun-  
quam repetierit.

## §. II.

Per salina

rum chin-  
china.

Contra ea, si quæ fuerunt, quæ excretionem anoteri-  
cam interdixerunt, multi tamen serosi & crudi succi intus de-  
situerunt ac sufficientem evacuationem exegerunt, salibus  
deterfivis alvum aperientibus medicationem sum aggressus  
hunc conficiendo pulverem: Recipe salis Sedlicensis unciam  
dimidiam, salis ammoniaci, vel digestivi Sylvii, lapidum  
cancrorum ana drachmas duas, nitri purificati drachmam u-  
nam. M. F. pulvis, de quo binis quibusvis horis drachma  
una in unciiis aliquot aquæ puræ, vel chamomillæ vulgaris,  
aut ptisanæ, ingerenda, superbibendo semper vasculum in-  
fusi theæ. Quo postquam aliquoties diebus inter, ectis egre-  
gie, blande tamen & per epicrasin, alvus totusque intesti-  
norum canalis expurgatus, febris tamen nec depulsa, nec  
quoad vehementiam imminuta, vel corticem chinæ salibus  
æquali pondere admiscui, vel solum electuarius nostrum in-  
terponere jussi, & sic etiam brevi tempore tertianas expu-  
gnavi, epidemice etiam grassantes & autumnales.

## §. III.

per clyste-  
res & le-  
nissima.

Quod si vero æger affectioni hypochondriacæ obnoxius,  
inflati stomachi, alvi obstructioris, exquisitoris sensus, im-  
patiens & ad animi motus proclivis, nec emeticis, nec pur-  
gantibus salibus, præsertim liberaliori manu; utendum est,  
sed commodissimam tum locant operam clysteres, ex tempe-  
ratis carminativis & emollientibus conflati, item pilulæ no-  
stræ balsamicæ, retractorii dosi, ad nuvem vel undecim,  
tempore intermissionis deglutitæ, præmittendo aliquot horis,  
vel postponendo pulveris digestivi, ex cancrorum lapidibus,  
terra foliata tartari, tartaro vitriolato & nitro depurato, usum

## §. IV.



## §. IV.

Quid fa-

In accessione febris ipsoque paroxysmo, & maxime <sup>ciendum</sup> quidem rigore, nihil plane a Medico tentandum. Abstinen-<sup>in?</sup> dum tum etiam a potione, præsertim frigida, licet sitis ipso sub frigore præsto sit. Incremente vero sensum æstu eoque ad vigorem deducto, potum utique, & quidem sufficientem, præbere decet, non tamen magnis haustibus, sed crebrius interpolatis, studendo simul, ut palato non sit ingratus. Propinanda hinc quæ supra commendavimus decocta & infusa, & quæ maxime accommodata ptisana, seu decoctum hordei, cum scorzonera, adjecto limonum, vel rubi idæi sirupo, nec non spiritu nitri dulci & oleo de cedro. Ad æstum quoque & sitim extinguendam ex usu est pulvis temperans, ex duabus lapidum cancrorum & una nitri parte, repetito cum ptisana exhibitus.

## §. V.

Erumpens remittente æstu & soluto paroxysmo mador, & extra vel etiam sudor, tam levis & hypocausti temperie, quam in-<sup>paroxy-</sup> ternis quoque adminiculis blande proritandus, eumque in <sup>finem?</sup> finem, præter jam memorata, egregii usus infusum theiforme ex herba scorzonera, herba scordii & corticibus citri. Postquam vero febris penitus deferbuit, corpus ab omni tam interna, quam externa refrigeratione defendendum, & curandum potius, ut in jugi servetur perspiratione, quod impetratur accommodata exercitatione & crebriori potuum calidorum usu.

CAUTELAE ET OBSERVATIONES  
CLINICAE.

## §. I.

In perita medicamentorum adversus tertianam, sim-<sup>Initii &</sup> plex sit, sive duplex, aut continua, administratione, ante omnia <sup>finis paro-</sup> observandum a Medico, initium paroxysmi ejusque finis, judi-<sup>xyfmi ra-</sup> cando illud ex refrigeratione partium extremarum, pandicu-<sup>tio ha-</sup> latione, oscitatione, horrore & pulsu in celeriore & con-<sup>benda.</sup>

tractum mutato, & solutionem ex pulsu molliori, remissione æstus, madore, vel sudore. Etenim nunquam in accessione, vel mox ante ipsam, sanguinem mittere, vomitorium, purgans, corticem chinæ, aut aliud roborans & adstringens exhibere licet; defervente vero impetu, sudor, ubi expedit, commode promovendus, & tempore demum a febre profusus vacuo, diaphoretica, evacuantia, vel etiam pro renata specifica præbere optimum & accommodatissimum.

## §. II.

Quid si ut  
continua sæpe  
accedit?

Quum tertiana in principio, præsertim in calidioribus, it, antifebrilis illa potio, quam primus *Crollius* & ex hoc *Riverius* commendat, ex aqua scilicet destillata, ut cardui benedicti, sale absynthii & spiritu vitrioli confecta, bis vel ter quotidie data, egregium affert levamen, eo certius, quando pilularum nostrarum balsamicarum usus interponitur. Monendum tamen, hanc servandam esse enchiresin, ut spiritus vitrioli non immediate cum sale absynthii commisceatur, sed miscela in aqua adornetur. Ego quoque sali absynthii oleum tartari per deliquium surrogare soleo, vidento, ut connubio punctum saturationis exacte tangam. Et talis potio similem, immo superiorem aquis mineralibus, acidulis dictis, aperientem virtutem possidet.

## §. III.

contu-  
max & in  
quotidia-  
nam  
transit?

Si contumax est, ut autumno, vel in quotidianam transit, it, antifebrilis illa potio, quam primus *Crollius* & ex hoc *Riverius* commendat, ex aqua scilicet destillata, ut cardui benedicti, sale absynthii & spiritu vitrioli confecta, bis vel ter quotidie data, egregium affert levamen, eo certius, quando pilularum nostrarum balsamicarum usus interponitur. Monendum tamen, hanc servandam esse enchiresin, ut spiritus vitrioli non immediate cum sale absynthii commisceatur, sed miscela in aqua adornetur. Ego quoque sali absynthii oleum tartari per deliquium surrogare soleo, vidento, ut connubio punctum saturationis exacte tangam. Et talis potio similem, immo superiorem aquis mineralibus, acidulis dictis, aperientem virtutem possidet.

## §. IV.

vel nimis  
biliosa a-  
gendum.

Eadem potio in tertiana nimis biliosa, vel in cholericis ex iracundia enata, admodum proficua vitanda vicissim amara, sudorifera, alexipharmaca, acriora, aromatica, multo magis salia volatilia, & usurpanda potius temperatissima salina, nitrosa & præcipitantia.

## §. V.

Chinæ cortex optimum certe antifebrile, ejusque virtutem etiam in grassantibus epidemice febribus præstabilem deprehendi atque securam; semper tamen securior in sensibiliore, calidioris & vegetioris naturæ subjectis, nec non ubi urina sedimentum ponit ac per cutis poros excretio succedit, quam in segnioribus, melancholicis, phlegmaticis, vel mensium suppressione laborantibus, ac ubi excretionum defectus & urina cruda. Hinc recte ipso assumpto, motus corporis, quantum fieri potest, imperandus & potus non frigidus, sed calefactus exhibendus.

## §. VI.

Quandoque antecorrectionem & sufficientem materiæ morbiferæ evacuationem, paroxysmos per specifica & corticem chinæ compescere oportet; ut postea longe meliori effectu mineræ febris & corrigendæ & eliminandæ congruis præfidiis aliquamdiu insisti possit.

## §. VII.

Quando æstus & pathemata gravius urgent viresque exhauriunt, corticem chinæ, nitro nuptum, in forma electuarii, intermissionis tempore, cum bonis ægrorum rebus datum fuisse, multis confirmatum habeo exemplis, ita prorsus, ut mox symptomatum mitigatio & virium incrementum successerint. Tenendum tamen, hoc facto, materiæ febrili & temperandæ & expurgandæ, medicationem adhuc esse accommodandum.

## §. IIX.

Purgantia acriora, uti, ob spasmodum quod ciet incrementum, nunquam in tertiana propinanda; ita eo minus, quando paroxysmia cortice chinæ, vel aliis remediis cessant, eo quod facile febrem revocant. Sed quando alvus subsistit, clysteribus, vel pilulis nostris balsamicis, interposito salium usu, officii admonenda.

## §. IX.

Emetica, si indicatio adest, statim in principio, quo citius eito data



tius, eo melius, offerenda, nec gratis expectandum, donec materia fuerit concocta, sed proxima via exturbanda, priusquam noxam latius diffundat. Quod si enim febris corpus jam aliquamdiu detinuit, æstus ille solennis nimius ventriculum ad inflammationem concipiendam disponit, ab emetico postea facile procurandam. Interim quando paroxysmus, sæpius, licet mitius, recurrit, & febris vel ex neglecto regimine diætetico, vel perperam instituta medicatione, ad aliquot menses extracta, utilissime sæpius dedi vomitorium. Id duntaxat servandum; minorem tum, ac in principio, sufficere dosin, eademque magnam biliosorum humorum coluviem e duodeno exturbari, tam salubri effectu, ut licet febris non penitus cesset, ex facili tamen postea specificis antifebrilibus, & maxime quidem chinæ cortice, subjuncto debito in vita & victu moderamine, abigi possit ac persanari.

## §. X.

*Venæse-*  
*ctio quan-*  
*do condu-*  
*cat.*

*& noceat*

Sanguinis missio in tertiana summa cum cautione instituenda. Nimirum quando febris primum accedens continuæ speciem refert, ingens æstus cum delirio urget, æstas regnat, æger ætate vigens sanguine abundat, biliosus, ad iram pronus & diætæ vinosæ assuetus, utiliter utique vena pertunditur. Præmittenda tamen primarum viarum repurgatio & eligendum tempus a febre immune. Sorbillandum etiam paucis ante, vel post sectionem horis, infusum theiforme, imprimis ex floribus chamomillæ vulgaris, singularis plane adversus febres virtutis, partim quo sanguis tenuior redditus eo liberius circumferatur, partim quo motus spastici, quibus tota febrium natura continetur, quodammodo placentur. Contra ea quando prima regio cruditatum sentina fordescit, corpus non sanguine abundat, nec reliqua præsto sunt phænomena, sanguinem mittere nocivum, eo quod excretionibus salutare, maxime ea quæ fit per cutis poros, inde sufflamantur, ipsaque febris, experientia teste, obfirmatur magis & chronica fit.

## §. XI.

§. XI.

Ab opiatīs & anodynīs, quorum in numero etiam sunt *Sedativa nocent.* pilulæ Wildegansii & de cynoglossa, in intermittētibz profut abstinere consultum, quippe quæ infido effectu paroxysmum quidem mitigant, vel interdum suspendunt, sed vires simul deiciunt totumque febris decursum cum salutari crisi turbant, ut morbi causa majores acquirat vires & paroxysmus longe gravior postmodum accedat.

§. XII.

Aluminosa, martialia & vitriolacea etiam febrium paroxysmos sistunt, sed si quis forsan inplebejis iis uti velit, *Adstringentia insicura.* opus est, ut post eorum usum sudor decoctio, vel infuso theiformi calide sumto eliciatur, vel corpus motu exerceatur; quo alias nocens facultas earundem quodammodo averti potest. Post præposterum enim tam horum, quam aliorum eminentius adstringentium usum, plura subsequuta fuisse incommoda annotavi, maxime in iis, qui excretionibus sanguineis assueti, ita ut hæ inde penitus fuerint suppressæ.

§. XIII.

Cortex chaccarillæ accommodatissimum etiam in intermittētibz est remedium, ob principium quo instructus est *Chaccarilla quibus conducit.* balsamicum & sulphureum anodynum terreumque adstringens. Sed quia sanguinem exastuare & calorem accendere solet, in biliosis & ad motuum impetus pronis subjectis minus, & nonnisi in refracta dosi, ex usu est, in segnioribus vero, in phlegmaticis & mulieribus magis, & tunc commodissime cum cortice chinæ miscetur.

§. XIV.

Absorbentium spectatus quidem in febribz effectus, *Absorbentia cum delectu & moderate usurpanda.* nihilominus tam moderate, quam cum delectu, sunt usurpanda. Copiosius quippe ingesta, solventibus in ventriculo succis minus obediunt, sed integra relicta, eundem one-  
scant, quin in lentam plane pastam coëundo, anxietates & nau-  
eam cient. Rudiora vero illa, ex marinis maxime deprom-

ta, ægrius non modo liquantur, sed & adstrictivam plane postea sortiuntur virtutem.

## §. XV.

Topica in  
cephalal-  
gia obsunt

Sæpius evenit, ut in paroxysmo, præsertim accedente, a sanguine ad caput, potissimum in plethoricis, congesto, exquisita oriatur cephalalgia, cum sensuum & phantasiæ turbatione, cui non promiscue topicis occurrendum. Vidi enim epithemata illa domestica, ex absynthio, ruta, cumino, baccis juniperi, sale communi & pane trito, ob vaporem, quo caput replent, plus nocuisse, quam profuisse. Multo minus vero cephalica & nervina, ut balsamum nostrum vitæ, quod alias in doloribus capitis egregii usus, porrigenda sunt.

## §. XVI.

Potus calidus circumspiciendus.

In paroxysmo potus calidus, ut herbæ theæ, fabarum coffeæ, non confert, quia humores acres, biliosos, plus justo in sanguinem agit & æstum, nec non anxietates, mirifice auget; sed potius concedenda potio temperate calida, aut tepida. Recte enim *Hippocrates lib. III. de morb.* præcipit: tertianis potus calidus non confert, sed frigidus. Extra paroxysmum autem calidæ ejusmodi potiones commode inveniunt locum, præsertim quando excretio alvina libera est.

## §. XVII.

Depulsa febre quid faciendum.

Quando febris per specifica depulsa, non omittenda penitus sunt sanitatis præsidia, sed vitanda sedulo corporis refrigeratio, in appetitu moderamen servandum & aliquandiu tam pilularum balsamicarum, quam elixirii stomachici usui insistendum, uti jam superius in sexta pluribus monuimus indicatione.

## §. XVIII.

Oedematosa si succedunt.

Quod si vero contigerit, ut ob ingestum largius frigidum potum, vel data præpostere adstringentia, tumores succedant oedematosi, neutiquam in usum vocanda acriora purgantia, martialia, aut salia volatilia, sed omnis medicatio salibus abstersivis, pilulis balsamicis & temperato lignorum deco-



decocto conficienda. Vbi etiam anasarca corpus obsidet, <sup>vel anasarca</sup> emeticum cum extracto panchymagogo Crollii, vel hellebori nigri, oblatum, miram aquarum copiam evehendo, insigniter juvat.

§. XIX.

Senes plethoricos & venæ sectioni assuetos, a refrigeratione in atrocem colicum dolorem, subsequente tertiana continua epidemice grassante, incidisse, crebrius observavi, qui <sup>Quomodo tractandi</sup> senesbus sanguinis missio admodum fuit proficua, chinæ cortex autem, mature nimis datus, perniciosus, ita prorsus, ut quotidiana hæctica similis funesta inde fuerit enata.

§. XX.

Pueris octavum vel decimum ætatis annum agentibus, febre tertiana correptis, exoptato cum successu dedi potiunculam emeticam, & post hanc clysteres ex antifebrilibus, centauro minori & cortice chinæ, applicare jussi, febre ex toto quiescente, nec unquam repete.

§. XXI.

Feminæ ex mensium suppressione cachecticæ febrientes, <sup>femina</sup> magna circumspectione tractandæ, rejectis penitus omni <sup>cachecticæ</sup> bus validioribus, evacuantibus, æque ac roborantibus, emmenagogis quoque; quæ quidem temperata, sed febre nonnisi discedente, locum inveniunt. Clysteres vero ex leniter laxantibus, amaris & carminativis, nec non infusa blande alvum subducentia, quæ simul amara, corticem chinæ & limaturam martis habent, opem ferunt præstabilem.

§. XXII.

Puerperæ intermittentibus affectæ febribus, gravissime <sup>Puerpera</sup> inde luunt & sæva pathemata hysterica incurrunt, nisi lochiorum curate habeatur ratio, tanto magis quando hæc cum febre per absorbentia marina, vel præcipitantia rudioris texturæ, conchas, corallia, cum, vel sine acido, nimis cito supprimuntur. Tum potius insigni virtute splendent, pilulæ nostræ balsamicæ tonicæ, quæ morbis ex uteri vitio apprime medentur.

## ENARRATIONES MORBORVM.

## OBSERVATIO. I.

*Tertiana  
in bilioso  
perperam  
salibus  
excepta.*

Incidit vir quinquaginta annorum, cholericus & in iram admodum proclivis, æstivo tempore in tertianam, quæ per aliquot hebdomadam decursum perstitit, ægerque variis interea animi pathematibus, angore, cura, sollicitudine, quin ira affectus, in paroxysmis subinde conatus ad vomendum persensit. Vocatus in consilium Medicus, non alia exhibuit medicamenta, quam salia, arcanum quippe duplicatum, sal ammoniacum, sal tartari, nitrum & id genus plura, & hæc quidem liberali admodum manu & repetitis dosibus. Sed tantum absuit, ut his, quantumvis diu usurpatis, febris fracta fuerit vehementia, ut potius symptomata magis increverint, angustia præcordiorum cardialgica intensiores, facies admodum contracta, pallida & livida, extremorum etiam die vacuo refrigeratio, cum perpetuo ad tussim siccam stimulo, vomendi conatu, quin singultu, accesserint, & simulac quicquam, esculenta fuerint, sive potulenta, in ventriculum delatum, illico pejus habuerit æger. Nostræ hinc commissus medicationi, omnia salina seposuit, a vino quoque, licet ejus potui antea assuetus; abstinuit & crebrius jacula hausit ex pullo gallinaceo, cremore hordei & vitello ovorum, nec non decoctum florum chamomillæ vulgaris. Exterius ante paroxysmum epigastrii regioni imposita est vesica speciebus emollientibus repleta, & alvo injectus clyster ex lacte & manna, adjecto stimuli loco nitro & sale. Mitigatis autem hinc symptomatibus, electuarium ex cortice chinæ, julepo rosarum, theriaca & nitro, intercalari die aliquoties modica dosi dedimus, tam salubri effectû, ut febris penitus discederet nec unquam rediret.

*Epicrisis.*

Notatu utique dignum est, salium, præstantis alias in intermittentibus virtutis, usum, tam male hoc in ægro cessisse, & inflammatoriam quasi in ventriculo adduxisse erosionem, ut hinc omnia illa quæ affligerunt insolita pathemata pullularint

larint. Ratio tamen peculiaris hujus effectus in proclivi. Scilicet cholericæ constitutionis erat corpus, æger ad iram pronus & sub ipsa febre animi affectibus agitabatur. Jam vero nihil tam promte & celeriter ventriculorum cum tenuibus intestinis spasmo afficit, dispositionem ad inflammationem ibi ingignit & bilem acrem ipsiusque effusionem causatur, quam ira, in subjecto præsertim plethorico. Dein notum etiam est, salia, cujuscunque fuerint generis, nervosas ventriculi & intestinorum tunicas mirum in modum irritare magisque ad spasmos sollicitare. Atque adeo, his tam exquisitis sentientibus & spastica jam strictione affectis partibus, non potuerunt non malum augere & sinisterum plane effectum edere hæc salina remedia, tanto magis copiose & iterato oblata. Contra ea optimum certe fuit consilium, afflictas has partes mulcere temperantibus, spasmos complacare & febiles demum motus, diu jam corpori inhærentes, sistere atque compescere.

## OBSERVATIO. II.

Vir quidam generosus, ruri degens, vegetus natura, robustus, sanguine succique plenus, sexaginta & sex annos habens, postquam nocturno aëri sese incautius commisisset & sudorem improvida refrigeratione repulisset, tertiana corripiebatur exquisita. Vocabar accedente tertio paroxysmo ego, ægrumque frigore deprehendebam omni fere sensu privatum, delirantem, tremantibus ob anxietatem summam manibus pedibusque, cum corporis irrequieta jectigatione; facie inflata & bruni coloris, ac pulsu contracto, duro ac celeri. Metuebam hinc gravem capitis morbum & ex adstantibus quærebam: annon vena fuerit secta? sed regerebant: ob impensam naturalem quandam aversionem, nunquam ægrotum ut sanguinem mitteret induci potuisse, neque ipsum, quantumvis plethoricum, unquam spontaneum sanguinis exnarium, vel ani venis expertum esse fluxum. Ter interea tam graviter febricitans pituitam maxime lentam, instar gelatinæ

*Febris in  
plethorico  
gravibus  
symptomatibus  
stipata  
sine V. S.  
sanata.*



tinæ, saturato bilis colore tinctam, alvo dejiciebat, & postquam frigus per tres horas durasset, succedebat æstus sex horarum, remittentibusque sensim pathematibus, erumpebat demum mador, ægro intercalari die bene se habente. Sitis autem sub frigore & horrore erat impensior, quam sub calore, & urina in paroxysmo rufa sine sedimento secedebat, quod tamen intermissionis die deponebat. Quum igitur æger omnem penitus sanguinis missionem respueret, ut exæstuationem & congectionem sanguinis ad caput omni modo præscinderem, operam dedi, eaque propter loco cerevisiæ, quæ crassior erat & lupulata nimis, ptisanam potui præbendam suasi, & in paroxysmo potionem temperantem, ex aquæ florum acaciæ, sambuci, tiliæ, cardui benedicti ana unciis quatuor, pulveris nostri polychresti, bezoardici dicti drachmis duabus, temperantis nitrosi drachma, succi citri cochlearibus binis & sacchari uncia dimidia, cujus etiam per intervalla crebrius aliquot pro dosi cepit cochlearia. Declinante impetu, ad madorem eliciendum, infusum ex scordio & corticibus citri sorbillavit, & extra paroxysmum pulverem ex lapidibus cancrorum, terra foliata tartari & nitro, cum sufficiente quantitate ptisanæ, subinde assumsit. His aliquandiu ulurpatis, symptomata post nonum paroxysmum multum mitescebant & urina multum crassæ dimittebat materiæ. Quare quum ægrum duabus mannæ unciis & salis polychresti drachmæ dimidio, in jure carnis dissolutis, purgassem prius, ad sistendum paroxysmum electuarium antifebrile, consueta methodo & idoneo regimine exhibui. Quo, semel adhuc admodum leni insultu subsequente, febris penitus demum corpus deseruit, usurpatis postea aliquoties alternis diebus pilulis nostris balsamicis, cum pulvere salino aperitivo. Et ita perfecte cum sanitate sine recidiva in gratiam rediit æger, & in hunc usque diem ad septuagesimum septimum annum sanus pervixit.

*Epicrises.*

I. Sub gravibus & insolitis capitis in hoc agro pathematibus, ab affecto graviter præter naturam nervorum systemate oriundis, singulari omnino naturæ beneficio evenit, ut minimum bis, vel ter, lentos biliosos succos copiose excerneret, & credibile merito, alvo simul adstricta, ancipitem subsequutum fuisse capitis morbum.

II. Si febrientes plethorici, nec tamen venæsectionem admittunt, optimum consilium, æstum temperantibus leniterque alvum subducentibus uti.

III. In corpore plethorico, denegata sanguinis missio ne & urina cruda prodeunte, febris nunquam cito per specifica iugulanda, sed tutius est decem minimum opperiri paroxysmos, qui quasi remedium adversus succorum abundantiam, donec sponte mitescant symptomata & urina coctam ingatur, ac tum demum, præmissis adhuc alvum moventibus, ad febrem transire depulsandam.

OBSERVATIO. III.

Quadragenarius quidam, sanguineo-melancholicus, a *Terriana simplex præpostera medicatione in duplicem conversus.* longo jam tempore inordinata usus diætæ, æstate, qua jam tum febres grassabantur, ira gravius incitatus & corpus auræ vespertinæ frigidiori liberius committens, incidit in artuum lassitudinem, cum somno inquieto, dolore dorsi, capitis & hypochondriorum tensione, succedente horrore & post hunc calore. Tertia die idem redit insultus, & licet frigus non adeo esset intensum, æstus tamen & reliqua pathemata longe erant acerbiora, anxietas intensissima & mentis plane quædam alienatio. Secatur a Medico vena, offertur emeticum, unum tantum vomitum ciens, & post quartum paroxysmum, febris cortice chinæ sistitur. Prodit hinc post aliquot dies in publicum æger & in horto fluvio adiacente bene coenatur & potat quidem, sed recidit in febrilem longe vehementiorem paroxysmum, stipatum summa præcordiorum

angustia & æstu, nec non vomitione, ita ut non modo potum, sed & ipsa medicamenta rejiceret. Porriguntur hinc elapsis quatuordecim diebus bis pilulæ ex cortice chinæ & floribus salibus ammoniaci martiatis, tam infelici effectu, ut tertiana simplex in duplicem degeneraret & vires ægri mirifice attereret. Notabatur præterea circa ventriculi regionem tumor, ingesta omnia vomitu reddebantur, anxietas erat vix toleranda, pulsus etiam extra paroxysmi tempus celer, urina non semper eadem, interdum crassa cum sedimento, interdum flava tenuis, nonnunquam plane rufescens, & clystere injecto, alvus copiosa mucida, foetida & biliosa dimittebat.

*Epicrisis cum curatione.*

Est hæc febris tertiana duplex, cum metu inflammationis ventriculi, quam imminentem maximæ anxietates, perpetuæ stomachi subversiones, alvi constipatio, pulsus continuo celer & tumor ventriculi haud dubie præfagiunt. Nec levis notæ error in medicatione commissus fuit, quod non modo emeticum in febre tanto æstu & angore stipata oblatum, sed & ante sufficientem materiæ febrilis correctionem & primarum viarum expurgationem, paroxysmus præmature primum cortice chinæ depulsus, & repetens postea, pilulis ex floribus salis ammoniaci, eminentius adstringente virtute præditis, oppugnatus. Vt igitur inducta hinc noxa præscinderetur ipsaque febris perfanaretur, hoc modo medicationem aggressus sum. Ininfuso theiformi ex scordii manipulo, florum chamomillæ vulgaris, summitatum milletolii ana pugillis quatuor, seminis fœniculi uncia dimidia, exhibui liquorem anodynum cum elixirio stomachali. Deinde ad potum ordinarium commendavi decoctum rasuræ cornu cervi cum radice scorzonæræ, cum quo quandoque propinatus hic pulvis: Recipe pulveris Marchion. drachma, lapidum cancrorum, nitri depurati ana drachma dimidia, pulveris castorei grana X M. F. Pulvis D. S. *Pulver auf etliche mahl.* Postea sal absynthii cum succo citri oblatum. Exterius vero cata-



cataplasma, quod habebat florum sambuci, chamomillæ vulgaris, Romanæ, salviæ, hormini, anethi singulorum pugillos sex, herbæ menthæ crispæ manipulum, nucis moschatæ, caryophyllorum, cardamomi, feminis fœniculi ana unciam semis, redactis omnibus cum fermento panis, spiritu vini & aceto rosaceo in formam cataplasmati, calide regioni ventriculi appositi. Quo per universum corpus sudor obortus & anxietas cum vomitu cessavit, ac mitiori quoque sensim facto febris impetu, tandem electuario ex cortice chinæ, floribus chamomillæ & sirupo acetositis citri, morbus feliciter persanatus.

#### OBSERVATIO. IV.

Senex generosus, septuagesimum & quartum ætatis an- *Tertiana*  
num agens, sanus alias adhuc & vegetus, intermiserat con- *continua*  
suetam vere sanguinis missionem, & post impensam totius *in sen*  
corporis refrigerationem, atroci primum abdominis dolore *funesta.*  
inestabatur, cum extremorum frigore & tremore, ad viginti fere horas persistente. Succedebat postea æstus, cum sensuum perturbatione, pulsu vehementi, delirio viriumque prostratione. Tandem quidem superveniente leni madore, hæc inducias dabant, sed elapsis aliquot horis levis denuo eveniebat partium extremarum refrigeratio, iisdem quam antea symptomatibus stipata, ut non amplius obscurum esset, laborare ægrum febre, tum temporis epidemica, tertiana continua. Accitus hinc Medicus, cui solennis, statim etiam in principio intermittentium, electuarii, cujus basis cortex chinæ, usus, & idem hoc suum remedium suadet, sed absumpta licet successive dimidia hujus libra, plus tamen increvere, quam remittere symptomata, subsequuta enormis virium prostratio, continens capitis dolor, sitis, summa præcordiorum anxietas somnique defectus, pulsu semper magno, pleno, citato, interdum plane intermittente. Nono morbi die advocabar ego, ægrumque offendebar imbecillimum, graviter de sinistro electuarii, biduo jam omisi, effectum conquerentem, ideoque  
san-

sanguinis missionem, quæ in principio, meo & aliorum Medicorum iudicio, summopere fuisset necessaria, instituire nolui, & nil nisi analeptica & temperantia, cum leniter diaphoreticis suasi. Aderat quidem quotidie symptomatum ad sex vel septem horas remissio, sed totalis virium prostratio pessima ominabatur, ideoque capitalem fore morbum prædixi, ægro etiam elapsis aliquot diebus, ipso sub paroxysmo, ob-eunte.

*Epirisis.*

Quamvis specifica antifebrilia, quorum potissimum cortex chinæ, nec non reliqua quæ mera adstrictione agunt, martialia scilicet, cortex fraxini & Hartmanno familiaria aluminosa, in moderandis, vel plane sedandis febrilibus motibus, non contemnenda prudenter usurpata polleant efficacia; nihilominus tamen ego nunquam non gravissimam inde notavi noxam, in corporibus plethoricis, spasticis obnoxiiis vehementioribus stricturis, hypochondriacis & hysteriis, & ubi nondum humorum acrimonia emendata, nec æstus mitigatus. Tanto vero magis cum cautione danda sunt senibus, quanto major in his ut plurimum humorum spissitudo & crassities, alvi obstipatio, immo haud raro sanguinis redundantia.

OBSERVATIO. V.

*Tertiana  
cito & tu-  
to sanata.*

Añus currebat MDCCXIX, quum Charlotteburgi, (quod amœnum prope Berolinum secessui regio dicatū oppidū, sed ob paladium & stagnorum circumiacentium copiam, febrium, quotannis ibi grassantium proventus, infestum,) plures ex aulicorum ministrorum numero, propter ciborum ingluviem, vespertinum improvide admissum frigus & aërem noxiis effluviis refectum, tertianæ implicarentur, consuetis symptomatibus stipatæ. Ex his plures qui mea utebantur medicatione hac ratione ad sanitatem reduxi. Superato scilicet tertio paroxysmo, intermittente die potionem emetico-laxantem

por-

porrexi, ex manna & tartaro emetico, in aqua veronicae, vel florum acaciae solutis, qua ingens vitiosorum humorum colluvies per inferiora & superiora exturbata. Hoc facto, tribus, vel quatuor, ante subsequens paroxysmi accessiorem, horis, ad lenem provocandum sudorem, exhibui potionem ex tribus aquae cardui benedicti uncis & dimidia uncia aquae theriacalis, cum drachma salis tartari & triginta spiritus vitrioli guttis. Tum extra paroxysmum cort. chinae & flores chamomillae vulgaris, vel in forma electuarii, vel potionis, binis quibusvis horis, praebui, quibus per aliquot dies usurpato, febris discessit, adjuncta postmodum, ad arcendam novae materiae febrilis generationem, parciori victus ratione, cum elixirii nostri stomachici usu.

#### *Epicrisis.*

Multiplici edoctus sum experientia, specifica intermittentium praesidia, horumque princeps, corticem Peruvianum, felici cum successu dari, vel statim in principio febris, per purgatis prius probe primis viis, vel declinante post aliquot paroxysmos jam sua sponte ipsa febre, neque tam facile nocere, ac si natura per decem, vel plures paroxysmos imbecilliori reddita, demum usurpatur. Tum enim magis noxa timenda & majori opus est prudentia, eo quod per crebriores paroxysmos, motu tam intestino, quam tonico auctiori, tota sanguinis & humorum massa in excrementitiasordes fatiscit, quae nisi prius sufficienter expurgatae fuerint, per adstrictivam specificorum facultatem intus retentae, pejoris notae recidivas, vel novos alios morbos, ingignunt.

#### OBSERVATIO. VI.

Ex praecalida, diuturna, insueta plane aeris tempestatum *Tertiana*que constitutione, elapso & qui jam labitur MDCCXXVII. *epidemi-*anno, plures febrium species universam fere Germaniam *ca.* infestarunt & laborantes nimio, fere continuo aestu, virium prostratione, anxietate, capitis dolore & nonnunquam plane delirio, mirifice affligerunt, ita quidem, ut frequentissima

(IV.)

F

ex illis



illis essent tertianæ continuæ, symptomatibus non penitus intermittentib<sup>9</sup>, sed tantum remittentibus, donec lapsu temporis, successive vel in quotidianas, vel tertianas legitimas, vel etiam quartanas, transirent. In harum perfanatione ego quidem felici cum successu hac usus sum methodo. Sub febre, tribus singulis horis, duo circiter cochlearia præbui potionis ex aquæ florum sambuci, tiliæ, ceraforum nigrorum ana uncias duabus, pulveris præcipitantis & bezoardici ana drachma una, succi citri & julepi rosarū ana uncia dimidia. Remissionis tempore oblatum laxans ex mānæ uncia cum dimidia, vel duab<sup>9</sup>, nitri puri & salis polychresti ana granis XV. in jure carnis vel aqua destillata solutis. Fœminis autem spasmodicis affectibus obnoxiiis, clysteres injicere jussi, leniter discutientes & demulcentes. Perpurcata his prima regione, ad electuarii usū accessi, hac tamen cum differentia, ut ad temperandum æstum nitrū adjicerem. Fracta hinc postero mox die febris atrocior, ut per aliquot adhuc dies hujus remedii usui insisterent & alvū clysteribus apertam servarent, febre autem penitus evanescente, exactum in vita & victu tenerent moderamen & subinde pilulas nostras balsamicas confortantes deglutirent, injunxi. Et sic brevi tempore, divino auxilio, ægri convaluerunt, quum alii, iisdē febribus laborantes, adhibitis variis remediis, venæsectione, emeticis, salib<sup>9</sup>, amaris & essentiis alexipharmacis, diu fuerint afflicti, viribus adeo consumptis, ut longo tempore omnique arte easdem vix potuerint recuperare.

*Epicrisis.*

Febres quæ accedentes gravibus stipantur symptomatibus, intenso æstu, siti, virium & appetitus dejectione, nisi sint acutæ, sed notabiles servant remissiones, melius in principio specifica febris præsidia ipsumq; chinæ corticem ferunt, ac illæ ex tertianis & quartanis, quæ lenius invadunt & lentius procedunt. In illis quippe expedit utique effrenes solidorum & fluidorum motus, roborantibus & antispasmodicis moderari, vel plane sedare; in his vero languescente jam

naturæ

naturæ motu & ad removendam in viscerum infarctu & glandularum obstructione repositam morbi causam non sufficiente, idem perficere oppido nocivum. Ego certe multis confirmatum habeo exemplis, longe melius antifebrilia propinari in tertianis legitimis, cholerica & juvenilia corpora graviorum symptomatum insultu infestantibus, quam ubi segniora & phlegmatica constitutionis nothis implicantur. Nec infrequens in illis fuit observatum, post Americani corticis usum, alvum fluxisse, sudorem largius manasse, pulsum intermissionis tempore cum virium incremento increbuisse, quin ipsum salivalem laticem stillasse.

### OBSERVATIO. VII.

Prehendebatur verno tempore tertiana epidemica, <sup>Ex tertiana apostema musculorum abdominis.</sup> vir quidam quadragenarius, laxioris habitus, qui militiæ deditus, tam propter effusum per crebriora vulnera sanguinem, quam abusum vinorum Italicorum, corpus infirmum atque causarium reddiderat. Advocabatur Medicus, febremque ardentem & malignam, propter intensum ardorem & sitim, fore judicans, porrigebat alexipharmacum, ex spiritu cornu cervi & tinctura bezoardica. Sed crescebat inde ardor cum siti & accedebat delirium plane, ut æger nudum etiam corpus in paroxysmo frigido subjiceret aëri, gelidamque largiter ingurgitaret aquam. Concedebat tamen febris in tertianæ intermittentis typum æstusque remittebat, debilitas autem insignis, magna ad sudorem proclivitas & mira paroxysmorum anomalia succedebat. Discedebat tandem penitus febris tertiana, sed sudor cum tussi affligebat perpetua & quotidie febrilis quædam, licet sine horrore & adeo notabili calore, præsto erat commotio, ac præterea infra cordis scrobiculum, in media cartilagine ensiformi, tumor quidam prædurus eminebat. Conflictabatur cum hisce pathematibus per binos fere menses æger, ac interea a multis Medicis exquirebat consilia, quorum quisque de affectu & medicatione peculiarem promebat sententiam, uno febrem esse hecticam, altero tertianam

tianam duplicem, tertio hydropem, quarto glandularum omenti tumorem, affirmante. Errabant autem omnes. Increfcebat enim subinde tumor & exquisitus pungitivus cum ardore dolor jungebatur, & apostema potius intra musculos, non cavum abdominis, latitare conjiciebam. Rejēctis igitur discutientibus externis emplastris, solum diachylon simplex fuit admotum & super hoc positum cataplasma emolliens. Sic elapso triduo, attolli & mollescere cōepit tumor purisque subitus undulatio locum incisionis monstravit, qua quinto die facta, pus foetidissimum, ad tres minimum mensuras, paucō cruore intermixto, effluxit sensim. Inde mitior illico factus calor, somnus quietus redditus, & abscessu injectis balsamicis sensim ad consolidationem perducto, pristinam demum aeger recepit sanitatem.

*Epicrisis.*

Sanguineum corpus apostemati concipiēdo quam maxime est opportunum, ob succos in laxa fibrarum textura ex facili subsistentes. In hoc quidem, potus ille frigidus, sub paroxysmo copiose ingestus, cum improvida abdominis refrigeratione sub fervido calore, sanguinem & succos in musculis abdominis consistere fecerunt. Horum exstasi enatum apostema, factus tumor & materia contenta computruit, quæ sanguini præterlabenti remixta, continuum lentum calorem cum languore induxit, & aperto apostemate, tam foetidum exspiravit odorem.

OBSERVATIO. VIII.

*Tertiana  
cum icte-  
ro & ruffi-  
catata*

Æstate qua varii generis febres circumibant, vir quaro & ruffi dragenarius, post gravem iram, præcordiorum summas anxietates, cum vomendi conatu, incurrebat. Excipiebatur hæc posteris diebus icteritius color, in oculi albo quam maxime conspicuus, nec non ferina tussis, noctu potissimum affligens somnumque inturbans. Nihilominus, postulante sic quo fungebatur munere, iter suscipiebat, sub quo vero ob auram frigidiusculam & delicta quæ committebat diætetica, febrem



brem nanciscebatur tertianam. Stipabatur hæc solitis pathematibus, major tamen in paroxysmo erat anxietas & inquietudo, urina saturate tincta, sine sedimento, æstus productior, per viginti fere horas persistens, & tussis quoque, noctu præsertim & sub frigore, vehementior. Consulebatur Medicus, qui propinabat emeticum, ex tribus tartari emetici granis, quo sexies pituitosus tantum bile leviter remixtus humor ejectus. Hoc facto dabatur electuarium ex radicibus alexipharmacis, pimpinella, gentiana, angelica, addita theriaca veteri & sirupo acetositis citri. Hinc vero mirum exasperabatur febris fereque reddebatur continua, somnus cum appetentia intercidebat & continuus sine frigore persistebat æstus, sub quo Medicus ad sitim extinguendam Martisburgensem suadebat cerevisiam. Advocabar ego & caulam febris cum symptomatibus curatius expendens, rejectis, quæ a Medico præscripta fuerant cunctis, contrariam plane medendi ingrediebar viam. Pro potu quippe suadebam decoctum avenaceum, idque etiam cum seminibus quatuor frigidis & papaveris albi in emulsionis formam redigere, & adjecta convenienti nitri portione, pro lubitu liberaliter ingerere præcipiebam. Pulverem dein absorbentem nitrosum, ex antimonio diaphoretico, lapidibus cancerorum, nitro & tartaro vitriolato, bis velter quotidie, in & extraparoxyssum sumendum, commendabam. Bis etiam quotidie liquor noster anodynus mineralis ad guttas XX. in superiori decocto offerebatur. Redditis per hæc mitioribus cunctis, elapsis quinque diebus, electuarium antifebrile ex rob. sambuci uncis duabus, corticis chinæ drachmis sex, sirupi acetositis citri uncis duabus, ulveris florum chamomillæ drachmis duabus, antimonii diaphoretici, extracti centaurii minoris, nitri, singulorum drachma, quo vis bihorio ad drachmas duas, per quatridduum exhibitum. Quo ex toto cessavit febris, cum omni æstu ac siti, ferina tussis conquievit, urina, secus ac per totum morbi decursum, ex bruno

rubicundo colore flavescentia sedimentum dimisit, appetitus cum viribus rediit & flavus in facie & corporis superficie color successive disparuit. Demum vero, ne ex ciborum ingluvie recidiva gigneretur, crebriorem pilularum balsamicarum & salis digestivi ex arcano duplicato, sale digestivo & sale tartari ulum, cum abstinentia, serio injunxi, & sic æger, vitata simul omni refrigeratione corporis, animique commotione, quæ facile recidivam creare possunt, maxime si negligitur primarum viarum evacuatio, quæ demum septimo a febre die molienda, ad perfectam rediit sanitatem.

### *Epicrisis.*

I. Hoc in ægro omnia primum in motu spastico excessivo fuerunt constituta, acris etiam subtilis materia potius in vitio fuit, quam crassioris & rudioris humoris moles, testantibus id origine febris ab ira, symptomatibus, ut tussi ferina, & icteritia, ex spasmo ductuum biliariorum. Perperam igitur a Medico datum emeticum & electuarium calefaciens, quibus motus spastici cum intestino aucti & pathemata exacerbata. Ex ulu potius fuissent motus complacantia & acrimoniam diluentia ac temperantia, cum iis quæ per cutis poros subtiles sordes eliminant. Quod demum cum successu decocto diluente & humectante, pulveribus absorbentibus nitrosis & temperante diaphoretico electuario, a nobis confectum.

II. Magna omnino est cognatio inter subitaneam ex spasmico icteritiam, tussim ferinam convulsivam & inter motum febrilem intermittentem, qui nostra sententia in spastica quadam universali valorum & nervosarum partium systematis strictura consistit. Hinc etiam factum, ut iisdem remediis, terna hæc mala & symptomata omnia simul & semel funditus fuerint sublata.

*Tertiana  
curata &  
in*

### OBSERVATIO. IX.

Miles quidam robustus, postquam in coena ad satietatem usque ingessisset, & noctu aëre nebuloso excubias egisset,

gisset, præcedente horrore, nausea & conatu ad vomitum *continu-*  
 corripitur, subsequente æstu & anxietate. Redeunt hæc *am con-*  
 pathemata tertio die acerbiora, ideoq; ad Chirurgum prope- *versa uno*  
 rat, quidie vacuo primum dat emeticum, septem ante paro- *remedio*  
 xysmum horis, quo strenue pituitam cum bile evomit. Fe-  
 brili die, tribus ante paroxysmum horis, idem morbi artifex  
 piperis albi grana XV. stercoris muris grana X. & lapidum  
 cancrorum drachmam dimidiam in aliquot cochlearibus spi-  
 ritus vini porrigit, & jubet, ut desuper biberetur cerevisia pro-  
 be calefacta. Miles lecto inclusus sudat inde fortiter,  
 paroxysmus fugatur, & repetito aliquoties hoc remedio, cura  
 feliciter absolvitur. Accidit vero haud ita multo post, ut  
 juvenis cholicus, in iram pronus & liberaliter vini potui in-  
 dulgens, tertianæ implicaretur. In consilium vocatur idem  
 Chirurgus & idem remedium exhibet, sed tam sinistro effe-  
 ctu, ut continua inde fere fieret febris, æstus augetur, æger  
 deliraret & de exquisito ardoris, quasi carbonis igniti, sensu,  
 in scrobiculo cordis, conquereretur. Parata igitur emulsio  
 ex aqua florum sambuci, tiliæ, papaveris rhœados, seminibus  
 quatuor frigidis & papaveris albi, quæ tam sola, quam cum  
 pulveribus absorbentibus & diaphoreticis, nitrosis, sumta, ac  
 demum adjunctus usus electuarii jam descripti, quem excepit  
 liberalis alvi fluxus, tam salubri eventu, ut febris discede-  
 ret, symptomata quiescerent & æger sanitatem reciperet.

*Epicrisis.*

Luculentum hoc exemplum, non omnia omnibus prod-  
 esse. Nam si tertiana in corpus robustum, minus agile ac  
 sensibile incidit, idque ob saburram in ventriculo & transpi-  
 rationem impeditam; emetica quidem, & postea calidiora an-  
 te paroxysmum, eximie sunt utilitatis. Sed ubi corpus ædum  
 & motus magis, quam qualitas & quantitas humorum, pec-  
 cat, contraria plane medendi methodus & sedantia adhiben-  
 da medicamenta. Et in ejusmodi quidem cholicæ indolis  
 ad iram pronis subjectis, singularis plane est ex chinchina  
 para-



paratorum effectus, eo quod summa cum euphoria crebras & biliosas alvi dejectiones proritare solent.

## OBSERVATIO. X.

*Ex terti-  
ana ven-  
triculi in-  
flatio.*

Sexagenarius robustus & plenus, sanguineo-phlegmaticus, calculi renalis doloribus ab aliquot annis subinde obnoxius, flatibus præterea & ructibus divexatus, nanciscebatur anno abhinc tertianam tum epidemiam. Post tertium paroxysmum, molestiarum pertæsus a Medico ut febrem abigeret poscit. Pareth hic, & electuario, ex rob juniperi, cortice chinæ & sirupo acetositatis citri, post sex dies, febrem ex voto, uti videbatur, profligat. Sed sequitur postea inflatio ventriculi, cum ructibus & borborygmis ventris, præsertim post pastum & alimenta gravis materiæ. His jactatus æger meo ex consilio usus est mane pilulis balsamicis & vesperti pulvere salino aperitivo, ex arcano duplicato, sale Sedlicensi & cancrorum lapidibus, per sex dies, & postea ante prandium essentia carminativa Wedelii, cum æquali parte spiritus nitri dulcis remixta, felici cum successu. Quum vero elapsis vix quatuordecim diebus medicamenta rejiceret, eadem a flatibus & ructibus expertus est incommoda, eaque propter ad priora medicamina confugit, succedente ex voto effectu.

*Epicrisis.*

Quando tertiana corpus impurum, succis repletum & chronicis passionibus jam affectumprehendit, in medicinam cedit, motu intestino & progressivo auctiori obstructions referando, viscidos humores attenuando & sordes subtiles difflando. Quando vero cito nimis specificis compescitur, noxia materia remanens & deterior reddita, in disposito jam corpore, flatulentias creat malumque exacerbat. Et licet opposita his pathematibus præsidia leniter educendo vitiosam materiam ac tonum ventriculi & intestinorum roborando, egregie profuerint; expertus tamen scribo: non facile ejusmodi pathemata cessare, nisi aquæ minerales, præsertim Carolinæ

rolinæ thermæ, in auxilium vocentur, ac vere, vel æstate, debito cum regimine usurpentur.

OBSERVATIO XI.

Superiori vere, quo tertianæ erant admodum frequen-*Tertiana*  
tes, vocabar ad septuagenarium vegetum adhuc & strictio-*in fene*  
ris corporis habitus, qui eodem decumbebat morbo, & ad-*curata.*  
hibitis licet pulveribus digestivis salinis, elixiriis amariis, pilu-  
lis etiam polychrestis, decimumquartum jam paroxysmum erat  
passus. Percontatus de omnibus, vires quidem prostratas, sto-  
machum mire languentem & fastidientem & urinam sine  
sedimento esse, comperio, habitum tamen corporis expen-  
dens & pulsus in paroxysmo plenum adhuc & fortem offen-  
dens, electuarius offerre non dubito. Sumtum illud bihorio  
quovis ad drachmas duas, bibendo postea aliquot cochlearia  
vini, auspicato cum effectu, ita, ut subsequens illico paroxy-  
smus mitior longe esset, nec nausea, nec capitis dolore, ne-  
que anxietate, ut antea, stiparetur, secundus vero penitus  
emaneret, urina crassa mingeretur, vires redirent & æger  
optime convaleret. Ne autem recidiva accideret, ut eodem  
electuario, parcius tamen, adhuc uteretur, elapsis septem die-  
bus, bis pilulas balsamicas cum sale aperitivo deglutiret, in-  
gluviem ciborum & seria negotia vitaret, temperate calidum  
potum assumeret & corpus ab omni refrigeratione solícite de-  
fenderet, serio præcepi.

*Epicrisis.*

Chinæ cortex non tam nocens ut vulgo creditur, sed  
ipsis etiam senibus cum fructu datur. Neque etiam sine ex-  
ceptione illa practica regula: quod nunquam sit offerendus,  
antequam urina compareat cocta. Ego enim multiplici com-  
pertum habeo experientia, nunquam ipsum nocuisse, si pri-  
mæ viæ prius probe expurgatæ, si corpus non impuris suc-  
cis scatet, viscera sanguinea integra, & nullus inflammatio-  
nis internæ metus. Multo magis innocens huius corticis &  
salutaris effectus, in ægro activæ indolis, fibrosi & anplio-  
(IV.) ribus

ribus vasis instructi habitus. Longe præsentio rem etiam expertus sum ipsius efficaciam in corpore quodammodo jam per febrem debilitato fibrarumque tono remissiori, ac si vires adhuc vegetæ & motuum vigor, nisi forsan expectationem interdicant circumstantiæ.

## OBSERVATIO. XII.

*Tertiana cito curata in carolinis.*

Rari sunt in thermis Carolinis diu febricitantes. Simul ac enim febris impetit, intercalari die largiter ingerunt aquas thermales, quæ primas vias efficaciter deplent, sudorem etiam & urinam liberaliter eliciunt. Si post quintum paroxysmum febris non discedit, corticem Peruvianum die vacuo adhibent, vel in electuarii forma, vel decocto, hunc in modum: recipe corticis chinæ unciam, radicis gentianæ rubræ unciam semis, herbæ cardui benedicti manipulum, centaurii minoris tantundem, vini Gallici mensuram; coque leni calore, cola & adde sirupi menthæ unciam, M. de quo tribus quibusvis horis extra paroxysmum duas uncias bibunt, forbillando mane in lecto infusum theiforme & sudorem eliciendo. Sic feliciter ut plurimum ex toto febrem percurant. Mihi ansam hoc dedit, ut eadem methodo subinde uterer, & surrogata Carolinis Sedlicensi aqua, purgationem ventris molirer, & post eam decoctum illud præberem, auspicato pariter successu in tertiana & quartana, præsertim æstiva ac vernali.

*Epicrisis.*

Compendiosa & facilis est hæc intermittentes curandi methodus, solennis non modo in Carolinis, sed & iis locis, ubi acidulæ purgantes saliant. Nec male medentes eidem viæ insistant & primas vias crudis & biliosis sordibus obsessas salibus deplent. Salia enim reliqua ex regno vegetabili purgantia securitate & prompta efficacia longe superant. Tanto vero magis proficua sunt, quando in sufficienti quantitate humidi soluta assumuntur. Hinc si copia non est aquæ ejusmodi medicatæ, ego ad imitationem ipsius aquam paro laxantem, adjiciens uni aquæ mensuræ olei tartari



tartari per deliquium unciam dimidiam & in lagena angusti orificii instillans eo usque spiritum vitrioli, donec nulla amplius eveniat ebullitio. Vel dissolvo in mensura aquæ unciam senis salis polychresti, ex sulphure & nitro calcinatis confecto. Vsurpato aliquoties liquore hoc salino, descendo tandem perquam secure ad specifica roborantia, quæ inter primas tenent, cortex chinæ, cascarillæ, tamarisci & omnia amara & ex marte rite parata.

## OBSERVATIO. XIII.

Puer facie florens, indole vividus, complexione sanguineus, a biennio aliquoties hæmorrhoidarius, cum abdomine tumido, ceterum valens, post æquinoctium autumnale, tertianam, quo ex diætetico errore nescio, incurrit, eademque ob paroxysmi vehementiam, stomachum penitus languentem somnumque turbatum, graviter decubuit, urina simul clara & sine sedimento comparente. Excepta hanc Medicus aperientibus, crudos succos corrigentibus tutissimisque febrifugis. Sed quum decem paroxysmos passus esset æger, parentes percarum natum vitæ discrimen subire metuentes, inconsulto Medico ab Empirico quodam potius quam Medico opem quæsierunt, qui electuarium, cujus basis tormentillæ radix, promte porrexit, ac ut tribus singulis horis, intercalari die, dosi castaneæ magnitudine deglutiretur, præcepit. Mitior inde facta febris, sed continuato aliquandiu adhuc pharmaco, paroxysmi tempore, tremor ac frigus totum concussit corpus, cum collisione dentium & labiorum, sequuta mox convulsio epileptica universalis, per viginti horas, frustra datis omnibus antiepilepticis, persistens, ægro sub ipsa extincto.

*Epicrisis.*

Ego quidem permultis confirmatum habeo exemplis, hæmorrhoides in infantibus ac pueris jam prodeuntes, accedentibus pubertatis, vel juventutis annis, raro alium quam sinistrum ac ut plurimum funestum fortiri eventum. Ipsum hoc enim ataxiam motus circulatorii in visceribus abdomi-

nis prodit, ex qua facile labem & vitium contrahere possunt. Neque ea propter dubium est, quin hoc in puero, infimi ventris viscera, hepar, lien, vel pancreas, fuerint sarcta & obstructa. Motus autem febriles præsidio potius fuissent, inprimis quum intermittentes per annum læpe infantes detineant, modo medicatio rite instituat, nec tamen adeo sint detrimento, ut potius corpus firment & longævum efficiant. Perperam igitur adstringentibus salutare hi motus sedati & causa febris altius visceribus impacta, spasmi quoque tam ex hæreditate a matre hysterica, quam ex ipsa febre jam præsentis, & ex alvi strictura ac limpida urina cognoscendi satis, ita adaucti, ut in convulsivos plane degenerarint funestos. Memoratu etiam dignum videtur, quod hic puer multos annos insolita voracitate laboravit.

Has pratico-clinicas de tertiana observationes adduxisse sufficiat, plures passim reliquis meis scriptis inferui, & quidem uberius enarratas ac evolutas, *Medicina consultatoria*, ex qua hanc in rem conferri poterunt ea, quæ *Tom. II. Dec. I. cas. IV. pag. 32. seqq.* de gravibus & variis symptomatibus ex male curata intermittente, *Dec. II. cas. VI. pag. 86. seqq.* de febre lenta ex male curata tertiana; *Dec. IV. cas. V. pag. 180. seqq.* de spasmo hypochondriaco ex male curata tertiana; *Tom. III. Dec. II. cas. XI. pag. 106. seqq.* de febre tertiana male curata, sæpius recidiva inque erysipelas cum molestis symptomatibus transeunte; *Tom. IV. Dec. III. cas. IV. pag. 167.* de febre biliosa intermittente; *Tom. V. Dec. IV. cas. I. pag. 243.* de multis atrocibus malis post febrem suppressam & puerperium feminam infestantibus, nec non *Tom. VI. Dec. I. cas. VI. pag. 35.* de tertiana duplici cum purpura in gravida, attuli.

CAP. II.

DE

FEBRE QVARTANA.

§. I.

**T**ertianam, & gravitate, & contumacia, ex intermittenti-  
bus longe adhuc superat ea, quæ quarto quovis die, *Quarta-*  
intercalaribus integris binis, corripit, eamque ob cau-  
sam vocatur quartana. *naqui d?*

§. II.

Scilicet, post meridiem ut plurimum, hora quarta, aut *Paroxy-*  
quinta, quandoque etiam citius, quandoque serius, cum notabili *fmi histo-*  
corporis languore, pandiculatione capitisque, dorfi, lumborum *ria.*  
ac tibiarum contusivo dolore, accedit. Pedes hinc cum manibus  
refrigescunt, corpus universum pallefcit, facies & ungues live-  
scunt, supervenit horror & rigor, huic feбри familiaris, lingua &  
labia tremunt, spiritus difficulter trahitur, præcordia anguntur,  
corpus inquietudine jactatur & pulsus arteriarum contractus  
ac durus, quandoque etiam inæqualis plane percipiuntur.  
Durant hæc omnia per duas plerumque, aut tres horas, ac  
interea alvus in plurimis stringitur, in nonnullis ad desiden-  
dum & meiendum stimulus, in quibusdam, potissimum seni-  
bus, conatus ad vomendum, vomitus & alvi secessus. Mul-  
tis etiam, inprimis ætate gravioribus, caput mirum turbatur  
& mens sibi non constat, ut aliena multa loquantur. Suc-  
cedit lento postea gressu calor, non adeo urens, sed aridita-  
te quam maxime molestus, evanescit rigor, arteriarum ictus  
ad æqualitatem redeunt, celerioresque ac majores micant,  
capitis tamen obtusus dolor perstat, cum vertiginosa affectio-  
ne, & cutis demum pauca saltem humiditate persunditur,  
donec elapsis quatuor vel sex horis, & æstus, & pathemata  
hæc, discedant. Cessante sic febris impetu, duobus qui va-  
cui sequuntur dies, æger quidem semper fere lectum relin-  
quit,



quit, restitat tamen sensus quidam doloris in artubus ac pedibus, ipsa ossa quasi tundens atque profundo pondere obtrens, osteocopus græco nomine dictus, caput quoque in quamplurimis grave est & animum fastidium tenet, urina quæ in paroxysmo tenuis reddita & aquosa, nunc crassa & cum sedimento secedente.

## §. III.

*Quartana causa proxima.*

Hæc quæ sub paroxysmi impetu subinde obveniunt pathemata, uberius utique testantur, gravissime nervosarum partium systema in universo corpore pati & spasticis constrictionibus agitari. Eamque ob causam immediata & proxima hujus febris causa constituenda omnino in universali & vehementi spastica nervosarum partium strictura, quæ ex spinali medulla potissimum procedens, non modo tunicas vasorum, sed & totum nervorum ac fibrarum systema, præter naturam afficit, ut motus solidorum & fluidorum inde graviter turbentur.

## §. IV.

*Materia-  
lis.*

Materialem vero causam, quæ nervosas partes in tam exorbitantes motus abripit, Veteres quidem humorem melancholicum extra vasa putrescentem esse voluerunt. Sed sicuti in omni febre, sic etiam in quartana, subest materia activæ indolis & caustica acrimonia imbuta, internas sensu exquisito pollentes partes ad spasticas crispaturas sollicitans. Quia tamen ex pancreate ei nupta est materia, quæ ad acidoviscidam indolem accedit, diuturniores dat inducias, nec tam cito colligitur, nec ad membranas spinalis medullæ ex prima regione tam cito appellitur. Quando vero sufficienti quantitate est collecta in primarum viarum latibulo, massam sanguinis successive subiit, & certo interposito tempore, ad spinæ dorsi membranas delata, febriles eodem modo suscitatur motus, ac præcedenti capite de tertiana enumeravimus.

## §. V.

*Antecedens.*

Iam si porro hujus materiæ febrilis natales rimamur, hæc uti-

utique primario arcessendæ ex tardo admodum sanguinis per viscera abdominis depuratoria & secretoria, hepar præsertim, lienem & pancreas, progressu, horumque tandem succedente infarctu & obstructione. Hoc enim factò, humores fermentales, gastrici, lymphatici, salivales, a temperata, subtili, spirituosà indole desciscunt ac fixam & acidam induunt, ut ad intimam ciborum dissolutionem & chylī extractionem minus sint idonei, sed cruditarum acidarum & viscidarum ingens fiat proventus. Quibus ipsa mora pejorem indolem contrahentibus & ab accidentibus aliis externis causis acrimoniam induentibus, ipsa demum excluditur febris.

## §. VI.

Videlicet languidiorem sanguinis per abdominis vasa cur- *Impedi-*  
sum in causa esse, ex eo patet, quod huic feбри quam maxime op- *tus humo-*  
portuna sint corpora consistentis & proVectioris ætatis, melan- *rum per*  
cholici temperamenti, & quæ vita sedentaria nimis, intermissa *viscera*  
sanguinis missione, victu duro & insalubri, nimioq; acidorum & *progres-*  
spirituosorum usu, vel etiam solennium criticarum sanguinis e- *sus.*  
vacuationum suppressione, nec non animi affectuum intemperantia, succorum incurrerunt & abundantiam, & spissitudinem ac impuritatem. Causticam vero simul etiam subesse materiæ indolem nemo negabit, qui novit, quartanam post exclusas sub ætate fervente acres sordes plerumque autumno pro- *Et acris*  
dire, per scabiem quandoque & purpuram solvi, iisdemque *muetnia*  
repulsis impetere, variolis erumpentibus discedere, ex tertiana gigni, in tertianam quoque transire, & eodem modo ac tertianam in locis paludosis, aëre acrium recrementorum copia referto, frequentem admodum esse ac epidemiam.

## §. VII.

Sic quidem generata febris quartana varium subinde ex- *Quarta-*  
hibet genium. Quandoque scilicet simplex est, quandoque du- *na sim-*  
plex. Simplex, ea, ut jam delineavimus, incedit facie. Du- *plex est*  
plex *vel du-*  
plex *plex.*

plex vero tum dicitur, quando intra quatrimum bini succedentes accedunt paroxyfmi, ita quidem, ut uterq; peculiarem suum fervet typum & singulare accessionis tempus, alternatim semper præcedenti insitui respondens, tertio duntaxat die a febre penitus vacuo. Id quod sæpius evenit, quando simplex quartana perversa medicatione excipitur, aut in vitæ, vel victus regimine, committitur error.

## §. IIX.

**Legitima vel notha.** Legitima dein observatur esse, vel notha. Illa exactius, quam ullum aliud febrium genus recursus terminum servat, tempore scilicet pomeridiano. In hac contra certum non est reditus tempus, plerumque tamen ante meridiem, æstus quoque impensior ipsoque frigore gravior, urget.

## §. IX.

**Continua** Nonnunquam porro quarto quidem quovis die, præviis ut plurimum pandiculationibus & horripilatione, reperit, statum tamen terminum non adeo exquisitè servat, nec deservesciente impetu penitus intermittit, sed diebus in simplici intercalaribus, mitius tantum, quam febrili, affligit, calor naturali intensior adhuc adest, pulsus magis auctus, appetitus languet, vires prostratæ sunt, os siccum, caput temulentum, somnus inquietus & urina rubicunda, crassior, cum sedimento roseo mingitur, eamq; ob causam a Medicis quartana appellatur continua.

## §. X.

**Epidemia** Ut plurimum populares habet circuitus & epidemia est, tum maxime, quando æstas præcessit præter consuetudinem calida & sicca, eaque propter acria & multa biliosa recrementa in corpore genita. Id quod anno clbxcxvi, Sennertus de febb. lib. II. cap. 20 nec non anno clbclxii, Baribolinus cent. I. hist. anat. 95. contigisse, memorant, & nosmetipsi de annis clbclxxxiv. clbcccix. xxvi. & xxviii. multiplici experientia edocti testamur. Et quia ob æstum nimium potus frigidus sæpe acfescens ingeritur, & noctu frigus accedit, perspiratio sordium acrium impeditur & humores cum sanguine spissi evadunt.

## §. XI.



§. XI.

Nonnullas regiones & tractus endemia lue infestat. *Endemia.*  
Nimirum in Westphalia, Pomerania locisque quæ ad boream vergunt, & incolas alunt, victu duriori, crassiori & crudiori utentes, nullus fere elabatur autumnus, quo non multi quartana prehendantur ac diu admodum eadem detineantur. Idem evenit in locis paludosis, stagnorum & lacuum pravis exhalationibus infestis, in quibus vere tertianæ, autumnæ quartanæ, largo proventu pullulare & crebro recrudescente solent.

§. XII.

Varium etiam quartanæ exhibere solent genium, pro *Variat in* diversitate corporum, quæ corripunt. Nimirum si incidunt *plethor-* in corpus, quod ob vitam sedentariam victumque crassum *cis & hy-* & durum, copiosum & crassum sanguinem in venis alit, vel *pochon-* hypochondria male constituta habet, aut diuturnior animi *driacis.* moeror præcessit, graves & contumaces esse suescunt, nec periculo vacant, eaque propter in ægrotante exquisitum victus ac vivendi moderamen, in medente autem magnum in exhibendis remediis poscunt iudicium. Ubi cacochymica dispositio *cacochy-* & purpuræ forsan materia simul subest, pathematibus longe *micis.* acerbioribus incedunt, major virium est prostratio, vigilia, mentis emotio, præcordiorum anxietas ac purpura demum erumpit, qua levi ex causa retrocedente, febriles passionες crescunt graviusque affligunt.

§. XIII.

In subiecto, viribus per senium, valetudinem, pravam *Infirmis* vitæ rationem, aut animi pathemata exhausto, facile in con- *senibus.* tinuam transit, quæ ex languore virium post paroxysmum, pulsu frequenti, lento calore & appetentia prostrata, cognoscitur, ægrumque in haud leve discrimen adducit. Quan- *juveni-* do post intensiorem ætatis fervorem, corpus juvenile & *bus.* agile invadit, paroxysmus longius perdurat, æstus urens magis in liberalem solvitur sudorem, sitis quoque & stoma-

*Infantibus.*

chi languor impenſius urgent. Infantes & pueri, quia ægre medicamenta ſumunt, nec diæteticis præceptis obtemperant, noctu, removendo ſtragula, corpus refrigerant & præterea habitum corporis laxum, ad ſuſſaminandum perſpirationis ſucceſſum, nec non ventriculum ad colligendam cruditatum ſaburram aptum, obtinent, diutius hac cum febre conſiſtantur, crebriores in recidivas incidunt, aut aliis poſtea morbis patent.

#### §. XIV.

*Secura tamen eſt.*

Interim quartana hæc febris placida admodum eſt atque ſecura, nec facile ingulare ſolet. Sin ſecus evenit, corpus aut ſenile fuit & viribus jam exhaustum, aut tenerum nimis epilepticis inſultibus obnoxium, aut ipſa febris, intercurrentibus animi pathematibus, tam ſuſcitata, quam exacerbata fuit, aut etiam, vel medentis, vel ægrotantis accidit delictum, quo in quotidianam, aut longum alium funeſtum morbum fuit tranſmutata.

#### §. XV.

*Sed contumax.*

Gravitate tamen & contumacia ſecuriorem hunc decurſum compenſat. Diu enim trahi, ac ſapius, ceu verum medicorum ſcandalum, omnia eludere ſolet remedia. Evenit hoc maxime in ea, quæ autumnæ oboritur, & per hiemem perſiſtens, raro admodum prius diſcedit, quam ſolſtitii vernalis tempore, quo poris adapertis ſuccisque ob æris ſerenitatem tenuioribus factis, ſponte fere evaneſcit. Rebellis etiam maxime eſt, quando in viſceribus, præſertim hepate, liene & pancreate, vitium altius radices egit, vel tota humorum maſſa ſpurca & impura, vel etiam ſyſtema nervorum admodum debile ac ad anomalos ejusmodi motus, & concipiendos, & fovendos, diſpoſitum. Tanto magis, quando æger verocitate materiam febris colligit ſemper & auget.

#### §. XVI.

*Facilis curatu vernalis.*

Contra ea ſi vernali, vel æſtivo tempore incidit quartana,

tana, facilis & explicata ipsius curatio, quia aeris temperies & tenuitas multum medicationi velificatur. Quæ etiam ex inordinata diætâ & cruditatibus in prima regione collectis, integris autem visceribus, aut valde prohibita transpiratione succrescit, ex facili, vel unico sæpe vomitorio, vel diaphoretico, ante accessionem dato, discutitur. Et illa pariter, quæ juvenile & viribus pollens corpus detinet, præsertim si bilis plus, quam humor tenax, acidus peccat, ut potissimum fit in epidemicis æstate grassantibus, nisi ægri vel medentis culpa ingravescat, ex facili medicationem admittit.

§. XVII.

Neque etiam quartana anomala, quæ typum non servat, incerto tempore redit, aut ex simplici in duplicem concedit, adeo est pertimescenda, uti quidem vulgo censent. Ipsum hoc enim indicio est, succos vitiosos non tam lentos & visceribus alte impactos, sed ad emotionem adhuc promotos esse, naturam quoque vegetam in amolienda quæ morbum facit materia. Ne dicam, paroxysmos rite decurrentes, multum facere ad dissolvendos viscidos & discutiendos subsistentes humores, adeoque quo crebrius recurrunt, eo citius causa febris eliditur, & natura ministrante, curatio paucis congruis perficitur.

§. XIX.

Licet quartana solenniter nullam criticam servet excretionem, fit tamen quandoque, ut erumpentibus pustulis, maculis, ulcusculis & scabie per universum corpus diffusis, nec non prodeunte hæmorrhoidum fluxu, feliciter solvatur. Vidi quoque in infantibus eam cum auspiciato successu defuisse in variolas. Et de gravidis compertum habeo, quod quartanam non prius evalerint, quam superato partu, infante vero eadem affecto.

§. XIX.

Quin præsidio quandoque est hæc febris & adversus alios



*morbos  
præsidio  
est.*

alios, præsertim chronicos morbos, remedio. Auctus enim ille sub impetu solidorum & fluidorum motus lentos succos circumagendo attenuat, latibulis suis elidit & ad veteres obstructions, quæ in minimis vasculis, glandulis & nervosis partibus altius consistunt, expediendas & excutientas multum confert. Hinc prisca jam medicinæ principes, *Hippocrates, Asclepiades, Galenus & Celsus*, se quartana remedio uti, affirmarunt. Et certe ad expugnanda hypochondriaca pathemata spectata ipsius est virtus, quam etiam in epilepsia & convulsivis motibus mire deprædicat *Hippocrates lib. VI. epid.* Ab asthmate quoque convulsivo, item calculo, podagra, si feliciter decurrit & prudenter a Medico dirigitur, quartanam liberaffe historiæ loquuntur. Dumque corpus ab inhærentibus viscerum vitiis liberat, post discessum suum illud mirifice firmat, ut non tam facile morbis pateat, aut pristinis attentetur denuo, uti experientia suffragante ex *Platone* jam habet *Gellius noct. An. lib. XVII. cap. XII.* Et nos plures novimus, qui post quartanam longævitate nati fuere. Quo magis admiranda DEI providentia, quæ ipsis etiam morbis plane incomparabilem & medicinalem virtutem tribuit.

#### §. XX.

*Sed diu-  
turna.*

*& perpe-  
ram ex-  
cepta  
morbos  
facit gra-  
ves.*

Sed ubi longius quam par est extrahitur morbus, succi concipiunt dyscrasiam, & si humores tenues ac biliosi sunt, purpura excluditur, vel partibus spirituosiss, roscidis, nutritiis diffatis, lentescunt reliqui, corrumpuntur & longos morbos invehunt. Si etiam perversa medicatione excipitur, in graves & capitales degenerat passionnes, cujus generis sunt maxime hydrops, anasarca & ascites, cachexia scorbutica, tumores oedematosi, febris lenta & hectica, continua, asthma siccum, icterus, tussis ferina, in senibus affectus comatosi & hemiplexia, in junioribus affectio hypochondriaca & in infantibus sævi convulsivi motus, spinam dorso, antrorsum & retrorsum miseranda facie distorquentes. Et in his quidem omnibus conspicuum post mor-

mortem deprehenditur viscerum vitium, hepatis nempe, lienis, pancreatis, nec non glandularum melsaraicarum, obstructio, infarctus & corruptio.

§. XXI.

Qui vero quartana febre intereunt, sub frigoris rigore & mente turbata decedunt. Tum enim, qualia duo exempli vidi, in adultioribus adeo increfcit spasmorum atrocitas, ut nullus plane subsequatur æstus, sed symptomata veneni prorsus æmula adsint demumque interimant. Et in infantibus, spastica stricture in convulsivos plane motus degenerant, funestos.

§. XXII.

Qui demum evadunt, habent utique, ut in vitæ victusque ratione exactum servant postea per aliquod tempus moderamen. Refractaria enim admodum est hæc febris, pristinaque sedem, data levi occasione, ex facili repetit. Sane qui superata ipsa gulæ indulgent corpusque extenuatum largo, tanto magis insalubri cibo, farcire nituntur, promississime recidivam, ex congesta denuo cruditatibus saburra, incurrunt. Idem experiuntur, qui saluberrimam illam per cutis spiracula excretionem penſi habent & corpus aëri frigidiori & humidiori incautius committunt, vel frigidum potum ingerunt. Neque minus ex facili iteratoprehendit eos, qui affectuum intemperantia jactantur, ac inprimis impensiori tristitiæ diutius indulgent. Et, quod tamen rarius est, repulsa præpostere, quæ ad habitum corporis cum salute acta fuerat, & per scabiem, pustulas, ulcera & purpuram expulsa, materia, illico impetit denuo, qui sedatus fuerat inde febris impetus.

METHODVS MEDENDI GENERALIS CVM  
INDICATIONIBVS CVRATORIIS.

§. I.

**Q**uo pacto intermittens febris sit arcenda, superiori capite sub methodo præservatoria tam fuse exposui, ut supervacaneum ducam illud hoc loco iterum tradere.

Indicationes autem curatoria, causis quartanae oppositae, huc redeunt. I. Ut cruditates viscidae, acidae, biliosae ex primis viis, cum chylo & lymphâ successive ad sanguinem abeuntes ac in nervosarum partium systemate febriles motus suscitantes, & corrigantur, & per congrua emunctoria evacuentur. II. Ut sanguinis per abdominis viscera, praesertim ad quae vena portae excurrit, progressus liber praestetur, congestio vero, infarctus & obstructio expediatur, vel minimum major impediatur. III. Ut spastica vehementior in genere nervoso constrictio, seu acerbiorum symptomatum causa, leniatur. Et IV. ut dejectum viscerum, stomachi nervosarumque partium robur restituatur, sicque tum ulterior accessio, tum recidiva, praescindatur.

## §. II.

*Prima  
perficien-  
da tem-  
peranti-  
bus, inci-  
dentibus  
& vacu-  
antibus.*

Primae igitur indicationi exsequendae serviunt ea remedia omnia, quae acidum obtundendi, lentos succos incidenti, acres contemperandi, & primam maxime regionem expurgandi facultate pollent. Splendent autem hac virtute alcalina pharmaca, uti sunt salia plantarum per incinerationem parata, sal potissimum ablynthii & cardui benedicti. Commendanda etiam salia neutra, maxime sal ammoniacum depuratum, terra foliata tartari, sal digestivum *sylvii*. Quibus ad biliosam acrimoniam intringendam, addenda absorbentia teneriora, cancrorum lapides, conchae, vel cornu cervi sine igne paratum. Et si praeterea educendi scopus, salia fontium medicatorum, Egranum, Ebshamense, Sedlicense, aucta dosi, aut ipsa etiam aqua Sedlicensis, per alvum crassiores, tartarea vero, per urinarias vias subtiliores salino sulphureas sordes, efficaciter evehunt. Habet etiam purgantem facultatem in quartanariis magnesia alba, quae acidum primarum viarum imbibendo, transit in sal amarum, sali cathartico Ebshamenfi simile.

## §. III.

*Secunda  
amaris.*

Ad obtinendum secundae indicationis scopum, egregie faciunt amara, quae balsamico suo fixiori sulphure bilis balsamum



samum restituunt, acidos simul ponticosque humores obtundunt & lenem quandam spirituascentiam succis conciliant. Talia sunt extracta amara, fumariæ, absynthii, cardui benedicti, gentianæ rubræ, trifolii fibrini, centaurii minoris, essentia, vel extractum rhabarbari, nec non pilulæ balsamica, secundum exemplar *Beccheri* confectæ, ex aloë bene depurata, extractis amaris & gummatibus resinosis balsamicis temperatis, quæ præter facultatem alvum laxantem, etiam attenuantem lentos & spissos succos obtinent, præfertim si earum usus interponatur supra laudatis salibus. Pertinet huc quoque conveniens cum debito regimine thermarum & acidularum usus. Sin vero inveterata nimis obstru- & mine-  
ctio viscerum, præsertim pancreatis, quod in quartana re-ralibus.  
belli non insons est, lenioribus expugnari nequit, in usum vocanda penetrantiora magisque activa mineralis prosapiæ pharmaca, mercurius quippe dulcis, vel nostra methodo diaphoreticus solaris, nec non antiquarium *Riverii*, quod ex mercurio, antimonio & auro, desuper abstracta aliquoties aqua regia & postea spiritu vini accenso, paratur. Ex antimonialibus, regulus antimonii medicinalis, panacea Glau-beriana & Conerdingiana, item sulphur nostrum antimonii correctum, sine præcipitatione cum acido confectum.

§. IV.

Spasticas generis nervosi stricuras remittunt I. linimen-*Tertia li-*  
ta antispasmodica & nervina, spinali medullæ cum frictione *nimentis.*  
calida admota, ex axungia humana, oleo spicæ, lavendulæ, rutæ, salviæ, balsamo Peruviano; II. clysteres ex *clysteri-*  
herbis nervinis, carminativis & antispasmodicis, addita suffi-*bus, bal-*  
cienti quantitate oleorum demulcentium, parati; III. balnea *neis.*  
aquæ dulcis, Veteribus inprimis ante paroxysmi accessio-  
nem usitata; IV. epithemata & linimenta ex spirituosiss & *epithe-*  
aromaticis parata, sub horrore & rigore regioni epigastricæ *matibus-*  
apposita.

§. V.

Ultimæ demum indicationi apprime satisfaciunt omnia *Quarta*  
ama-

**amaris  
adstri-  
ctivis.**

amara, quæ simul balsamica quadam adstrictiva virtute pol-  
lent. Nobiles hac virtute sunt chinæ & chaccarillæ corti-  
ces, nec non cortex capparum, item tamarisci, cinnamomi,  
rasura fantali rubri & essentia ex amaris plantis extractæ,  
quæ cum liquore martiali acuata, omnibus fere palmam præ-  
ripiunt. Instar omnium vero erit electuarium nostrum an-  
tifebrile, cujus descriptionem superiori jam capite suppe-  
ditavimus.

### §. VI.

**Epicar-  
piis dis-  
cutienti-  
bus,**

Peculiaris etiam virtutis adversus quartanam habentur  
emplastra carpis manuum applicata, quæ inter famigeratis-  
simum est a *Sirobelbergero* dictum. Concinnari autem pos-  
sunt ex iis, quæ tam aromatico balsamico, quam irritante  
principio, motum & stimulum fibræ addunt, ut materiam  
altius partibus nervosis impactam hærentem excutiant, &  
promptius die vacuo sanguis circumagatur.

### §. VII.

**Potissimū  
præstabi-  
le vino-  
sum insu-  
sum.**

Præter ea vero quæ hætenus adduxi quartanæ præsidia,  
non possum, quin bina subjungam adhuc remedia, quæ mi-  
le vinoram efficaciam mihi olim in Westphalia præstiterunt, pro-  
pter quam etiam eadem jam *dissertationi de felici quartanæ  
curatione*, inferui. Primum est infusum vinosum, omnibus  
curatoriis indicationibus satisfaciens, de quo matutino tem-  
pore quotidie liberalis haustus sumendus. Recipe fibrarum  
hellebori nigri, polypodii querni, foliorum fennæ sine sti-  
pitibus singulorum unciam, herbæ absynthii, centaurii mi-  
noris, cardui benedicti, trifolii fibrini, ana manipulum di-  
midium, rasuræ ligni colubrinæ, corticis chinæ, aurantiorum  
recentium ana drachmas tres, limaturæ martis unciam semis,  
tartari tartarifati tantundem. Conc-cont. irrorentur drach-  
mis duabus spiritus falis ammoniaci urinosi, misceantur &  
duabus vini mensuris infundantur.

### §. IIX.

**Et pulvis  
resolvens**

Alterum hic est pulvis: Recipe corticis chinæ drach-  
mas tres, reguli antimonii medicinulis drachmas duas, mer-  
curii

curii dulcis, (qui non terendus cum pulvere propter salia, *ac roborans.* sed cuspide tantum cultelli miscendus) croci martis tenuissimi, arcani duplicati, singulorum drachmam, olei menthæ guttas quatuor. M. f. pulvis, cujus drachma dimidia, aut una, cum rob sambuci & julepo rosarum in electuarii formam redacta, mane & vespere poterit assumi. Et certe egregii usus est hic pulvis in quartana, quæ altas in viscerum penetralibus egit radices, requirit tamen corpus paullo robustius, cum exacto in diætâ & vitæ ratione regimine. Licet etiam molestant quandoque lenem moverit salivationem; ex voto tamen cessit febrisque rebellis fuit expugnata. Ceterum plura de speciali huic febre medendi methodo, infra observatione X. nec non *capite IV. de febribus epidemicis*, afferemus.

## OBSERVATIONES ET CAUTELAE

## CLINICAE.

## §. I.

**Q**uartana, ex morbis fere contumacissimus, ægri patientiam & Medici expectationem poscit: inprimis ea, quæ *Quartanæ* corpori melancholicæ constitutionis, senibus, hypochondriacis & ubi languidior sanguinis per venas mesaraicas progressus, viscera infarcta & autumnus adultus, accidit. Non itaque impetuose in his aggredienda, aut violentis pharmacis urgenda curatio. Si secus fit, plus detrimenti, quam emolumenti sperandum. *max morbus.*

## §. II.

In principio quidem morbi, natura si robusta, validiora *Leniori-* resolvendi & colliquandi atque evacuandi virtute pollentia *bus ta-* cum inveniunt. Ubi vero morbus inveteravit, corpus tenerum *men ex-* & exquisitè sentiens, multaque acria & biliosa recrementa *capitur.* præsto sunt, mirum inde exacerbatur febris & haud raro ex simplici in duplicem, aut quotidianam plane transit. Temperata potius, plus diætetica, quam pharmaceutica, cum iis *(IV.)* *I* *quæ*



quæ lenimento sunt generi nervoso, infestis spasimis jam affecto, in usum vocanda.

## §. III.

*Et quandoque fugatur.*

Neque enim adeo refractaria est quartana omnis, ut non sæpius lenissimis cedat. Ego certe plures novi, qui solo usu elixirii temperati balsamici, quod cum aqueo lixivio ex amaris extractis & rhabarbaro, adjecto vino Hungarico, paratum, eandem feliciter evaserunt. Alii solo oleo tartari per deliquium, frequentius cum potu assumpto & hausto ante paroxysmum vino veteri Rhenario, cum, vel sine amaris, subjuncto postea vehementiori corporis motu, ab eadem sunt liberati. Nonnulli balneorum aquæ dulcis usu quotidiano, instituta simul ante accessionem corporis ad sudorem usque exercitatione, curati sunt.

## §. IV.

*Facilius sub cœli favore sanatur.*

Semper tamen longe facilius atque felicius quartanæ curatio succedit, si cælum eidem velificatur, & aër purior, subtilior & rarefactus est, uti tempore verno, æstivo sereno. Tum quippe veteres viscerum obstructions promptius expediuntur lentorque succorum liquatur, & perspiratione æquabili atque constanti, acres per apertos cutis poros sordes diffantur. Quin novi quosdam, qui non prius convaluerunt, quam mutato cœlo & in locum salubriorem secessu, vel alio vitæ victusque genere instituto.

## §. V.

*Potus mutatio- nem potiss.*

Potissimum in quartana febre, sicut omnibus longis morbis, ut potus mutetur ex usu est, & decoctum ex radice farfapillæ, cichorei, herba cardui benedicti, passulis minoribus & semine foeniculi, tam loco cerevisiæ frigidum, quam loco infusi theæ calidum bibatur, declinante paroxysmo. Conducibiles quoque sunt pro potu temperatæ acidulæ, uti Selteranæ, quippe quæ cum dimidia, aut tertia vini parte potæ, in diluendis crassis & evehendis per urinarios ductus impuris succis, effectum præstant saluberrimum.

## §. VI.

## §. VI.

Studiose etiam providendum, ut per cutis poros acres *Nec non*  
 subtiles sordes perpetuo eliminentur. Perficiendum hoc tam *perspira-*  
 ante, quam post paroxysmum, & obtinendum, non per po- *tionis*  
 tentia sudorifera, sed ea, quæ solidorum tonum intendendo, *succesum*  
 progressum sanguinis accelerant sicque sudorem eliciunt. *ante*  
 Singularis hunc in finem virtutis est validior corporis motus,  
 per equitationem, saltationem, aut ambulationem, aliquot  
 ante paroxysmum horis institutus, quo ego quartanam mul-  
 toties discussam esse novi. Priscum enim jam *Celsi lib. III. c. 15.*  
 hoc est præceptum: *quo die quis febrem expectat, ante sur-*  
*gere & exercere dareque operam oportet, ut in ipsam exerci-*  
*tationem tempus febris incurrat. Sic enim saepe illa discuti-*  
*tur.* Mira etiam hac in re virtus mixturæ innumeris experi-  
 rimentis comprobata hujus: recipe aquæ cardui benedicti  
 uncias quatuor, theriacalis unciam semis, salis cardui bene-  
 dicti drachmā, antimonii diaphoretici drachmam semis, spi-  
 ritus vitrioli guttas viginti ad triginta, sirupi cardui benedicti  
 drachmas duas. M. de qua, modo prius probe prospectum  
 fuerit primis viis repurgandis, tribus, vel quatuor horis ante  
 paroxysmum, dimidia, & defervescente hoc, reliqua dimidia  
 portio sumenda.

## §. VII.

Declinante quoque febre, quum defervescente æstu spon- & post  
 te corpus madescit, cavendum, ne sudor externa refrigera- *paroxy-*  
 tione, vel potu frigido intercipiatur. Si secus fit, febris non *sum.*  
 modo diuturnior redditur, sed & facile succedunt contractu-  
 ræ, nec non tumores pedum œdematosi. Consultum po-  
 tius, temperato externo calore & diluente calido potu, ipsum  
 placide promovere.

## §. IIX.

Sanguinis per venam sectam missio, auferendis quarta- *Cum di-*  
 næ causis directe quidem non respondet; nihilo tamen *stinctione*  
 ubi suspicio est, febrem ab impedito sanguinis per abdo- *adm. trit*  
 I 2 *vena-se-*  
 minis *ctionem.*

minis viscera progressu sustentari, uti in iis qui pathematibus hypochondriaco-hysteriis obnoxii, fluxum hæmorrhoidalem antea aperti, aut molimina ad hunc persentiscunt, utiliter utique vena in pede pertunditur, adeo ut unica venæsectione quartanam contumacem penitus discussam esse, observaverim. Quum etiam gravidæ tantum non omnes sint plethoricæ, venæsectionem, si quartana corripitur, utiliter non modo ferunt, sed & poscunt, ne intenso per spasmos febriles sanguinis motu, uterus ad præmaturam exclusionem sollicitetur. Consideranda igitur morbi tempora, ipsa corpora, vires & fluidorum ac solidorum dispositio, ne perperam instituta sanguinis subtractione, sanatio difficilior fiat & spasmi febriles accessionis tempore incrementum, uti pluribus in dissertatione, *observationes clinice circa curationem quartanæ*, inscripta, monui. Notabile autem est, quod sanguis e quartanariorum vena emissus conspicuum exhibeat vitium ac flavescente lenta pituita in superficie obductus compareat, cuiusmodi crustam albam pituitosam in venis etiam quartana defunctorum se invenisse testatur *Schenckius*.

## §. IX.

*Et vomitoria.*

Vomitoriorum usus in quartana pariter cum distinctione admittendus. Quando enim crudorum ac viscidorum succorum colluvies primis, ex nimia ingluvie, est in visceribus ac ad vomendum proclivitas; expedit omnino, ut brevissima via per emeticum exturbetur, antequam sanguinem subeat & systema nervosum afficiat. Consultius tamen est, ut nonnisi adhibeantur, quam si viscera salva, ventriculus non adeo tener, genus nervosum non nimis sentiens & debile, ac pulmones nulla labe infecti. Præferenda etiam tutiora & appropriata. Ex illis palmam fert radix ipecuanhæ, quæ propter vomitum moventem, aromaticam & balsamicam habet facultatem. Et inter hæc antimonialibus anteposenda venerea, vitriolum maxime cyprium, vel album, eo quod tam biliosos & glandulosos ductus simul constringendo, ulteriori affluxui materiæ febrilis aditum præcludunt, quam etiam fibras adducendo, & stim-



& stimulando, ut firmius impacta nervosis partibus materia excutiat, faciunt. Utraque vero sociata, in temperamentum quasi rediguntur, ut medicina emergat, tum ad stomachum deplendum, tum febrem expugnandam, apprime utilis.

§. X.

Chinæ cortex, cum ratione usurpatus, spectatæ ad ver- *Optime*  
sus quartanam est utilitatis. Tenendum tamen, non prius ad *fert chi-*  
ipsius usum esse descendendum, quam perpurpatis probe *na cor-*  
primis viis, demta plethora visceribusque integris atque aper- *ticem.*  
tis. Tutior etiam est in quartana biliosa æstiva, quam quæ  
auctumno vergente grassatur & viscerum vitio succisque te-  
nacibus fovetur. Tum conducibilis ipsum in decocto ex  
vino porrigere, adjectis amaris, aperientibus & diaphoreti-  
cis, uti sunt summitates centaurii minoris, herba cardui be-  
nedicti, radix gentianæ rubræ, pimpinellæ & sal tartari. Ex-  
pedit quoque interdum in hac febre virtutem ipsius adjecto  
martis croco & chaccarillæ cortice intendere. Interim si de-  
bito tempore, debita dosi & quantitate exhibebitur & cum  
diaphoreticis & resolventibus rite permiscebitur, nocebit  
nunquam. De quo pluribus evolvendam commendo disser-  
tationem, *de recto corticis chinæ usu in febribus.*

§. XI.

Ad minuendos præterea, vel sistendos plane paroxysmos, *Nec non*  
in quartana, præsertim autumnali & rebeli, nec non quæ se- *epicar-*  
gniores naturas infestat & sopore stipatur, admodum efficacia *pia.*  
reperi epithemata, ex acrioribus, stimulantibus leniterque ve-  
fificantibus composita & manuum carpis applicata. Plebeji  
quidem allio hunc in finem utuntur, sed ingratus nimis est in-  
de foetor, ideoque optime ejusmodi epicarpia concinnantur  
ex terebinthina, fuligine, sale ammoniaco, araneis contusis,  
pipere atque theriaca.

§. XII.

Minerales aquæ, acidulæ præsertim ac thermæ, meo  
quidem judicio, tam ad præservationem, quam curationem *Minerali-*  
intermittentium faciunt. Sed ante paroxysmum & in ipso *bus aquis*  
*quomodo*  
*utendum*  
*& quan-*  
*plane do.*

plane ab iis abstinendum, & videndum, ut ante accessionem febris, aqua per emunctoria congrua jam sit evecta, ne motus febriles inde exacerbentur. Loco potus tamen temperata, uti superius meminimus, semper possunt potari.

## §. XIII.

*Alvus  
clysteri-  
bus ape-  
rienda.*

Si alvus in hac febre pertinacius clausa atque constricta, expedit eandem potius clysteribus, quam internis pharmacis sollicitare. Optima horum enematum ingredientia sunt, quæ præter vim emollientem, paregoricam & spasmos sedantem obtinent, ut summitates millefolii, flores chamomillæ vulgaris, sambuci, tilia, semen cumini, brodium carnis vitulina, vitellus ovi, cum pauxillo salis gemmæ. Opportune etiam quandoque iisdem specifica quædam antifebrilia, amara, nervina & roborantia commiscuntur. Inter Gallos enim ab aliquot jam annis mos increbuit, intermittentes curandi per decoctum chinæ chinæ, crebrius per anum injectum. Idem tamen etiam cum aliis succedit antifebrilibus, ut carduo benedicto, centauro minori, radice gentianæ, nec non herba majoranæ, rorismarini, abrotani & salviæ. Et certe apprimè hæc methodus ex usu est in infantibus & qui ventriculolum minus firmum & facile nauseantem obtinent, hac tantum servata cautione, ut alvus prius emolliente & salino solvatur clystere, quam nervinus & roborans injiciatur.

## §. XIV.

*Quibus  
levandus  
capitis  
dolor.*

Capitis dolores sævi, qui hisce febribus in provectionis præsertim ætatis personis, junguntur, ægre levantur. Potissimum lenimen sperandum ab iis, quæ alvum liberiores reddunt, nec non a pediluviiis, quæ sanguinis impetum a capite ad inferiora trahunt. Inter externa vero acetum rosaceum, item rutaceum, cum sale & nitro mixtum, pani inditum & applicatum, optimum affert solatium.

## §. XV.

*Recidiva  
arcenda  
ex diate-  
ticis.*

Quo demum pacto, ne quartana, uti frequenter fieri assolet, recurrat, sit præcavendum, egregium sane Celsi est consilium, lib. III, cap. XVI, sic habens: *si febris quiescit, diu meminisse*

minisse ejus diei convenit, eoque vitare frigus, calorem, cruditatem, lassitudinem. Facile enim revertitur, nisi a sano aliquandiu timetur. Hinc, paroxysmi inprimis die, vitare oportet ventos boreales, aërem compressum frigido-humidum, qualis esse solet in humilioribus, paludosis & subterraneis locis, & perspirationis successus custodiendus. Victus etiam exquisita habenda est ratio, ne nimium ingeratur, tanto minus ex alimentis difficilis solutionis. Animus quoque in tranquillitate servandus, & providendum, ne ira & terrore commoveatur, quo febrem quartanam sanis etiam compluries indutam novimus.

## §. XVI.

Tum stomacho subveniendum & elixiriis stomachicis, ex *Et phar-* amaris & aromaticis confectis, digestio secundanda, crebro *macev-* quidem ac diu, sed parcius iisdem utendo, ne debile jam *cor-ticis.* pus præter naturam exæstuent. Inprimis curandum, ut per alvi secessum, denuo succrescentes crudi succi, blande subducantur, eamque ob causam crebrius utendum pilulis balsamicis, vel nostris cinnabarinis, item de ammoniaco *Quer-* *cerani*, quibus, si per chinchinam febris suppressa, salis digestivi usus jungendus. Et his præsidiiis non modo pessimæ recidivæ, sed & aliæ sæpius deteriores passionēs, lentæ præfertim febres, opportune præcinduntur.

## ENARRATIONES MORBORVM.

## OBSERVATIO I.

Generosa femina sanguinea, macilenta, quinto mense *Quarta-* gravida, Septembri, posteaquam in nocturno, frigido, nebu- *na in gra-* loſo aëre iter fecisset, incidit in quartanam, cui præter sueta *vida cu-* symptomata, vehemens cephalalgia, summæ præcordiorum *rata.* anxietates, vomendi conatus & inquietudo, juncta. Medicus amaram essentiam cum alexipharmaca, in & extra paroxysmum, quotidie ad guttas minimum sexaginta, porrexit, eo cum effectu, ut bini sequentes paroxysmi longe gravius *impe-*



impeterent & superius dictis pathematibus intensissimus æstus, ventris tormina ac dorfi dolores accederent, & abortus plane esset metus. Meum hinc rogatum consilium & quæsitum: an venæsectioni, quam reformidarat primus Medicus, locus? Ego vero expensis circumstantiis, eandem oppido necessariam judicavi. Administrata igitur fuit sequenti post febrem die & sanguis impetuose exsiliit. Tum mixturæ calefacienti nimis substituti pulveres temperantes nitrosi, cum emulsione analeptica. Inde sequens paroxysmus mitior factus, & usurpatis per aliquot adhuc dies iisdem, demum electuario nostro, parce, sed iterato exhibito, penitus abacta fuit febris, salvis & matre, & foetu.

### *Epicrisis.*

Sicuti tempestiva sanguinis missio gravidis, quæ ordinario plethorica, ad præcavendum abortum pernecessaria; ita multo magis ex usu est, quando motu febrili calido, vel medicamento exæstuante, sanguis in vehementem orgasmum, five motum intestinum expansivum, conjicitur. Feliciter igitur in hac febriente non potuit non succedere febris curatio, posteaquam sanguis subtractus, calida rejecta & furrogata quæ æstum sanguinis restinguunt. Corticem autem chinæ gravidis etiam non nocere, sed circumspecte datum insigniter prodesse, tum hoc, tum aliis multis in comperto est exemplis.

### OBSERVATIO II.

*Quartana in cachectico in funestum hydropem terminata.*

Quinquagenarius obesus, vini ac cerevisiæ potator, hinc cachecticus, autumnò quartana corripiebatur epidemica eademque per mensem detinebatur, pedibus simul tumidis, alvo adstricta, cum sopore ac torpore in paroxysmo. Frustra datis multis, chinæ cortex tandem in usum vocatus in decocto. Quo per hebdomadem usurpato, febris siluit, sed tumor dextri pedis cum dolore obortus, & enatum, initio superficialium, postea profundius ulcus, supra malleolum. Discussus tamen ligaturis & externis constringentibus aquosis tumor, ulcus quoque consolidatum. Brevi autem post rediit quartana & adhi-

adhibitis incassum omnibus , per semestre spatium persistit, ægro interim diætæ incurio & lac in paroxysmo copiose ingurgitante. Intumuit hinc venter, urina parce stillavit, spiritus angustus factus, scrotum quoque cum pedibus tumefactum, superiora autem tabida, sequutus hydrops ascites, quo æger extinctus.

*Epicrisis.*

Perperam tumor pedis vi repressus & ulcus siccatum, quum quartanæ haud raro his terminentur, iisdemque repulsis, & fiant primum, & repetant. E repotius fuisset, cachexiam & vilcerum labem oppugnare, & internis magis, quam externis morbo occurrere. Sic omnino recidiva declinari & æger servari potuisset.

OBSERVATIO III.

Juvenis literatus, computationibus in seram noctem sub *Quartana* inde indulgens, autumnno pluvioso sub itinere incurrit tertia-*ex tertia-* nam primum. Cujus æstum, quum pomis citriis in taleolos *na, cum* discissis & julapiis copiosis restingueret, successeit quartana, *salivati-* cum exquisito contusivo artuum dolore, capitisque ac pedum *one.* quas frigore, alvo simul clausa & urina cum ardore stillante. Diu hæc febris & medicos & medicamenta elusit. Tandem datus hic pulvis : recipe coralliorum, salis absynthii, mercurii dulcis ana drachmam, olei caryophyllorum guttas sex, laudani opii grana quatuor. Sumtus is quotidie, bis, eodemque intra triduum consumto, salivatio oborta, postquam febris discessit. Sed periculi non expers erat salivæ fluxus, quum per quatuordecim integros dies, quotidie sæpe ad mensuras duas, succederet, æger neque somnum capere, nec solidi quicquam assumere posset, manus & pedes frigerent, faucium & gingivarum caro mirum tumeret, foetidissimus exspiraretur halitus, corpusque debile & marcidum redderetur. Hinc pedes immissi ter quotidie pediluvio, ex vino, aqua & herbis aromaticis. Alvus subducta clystere ex floribus chamomillæ, herba melissæ, origani, salviæ, oleo chamomillæ cocto, cum sale communi. Interius la-

xante ex manna, cassia, rhabarbaro & foliis fennæ. Potui datum decoctum ex sarsaparilla, china radice, ligno juniperino & mastiche, cum regimine sudorifero. Fauces elotæ decocto salviæ, menthæ crispæ, florum rosarum rubrarum, balaustiorum, sambuci & radice plantaginis, ex vino, adjecta postea essentia mastiches & myrrha. Et circa somni tempus oblatus pulvis bezoardicus cum theriaca coelesti & oleo ligni assafras. His intra mensem sublata omnia & æger ad sanitatem traductus.

### *Epicrisis.*

I. Abusus acidorum & pomorum citriorum tertianam in quartanam commutavit utique. Fixiorem enim & lentam reddidit febris materiam, simulque primas vias acidorum & ponticorum succorum copia opplevit. Et hinc etiam ratio subsequentiū incommodorum petenda.

II. Ex vero scribit *Willisus de febb.* quartanarios promptos esse ad salivationem, ex levi etiam mercurialium dosi, & quartanam etiam sæpe salivatione solvi. Utrumque confirmatur hoc casu. Ratio vero cur tam facilis sit in quartana, ac uti ego observavi in tertiana etiam, salivatio, hæc mihi videtur, quod, qui eadem decumbunt primam regionem, salis, acidis partim, partim biliosis acribus succis, gerunt obsessam, a quorum faldedine mercurialium vis mire intenditur. Neque tamen reticendum, enormis in nostro agro salivationis causam potissimum fuisse, quod mercurius dulcis cum coralliis in calcem ustis & sale absynthii intensius tritus fuerit atque commixtus. Inter omnis enim generis salia, fixa potissimum alcalina, cum mercurialibus pessime miscentur, & validiori tritu, drastica, humores salivales & lymphaticos fortiter commoventem facultatem, acquirunt. Memini etiam paratum a medico in contumaci quartana decoctum, ex cortica chinæ, sale tartari, terra solita tartari, mercurio dulci & aqua communi, vix coercibilem concitasse salivationem. Idem contigisse novi in quartana oblato mercurio dulci cum specifico *Mynsichti*. Hinc auctor sum,



sum, ut, qui tuto uti velit mercurialibus, eadem nunquam triturando exactius misceat cum salibus, vel salia prorsus omitat.

#### OBSERVATIO IV.

Robustus & plethoricus vir, vitæ sedentariæ cum crassiori *Quarta-*  
 victu addictus, animi affectibus indulgens & ab anno hæ- *na china*  
 morrhoidarius, Octobri mense, sine præcedente externa cau- *cortice &*  
 sa, inhorrescere coepit, lassitudine corporis & contusivo ar- *corrupta*  
 tuum dolore affligi, pituitam viridem copiosam evomere, cum *& sana-*  
 insigni præcordiorum angore, subsequutus calor universi cor-  
 poris, cum cephalalgia, cuti arida & urina naturali. Quar-  
 to die hæc recurrerunt, ideoque Medicus quartanam esse ju-  
 dicavit & elixirium amarum cum spiritu salis ammoniaci, nec  
 non infusum herbæ thee, ante paroxysmum, largiter ingerere  
 jussit. Sed ingravescente inde morbo, ad specifica magis de-  
 scendit, & chinam chinæ, tam intermissionis, quam paroxy-  
 smi tempore, liberali manu porrexit. Licet etiam pectus in-  
 de longe gravius opprimeretur & vires corruerent, eodem  
 tamen institit, eo cum effectu, ut alvus pertinacius obstiparetur,  
 vomitus in paroxysmo cum mirifica anxietate erumpe-  
 ret hocque non succedente, lypothymia plane ingrueret ac fe-  
 bris in continuam videretur mutata. Ascitus igitur alius medi-  
 cus, qui venæ sectionem instituens, paroxysmum effecit illico  
 mitiorem. Intercalaribus postea diebus infusum leniter eva-  
 cuans, ex foliis senæ, radice cichorei, herba taraxaci, passulis, tar-  
 taro tartarifato, & sirupo rosarum solutivo, ex vino, per qua-  
 tuor vacuos a febre dies sumendum suavit. Præcepit etiam  
 ut clystere emolliente alvina regio expurgaretur ac ipso in pa-  
 roxysmo dorsi spina & pedes linimento nervino inungerentur.  
 His deferbuit magis adhuc febris, dolor osteocopus sublatus,  
 urina reddita largior & sudor liberalius prodire coepit. Trans-  
 actis autem sic quatuor septimanis, pulverem supra descriptum  
 ex martis limatura, cortice chinæ, mercurio dulci &c. duode-  
 cim dosibus obtulit, expirante sensim febre & agro, consum-  
 to hoc pulvere, ad perfectam sanitatem redeunte.

*Epicrisis.*

Docet hæc historia, perniciosum esse specificorum usum ante correctionem & evacuationem humorum nocentium, præstabilem vicissim leniter evacuantium, nec non pulveris ex aperientibus metallicis cum chinchina, facultatem. Et certe tutissimus cortex hic est, si cum laxantibus & diaphoreticis propinatur. Neque enim alia ipsius ratio ac opii, cujus soporifera virtus adjectis purgantibus, sudoriferis, vel etiam diureticis & analepticis, ita cicuratur, ut in innoxium quasi temperamentum redigatur. Hinc serio auctor sum, ut febrifugum hoc, præsertim in corporibus vi cerum obstructione & infarctu laborantibus, nunquam solum, sed aperientibus præmissis, vel iis nuptum, exhibeatur.

## OBSERVATIO V.

*Quartana  
purgatio-  
ne curata*

Quum anno c1710ccxix, ob siccum & calidum per integros tere quinque menses regnantem aërem, heic grassarentur febres varii generis, quartana etiam correpta fuit juvenicula sanguinea mollioris & laxioris carnis. Post quartum paroxysmum Chirurgus per sectam in brachio venam largiter sanguinea, subtraxit & die post pilulas dedit valide purgantes, quibus intra nycthymeron vigesies dejectum. Perstitit hic alvi fluxus per aliquot dies cum torminibus, licet non tam numerosis sedibus, ac demum sanguis plane cum muco secessit. Febris autem inde mitior facta & postea plane discussa. Cruentum etiam alvi profluvium, potibus demulcentibus ex floribus chamomillæ, sambuci cum lacte, item pulvere antidynterico *Klapperbeinii*, ex bolo Armena & cortice chaccarillæ composito, feliciter sublatum.

*Epicrisis.*

Frequentes hoc anno erant & dysenteriae, & varii generis febres, ex una eademque causa, impuris nempe, excrementitiis, acribus, biliosis sordibus in corpore genitis perspiratione suppressa retentis atque in primis viis & duodeno potissimum collectis, quæ postea transmis-

sa ad sanguinem vel per intestina, vel per habitum corporis motu febrili, critice quasi expulsa fuerunt. Secta igitur in febriente hac vena, perspiratio fuit imminuta, per drasticum purgans autem impetus humorum ad intestina proritatus, factaque ibi majori acris biliosae materiae excretionem, febrilis spasmus, ab hac suscitari solitus, cessavit. Nam sub eadem epidemica febrium affectione observavimus, dysenteriam praepostere cohibitam, febres curatu admodum difficiles induxisse.

### OBSERVATIO. VI.

Sub principio autumnii, quo frequens erat quartana, invasit etiam solitis pathematibus plebejum juvenem, post copiose ingestum potum corporisque refrigerationem statim ab ira. Superato quinto paroxysmo, tria tartari emetici & quinddecim tartari vitriolati grana, sex ante accessionem horis data, quibus cum magna praecordiorum anxietate puitosum liquamen cum bile evomuit. Ex eo in quotidianam quae typum non servabat conversa est febris. Oblati igitur pulveres absorbentes, salini, nitrosi & cinnabarini. Inde febris brevior & mitior, alvus fluxa & sudor declinante impetui largus. Elapsis aliquot hebdomadibus, debito tempore ac dosi usurpatum electuarium febrifugum & febris successively abacta. Sed quum liberatus obvia quaevis ingereret, corpus a frigore non defenderet, rediit febris, quae tamen post aliquot paroxysmos, balsamo vitae ad XXX. guttas, in duabus aquae menthae unciiis, tam ante, quam post paroxysmum, sumto, iterum discussa. Breves autem & haec erant induciae. Reconvalescens quippe appetitui liberalius indulsit, nec a frigore sibi cavit, ideoque in eundem recidit morbum. Dedi hinc consilium, ut grana XV. piperis albi leniter contusi, cum aliquot cochlearibus spiritus vini, quatuor ante paroxysmum horis ingereret & in lecto sudaret. Quo demum quater usurpato, factum, ut febris penitus discederet.

#### *Epicrisis.*

I. Febres, praesertim quartanae, in nullis frequentius recidivant, quam in plebejis. Hi enim neque diateticis le-



gibus obtemperare, neque ex præscripto Medici vivere sue-  
scunt. Unde plerumque tam ob cohibitam perspirationem,  
quam ingestos multos & graves cibos, promte iterum fo-  
mes colligitur febrilis. Ne igitur in morbum erumpat, vel  
emeticis superius, vel salinis deterfivis & balsamicis laxan-  
tibus inferius, educendus, vel etiam medicamento digerente  
stomachico præscindendus, cujus generis maxime est piper,  
in plebejis summopere proficuum.

II. Sudor ante paroxysmum convenienti remedio atque  
regimine prolectus, neutiquam nocet, sed ad febrem vin-  
cendam ejusque insultum arcendum, quam maxime salutaris,  
secus ac communis Medicorum fert sententia. Ego certe  
multis confirmatum habeo exemplis, sudore ante paroxysmum  
per accommodata medicamenta provocato, modo prima re-  
gio a fermento febrili prius exquisite depleta fuerit, cutis in-  
horrescentiam & spasmus, sine quo nullus subsequi potest  
æstus, fuisse prohibitum ipsamque febrem fugatam. Decu-  
manus etiam error est, febrilem materiam demum paroxy-  
simo finito expelli sudore. Tantum enim abest, ut febrem su-  
doribus post paroxysmum, vel intercalari die largis, cum sa-  
lute terminatam viderim facile unquam, ut potius, ipsi hi  
largi sudores debilitatem partium & atoniam cutis indicarint,  
corpus ad novum paroxysmum disponentem.

## OBSERVATIO VII.

*Quarta-  
na in quo-  
tidianam  
sepe red-  
euntem  
mutata.*

Puer decennis, facie lividus & pallefcens, abdomine  
turgidus, appetens tamen ciborum, ex refrigeratione sub  
aura vespertina contraxerat quartanam. Opponebantur  
amara in essentiam redacta. Sed aucta inde appetentia cor-  
porisque nocturna denudatione accedente, in quotidianam  
post decem paroxysmos transiit febris. Hinc datæ alternis  
diebus pilulæ nostræ in vehiculo liquatæ, & cerevisiæ potan-  
dæ mensuræ indita bina cochlearia liquoris ex salis tartari,  
nitri, salis ammoniaci, arcani duplicati ana drachmis  
duabus, in aquæ fontanæ libra liquefactis & decem ex-  
tracti croci granis adjectis. His intra trium hebdomadum

decursum febris discussa, abdomen detumuit atque ex facie livescens color deterfus. Sed post quatuor hebdomades rediit febris quotidie, quæ quidem iisdem brevi profligata, post duos autem menses denuo repetiit, iisdemque iterum fuit abacta. Quia autem animadverti, causam tam crebræ recidivæ esse neglectum post febrem remediorum usum & diætam insalubrem, serio dulcibus, acidis, lacticiniis, caseo, fructibus horæis interdixi, ac præcepi, ut ternis minimum diebus aliquandiu pilulis & liquore superius dicto insisteretur. Sic demum febris expugnata & puer ex voto convaluit.

*Epicrisis.*

Ægre ex quartana levantur pueri, crebras experiuntur, etiam post longum tempus, recidivas, vel alios longos ex ventriculi imbecillitate morbos, vel etiam catarrhales defluxiones lentasque febriculas incurrunt. Interest igitur, ut tempestive statim in principio imminetia mala præscindantur. Ego quidem ut plurimum vacuantibus medicationem cum successu exorsus sum. Ad alvum purgandam frequens mihi fuit pulvis Cornachinus, ex cremoris tartari drachma, antimonii diaphoretici granis XII. & diagrydii sulphurati granis sex, cui interdum nitri paucillum addidi. Hunc in tres doses divisum, ter, sex horis ante accessionem porrexi. Si vero nausea & conatus vomendi adfuit simul, dimidium tantum tartari emetici granum uni dosi admiscui. Sic expurgata fordium colluvie, infusum roborans, die vacuo omni bihorio ad cochlear unum, dedi sic paratum: recipe corticis chinæ unciam semis, chacarillæ terræ foliatæ tartari, salis tartari ana drachmam, infunde unciis octo aquæ cardui benedicti, colaturæ adde julepi rosarum unciam semis. M. Si his febris non discessit, indicio fuit infarctus viscerum, aut obstructionis glandularum in abdomine. Ad hanc submovendam usurpavi liquorem salinum supra descriptum, parca, sed repetita dosi, simulque pro potu præbui decoctum diluens atque aperiens. Præparatis autem hac ratione primis viis & visceribus referatis, non dubitavi,  
præ-

praesertim mitiore & brevior jam facto paroxysmo, febri-  
lem compescere spasum. In quo quidem conficiendo, tam  
in puerili, quam juvenili aetate, tutissimam inveni metho-  
dum *Helvetii*, per clysterem ex decocto corticis chinæ, bis,  
vel ter, intercalaribus diebus injectum, praemisso tamen, ad  
educendas prius sordes, clystere emolliente. Sic percurata  
fuit febris demum, neque unquam rediit, si modo conva-  
lescentes sibi caverunt a refrigeratione, instantibus & alvum  
constipantibus.

## OBSERVATIO VIII.

*Quartana  
in sene  
funesta.*

Senex generosus octogenarius, per omnem vitam rari-  
us morbis affectus, vesperti, post improvisum terrorem & su-  
peringestum cibum, horrore & frigore corripiebatur, quod se-  
quebatur calor, ut noctem duceret insomnem. Redibant hæc  
quarto die graviora, capitis dolore, artuum languore & præ-  
cordiorum anxietate stipata. Interim vacuis diebus sic satis  
bene habebat æger, somnum & cibum capiebat. Post se-  
ptimum paroxysmum consultebatur Chirurgus, qui bis ante  
paroxysmum porrigebat emeticum, intermedio tempore pul-  
veris acris salinis, cum zingibere & radice ari, febrem op-  
pugnabat & potui suadebat decoctum lignorum temperatum.  
Invalescebant hinc paroxysmi, inquietudo, sensuum torpor  
ac mentis plane emotio accedebant, die vacuo etiam persiste-  
bat capitis dolor, virium & artuum languor, cum calore præ-  
ternaturali, & appetentia ciborum plane intercidebat. Vo-  
cabar nunc ego ad ægrum per binos jam menses febre de-  
cumbentem, nil vero ob plenariam & alimentorum & medi-  
camentorum nauseam efficere poteram. Interim quia alvus  
adstricta & inflatio ventriculi cardialgica angebat, suadebam  
ut clyster injiceretur emolliens, cum carminativis & stimulo  
salino, quo levamen & somnus procuratus. Carpis etiam  
emplastrum ad imitationem Strobelbergeriani imponi jube-  
bam, quo mitior fiebat accessio. Interne nil nisi elixir tem-  
peratum balsamicum dabam, inprimis quum a salinis deter-  
sivis majores semper præcordiorum anxietates oboriri vide-  
rem.



rem. Sed deficiente, ob nauseam ciborum, alimonia, febrisque, quæ in continuam quasi concedebat, diuturnitatem, vires demum penitus exhaustæ & mors sequuta, ita quidem, ut bini penultimi paroxysmi, intenso ac diuturno horrore, rigore, anxietate, anhelosa spiratione, mentis emotione corporisque jactatione, per quatuor vel quinque horas, cum pulsu admodum contracto & debili, insisterent, succedente postea calore & pulsus in celeriore mutatione, ultimus autem eadem quidem impeteret vehementia, sed nullus plane sequeretur æstus, & æger in ipso rigore atque frigore interiret.

*Epicrisis.*

Quartana febris, *Hippocratis* & *Celsi* effato, per se quidem secura est & neminem facile jugulat, immo, si rite decurrit, ad longævitatē ducit. Sed visceribus inflammatis, aut labe affectis, recte monente *Galeno in lib. III. epid.* enecat quamplurimos, sive ob aquam intercutem, sive omnimodam cibi abstinentiam. In pessimis enim est plenaria ejusmodi ciborum aversatio, & ego quidem putrescens tum quoddam viscus esse observavi. Dumque nihil alimenti assumitur, corpori viribusque subtrahitur pabulum, ut illud emaciatur & hæ elanguescant penitus. Tanto magis id accidit senibus & febre jam diu attritis. Dein senibus longæ ejusmodi febres, ex animi affectu ortæ, admodum sunt infestæ, & licet vires primum non adeo languidæ, cautissime tamen tractandæ, quum commissos in diætā, aut medicatione, vel leves errores, decrepiti graviter, haud raro capite plane, luant. Qui vero intermittentibus decedunt, sub vehementia febrilium spasmodum, qui fluida ad caput & interna vitalia organa urgent, ibique succos penitus consistere faciunt, per eunt, id quod non modo in quartanis, sed & quotidianis, si continuæ factæ, animadvertitur.

OBSERVATIO IX.

Juvenis, literarum perquam sub vita sedentaria studiosus, *Quartana sim-*  
Septembri mense, aëre pluvioso vespertino, iter suscipiebat, *plex pri-*  
in diversorio bene prandebat vinumque austerum, non adeo *mum,*  
(IV.) L bonæ postea du-

*plex, de-  
mum tri-  
plex cum  
tumore  
pedum,  
curata.*

bônæ notæ largiter bibebat. Vesperi domum rediens, paroxysmo afficiebatur febrili, cum artuum languore, qui quarto die gravior & cum majori præcordiorum anxietate redibat. Sumebat hinc ex consilio medici pulverem digestivum salinum, & in paroxysmo, temperantem nitrosum. Alvo inde sexies sine torminibus soluta, febris deservescerebat & levior reddebatur. Quum vero quinto post die, vesperi tempestate frigido-humida medicum relaturus successum ipse adiret, domum reversus, ex improvise novum febrilem experiebatur insultum, priori longe acerbiorum. Redibat idem postero die, tertius erat vacuus, quartus paroxysmum primi, quintus secundi respondentem, inferebat, ut sic quartana esset duplex. Alvus præterea erat stricta, ventriculus cardialgia premebatur, pedes tumebant ad genua usque totiusque corporis & faciei aspectus erat turgidus. Exhibebatur ipsi liquor salinus, alcalinus nitrosus, in & extra paroxysmum, & die intercalari pilulæ balsamicæ. Quibus alvus bis soluta & in simplicem rursus mutata febris. Insistebatur iisdem eadem ratione remediis, & subsequerebatur copiosus alvi fluxus, cum exquisitis circa umbilicum torminibus, & tam acria noctu æque ac interdiu secedebant, ut anus fere eroderetur. Durabat hæc diarrhoea per aliquot dies febrisque mitiorem insultum faciebat, sed tumor pedum cum gravitate & languore lumborum crescebant potius. Post usum mixturæ ex tinctura antimonii tartarisata, essentia chaccarillæ & spiritu cornu cervi succinato, adhuc quidem febris mitescebat, sed languor corporis, cum inappetentia, lurido aspectu & pedum tumore, metum incutiebat haud levem. Datum igitur extra paroxysmum electuarium ex rob sambuci & juniperi, cortice chinæ & cascarillæ, extracto centaurii minoris, cerussa antimonii, sale cardui benedicti, cum spiritu salis ammoniaci, quo ager illico sensit virium incrementum, stomachus melius appetiit, obtusus & gravativus artuum dolor discessit, febris, post unum adhuc mitissimum paroxysmum, penitus cessavit, tumor quoque pedum sensim subsedit & elapso a primo

primo insultu mense, integra reddita fuit sanitas. Ad quam conservandam, præter exquisitam vitæ ac diætæ rationem, pilularum balsamicarum & elixirii stomachici usus commendatus, & sex jam elapsis septimanis, nihil plane visum est incommodi.

*Epicrisis.*

Plura ex hac observatione in usum decerpenda. Elucescunt inde procataciticæ causæ, quibus conspirantibus, intermittens febris excludi possit, aëris nempe conditio, sub qua tertianæ & quartanæ jam erant frequentes, imbecillis ex studiorum intemperantia & vita sedentaria ventriculus, perspiratio ab aëre vespertino, frigido humido intercepta & stomachus cibi ac potus minus salubris copia refertus. Alvo dein, & naturæ, & medicamentorum ope, soluta, paroxysmus fractus, concessione autem in auram vespertinam frigido-humidam rediit mox, eo quod recrementa halituoza ac sulphureæ indolis, per poros elabi solita, retroacta & ad primas vias ceu imbecilles partes delata, febrilem rursus constituerunt fomitem. Quod autem simplex quartana in duplicem concessit, id mea quidem sententia, factum a nimis copiosa sentina succorum vitiosorum, in ventriculo, propter ipsius imbecillitatem confluentium. A quibus tamen natura suo robore, arte adjuta, per crebriores sedes se exoneravit, junctis simul ventris torminibus. Porro notabile & hoc, quod succedente copioso alvi secessu, tumor tamen enatus fuerit, imo increverit, luculento indicio, copiosas affuisse cruditates magnamque viscerum ac partium externarum atoniam. Hinc sumto electuario insigniter roborante, redditoque per illud ventriculo & primis viis robore, vires sensibilibiter cum appetitu restitutæ, febris fugata, tumor successive subsedit & sanitas perfecte revocata. Ut adeo pateat, tumorem pedum, sub ipsa febre oborientem, non sic esse pertimescendum, ac eum, qui post febrem, præsertim male curatam, succedit. Specificorum etiam antifebrilium & roborantium, quæ inter primas utique tenent chinæ & chaccarillæ cor-



læ cortex, usum, felicius longe succedere, si corporis partes ipseque ventriculus atonia potius, quam strictura affectæ, & humorum potius copia, quam virulentæ indolis exiguæ molis materia, in vitio est.

## OBSERVATIO X.

*Auctoris  
methodus  
curandi  
quarta-  
nas.*

Plures hæctenus speciales, de felici, æque ac infelici quartanæ curatione, enarravi practicos casus. Quibus addenda adhuc illa observatio, quam in *Medicine consultatoria tomo IV. Dec. V. cas. VII. pag. 321.* de quartana in gravida feliciter curata, adduxi. Jam non abs re erit, brevibus adjicere, qua ego in sananda hac febre ut plurimum usus sum methode. Nimirum primum fuit, ut ad contemperandos acidos salso, & liquandos viscidos succos, nec non obstructions referandas, ter vacuo die, & una vel altera ante paroxysmum hora, cum haustu cerevisiæ tenuis, præberem cochlear liquoris salini, ex sale tartari, ammoniaci, nitro, tartaro vitriolato, sive arcano duplicato & cortice cascarillæ singulorum uncia semis, soluta in libris duabus aquæ cardui benedicti, sive chamomillæ vulgaris, adjecta demum drachma dimidia extracti croci. Superato tertio paroxysmo, elixirio usus sum antifebrili, ex radice pimpinellæ albæ, contrayeræ, vincetoxici, ligno colubrino, cortice chaecarillæ ana uncia semis, extracto cardui benedicti, scordii, salis tartari ana drachmis duabus, extractis cum spiritus theriacalis & liquoris anodynæ mineralis ana uncia, spiritus vini tartarificati octo, aquæ florum sambuci quatuor uncis. Dando illud post paroxysmum ter quotidie, ad quinquaginta, vel sexaginta guttas, cum potu calido, ad sudorem placide eliciendum. Discessit hinc sæpe febris: Quando vero persistit, infusum laxans superius descriptum, diebus intercalaribus mane exhibui, & vesperti modo dictum liquorem salinum. Post aliquot autem dies electuarium febrem fugans, ex rob sambuci, juniperi ana uncia, corticis chinæ, chaecarillæ ana uncia semis, extracti centaurei minoris, salis ammoniaci, antimonii diaphoretici ana drachma, julepi rosarum uncia una cum dimidia, exhibui

exhibui tempore a paroxysmo vacuo, bihorio quovis, magnitudine nucis moschatae. Si etiam interea alvus officii oblita, clystere domestico eam ducere jussi, vel elixirium, ex massae pilularum balsamicarum uncia semis, soluta in unciis quatuor aquae fumariae, cum uncia olei tartari per deliquium, ad centum guttas porrexi. Discussa sic febre, ad recidivam declinandam, octiduo semel deglutitae pilulae balsamicae, vel a robustioribus efficaciores, ex gummi ammoniaci, extracti hellebori nigri, croci, mercurii dulcis, cinnabaris ana drachma, trochiscorum alhandal drachma dimidia, triginta granorum pondere sumtae. Usurpatum praeterea quotidie elixir stomachale & injunctum exactum in vita victuque moderamen. Nunquam fere sic rediit febris. Si vero forsitan id factum, vehte opus fuit. Ideoque aggressus eam sumemetico, ex radice hypecuanhae, vitriolo cyprio & croco, ac subjungendo statim electuarii usum, penitus expugnavi. Qua etiam ratione, me multoties quartanam epidemicam & ex ingluvie ortam, in plebejis potissimum, prima in herba jugulasse, testor.

### *Epi-crisis.*

Methodo hac frequentius summo cum fructu quidem usus sum, nihilominus illud adjiciendum in gratiam eorum, qui praxin cum judicio & sufficiente ratione exercere nituntur, putavi, ut non talem methodum in ullo morbo universalem medendi dari autument, quae perpetua sit & in omnibus casibus & circumstantiis promiscue applicari possit. Illud enim satis serio inculcare soleo meis auditoribus, nec remedia adversus morbum, certae semper efficaciae, nec unam eandemque medendi dari methodum, sed individuaem & specialissimam, ex sollicita historiae morbi & maxime corporis aegrotantis & morbificae causae exploratione, praevia sufficienti meditatione & deliberatione, inveniendam esse, quae in eo consistit, ut non modo remedia, quibus utendum sit, cognoscantur, sed & quo ordine, qua dosi, quo tempore & quamdiu cum iis continuandum, exquisita ratione & experientia, qua

optime vires & remediorum virtutes perspiciendæ & addiscendæ, judicetur.

## CAPVT III.

DE

## FEBRE QVOTIDIANA

THESES PATHOLOGICAE.

## §. I.

*Quotidiana quæ dicatur.* **E**T quartana, & tertiana, ex intermittentibus rarior est quotidiana, quæ scilicet singulis diebus accedit & solvitur, subsequente postea aliquot horarum intermissione.

## §. II.

*Legitima typus & historia.*

Accessio hujus febris primo mane, hora circiter quarta, aut quinta, evenit, cum frigore & horrore, sine rigore tamen. Sub hoc cardialgica præsto est nausea & ventris inflatio, in nonnullis capitis dolor, in aliis animi defectio, in plurimis vomitus, vel alvi secessus, vel etiam utrumque. Excipit postea calor magis lentus, quam mordax, cum siti minus intensa. Pulsus, inordinatus antea & debilis, increbescit, non adeo durus tamen est, sed mollior. Neque urina flammea, sed potius cruda ex citrino turbida. Multis etiam insuperabilis fere in somnum proclivitas. Paucus demum prodit sudor. Et elapsis decem, vel ultra horis, discedit paroxysmus, corpus hebes & grave relinquens, statim postero die hora reversurus.

## §. III.

*Quandoque notha & vaga.*

Sic quidem incedit & decurrit febris exquisita quotidiana intermittens. Quæ verò typum hunc non servat, sed vel meridie, vel circa vespèram, vel etiam vago invadit tempore, notha appellatur, erratica, aut anomala.

## §. IV.

*Epidemica.*

Irregularis hæc quotidiana, haud raro observatur epidemica. Tum nempe, quando irregularis ac inordinata diuturna tem-



na temporum anni fuit constitutio. Ego quidem, post continuum intensum aestate anni MDCCXXVII. & XXIX. calorem, obortas vidi, pro diversa corporum constitutione, tam diarrhoeas & dysenterias, quam varii generis intermittentes febres, & inter has potissimum quotidianas.

## §. V.

Intermittens autem est, de qua agimus quotidiana, ideo *Differt a* que non permutanda cum quotidiana continua. Quae qui- *quotidia-* dem pariter prima luce cum frigore accedit, sed calor & lan- *na conti-* guor, cum pulsu celeri ac debili, inappetentia & interdum *nua.* colliquativus sudor, per totum reliquum tempus durant. Et si longior, ut plurimum funesta, ægris, fractis penitus viribus, sub ipso frigore pereuntibus.

## §. VI.

Neque etiam confundenda cum catarrhali. Hæc quip- *A catar-* pe benigna, vesperi cum leniori refrigeratione accedit, mane *rhali be-* deservescit & catarrhosis defluxionibus satis est conspicua. *nigna &* Et maligna ex repentina insigni virium prostratione, & agry- *maligna-* pnia facile innotescit, neque penitus intermitte, sed tantum remittit.

## §. VII.

Differt quoque ab aliis intermittentibus. Quando enim *Tertiana* ex tertiana simplici fit duplex, singulis etiam diebus impetit *duplici-* paroxysmus, sed insultus tempora alternatim sibi respondent, aliæ sunt causæ, alia medicatio.

## §. IIX.

Si ex quartana insultus quotidianus, triplex dicitur quar- *Quarta-* tana, & paroxysmus non quotidie eadem hora venit, sed quarto *na tri-* quovis die, quoad accessionis terminum, conspirat, diversa *plici.* etiam, ob diversas causas, ineunda medendi ratio.

## §. IX.

A lenta demum febre distinguitur, quod illa post pastum *Est lenta.* & circa noctem sine horrore obrepat, cum calore in volis manuum plantisque pedum, noctu etiam magis affligat sudore stipata, mane vero tepescat, nec tamen penitus intermittat.

## §. X.

## §. X.

*Ejus  
causa.*

Jam sicuti omnis febris proxime nervosi generis est affectio; ita formalem pariter quotidianæ rationem spastica nervosarum partium & systematis vasorum agitatione absolvi, indubium plane. Hic autem præternaturalis febrilis motus, per materiam, a naturali & blanda humorum vitalium indole plane alienam, ad sanguinem delatam, nec tamen cum ipso miscibilem, inducitur.

## §. XI.

*Ex vitio  
viscerum.*

Nimirum primæ sic dictæ viæ, ventriculus, duodenum & potior jejuni valvulosi portio, sunt illud latibulum, in quo vitiosa materia fermenti instar hospitatur. Inde per vasa lactea ad sanguinem & succos transmittitur, & cum his ad sentientes internas partes delata, easdem exagitat & ad extraordinarium motum excitulat. Et certe in quotidiana etiam febre, primam maxime regionem, varii generis vitioforum, corruptorum, viscidorum, acido-bilioforum succorum faburra, scatere, plura sunt quæ uberius evincunt. Etenim junguntur ipsi ordinario fere ructus, nausea, cum conatu vomendi, inappetentia, cardialgica inflatio, præcordiorum angustia & pectoris oppressio, interdum tenuis, pungitivus ac morficans dolor, ad dorsum excurrens. Foedus dein ut plurimum & ingratus sapor in ore percipitur, quandoque amaricans, aliquando subdulcis nauseosus, nonnunquam nidorosus plane. Ipsa demum febris naturæ beneficio per crebriores dejectiones alvi sponte haud raro solvitur, in artificiosa autem medicatione, per superius & inferius os evacuantia, cum stomachicis, utramque faciunt paginam.

## §. XII.

*Sedes in  
primis  
viis.*

Quia ramen longior ut plurimum hæc est febris & ad plures sæpe menses trahitur, justa utique suspicio est, labem in imi ventris penetralibus subesse firmiter radicatum. Organa quippe secretoria, glandulæ & glandulosæ intestinorum tunicae, remissa nimis sunt atque laxata, ideoque loco subtilis lymphatici salivalis succi, copiosum ferosum impu-  
rum

rum plorant. Reliqua quoque sanguinis depurationi dicata viscera, hepar, lien & pancreas, ob dejectum robur & languidiorem per ipsa sanguinis progressum, succum lymphaticum & biliosum minus purum in digestionis officinam mittunt. Hinc alimentorum solutio & chyli elaboratio turbatur, multæque serosæ & corruptæ cruditates prima in regione & gignuntur, & cumulantur, quæ ipsa mora deterioris indolis factæ, & ad sanguinem delatæ, febrilem uti diximus faciunt motum.

## §. XIII.

Quod autem crebrius, quam in aliis intermittentibus, *Cur quotidiana insultus.* febris insultus in quotidiana impetat, ob eminentiorem primarum viarum imbecillitatem fieri arbitror. Hæc enim quam maxime cruditarum proventui favet, & facit, ut promte eadem istuc confluant, cito ibi colligantur, breviori etiam tempore sanguinis massam subeant & ad nervosas spinalis medullæ membranas deferantur.

## §. XIV.

Hinc igitur porro est, quod omnia quæ viscerum flacciditati inducendæ & crudorum ac impurorum succorum proventui favent, ad hanc febrem sternant viam. Insidiatur *Cause antecedentes & subjecta.* potissimum hominibus segnioribus, otiosis, inordinata & cruda diæta utentibus, crapulæ ex cerevisia, nec non mœrori ac curis nimium indulgentibus, item qui debilem ob prægressos morbos, vel sanguinem effusum, nacti ventriculum. Frequentius etiam infestat hiberno, autumnali nubilo cœlo, senes magis & pueros, feminas plus quam viros, pituitosos, phlegmaticos & sanguineos, præ biliosis & melancholicis. Ex aliis quoque intermittentibus prompta ipsius genesis. Tum scilicet, quando æger incongrua vorat, vel crebrius animo movetur, quando purgantibus & emeticis validioribus stomachi robur atteritur, anodyna, calida & spirituosus usurpantur, aut pensæ habita primarum viarum repurgatione, adstringentia & specifica præpostere adhibentur.



## §. XV.

*Exquisi- Ceterum quotidiana exquisita, ex viscerum atonia ori-*  
*ta longa, unda, longius ut plurimum trahitur multumque negotii Me-*  
*vaga non.* dico faceffit. Quæ vero vaga, populares habet circuitus  
 & succorum tantum vitio debetur, facilius sanationem  
 recipit.

## §. XVI.

*Continua Minus dein periculosa est, quæ plenariam paroxysmi*  
*propin-* habet intermissionem. Sed quæ ad continuæ indolem incli-  
*qua ma-* nat, & soluta febre, languor tamen virium, cum pulsuum de-  
*gis an-* bilitate & frequentia persistit, corpusque sudore diffluit, ita,  
*ceps,* si ad aliquot menses producit, vires enervat, ut æger haud  
 raro succumbat.

## §. XVII.

*Ex inter-* Quæ etiam ex intermittentibus, præsertim quartana,  
*mittenti-* succrescit, rebellis & periculi plena est, præscio jam *Celsi lib.*  
*bus peri-* III. c. XV. testimonio : *quartana, inquietis, neminem jugu-*  
*culosa.* *lat, sed si ex ea facta quotidiana, in malis æger est.* Magnum  
 enim viscerum vitium subesse indicat & continuæ plerumque  
 est propinqua.

## §. XIX.

*Si excre-* Quando incipiente accessione biliosi & pituitosi vom-  
*tiones* tus, vel secessus, eveniunt, bonum, nisi forsan ex febris diu-  
*adsunt,* turnitate vires jam nimium fuerint exhaustæ. Sudor quo-  
*bonum.* que declinante paroxysmo placide erumpens & urina post  
 febrem copiosior cum sedimento secedens, vehementiam  
 insultus minuunt febrisque felicem solutionem nunciant.

## §. XIX.

*Si nulle* Contra ea, ubi excretio nulla, febris etiam per longum  
*malum.* nimis tempus detinet, viscera demum labem contrahunt &  
 cachexiæ, febres lentæ & hæcticæ, tabes, in dispositis etiam  
 phthises, succedunt.

## §. XX.

*Ex per-* Idem perquam facile evenit, quando adstringentia &  
*versa me-* specifica febrifuga præpostere adhibentur. Et si calidoribus  
*dicatione* aliis mor- sudo-  
*bi.*

sudoriferis & essentiis alexipharmacis spirituosius acria ex prima regione recrementa in sanguinem aguntur, expeditus in continuam, cum sudore perpetuo & virium jactura, est transitus.

## §. XXI.

Qui autem hac febre demum decedunt, in his frigus *Mortis* longe intensius ac magis diuturnum, cum rigore, virium pro-*signa* stratione mentisque turbatione. Hoc plerumque bis adhuc excipit calor, sub tertio autem insultu, pulsuum ictus debiles manent & inæquales, ipsumque frigus in rigorem transit e-mortualem.

## INDICATIONES CVRATORIÆ

CVM

## METHODO MEDENDI GENERALI.

## §. I.

**Q**Uum itaque causæ quotidianæ intermittentis, cruditatum *Indica-* seroso viscidarum prima in regione saburra, viscerum *tiones* & glandularum flacciditate & impedito sanguinis per imum *curatoria* ventrem progressu contineantur; omnis omnino medicatio *tres.* merito eo dirigenda: ut I. impuri illi & pravi succi e primis viis, præparati prius, per congrua emunctoria proscribantur; II. viscera a tono dejecta roborentur & sic cruditatum ulterior proventus arceatur; & III. liber sanguinis per viscera abdominis & intestinorum canalem, tanquam digestionis & chyli elaborationis officinam, circulatio restituatur.

## §. II.

Primum ut ex voto perficiatur, laudata est virtus inci-*Profunt* dentium & abstergentium, & quidem salium neutrius generis, *salia* inter quæ primas tenent sal ammoniacum depuratum, dige-*neutra.* stivum *Sylvii*, ex capite mortuo spiritus salis ammoniaci urinosi, tartarus vitriolatus, arcanum duplicatum, sal Ebshamense, Sedlicense, nitrum antimoniatum. Dein commen-

*& acria  
aroma-  
tica.*

danda etiam quæ fale acri aromatico pollent, uti radix ari, calami aromatici, pimpinellæ albæ, costi veri, zedoariæ, cannella alba, zingiber, piper album. Quæ in pulverem redacta, salibus dictis mixta, & adjecta una vel altera guttula olei carminativi, egregiam suggerunt medicinam antifebrilem.

### §. III.

*Pilula  
balsami-  
ca cum  
salibus.*

Ad primæ æque ac secundæ indicationis scopum obtinendum, exturbandas nempe leniter per alvum sordes, roborandum simul tonum ventriculi & intestinorum eorumque turbatum motum restituendum, salubritatis laudem merito ferunt, pilulæ balsamicæ Beccherianæ, Stahlianæ & nostræ, massa etiam pilularum aloephanginarum, de succino *Cratonis*, item *Solenandri*, præsertim si unacum ipsis salibus offerantur.

### §. IV.

*Amara &  
roboran-  
tia.*

Potissimum vero ad reddendum visceribus abdominis robur ac impediendum impurorum succorum in digestionis officinam affluxum, ex usu sunt elixiria amara cum martialibus mixta, uti quidem est meum temperatum balsamicum, sine spiritu vini paratum, cum liquore alkalino. Vel essentia chaccarillæ cum essentia gentianæ mixta. Vel etiam elixiria stomachica, uti nostrum, vel *Michaëlis*, additis aliquot guttis tincturæ martialis, ex floribus salis ammoniaci martialibus, cum spiritu corticum aurantium rectificato faciæ.

### §. V.

*Therma  
inprimis  
& acidu-  
la.*

Et his quidem etiam promovetur egregie sanguinis per abdominis vasa ipsamque digestionis officinam progressus. Interim si refractaria admodum febris, repetit & ab inordinata diætâ sustentatur, omnia salubritate antecellunt medicatæ aquæ, thermæ potissimum atque acidulæ, uti Carolinæ & Egranæ tepesactæ, quæ debito cum regimine, intermixtis amaris, balsamicis & anticachecticis, usurpatæ, viscidas sordes diluunt, per alvum & urinam cum serosis evehunt, infarctus expediunt liberumque sanguini reddunt com meatum.



## §. VI.

Specialis autem medendi cum hisce præfidiis metho-<sup>Methodus</sup>  
 dus, pro temperamentorum, ætatum, anni temporum ratio-<sup>medendi.</sup>  
 ne, corporum constitutione, dispositione primarum viarum,  
 sexu morbique causa, instituenda, & singulis his, tam dosis re-  
 mediorum, quam sumendi ratio accommodanda. In genere  
 tamen tenendum: horis a paroxysmo vacuis pulveres salinos  
 cum incidentibus esse exhibendos, tertio vel quarto die ven-  
 trem solvendum pilulis, ita tamen, ut operatio earum acce-  
 dente paroxysmo, jam sit absoluta, declinante paroxysmo  
 erupturum sudorem quiete & calido potu esse promovendum,  
 ac demum subjungenda roborantia, amara, martialia & an-  
 tifebrilia. De quo tamen plura in cautelis & morborum  
 enarrationibus.

OBSERVATIONES ET CAUTELAE  
CLINICAE.

## §. I.

Q Uotidianæ intermittentes circumspecte sunt tractandæ, Medica-  
 ne in alios longos & ancipites morbos transeant. In-<sup>tio cante</sup>  
 primis aspernantur adstringentia & sopientia, præcipitantia <sup>institu-</sup>  
 terrea larga, item omnia purgantia drastica & sudorifera, <sup>enda.</sup>  
 nec non validiora emetica.

## §. II.

Multum tam ad quotidianæ curationem, quam recursum <sup>Vitus &</sup>  
 ipsius arcendum facit, vitare animi commotiones, moero-<sup>vita ratio</sup>  
 rem inprimis ac diurnam sollicitudinem, cum insalubri cibo, <sup>habenda.</sup>  
 ac vini potu, nec non refrigerationem, præsertim abdominis.

## §. III.

Quum natura ipsa hanc febrem critico alvi fluxu sæpe <sup>Albina</sup>  
 solvere soleat; ipsius ductui insistendum ipsaque juvanda ab <sup>excretio</sup>  
 artifice. Unde ægri non ad regimen sudoriferum, aut phar-<sup>promo-</sup>  
 macis ad sudorem cogendi, sed potius eo annitendum, ut ma-<sup>venda.</sup>  
 teria vitiosa ipsæque primæ viæ ad alvi fluxum salutarem præ-  
 parentur ac disponantur. Quod quidem egregie perficitur,  
 M 3 quando

quando aliquot ante paroxysmum horis, lene laxans, pulvis cornachinus, vel pilulæ balsamicæ, cum sale præbentur.

## §. IV.

*Vomitus  
secun-  
dandus.*

Quia porro vomitus huic morbo jungitur, cum bonis ægrorum rebus succedens: e re est, ut idem debito tempore & convenienti medicina secundetur. Hinc expedit interdum omnino stomachi subversionem per emetica ante paroxysmum data provocare. Ego quidem memini, me aliquoties in febre exquisitè quotidiana, quæ hora quinta matutina invadere solebat, porrexisse circa noctis tempus, prius quam cruditates ex digestionis officina ad sanguinem delatæ, lene vomitorium, ex radicis ipecacuanhæ granis XV. cum dimidia parte pulveris cornachini. Proritus inde felici cum successu fuit vomitus, nonnunquam alvi fluxus, & febris minimum mitior facta, aliis postea facile expugnanda.

## §. V.

*Etiam in  
diuturna.*

Si etiam quotidiana febris, diu perstitit per mensem, vel longius, ac in lentam ferme degenerare videtur, commode offerri potest granum unum tartari emetici soluti. Quo biliosum stagnantem succum, cum levamine, incredibili fere copia, fuisse exturbatum, novi.

## §. VI.

*Externa  
ventri-  
culo.*

Quando dolor ventriculi pressorius, vel inflatio & ciborum fastidium jungitur, regioni epigastricæ facculi ex herba menthæ, absynthii, rorismarini, floribus spicæ, chamomillæ Romanæ, caryophyllis & nuce moschata, vel sicci, vel ex vino cocti, applicandi. Qui, ubi finita etiam febre imponuntur, perspirationem & sudorem efficaciter eliciendo, egregie profunt.

## §. VII.

*Et epiga-  
strio im-  
ponenda.*

Frigus, quum nimis acre partes externas exagitat, tum facculi modo dicti, tum etiam spiritus vini purus, cum oleo menthæ in duplicato linteo stomachali regioni apponuntur cum fructu.

## §. IIX.

§. IIX.

Cum febrifugis caute in hac febre mercandum. In *Febrifuga*  
 quotidiana tamen epidemica & erratica, præter superius di- *cum di-*  
 cta, specifica etiam antifebrilia, ipsum quoque electuarium, *stinctione*  
 cujus basis chinæ & chaccarillæ cortex, tuto adhibentur. *usurpan-*  
 Provocata inde, observatorum etiam fide, alvi sæpe laxitas *da.*  
 & copiosæ summa cum euphoria sedes. Chaccarillæ autem  
 cortex in hac febre merito præferendus chinchinæ, quia ma-  
 gis roborans & adstringens est.

§. IX.

Sanguinis missionem raro admittit quotidiana. Jam e- *Nec non*  
 nim præsto est inprimis ventriculi imbecillitas & plerumque *venase-*  
 cachectici quippiam complicatur. Quod si autem eminens *ctio.*  
 plethora, præsertim a mensium, vel hæmorrhoidum suppres-  
 sione, urina præterea tincta & æger vini potui assuetus, in  
 principio statim vena secanda, ne febris inde ingravescat, ac  
 uti observata Medicorum testantur, lentæ, hæcticæ apostema-  
 tiçæ febres, subsequantur.

ENARRATIONES MORBORVM.

OBSERVATIO I.

Illustrissima persona, triginta annorum, inordinatum diu *Quoti-*  
 sectata fuerat vitæ genus, multa incongrua edulia ingesserat, *diana re-*  
 fructus horæos, lacticina, acetaria, variaque conchyliorum *bellis Ca-*  
 genera, Vina etiam potentia & aquas sic dictas vitæ libera- *rolinis*  
 liter potarat, prandium ad vesperam, & coenam ad mediam *expugna-*  
 usque noctem produxerat & præterea corpus frigido aëri au- *ta.*  
 tumno crebrius exposuerat. Incidebat hinc, prægresso fri-  
 gore in febrem, quæ mane quotidie accedebat, cum præ-  
 cordiorum anxietate, cardialgia, capitis dolore, artuum lassit-  
 tudine & vomitu pituitoso affligebat, ad tertiam vel quartam  
 pomeridianam durabat, somnum turbabat, & post aliquot in-  
 sultus, largo stipabatur sudore. Appetitus tamen non adeo  
 erat dejectus, sed æger in coena subinde cibos sumebat, in-  
 primis



primis intrita cum vino. Infistebat hæc febris per quatuor & quod excedit hebdomades, corpusque admodum hebes & languidum reddebat, licet interim variis remediis, purgantibus cum emeticis, salinis pulveribus, etiam cum floribus salis ammoniaci martialibus oppugnaretur, donec infuso corticis chinæ cum comis absynthii, ex vino, abigeretur. Sed quum appetitui redeunti indulgeret æger multaque minus salubria assumeret, rediit, elapsa vix hebdomade, febris, majori cum symptomatum vehementia. Opponebantur eadem & evacuantia, & antifebrilia, febrisque discedebat, brevi autem post eandem ob causam repetebat, idque minimum sexies factum, ut semestre interea efflueret spatium, quo corpus ob nocturnos sudores tabidum factum ac vires mirum exhaustæ. Alii igitur accersiti Medici, qui de thermis Carolinis, sub exactiori diætâ & regimine usurpandis, consilium dederunt. Allata etiam in lagenis vitreis magnis impensis thermalis aqua, & tepefacta ante paroxysmum, mane æque ac vespere, pota. Sed quum intermedium tempus brevius esset, quam ut aqua ante accessionem corpore posset evehi, gravior primum inde fiebat paroxysmus. Ideo febriles motus specificis prius compositi fuerunt & postea per binos menses Carolinæ singulis diebus matutino tempore usurpatæ, interpositis simul medicamentis amaris stomachicis & pilulis balsamicis. Quibus demum effectum, ut febris contumax expugnaretur, nec unquam rediret.

*Epicrisis.*

Voracitas & inordinata diætâ rebellem facit intermittentem omnem, tanto magis quotidianam, quæ, ex imbecillitate stomachi & cruditatum copia oriunda, novum inde semper nanciscitur fomitem. Dein quum longa febris sedem potissimum habeat in visceribus imi ventris, a crasso sanguine fartis, quæ tracta diutius febre, magis magisque robore exuuntur, in illustrissimo etiam hoc ægro viscera debilia fuisse atque oppleta, certum, unde crebriorum recidivarum origo. Nihil igitur salubrius fuit decenti thermarum usu, quæ

quæ partim salino aperitivo, partim terreo martiali principio roborante instructæ, crudos succos efficaciter evehunt, infarctus expediunt & sic lentam febrem, nec non cachexiam, quam optime præscindunt. Sunt tamen thermæ æque aciculæ cum cautione in intermittentibus in usum vocandæ, & providendum, ne paroxysmus in earum operationem incidat, emunctoria claudat, & aquis retentis, anxietates cum gravibus symptomatibus inferat. Hinc tutius, iisdem, composita febre, ad recidivam arcendam uti, & tum, adjunctis medicamentis stomachicis & balsamicis, opem ferunt certe laudatissimam.

## OBSERVATIO II.

Generosa erat femina, triginta circiter annorum, san- *Quotidia-*  
guinea, vegeta & tenera, quæ quarto mense gravida abor- *na recidi-*  
tum cum enormi hæmorrhagia & post hunc mensium sup- *vans eme-*  
pressionem experta, pallida hinc facta fuerat atque cachecti- *ricis cu-*  
ca, cum alvo adstricta & appetitu dejecto. Hæc postquam *rara.*  
ostreas in coena comedisset & vesperi sole occiduo in horto deambulasset, nocte insequente febre corripiebatur, cum anxietate, nausea & ingente artuum languore. Remittente febre dabatur ipsi quidem elixirium stomachale, sed noctu eodem tempore iterum redibat febris gravior paullo. Porrigebatur ob suspicionem cruditatum vomitorium, ex tartari vitriolati granis XII. & radicis hypecuanhæ granis XXV. quo crassam viridis coloris pituitam evomebat. Nihilominus statò repetebat tempore febris, majori adhuc compressorio in epigastrio sensu vomendique conatu, quæ silente etiam febre persistebant. Aperiebatur quidem vesperi alvus stricta clystere emolliente; febris tamen & ventriculi spasmus per aliquot dies infisteabant & facies icterica plahe comparebat. Exhibebatur ipsi mixtura ex aquæ cardui benedicti unciis tribus, theriacalis, cinnamomi ana uncia semis, salis cardui benedicti, antimonii diaphoretici ana scrupulis duobus, spiritus vitrioli guttis XX, sirupi papaveris rhœados drachmis duabus, cujus dimidiam partem vesperi sex ante

paroxyfimum horis, fumfit, impolito fimul ventriculo facculo, ex speciebus ftomachicis & carminativis in vino coctis, quo fudor ante invafionein largus & febris mitior. Instante fequenti paroxyfimo, alteram reliquam mixturæ fumfit partem, qui emanfit prorfus & fpafmus quoque cardialgicus laxatus. Quum vero ægra convalefcens appetitui indulgeret, fructibusque horæis ac marinis pifcibus vefceretur, quinto poft die iterum in febrem incidit, majori fere anxietate, vomendi conatu animique quadam defectione ftipatam & vefperi accedentem. Solvebatur hinc alvus, mixtura & externa adhibebantur, fed incaffum fere. Perfiftebat enim potius fervor & languor cum magna debilitate, etiam fuperato paroxyfimo, ut metus efferet continuæ. Injiciebatur rurfus clyfter & vomitorium fupra dictum porrigebatur, fequente & vomitu, & alvi feceffu. Mitefcabant inde fymptomata cum febre, & pulvere ex corticis chaccarillæ, tartari vitriolati & falis ammoniaci anatica portione confecto & per feptem dies, quatuor quibusvis horis, ad drachmam dimidiam ufurpato, difcufla demum omnia, ventriculo & corpori robur redditum, menfium quoque fluxus in ordinem redactus.

#### *Epicrifiſ.*

Caveant ſibi omnes, qui ex ſanguinis immodica profuſione languent, a prava diætâ & corporis refrigeratione. Tum enim, ob imminutum corporis ipſiusque ventriculi robur, perſpirationem quoque imminutam, prompta febrium geneſis. Deinceps in quotidiana, cujus cauſa ingens cruditatum in ſtomacho & primis viis ſaburra, magis quam ulla alia intermittente, conducibile eſt, ventriculum, præmiſſo blando eminate, leni emetico deplere. Tum ſpaſticas ventriculi ſtricturas nihil promptius laxat, quam placidum elicere ſudorem, quam in rem ſpirituofa regioni epigaſtrica calide applicata egregie conferunt. Tandem expurgata prima regione, chaccarillæ cortex cum ſalibus, non modo ad febrem fugandam, ſed & digeſtionis ſucceſſum fulciendum, utiliter adhibetur.



OBSERVATIO III.

Senex, sexagenario major, macilentus, sanguineo-melan-<sup>Quotidia-</sup>  
cholicus, continuis laboribus per multos annos sub vita seden-<sup>na ex ter-</sup>  
taria distentus, superiori anno, quo solennes erant intermit-<sup>tiana ele-</sup>  
tentes, corripiebatur tertiana, posteaquam peregre profectus, <sup>Quario</sup>  
liberali convivio exceptus & noctu sub coelo valde humido <sup>sanata.</sup>  
& pluvioso frigido redux factus esset. Placide hæc admo-  
dum decurrebat, & adhibitis prius pulveribus salino-digesti-  
vis, post quintum paroxysmum electuario expedite discuti-  
batur. Nolebat tamen pristinus vigor & appetitus redire,  
sed a sumto cibo pressorius semper in epigastrio urgebat dō-  
lor, nec somnus adeo erat quietus. Dabatur quidem, ad di-  
gestionem secundandam, quotidie bis, ac drachmam semis,  
pulvis ex radice ari, pimpinella alba, gentiana rubra, semi-  
ne cymini & macis. Sed præter opinionem quotidiana post  
aliquot dies accedebat febris vesperi. Promptum statim habe-  
bat Medicus electuarium ex rob juniperi, cortice chaccarillæ  
& sirupo acetositatis citri, idque omni bihorio deglutire ju-  
bebat. Sumto hoc, repetebat quidem paroxysmus, sed sub  
illo & post eum copiosæ prodibant dejectiones, vel decem  
numero, ut æger firmiter crederet, validum se accepisse pur-  
gans. Continuabatur igitur parciore dosi electuarii usus,  
tam salubri effectu, ut febris discederet & æger penitus con-  
valeret.

*Epicrisis.*

Enata procul dubio hæc ex tertiana quotidiana fuit,  
quod sub illa, prima non sufficienter expurgata regio. Unde  
reliquiæ materiæ febrilis, accepto per malam digestionem  
incremento, induxerunt quotidianam. Plane peculiaris et-  
iam heic fuit corticis chaccarillæ effectus, canalem intestino-  
rum efficaciter vacuans, febrisque fomitem simul & semel  
tollens. Is tamen non ubique perpetuus, sed peculiari pri-  
marum viarum dispositioni tribuendus. Alias inter omnes  
constat, corticem hunc potius ad compescendas nimias de-  
jectiones valere. Ut adeo pateat: unum remedium, pro di-

versa naturæ & corporis habitudine, alium atque alium, & diversum, contrarium plane, exserere posse effectum.

## OBSERVATIO IV.

*Quotidia-* Nobilis quædam tenerior & sanguinei corporis femina  
*na ano-* quinquagenaria, regnante Sirio & instante mensium fluxus, gra-  
*mala post* vi exagitata fuit ira, cum extremorum tremore. Porrexit  
*hyperca-* Medicus paullo post purgantes pilulas, quibus tanta hyper-  
*tharsin.* catharsis suscitata, ut intra XXIV. horas plus quam quinquagesies, & postero adhuc die, vigesies fere, dejiceret. Fractum inde mirifice corporis robur, artus languerunt, ingruit animi, præsertim erecto corpore defectio, periit appetitus, somnus turbatus & pæne omnis intercidit. Exactis inter hæc aliquot diebus, vesperi accessit anxietas summa, cum levi duntaxat horrore & frigore, inquietudo & syncoptica affectio, ut jam animam agere videretur. Sublequuti pulsus ictus celeres, æstus corporis, oris siccitas, & mador corporis, per duodecim horas halans, symptomatum attulit levamen. Habuit postea tantisper melius. Febrilis tamen commotio modo vesperi, modo noctur, jam gravior, jam levior, rediit quotidie, tussi sicca, & ante, & post illam affligente. Ægre tulit fere omnia stomachus, analeptica, salina, balsamicas pilulas, elixiria stomachica, alimenta ipsa, & quamvis suspensa manu datis, sequuta anxietas, æstus, pressio, strictura & ardor ventriculi, nec non tormina ventris. Sic decubuit per mensem, ac interea nihil melius ferre potuit, quam emulsionem ex amygdalis dulcibus, semine papaveris albi, aqua florum acaciæ, liliorum convallium, vilis & ceraforum nigrorum, quibus tantillum pulveris bezoardici nitrosi subinde inditum. Potui datum præterea decoctum avenaceum, nonnunquam in levem emulsionem cum amygdalis redactum. Et ad alvum obstructam solvendam, enema leniens injectum. Elapso autem mense, quodammodo commodius excepit ventriculus medicamenta. Hinc sumisit quandoque decem tantum pilulas ex nostris, quibus alvus cum euphoria laxata. Exhibitum quoque elixirium nostrum balsamicum,

parca

parca pariter dosi. Remanserunt nihilominus febriles commotiones, licet mitiores & sine angore. Ad has igitur componendas oblatas ter quotidie hic pulvis: recipe lapidum cancrorum, antimonii diaphoretici, arcani duplicati, corticis chaccarillæ, ana drachmam. M. f. Pulvis, dividatur in decem partes æquales. Et ad alvum subducendam usurpatum elixirium purgans, ex massa pilularum balsamicarum in tenui lixivio soluta. His demum intra quadraginta dies sensim febris sublata, vires cum appetitu & sanitate integra redierunt.

### *Epicrisis.*

Perniciosum utique fuit molimen, post iram & ingruente mensium fluxu, purgans dare, quia tum jam in motu natura & spastica in nervosis partibus stricturæ adsunt. Neque dubium est, quin sub proritata inde vehementiori purgatione & affluxu succorum impurorum ab ambitu ad interiora, & erosio, & levis inflammatio intestinis fuerit inducta, quibus effectum, ut, nec medicamenta, nec alimenta, sine incommodo, anxietate & æstu suscipere potuerit. Febrilis etiam irregularis insultus, quotidie bis interdum accedens, cum tussi, suscitatus omnino fuit a levi intestinorum inflammatione, sub qua semper stimulus spasmodicus & vitiata occultatur digestio. Hæc igitur partium & morbi causæ dispositio, nec correctoriam, nec evacuantem, nec roborantem aliam admisit medicinam, quam lenientia & demulcentia. Febri autem, quotidianæ typum servanti, accommodatius fuit nihil, quam chaccarillæ cortex, eximie roborans, mixtus cum aperientibus salinis, absorbentibus leniterque diaphoreticis. Cujus generis pulveres in quotidiana febre, etiam lenta & quæ ex vitiis primarum viarum maleque digestorum succorum coluvie oritur, virtutis sunt certe laudatissimæ.

### OBSERVATIO V.

Quadragenaria circiter femina, sanguineo-cholericæ Quotidianæ laxiorisque corporis constitutionis, quæ in iram prona, inordinata diæta cum fructibus horæis usâ & infusum théæ largi



nimis ingurgitans, stomachi sibi contraxerat languorem, paullo post mensium experiebatur suppressionem. Hos quum proprio artificio pellentibus urgeret, febrem incurrebat quotidianam, ordinariis symptomatibus comitatam, Medici tamen ope, exactis tribus mensibus, ab eadem liberabatur. Non autem ita multo post, emanentibus semper mensibus & alvo stricta, in eundem recidit morbum, quem complures in auxilium vocati Medici, nec pharmacis, nec aquis medicatis, Egranis æque ac Lauchstadiensibus, neque etiam lactis asinini usu, depellere potuerunt. Perstitit potius idem jam a triennio immedicabilis, & quotidie prima luce accedit febricula, quam comitatur sudor colliquativus panè, ad decimam usque antemeridianam manans, & pomeridie sequitur languor cum dolore lumborum. Præterea extra paroxysmum corpus totum tactu frigidum, vix vesperi ex cibis quicquam assumere valet & tum etiam ad incongrua magis fertur appetitus. Pallida quoque facies totusque corporis habitus tumidus quasi & inflatus. Obambulat tamen & domestica obit negotia.

*Judicium cum consilio.*

Quotidianam veram exquisitam, non secus ac quartanam, ex longis esse morbis, & ad unum, immo plures annos, trahi nonnunquam, hæc docet historia. Causa vero diuturnitatis inordinata omnino vivendi ratio ægræ, quæ animi affectibus indulget, palato accepta ingerit cuncta & extra paroxysmum in liberum qualemcumque regnantem aërem concedit. Neque enim omnis diuturna intermittens gravem in visceribus supponit labem. Sed per ipsum febrilem motum nova semper gignitur vitiosa materia, quæ quando intermissionis tempore perspiratione non excluditur & insalubri victu augetur potius, novum semper induci paroxysmum non mirum. Jam quidem morbus in habitum quasi transiisse videtur. Vegeta tamen natura & corporis extra paroxysmum motus, in causa fuit, quod deteriores huc usque non sequuti morbi alii. Ego quidem, rebus sic comparatis, vix aliam mendedi

dendi rationem esse, sentio, quam ut ægra curatius ex regularum diæticarum præscripto vivat, parcius, & cibos nec graves, nec fermentescibiles, sed leves, facile solubiles edat. Perspirationis dein successum custodiat ac secundet, nec obambulatione in aëre libero frigido inturbet. Tum ad temperandos & liquandos prævios in prima regione succos, salino superius descripto liquore utatur. Blandis porro laxantibus intestinorum canalem expurget eumque in finem, bis octiduo, balsamicas nostras pilulas deglutiat. Stomachi præterea languorem & digestionis vitium elixirio stomachali, crebrius inter cibos sumto, emendet. Ac demum, tam ad promovendam cuticularem excretionem, quam compescendam successivè febrilem habitualement commotionem, pulvere ex antimonio diaphoretico, cornu cervi philosophice præparato, tartaro vitriolato & cortice chaccarillæ, bis quotidie ad drachmæ dimidium, per octo dies utatur. His, nisi gravius quid interea acciderit, morbum rebellem, expugnari adhuc posse, speramus.

#### CAPVT IV.

DE

### FEBRIBVS INTERMITTENTI-

BVS EPIDEMICIS ANOMALIS

MALI MORIS.

#### THESES PATHOLOGICAE.

##### §. I.

**S**uperioribus annis MDCCXXVI. XXVII. & XXIX. *Ex tempestatum*  
plane irregulares & insolitæ erant, temporum ac tempe-  
statum constitutiones, ingentes potissimum siccitates & ardo-  
res, complures menses perseverantes. Variis hinc languori-  
bus *constitu-  
tione in-  
soliti va-  
rii morbi-*

bus corpora humana affligebantur, diarrhoeis, dysenteriis, intermittentibus febribus variis, simplicibus & duplicibus, quæ nulli temperamento, sexui, aut ætati parcebant. Maxime omnium vero æstate & autumnò regnabant febres, partim intermittentes plane, partim remittentes tantum, anomalæ & irregulares, vagum & incertum typum habentes, facile inter se mutabiles, ut plurimum insuetis & gravibus symptomatibus stipatæ, contagio infestæ nonnullosque per multos menses detinentes, quosdam etiam plane e medio tollentes.

## §. II.

Maxime  
intermit-  
tentes  
malignæ  
anomalæ.

Ambigunt quidem adhuc Medici, nostri æque ac prisci ævi: an intermittentes dentur malignæ febres? Re tamen paullo accuratius considerata, non dubitamus affirmare: intermittentes alio tempore esse benigniores, alio utique maligniores, non secus ac alii morbi ac febres epidemice grassantes. Nam prout variæ temporum & tempestatum sunt constitutiones, magis, vel minus regulares, boni & mali moris progigni & grassari morbos, jam olim noster prodidit *Hippocrates*. Experientia quoque stabilit atque confirmat, dari certis temporibus intermittentes, quæ indolem malignam, seu virulentam, referunt, cujus indicia & quasi characteres hi sunt, si insolitis symptomatibus stipatæ & maxime omnium virium junctam habent prostrationem eminentiorem, si epidemice grassantur & contagio etiam inficiunt disposita corpora, sique earum ferocia exanthematibus in summa cute erumpentibus, pustulis, ulcusculis in labiis, naribus, facie, purpura, vel maculis purpureis, vel etiam scabie mitescit. Hæc enim omnia exiguæ molis, sed valde vehementis & virulentæ indolis materiam tenuissimam, ventriculo & nervosis maxime partibus inimicam atque infestam, in qua potissimum veneni ratio & natura fundata est, subesse, & subitas savas commotiones atque alterationes concitare, luculenter arguunt.

## §. III.



## §. III.

Sic febres, quæ superioribus annis nostris locis, immo <sup>Sympto-</sup> universæ fere Germaniæ, fuerunt infestæ, anomalæ valde ex- <sup>mata epi-</sup> stiterunt. In quibusdam semel uno die, in aliis bis, accessio fa- <sup>demica-</sup> cta. In nonnullis primis diebus comparuerunt continuæ, <sup>rum &</sup> & tertio vel quarto die in intermittentes concesserunt; in <sup>historia.</sup> aliis vicissim primis temporibus intermissione habuerunt, postea vero, pessimo omine, factæ sunt continuæ. Aliqui enormes experti sunt per superiora, vel inferiora pituitosas & biliosas dejectiones, quidam remittente, vel intermittente paroxysmo, continuo sudarunt, cum ingenti languore. Nonnulli etiam se ipsa in febre, & calere, & algere simul, conquesti sunt. Juniores in paroxysmo interdum valde delirarunt & simulac clauferunt oculos insomniis agitati maleque cohærentia sunt loquuti. Senibus cum somnolentia accidit febris. Omnes vero de anxio & compressorio dolore circa ventriculi regionem, de dolore lumborum, pedum contusivo, capitis etiam, sunt conquesti, & intermissionis tempore, de dolore ex nucha per totum spinæ tractum ad scapulas porrecto. Prodeuntibus demum in facie pustulis, aut in ambitu exanthematibus purpureis, symptomata complacabantur. Et si purpura jungebatur scorbutica, diutius durabat febris; si vero superveniebat alba, funestum erat utplurimum.

## §. IV.

Observatum fuit, & id maxime Magdeburgi & in Du- <sup>Contagio</sup> catu Brunsvicensi, complures in una domo, non secus ac in <sup>infere-</sup> variolis, vel morbillis fieri solet, successive eodem morbo <sup>runt.</sup> fuisse affectos, & præsertim post sanguinis missionem, fortem purgationem, feminae maxime instante mensium fluxu, multi si animi affectu immoderato commoti fuerunt, timore potissimum & tristitia.

## §. V.

Licet vero, pro diversa natura ægrotantium, ratione <sup>Quomodo</sup> ætatis, temperamenti, naturæ magis, vel minus robustæ, mi- <sup>termi-</sup> <sup>nata.</sup> tiora,

tiora, vel sæviora fuerint symptomata, & nonnulli intra quatuordecim dies, alii intra mensem demum convaluerunt, perpauci tamen mortui, nisi ingenti errore Medici, aut ægrotantis admissio.

### PRAESERVATIO ET CURATIO.

#### §. I.

*Quomodo  
arcenda  
hæ febres.*

Frequentes quam maxime fuerunt hæ malignitatis suspectæ febres in locis paludosis, humidis & aquarum stagnis irriguis; uti nostris in confiniis sunt pagi Ostrau & Dieskau. Frequentius etiam infestarunt eos, qui post æstatem intensius fervidam, improba victus ratione usi, vespere, aut noctu, aëre humido frigido, corpus refrigerarunt & præterea imbecillioris fuerunt naturæ. Optimum hinc ad declinandum epidemicæ hujus febris incursum fuit consilium: vitare loca humilia, uda, multo minus in iis dormire, aëris injuriis sese non exponere, refrigerium omne, etiam per frigidum potum, fugere, ventriculum nec crudis, nec constipantibus cibis onerare, animum tranquillum servare, omniaque cum cura tenere, quæ acrimoniæ contemperandæ, sordibusque tam per poros, quam alvum leniter educendis, serviunt ac laudabiles succos ingenerant. Neque tamen forti utendum purgatione, quæ ab ambitu corporis succos trahendo, perspirationem minuit adeoque noxia est, tanto magis quando diarrhoea forsitan & dysenteria jam circumeunt.

#### §. II.

*Indica-  
tiones  
medendi  
res.*

Quum vero harum febrium mali genii causa, partim in infigni dyscrasia & intemperie sanguinis & humorum, a naturali & blanda temperie deficiente, salino-sulphurea, partim etiam in humore vitiosa & virulenta activæ indolis, in prima regione potissimum hospitante, & universum nervosarum & musculosarum partium systema commovente, consistat; eo utique prudenti consilio Medicus curam dirigere debet, ut I. in agis alterantibus & perversam sanguinis & humorum qualitatem emendantibus, quam fortioribus evacuantibus

utatur; II. ut placide & blandis evacuantibus, tam per cutem, quam alvum, præparatam materiam debito tempore excludat, ac III. ut congruis analeptics imbecillitati succurrat, atque demum symptomata mitiget.

## §. III.

In principio itaque, antequam Medicus dignoscere pote-<sup>profue-</sup>rat genium morbi, pulveres diaphoretici, cum leviter nitro-<sup>runt dia-</sup>sis exhibiti fuerunt, in aquis diaphoreticis & analeptics hunc in<sup>phoretica</sup> modum: recipe aquæ galegæ, cardui benedicti, acaciæ, ce-<sup>fixa & a-</sup>rasortum nigrorum ana uncias tres, cinnamomi s. v. unciam, spi-<sup>naleptica</sup>ritus nitri dulcis, vel liquoris anodyni mineralis guttas XX. sirupi acetositis citri, vel papaveris rhœados q. s. Hæc tam intra, quam extra paroxysmum oblata & potui datum decoctum avenaceum, cum succo & corticibus citri, vel etiam cum amygdalis in emulsionem redactum.

## §. IV.

Ad alvum solvendam profuerunt oppido clysteres tan-<sup>Blanda</sup>tum domestici, ex decocto avenaceo, nostris **Haber-Grüze**/ <sup>laxantia</sup> floribus chamomillæ vulgaris, oleo amygdalarum dulcium & sale communi parati. Interius vero ad laxandam alvum, potiones ex uncis duabus vel ana mannæ, cum drachma una cremoris tartari, in aqua florum acaciæ solutis & additis duabus guttulis olei de cedro, perquam utiles fuerunt. Quibusdam etiam infusum rhabarbari cum passulis magis conducibile deprehensum.

## §. V.

Ubi natura torpida ad movendum insultu declinante su-<sup>Quando-</sup>dorem, essentia scordii probe saturata, non tamen adeo spi-<sup>que sudo-</sup>rituosa, cum anatica portione liquoris anodyni & aliquot<sup>rem mo-</sup> guttis spiritus bezoardici <sup>Busii</sup> data, injungendo simul, ut in<sup>ventia.</sup> moderato calore & lecto corpus servaretur.

## §. VI.

Quibus remediis successive fracta fuit vehementia fe-<sup>Fracta fe-</sup>bris, siue potius virulenta ejus causæ indoles. Hoc facto, <sup>bre ap-</sup>si sine gravioribus symptomatibus interimiserat febris, ad <sup>propriata</sup>cam



eam fugandam, alia, quæ e re erant accommodata & appropriata, cum debito regimine & iusta methodo, in usum vocata præsidia.

## §. VII.

*Quando-  
que sta-  
tim in  
principio.*

Fuerunt tamen, ubi mox in principio consultus Medicus, qui expurgato per lene vomitorium stomacho, & usurpato postea electuario ex cortice chinæ, cascarillæ, antimONIO diaphoretico & nitro cum julepo rosarum & sirupo acetositis citri, facili & explicita curatione, evaserunt. Subiunctis postea, quæ ad sanitatem firmandam videbantur necessaria.

CAUTELAE ET OBSERVATIONES  
CLINICAE.

## §. I.

*Bezoar-  
dica fixa  
non vali-  
de vacu-  
antia  
pro sunt.*

In omnibus epidemice grassantibus febribus, imprimis si insueta habeant symptomata & metus cujusdam malignitatis sit, semper tutior medendi via, præsertim in principio, per bezoardica fixiora & analeptica temperata, abstinendo a sanguinis missione, emeticis, regimine etiam nimis calido, tam quoad lectum, quam quoad conclave, immo potum.

## §. II.

*Cibus*

In omnibus ejusmodi morbis præstat abstinere a cibis & paucus, potum tenuissimum assumere v. g. decoctum ex radice scorzonerae & cornu cervi usto paratum, adjecto sirupo acetositis citri.

## §. III.

*Vomitus  
& in-  
quietudo  
quibus  
sedanda.*

Si vomitus & inquietudines cum extremorum frigore urgent, consultius est eas blanda diaphoresi, quam adstringentibus sedare, & utique commodam hac in re præstat operam, liquor noster anodynus mineralis, vel cum refracta dosi liquoris bezoardici *Busshi*, vel aliquot guttulis olei destillati macis veri, aut tantillo extracti croci nuptus. Tum etiam, ad spasmodum stomachi potissimum laxandum, utile decoctum avenaceum, cum oleo amygdalarum dulcium & croco, libera-

liter

liter potare, vel emulsiōe, ex aquis antispasmodicis cum seminibus quatuor frigidis & papaveris albi, uti.

## §. IV.

In principio si alvi fluxus sociatur, pulvis rhabarbari *Diarrhœa* cum pulvere nitroso absorbente, vel etiam dosis pilularum *qua po-* balsamicarum, cum ejusmodi pulvere nitroso absorbente, *sciat.* aliquoties data, summæ sunt efficaciam. Sique nimis ille urget, pulveri aliquot grana corticis chaccarillæ possunt admisceri.

## §. V.

In intermittentibus epidemice grassantibus curandis id *Valide* in genere notate licet: fortes purgationes, per superiora æ- *vacuan-* que ac inferiora, parum proficere, ut potius noceant & gra- *tia no-* vior post eas impetat paroxysmus. Lenes autem evacuatio- *cent.* nes nunquam non proficiunt. Quo alvus enim adstrictior est, eo plus incrementum cardialgiæ flatulentæ & inquietudines. Monendum tamen, quod in paroxysmo difficulter, vel plane non, clysteres locum inveniunt, eo quod tanta plerumque flatuum in intestinis resistentia, ut nihil admittatur.

## §. VI.

Observatum etiam est, acriora & aromatica, essentias *Calida* fudoriferas, alexipharmacas & calidiora omnia, ex simplicibus *item* intermittentibus, duplices, vel continuas etiam lethales *acria.* plane, effecisse, præsertim in corporibus scorbuticis & ubi materia exanthematica purpuracea instar fermenti in humorum & sanguinis sinu delituit.

## §. VII.

Sanguinis missio neque præservationi, neque curationi *Nec non* harum febrium accommodata. Sufflammat enim saluberrimam cuticularem excretionem, sorditiem succorum hinc auget, *venase-* vires magis exhaurit & in continuas inde transiisse intermit- *ctio.* tes prius has febres, fuit animadversum.

## §. IIX.

Si purpura complicatur hisce febribus, cum copioso & foetido sudore, summo cavendum est studio a præcalido regimi- *Quid fa-* *ciendum* *purpura* *ne & accedente*

ne & expellentibus. Equabilis potius caloris temperies servanda & temperata etiam medicamenta optima. Ne nimis incalescat & dissolvatur sanguis, nec materia expellenda intus maneat, aut retrocedat prorsus. Hinc enim febris tantisper quiescens resuscitatur, vel minimum mitior, insigniter exacerbatur. Idem observavimus, si materia erysipelacea, cum magno pruritu juncta, quod interdum senibus accidit, ad habitum corporis praesertim pedes propulsa, ad interiora recessit.

## §. IX.

*Et febre  
in inter-  
mitten-  
tem ver-  
sa.*

Mitigata symptomatum atrocia, in epidemica hac febre sique ex ea antea continua facta typica intermittens, superatis aliquot hujus paroxysmis, die intermissionis lene laxante, vel emetico prima corporis regio expurganda & postea in usum vocandus hic pulvis: recipe corticis chaccarillæ, chinæ, natri purificati, antimonii diaphoretici, lapidum cancrorum, ana drachmam unam, de quo drachma dimidia, ter, vel quater quotidie, vel in aqua diaphnoica, uti cardui benedicti, galegæ, sonchi, scorzonæræ, vel etiam in electuarium cum sirupo redacta, extra paroxysmum usurpanda. Quo non modo materia febrilis virulenta primis in visceribus optime corrigitur, sed & roborando systalticam canalium virtutem, placide per diaphoresin educitur.

## §. X.

*Varius  
quorundam  
no atten-  
dendus  
genius.*

Ceterum epidemicae hæ febres non una omnibus annis incedunt facie, sed varium pro diversitate prægressæ temperie constitutionis exhibent genus. Hinc Medicus ad medicationem attento semper accedat cum judicio necesse est. Quæ vero ego diversis annis observavi & utilia deprehendi, passim in scriptis meis tradidi. Inprimis autem circa hoc argumentum evolvi poterit *dissertatio, observationes practicas circa febres intermittentes anno MDCXCIX, grassantes, sistens, item observationes baremotrico-meteorologicae Sect. ult. de constitutione epidemica anni MDCC, nec non Medicina consultatoria Tom. II, Dec. II, cas. VII. pag. 90. seqq. Tom. III.*

*Dec. I.*



Dec. I. cas. VI. pag. 33. sqq. Tom. IV. Dec. III. cas. IV. pag. 167. sqq.  
& Tom. VI. Dec. V. cas. X. pag. 355. sqq.

## CAPVT V.

DE

## FEBRE SEMITERTIANA.

## THESES PATHOLOGICAE.

## §. I.

**I**Nter epidemicas, quas jam exposuimus intermittentes *ma-semiter-*  
li moris febres, haud raro occurrit, quæ ex tertiana *in-tiana*  
termittente & quotidiana continua confit, eamque ob cau-*composita*  
sam Græco nomine *ἡμιτερτία*, & Latino, semitertiana vo-*febris-*  
catur.

## §. II.

Accedit hæc plerumq; ante meridiem, cum frigore & hor-*Quomodo*  
rore gravi pulsuque contracto. Succedit postea cum pulsum *incedat.*  
frequentia calor aliquot horarum, sudore erumpente tepescens,  
non tamen penitus intermittens. Intenditur potius, post re-  
frigerationem lenem, circa noctem æstus, cum pulsum cele-  
ritate, & postero die lenior persistit, sine siti, donec vesperi,  
præcedente leuiori horripilatione, denuo ingravescit. Ter-  
tio autem die horror iterum impetit, cum intensiore calore,  
eademque, ac primo die, ratione, decurrit. Ut sic semper  
quidem adsit febris gliscens, vesperi ipsius exacerbatio & ter-  
tio die mane hæc cum rigore maxime conspicua. Vires præ-  
terea sunt dejectæ, appetitus languet, somnus deficit, urinæ  
minguntur tenues crudæ, post tertianæ vero paroxysmum  
crassæ & tinctæ, exspuuntur cum tussi pauca cruda, & dorsi,  
nec non abdominis dolor haud raro jungitur, cum hujus  
intumescencia. Plurimi accedente tertianæ paroxysmo nausea  
pre-

premuntur & cardialgia, quidam vomunt plane, nonnulli animi defectionem patiuntur, alii delirant prorsus.

## §. III.

*Differt  
ab inter-  
mittente  
maligna.*

Ignota fere nostris hæc est febris & plerumque intermittentem malignam esse putant. Sed multum ab hac utriusque discrepat, quum neque contagiosa sit, neque exanthematibus stipetur, neque etiam tam enormi virium prostratione, & præterea peculiarem tertio quovis die cum horrore habeat conspicuam exacerbationem.

## §. IV.

*Tertiana  
continua.*

Alia eam cum tertiana continua permutant, perperam pariter. Hæc enim secus ac semitertiana, tertio tantum die, non vero vesperi simul ingravescit, neque tota continua est, sed licet primum continuo calore impetat, tertio tamen ut plurimum die vehementiam ponit, ac in tertianam intermittentem transit.

## §. V.

*Et tertiana  
dupli-  
ci.*

Neque etiam cum tertiana duplici confundenda est semitertiana. Licet enim illa quovis etiam die accedat, insultus tamen alternatim sibi respondet & febris ipsa perfecte intermittebat. In hac autem nulla plane intermissio, sed tantum remissio, vespertinus quotidie paroxysmus & tertio semper die duplex.

## §. VI.

*Continua  
causa ex  
mesenterio.  
Intermit-  
tentis ex  
prima  
regione.*

Composita igitur ex duplici febre est hemitritæ febris, ideoque duplex omnino erit ipsius focus, causa duplex. Nimirum continuæ nidus in mesenterio, ex intercepto per ipsius compagem transitu sanguinis ejusdemque hinc in contiguis tunicis nervosis oborta inflammatoria stasi. Ille autem alternis diebus accedens paroxysmus gravior, non secus ac ipsa tertiana, sedem ac causam habet in intestinis, maximeque duodeno. In cujus flexuoso cavo, ex glandulis, hepate & pancreate, lymphatici & biliosi, ob mesenterii vitium pariter vitiosi humores, nec non ex stomacho crudi succi, confluentes, mineram conficiunt morbosam, quæ sanguini im-

mixta

mixta & ad nervosas spinæ membranas delata, motum inducit præternaturalem febrilem.

§. VII.

Inter ea vero, quæ feбри huic ingignendæ apta, connumeranda omnia, quæ succos spissos & impuros reddunt pri-<sup>Quibus</sup> mamque potissimum regionem atque mesenterii vasa sordibus <sup>ex causis</sup> opplent. Eveniunt hinc quam maxime iis, qui salubris vitæ rationis incuriosi, cibos dulces, acidos & fermentescibiles, farinaceos cum butyro, saccharo & ovis frixos, ingerunt, vitam otiosam colunt & nimis sedentariam, parcius justo bibere solent, vel vina dulcia nimis amant & animi affectibus, præsertim tristitiæ, indulgent. Ex facili etiam eas incurrunt, qui brevi ex morbo convaluerunt, alvum habent strictam, qui crebrius utuntur purgantibus drasticeis, quibus etiam hæmorrhoides, vel menses suppressi. Autumno, qui ferax februm perniciosarum, propter varietatem & inæqualitatem perspirationi saluberrimæ valde inimicam, præterea frequentior quam aliis anni temporibus. Et haud raro accidit iis, qui corpori æstuanti frigidum ingerunt potum, aut sudantes in locum frigidum humidum concedunt.

§. IIX.

In quibusdam quoque regionibus frequens magis esse <sup>Quibus</sup> observatur. De Italia testantur hoc cum Galeno, Spigelius <sup>dam re-</sup> atque Baglivus. Et certe regnans ibi interdium æstus acria re- <sup>gionibus</sup> crementa gignit multa, frigidior noctu aura horum exclusio- <sup>familia-</sup> nem impedit & frigidus, quem amant & vel injecta glacie in- <sup>rior.</sup> colæ parant, potus, facit, ut subsistant in mesenterio, ubi minor resistentia & languidior progressus, succi, statim concipiant inflammatoriam & sic febris continua, intermittens vero a succis corruptis ex mesenterio ad intestina delapsis, gignatur. Idem evenit in Hungaria, ubi eadem cœli conditio & præterea usus vinorum dulcium spirituosorum liberalior, hanc febrem frequentissime accendit.

§. IX.

Semiter-

Quia igitur semitertiana hæc febris, præter communem <sup>tiana pe-</sup> (IV.) <sup>P</sup> inter-<sup>riculosa</sup>



intermittentium prima in regione causam, fundamentum habet inflammationem & indolem continuam, ut nec symptomatum adsit magna remissio, nec ad vires reparandas spatium, admodum anceps & intermittente simplici longe est periculosior.

## §. X.

*Brevi decurrit.*

Præcipitis etiam hanc ob causam est decursus, & plerumque nono, aut decimotertio die finem attingit, vel in salutem, vel transitu in alium morbum facto, vel etiam in mortem.

## §. XI.

*Longior in alios morbos transit.*

Ubi longius extrahitur, aut in suppurationem inflammatio, & morbus in hecticam potissimum, vel lentam febrem concedit, aut si firmior in mesenterio obstructio, in hydrophem, aut, rarius tamen, oppleta nimium fordibus prima regione, in intermittentem simplicem quandoque, quandoque duplicem.

## §. XII.

*Quomodo solvatur.*

Quando vero non modo declinante paroxysmo, sudor erumpit, sed & septimo critico die, aut post eum, alvus turbatur & fluxus oboritur vel biliosus ac pituitosus, vel etiam cruentus plane, bonum & morbi solutionem nunciat. Vel si etiam dolores in ventre acerbiores, certis plerumque horis ingravescentes, accidunt, iisdem discutitur morbus, aut subsequente postea diarrhæa saniosa & purulenta, aut sanguine copioso nigro secedente, solvitur.

## §. XIII.

*Mala signa.*

Contra ea, quando nihil horum evenit, sed potius ardor circa præcordia, tensio & dolor in tota ventriculi regione, vomitus, singultus, inquietudo, jactatio & tremor manuum, animadvertuntur, malum præbent omen & inflammationem latius ad ipsum quoque ventriculum serpsisse produnt.

## §. XIV.

*Sphacellatur necat.*

Qui semitertiana decedunt, sub accessione gravioris paroxysmi,

roxyfimi, tertianæ typum servantis, succumbunt, inflammatione late diffusa & in putredinem conversa. Quam etiam mortis causam *Spigelius* se semper invenisse testatur, *lib. de semiterian. cap. XIV.* disertis verbis scribens: *quotiescunque mecum repeto, quæ in dissectionibus mortuorum a semiteriana observavi, toties nil aliud potui agnoscere, quam putredines semper in vasis constetisse. Erant enim in dissecis cadaveribus inflammationes, ex sanguine bilioso & pituitoso factæ, circa jecoris cavam partem, in ventriculo, intestinis, tam crassis, quam tenuibus, mesenterio, omento, liene, & sæpius in una partium commemoratarum, aut pluribus, aliquando etiam in omnibus, quæ celeris mortis causæ erant, superveniente gangrena, vel sphacelo alicui loco, etiamsi quandoque exigua esset, partium prædictarum.*

## CURATIO.

## §. I.

Duplici potissimum fundamento semiterianis medendi *indicatio* methodus nititur, I. ut inflammatoria in mesenterii & intestinalibus tunicis hærens stasis, vitæ periculum intentans, *ratione curativa* promte vel discutatur, vel ne latius serpat impediatur, *bina.* II. ut materia febris, quæ intermittit, corrigatur & placide evacuetur, servando simul motuum criticorum rationem.

## §. II.

Ad primum obtinendum egregie proficiunt pulveres *Inflam-* diaphoretici, leniter nitrosi, parca, sed crebriori manu dati. *matio* Formula esse poterit hæc: recipe cerussæ antimonii, matris *quibus* perlarum, lapidum cancrorum ana drachmam, solutionis *discuti-* oculorum cancri, nitri depurati ana drachmam semis. M. f. *enda.* pulvis, de quo tribus quibusvis horis quindecim grana propinari possunt cum decocto ex radicis scorzeneræ uncis duabus, rasuræ cornu cervi uncia, passularum minorum tantundem, radicis cichorei uncia semis, in quatuor aquæ mensuris per horæ dimidium coctis. Idem præstant mixturæ re-

solventes & diaphoreticæ, ex aquis diapnoicis & analepticis, liliorum convallium, galegæ, card. ben. scorzonæræ, cerasorum nigrorum, cum aceto destillato, lapid. cancrorum, antimonio diaphoretico, mixtura simplici & syrupo cardui benedicti, ternis singulis horis, ad unum vel alterum cochlear exhibitæ.

## §. III.

*Alvus &  
sudor  
quomodo  
movendus*

His contemperantur etiam & diluuntur primæ regionis fordes intermittentem facientes, ad quas dein expurgandas omnium optima, soluta manna cum cremore tartari, nec non rhabarbarum, cum passulis & salis polychresti portione. Quippe quæ sine sanguinis commotione, sine stimulo nervosarum partium, sine virium dejectione, intestinorum canalem evacuant & ad mesenterii quoque infarctum expedientum multum conferunt. Conducunt tamen etiam pilulæ balsamicæ, ex amaris extractis, gummatibus resinosis balsamicis & aloë rite depurata, cum pulvere præcipitante nitroso, moderate, sed frequentius usurpatæ. Si etiam subtiliores fordes per cutis poros aucta perspiratione evehendæ, essentia scordii, cum æquali liquoris anodynî mineralis parte nupta, tutissima pariter & efficacissima.

CAUTELAE ET OBSERVATIONES  
CLINICAE.

## §. I.

*Medica-  
tio caute  
instituen-  
da.*

Omnis medicatio ita instituenda, ne unquam motui critico salutari obsit, sed eundem potius deficientem juvet & excedentem moderetur.

## §. II.

*Purgan-  
tia no-  
cent.*

Hinc purgantia propinare, tanto magis in principio, admodum perniciosum. Exagitur enim inde materia nondum præparata, inflammatio augetur & morbus ad funestum citum eventum disponitur.

## §. III.



§. III.

Ipsa salina deterfiva, per se data, in hac febre locum <sup>Eriam sa-</sup> non inveniunt, præsertim in majori dosi, excepto nitro anti- <sup>lina de-</sup> moniato, cui recte multum detulit *Baglivus*, cum sale poly- <sup>terfiva-</sup> chresto. Habent enim vim aperitivam, diureticam leniterque laxantem & commodissime ad grana XV. in sufficiente quan- titate decocti interdum dantur.

§. IV.

Si tamen febris hæc invadit alvo clausa, vel etiam sub <sup>Alvus cly-</sup> ipsa hæc stringitur diutius, clystere tantum, ex paregoricis <sup>steribus</sup> & emollientibus, ieminibusque carminativis cum sapone Ve- <sup>primum</sup> neto, ducenda. Quo a copia excrementorum liberentur <sup>aperien-</sup> primæ viæ. Hoc enim si negligitur, per superiora natura <sup>da.</sup> viam affectat & vomitum movet, præsertim ubi bile acri bi- liosi in hepate ductus turgent.

§. V.

Declinante autem jam febre, naturæ ductui, quæ sæpe <sup>Declin-</sup> eandem alvi fluxu solvit, insistendum & superius dicta laxan- <sup>nante fe-</sup> tia & pilulæ balsamicæ commodissime usurpantur. <sup>bre la-</sup>

§. VI.

In emeticis propinandis maxime cautus sit Medicus, ne <sup>Emetica</sup> vomitum & singultum proritet, vel stomachum ad inflamma- <sup>caute</sup> tionem disponat. Si vero materia per superius os exturban- <sup>danda.</sup> da ipsaque natura eo tendat, potus aquæ tepidæ cum sale, aut lenissimo stimulo antimonio, satisfacit.

§. VII.

Sanguinis missio non facile locum habet in hac febre, <sup>Vena se-</sup> nisi eminens plethora, urgens æstus, in corpore agili adhuc <sup>ctioni ra-</sup> & criticarum hæmorrhagiarum suppressione affecto. Tum <sup>ro locus.</sup> utique pernecessaria ad lethalem inflammationem intestino- rum præcavendam. Sed in principio statim administranda, & quo citius subtrahitur sanguis, eo expeditius succedit sanatio.

§. IIX.

Vitanda dein omnia calida, essentia alexipharmacæ & <sup>Vitanda</sup> tinctura bezoardicæ, ipsum quoque regimen æstuosum & po- <sup>calida &</sup> tus æstus.

tus copiosus calidus. Æstus enim inde magis accenditur, criticus mineræ morbi per intestina effluxus turbatur & vires inter largos sudores dissipantur.

## §. IX.

Adstrin-  
gentia &  
chinci-  
na.

Pulveres quoque adstringentes, nimium fixi, terrei, tæstacei omittantur his in febribus, nec non cortex chinæ. Observavit enim jam *Baglivus prax. pag. 51.* iisdem vel inflammationes lethales, vel lentas & hæcticas febres fuisse inductas.

## §. X.

Tormini-  
bus & di-  
arrhææ  
quomodo  
succur-  
rendum.

Si etiam dolor in abdomine exquisitus urgeat, vel crebriores quoque dejectiones adsint, abstinendum tamen a sedantibus. Exterius tantum succurrendum linimentis spirituosius roborantibus, abdomini illitis, & interius diaphoreticis tumultus componendus.

## §. XI.

Potui quæ  
serviant.

Potui ordinario egregie servit decoctum sub curatione commendatum, nec non decoctum avenæ sic parandum: recipe avenæ mundæ lotæ libram, radicis cichorii, sarsaparillæ, scorzonæræ ana unciam, florum papavaris rhœados pugillos sex, nîtri antimoniati unciam semis, adde foliorum scabiosæ manipulum dimidium, nîtri puri drachmas duas, coque in quinque mensuris aquæ communis ad consumptionem tertiæ partis, dulcificetur sirupo cardui benedicti, vel papaveris erratici, vel etiam acetositatîs citri.

## §. XII.

Chamo-  
millæ &  
millefo-  
lium pro-  
sunt.

Admodum præterea proficuum hac in febre deprehendi decoctum florum chamomillæ & summitatum millefolii, vel etiam confecta ex ipsis extracta. Spasmos enim, inprimis hystericos, sæpe complicatos, tuto leniunt simulque propter amaritiam, singularem tonicam antifebrilem possident virtutem.

## §. XIII.

Recidiva  
quomodo  
arceda.

Quum vero vix ulla febris æque facile redeat ac semiteriana, post eam in diætâ & vitæ regimine cum cura vi-  
tan-

tanda utique omnia, quæ superius in causarum procatarecticarum numerum retulimus. Temperata tenenda omnia, alvi beneficium clementioribus servandum, cruditatum proventus stomachicis præscindendus &, quod maximum, perspirationis successus omni modo custodiendus. Recidivæ enim, uti omnium febrium, sic etiam hemitritæ, longe deterioris, magisque refractariæ sunt indolis, ac primus morbus.

## §. XIV.

Hæc sunt generalia naturæ ductui & rationi innixa me- *Sic etiam*  
dendi præcepta, quibus observatis, curatio recte adornanda *in conti-*  
& ex voto etiam perficienda. Individualem autem & spe- *nus in-*  
cialissimam methodum, medici suggerat judicium, quo pro *termi-*  
diversitate circumstantiarum, ex morbi historia agnoscenda- *tentibus.*  
rum, ordinem, dosin, tempus, & usum remediorum, perite disponat ac dirigat. Quumque eadem omnino sint, quæ in medicatione intermittentium continuarum, quotidianæ, tertianæ & quartanæ, præcipi solent ac possunt, eadem in his etiam tenenda serio inculco & de iis peculiarem tractationem instituire supervacaneum duco.

## ENARRATIONES MORBORVM.

## OBSERVATIO I.

Virgo nobilis viginti annorum, tenerior, vitæ sedenta- *Semiter-*  
riæ & deliciis in victu impensius addicta, acetaria, fructus *tiana cu-*  
horæos, dulcia & lacticinia crebrius assumens, autumnò in- *rata.*  
cipiente, quum jam per aliquot hebdomades albo laborasset fluore, corpulque motu exastuatum frigidiori nocturno aëri exposuisset, primum experta est languorem universi corporis, dorsi & capitis dolorem. Mane post successit horrorum anxietate magna, nausea, vomendique & desidendi stimulo, quem excepit astus, pulsu celeri, exiguo & cuti arida stiparus. Mitecebat tamen cute demum madefcente, sed veperi iterum, post levem frigoris sensum, ingravescebat. Die post meliuscule habebat & urina secedebat cruda, tenuis, *febris*



febriculam autem nihilosecius adesse, calor quem persentiebat internus & os siccum aridum prodebant. Post meridiem etiam increbescibat febris & altero die mane cum horrore novus accedebat insultus, eodem modo, ut primus, incedens atque decurrens. Alternatim hæc ad diem usque septimum persistebant, quo in abdomine oboriebantur murmura, inflatio ventris & hypochondriorum tensio, & sequebantur plus quam decem dejectiones mucidæ & morficantes. Fluebat sic alvus ultra decimum quartum diem, ægra, inprimis noctu, mirum languebat, exteriora magis frigebant & algebant, interiora vero calebant accedebatque tussis ægram violenter excercens, cum somni & appetitus defectu. Medicus, quod a principio fecerat, insistebat absorbentium, refrigerantium nitroforum usu perpetuo, nolebant autem pathemata cedere, sed potius cum ventriculi inflatione cardinalgica augebantur. Postulato igitur meo consilio, dedi mixturam hanc diaphoreticam: recipe aquæ liliorum convallium, scorzonæræ, cerasorum nigrorum ana unciam unam semis, theriacalis cum vino unciam, lapidum cancerorum, antimonii diaphoretici, diascordii Fracastorii ana drachmam semis, mixturæ simplicis guttas XXX. sirupi cardui benedicti, quantum satis. M. Qua bihorio quovis ad tria cochlearia data, dejectiones pauciores factæ & cutis calido madore perfusa. Iniusum etiam theiforme ex veronica, scabiosa, floribus chamomillæ vulgaris & semine anisi potum, & loco ordinarii potus, decoctum cornu cervi & hordei citratum. Cum quo subinde assumptus pulvis, ex solo antimonio diaphoretico & lapidibus cancerorum, addita solutione oculorum cancri & pauxillo nitri. His intra binas hebdomades symptomata, tussis, alvi crebrior dejectio, virium labor, assidua vigilia & internus æstus, sublata. Quum vero metus esset febris lentæ, ob gliscentem diutius internum calorem, præsertim post pastum, ad præscindendam hanc datæ pilulæ nostræ balsamicæ, cum pulvere salino aperiente & elixirium nostrum stomachale, felici pariter cum successu.

*Epicrisis.*

Febris hæc exacte servavit semitertianæ typum & septimo etiam die salutarem habuit excretionem per alvum. Interim tamen semper etiam in hac febre ratio habenda cuticularis excretionis. Perperam igitur a primo Medico crebriori refrigerantium & nitroforum usu perspiratio fuit impedita motusque humorum ad intestina conversus, ex quo omnia pathemata. Mixtura autem leniter sudorifera ad superficiem corporis egit succos hincque egregie profecit.

## OBSERVATIO II.

Generosa femina quadragenaria, tenera, mobilis valde *semitertiana* atque sensibilis, purpuræ præterea autumnæ ab aliquot annis *tiana* obnoxia, post corporis refrigerationem & animi commotionem, superiori anno, vesperti horripilatione, capitis & *cum pur-* *pura sa-* *nata.* dorsi dolore corripiebatur, succedente æstu sedecim fere horarum. Vix inde septem aut octo elapsæ erant horæ, quum gravis impeteret horror cum præcordiorum anxietate, vomendi conatu & virium prostratione, qui paroxysmus cum subsequente æstu ad viginti fere horas producebatur. Superato hoc, melius quidem habebat, dormiebat etiam, sed exactis vix sex horis, denuo extremorum eveniebat refrigeratio, cum anxio æstu magnaue debilitate, vehementia tamen symptomatum non tam gravi, nec vomendi conatu. Vocabar in consilium, semitertianam agnoscebam, sed ob notam mihi ægræ dispositionem purpuræ, hanc simul subesse statim conjiciebam, inprimis quum insignis præsto esset peccatoris angustia & oppressio. Injunctus igitur primo clyster & post hunc ad expellendam purpuræ materiam, hanc ante paroxysmum & remittente eo, ad aliquot cochlearia porrexi mixturam: recipe aquæ cardui benedicti, galegæ, scorzonæræ, florum sambuci ana uncias duas, aceti destillati unciam, lapidum cancrorum, antimonii diaphoretici ana scrupulos duos, cinnabaris scrupulum unum, spiritus nitri dulcis, mixturæ simplicis ana guttas XXX. sirupi cardui benedicti drach-

(IV.)

Q

mas

mas duas. M. Hinc quidem symptomatum atrocitas mitigata, febris tamen pristinam adhuc, & vesperi, & alterno die, servabat incurfionem, & accedebat præterea abdominis dolor cum alvi adstrictione summaque anxietate. Indicio hoc mihi fuit viscidas & biliosas multas sordes primis hospitari in viis, eoque inductus, suasi, ut remittente paroxysmo, decem ex pilulis nostris balsamicis, cum dosi pulveris absorbentis nitrosi sumeret & præterea elixirio nostro viscerali in decocto pro potu crebrius uteretur. Sequuta inde placida alvi solutio, & continuatis iisdem remediis per aliquot dies, foetidissimæ secesserunt feces pariterque copiosæ. Hoc facto, mixtura superius dicta iterum usurpata, nec non pulveres bezoardici, cum pauxillo pulveris corticis chæcarillæ. Sic demum molestus in universo corpore obortus pruritus, purpura effloruit, urina sedimentum posuit, ac intra tredecim dies febris discessit & postea vires etiam recuperatæ.

#### *Epîcrisis.*

In omnibus fere morbis epidemicis complicata subesse solet ejusmodi materia exanthematica, qua ad habitum corporis, sub macularum, vel aliarum efflorescentiarum forma propulsa, febris quæ præsto est insigniter mitigatur; non fallaci testimonio, eandem ante ab acri subtili humore ortam fuisse. In hac vero historia commemorabile, quod materia scorbutica salino-acris in corpore delitescens, non statim a mixtura sudorifera ad cutis extrema fuerit expulsa, sed tum demum, quum natura arte adjuncta a sordium sarcina primam liberasset regionem.

#### OBSERVATIO III.

*Semiteriana dysenterica funesta.*

Quum anno cblcccxxvii. autumnio initiante, circumiret dysenteria, concessit in villam suam vir quinquagenarius, robustus, plethoricus, cibis duris ac salsis cum vini potu assuetus. Eo delatus, plurimos ex villicis maligno hoc fluxu decumbere percepit. Hinc terrore perculsus est haud levi. Bene tamen pransit & bibit, in horto etiam post prandium

deam-



deambulavit, leviter tantum vestitus, licet aer regnaret frigidiusculus. Vesper horrore coepit ac frigere, torminibusque ventris affligi cum aestu, qui per totam fere noctem persistit. Mane post misit qui Medicum vocarent, interea vero novum expertus est frigoris accessum, cum nausea, anxietate & ventris tensione, subsequente calore. Medicus epidemicam luem subesse ratus, ad præscindendum ipsius fomitem, purgans dedit pharmacum. Quo vel quinquagesies deiecit cum acerbis torminibus æger, alvumque in latrina, torrenti domum alluenti superstructa deponens, ad ventrem frigus incautius admisit. Accensa hinc magis febris, alternis semper diebus gravior, alvus perpetuo fluxit cruenta, demum cadaverosi foetoris, somnus perit, æger de ardore interno conqueri, corpus jactare & delirare coepit, donec sexto morbi die convulsus periret.

#### *Epitris.*

Est hæc febris dysenterica inflammatoria, semitertianæ typum habens, inducta a terrore, cruditatibus primarum viarum, refrigeratione & purgante, nec mirum, conspirantibus tam multis causis, brevi in funestum morbum fuisse adductum hominem sanum atque robustum. Hæc vero quam maxime proficua fuisset sanguinis missio, quam in dysenterico morbo mirifice commendat *Sydenhamus*, *Botallus*, *Amatus Lusitanus*, cum aliis. Et hac sola, adjunctis medicamentis diaphoreticis, leniter nitrosis, inflammationem discuti, sphacelum arceri & firmum alias virum servari potuisse, ego quidem arbitror.

#### OBSERVATIO IV.

Quadragenarius vir, tenerioris & biliosæ constitutionis, *Semitertiana* multum delectatus dulcibus, & in prandio, loco vini, sub-*tiana* inde sumens aquam sic dictam vitæ, jamque ante annum icte-*ictero* ricus, incidit autumnò in semitertianam cum magna debili-*discussa.* tate, occipitis dolore, siti, calore, ciborum nausea & crebrioribus ventris torminibus. Septimo die solvebatur alvus & per aliquot dies largiter fluebat, febrisque mitescebat. Ni-

hilominus Medicus ad sistendum fluxum exhibebat pulverem, cum terra catechu, quo constitit. Sed factus ager ictericus, flavescente per totum corpus colore diffuso, alvus obstipata, excrementa alba, urina nigra & oleaginosa. Interim sub icteritia hac priora symptomata cessarunt omnia, rediitque appetitus cum viribus. Icterus etiam discussus pulvere rhabarbari cum speciebus diacurcumæ & liquore aperitivo, ex sale tartari, terra foliata tartari & arcano duplicato, composito. Sicque ager penitus convaluit.

*Epicrisis.*

Orta procul dubio hæc febris a copiosis fordibus biliosis stagnantibus & postea ad intestina delatis, quarum affluxu cum pulvere adstringente ad interiora represso, icteritia supervenit. Adstruitur hinc veritas effati *Hippocratis* & *Celsi*: icteritiam febris succedentem, eam sæpe tollere.

CAPVT VI.

DE

FEBRE CATARRHALI  
BENIGNA.

THESES PATHOLOGICAE.

§. I.

*Febris catarrhalis. quid sit.* **E**X febribus lymphaticis & serosis est excutienda nunc catarrhalis, in qua motu solidorum & fluidorum adaucto, serum, ob perspirationem interceptam, superfluum & impurum, per glandulosa, faucium præsertim, narium & bronchiorum organa, critice quasi & salutariter ejicitur.

§. II.

*Ejus historia.* Incipit hæc, vesperi ut plurimum, cum cutis inhorrescentia, extremorum, inprimis pedum & plantarum refrigeratione, alvi siccitate, stimulo ad meendum, sed parco mictu, capitis debilitate, languore universi corporis & appetitu adaucto, quasi

quasi spurio, nec non siti, difficili deglutitione, stimulo in larynge, narium & faucium calore, sequitur sternutatio, pectoris gravitas, & calor circa noctem cum pulsu celeri auctiori, tussis violenta, cum coryza, ardore faucium, somno inquieto, mane sudor, gravitas & torpor totius corporis appetitusque prostratio.

§. III.

Immediata horum pathematum causa est serum, seu causa lymphæ, acris caustica, in tunicis glandulosis subsistens eas immediatè inflammans, cum dolore, tumore & rubore. Constat & sequitur hoc in tota narium, palati & faucium regione, tota des. etiam arteria aspera, cum ramis bronchialibus, quin in ipso oesophago, ventriculo & intestinis. Has enim simul affectas esse partes, rauco, tussis, scretus materiæ viscidæ, sternutatio, pectoris gravedo, item nausea, quandoque in vomitum erumpens, ardor in præcordiis, tormina ventris & subsequens salutaris alvi fluxus, testantur.

§. IV.

Hanc autem feri subsistentiam inducit potissimum inter-Frequens ceptus perspirationis successus. Hinc enim est, quod vere cur vere & autumno, æquinoctii tempore, frequentissimus hujus fe- & autum-bris incurfus. Tum quippe maxima tempestatum vicissitudo, mmo. ex calido in frigidum; sicco in humidum & vice versa, tam variè corporis corticem afficit, ut succedens ibi evacuatio graviter turbetur.

§. V.

Eandem ob causam catarrhi frequentissime accidunt sub aëris iis, qui subito aërem mutant, ex calido loco in frigidum, vel mutatio- ex frigido in humidum concedunt; qui corpus autumnali, ne. vel nocturno frigido humido aëri incautius committunt; qui vestitum hibernum vere cito nimis deponunt, vel autumno serius resumunt; qui etiam æquinoctio sanguinis mis-post ve- sionem passi, vel alias criticam largam hæmorrhagiam ex-nasectio- perti, improvide in aërem liberum frigidiusculum se con-nem. ferunt.



## §. VI.

*Phlegmaticis & intemperantibus.* Neque alia subest ratio, quod corpora spongiosa, laxa, phlegmatica & sanguinea, infantes, pueri ac feminae, longe frequentius febri catarrhali pateant, quam adulti, viri, stri-  
toris magisque biliosae constitutionis. Quod etiam magis eadem afficiantur, qui vigiliis indulgent, crapulam sectantur, vinoque aut vini spiritu corpus exaestuantes, humidiori & frigidiore aëri postea illud exponunt.

## §. VII.

*Post repulsas in cute efflorescentes.* In iis quoque, qui post crustam lacteam & tineam capitis, nec non scabiem praepostere siccata, post incuriosius, aut mala medicatione exceptam coryzam & tussim, febrem incurrunt catarrhalem, nulla utique alia potest suggeri causa, quam repulsum ex ambitu corporis ad interiora iterum acre & rodens, inflammationi inducendae aptum.

## §. IIX.

*Ex aëris vitio epidemica.* Non tamen dubitandum, quoniam quandoque in aëre hostetur subtilis caustica ejusmodi materia, quae inspiratione hausta, locis quae pertransit glandulosis, sese insinuat, eademque dolore, tumore & rubore afficit & febrem accendit catarrhalem. Prompta certe ejusmodi acris materiae genesis vere ineunte, quo liquescente nive & regelata glacie, solum aqua inundatur effoeta, quae passim stagnans & putrescens, noxia in aërem mittit effluvia multa. Quo etiam fit, ut febres haec tum ut plurimum sint epidemicae & plures uno tempore invadant.

## §. IX.

*Quandoque contagiosa.* Quod autem catarrhi & catarrhales febres contagiosae etiam sint & alios propinquos atque dispositos contagio inficiant, eam utique fit ob causam, quod lymphæ potissimum vitio debentur; eodem modo ac notum est, omnes qui contagio propagantur morbi, lymphæ corruptionem, vappescentiam, vel putredinem, habere causam.

§. X.

Sic incedit & generatur catarrhalis febris benigna, & *Differt a*  
 hæc qui novit, ex facili eandem distinguere poterit ab aliis *quotidie*  
 quotidie accedentibus febrium paroxysmis, lenta, hectica, *acceden-*  
 quotidiana, tertia duplici & quartana triplici. *tibus*  
*aliis.*

§. XI.

Facili etiam negotio discrimen perspiciet inter illas *A vene-*  
 glandulosarum in faucibus & naribus tunicarum affectiones, *reis &*  
 quæ ex lue venerea & scorbuto, & quæ ex catarrho eveni- *scorbuti-*  
 unt. In illis enim sola erosio & ulceratio, a materia caustici- *cis fau-*  
 ca lymphatico-serosa, sine febre; in hac vero, præter ar- *cium af-*  
 rosionem, inflammatorii quid subest, ex subtiliori sanguinis *fectibus.*  
 parte statim concipiente, cum febre.

§. XII.

Obvia quoque erit differentia, inter catarrhalem, & *Arhev-*  
 eam febrem, quæ rheumatismo accedit. Quum in illa tuni- *matismo.*  
 cæ glandulosæ internæ afficiantur & excretio subsequatur;  
 in hac autem externæ musculorum tunica patiantur & mor-  
 bus evacuatione critica non solvatur.

§. XIII.

Paullo difficilius autem benigna discernitur a maligna, *A catar-*  
 imprimis ab initio, ob plurima, quæ ambæ communia ha- *rthali ma-*  
 bent symptomata. In eo tamen differentia, quod hæc, se- *ligna.*  
 cus ac illa, ingentem & subitam inferat virium prostratio-  
 nem, cum vigilia perpetua, quam mentis turbatio sequitur,  
 quod contagiosa magis sit & plerumque etiam petechias &  
 maculas habeat junctas, uti pluribus infra dicitur.

§. XIV.

Ceterum, quo major sanguinis & serii impuri copia, eo *Longior*  
 graviora adsunt pathemata eoque diutius trahitur morbus, & *gravior*  
 uti potissimum obvium est in scorbuticis, nec non ubi purpu- *in scor-*  
 ræ materia intus delitescit. *buticis.*

§. XV.

In hypochondriacis, præter diuturnitatem, ob labefa- *In hypo-*  
 ctarum ventriculi & intestinorum tonum & proclivitatem ad *chondria-*  
 spasticas *cis.*

spasticas stricturas & flatulentias, gravia varia jungi solent pathemata, anxietates præcordiorum inprimis, spirandi angustia & inquietudo, cum inflativo & pressorio in hypogastrio dolore,

## §. XVI.

*In plethoricis item & intemperantibus.* Qui sanguine abundant, intemperanter vivunt, vina non adeo bonæ notæ largius potant & acidis falsis cibis delectantur, majorem circa vesperam experiuntur ardorem & tussim siccam ferinam, cum somno inquieto.

## §. XVII.

*Nec non in menses suppressum.* Neque minus feminae, quæ terrore, vel alia ex causa menses suppressione laborant, magnas in hac febre experiuntur præcordiorum anxietates, intercurrentibus lipothymis, universi corporis notabilem debilitatem & alternantem frigoris & caloris in cute sensum, quæ noctu potissimum ingravescunt.

## §. XIX.

*Per se periculi expers.* Per se tamen hæc febris benigna omnino est, & omnino periculo, si dextre in medicatione excipitur, vacat, & intra septem, aut quatuordecim dies, ut plurimum discedit, omni lassitudine sublata. Quin aliæ etiam capitis passiones, cephalalgia inprimis & hemicrania, succedente catarrho & naribus bene fluentibus, optime solvuntur.

## §. XIX.

*Excretionibus solvitur.* Solvitur sæpe in principio statim aucta perspiratione per sudorem. In aliis post aliquot demum dies, vel copioso creatu materiæ viscidæ, vel liberali feri mucosi e naribus stillicidio. In quibusdam etiam per crebras alvi dejectiones & in nonnullis, quando urina tenuis antea & parca, larga nunc manat & pondere gravis, ut minimum duplo majorem materiæ solidæ quantitatem contineat, ac in naturali statu.



## PRAESERVATIO ET CVRATIO.

## §. I.

Quod igitur ad arcendum catarrhorum insultum attinet, *Praeservanda* inculco omnia, quibus induci eosdem supra dixi, & *tio quo-* suadeo, ut vere & autumnio, tempestive sanguis mittatur, *modo in-* modicus cibus sumatur, perspiratio custodiatur & corpus sub-*stituenda* inde motu exerceatur. In iis autem, qui laxioris humidioris naturæ ac ætate juvenes sunt, & ob id, notante jam *Hippocrate Sect. VI. aph. 2.* frequenter exercentur catarrhalibus defluxionibus & rhevmaticis affectibus, ego multoties cum fructu usus sum hac methodo, qua præcepi, ut per quadraginta dies decoctum ex radice chinæ, sarsaparillæ, cortice ligni sassafras, cum passulis & pauco cinnamomo, biberent, ac interea ex cibis nihil sumerent præter carnem assatam, cum amygdalis tostis & pane bis cocto, simul etiam aliquoties ad alvum subducendam uterentur ptisana mannata, demum finita hac cura, elixir stomachale, ad XXX. guttas, cum aqua & vino, quotidie ante prandium usurparent.

## §. II.

Medicatio dein catarrhalium febrium, triplicem hunc *Indica-* sibi præfixum habet scopum: I. ut acrimonia illa salina acris *tiones cu-* lymphæ obtundatur ac temperetur; II. ut perspiratio turba-*ratorie.* ta, quæ primaria congestionis serosæ ad interiora causa, promoveatur ac in ordinem iterum redigatur; III. ut in fine excretio mucis visceri crassi promoveatur ejusdemque ulterior generatio impediatur.

## §. III.

Acridinem contemperant, præter pulveres sic dictos be- *Acrimo-* zoardicos absorbentes, humectantia omnia & oleosa, instar *nia quo-* omnium oleum amygdalarum dulcium, dein sperma ceti, *modo* butyrum rubrum, lac, cremor lactis, emulsiones ex amy- *tempe-* gdalis, vel pineis, cum semine papaveris albi, decoctum ave- *randa.* naceum, raparum, hordei, juscula caponum, gallinarum, cum vitello ovi. Ex dulcibus liquiritia, ejus infusum, essentia & succus Hispanicus, ficus quoque & passulæ. Si subtilis nimis

(IV.)

R

&amp; ro-

& rodens est acrimonia, leniora anodyna locum habent, inter quæ aliis palmam præripiunt papaveracea, crocus, item pilulæ *Wildegansii*, diacodium *Montani*, pilulæ de styrace, quarum compositio & usus antiquissimus pariter ac probatus, uti patet ex *Tralliani lib. V. pag. 247.*

## §. IV.

*Perspiratio quibus promovenda.*

Ad excretiones, præsertim omnium saluberrimam cuticularem, faciunt infusa calida theiformia, ex herba veronicæ, hyssopi, radice liquiritiæ, floribus sambuci, papaveris rhœados & semine fœniculi. Proficui etiam sunt pulveres diaphoretici fixiores, inprimis cum aquis diapnoicis & antispasmodicis sumti. Nihil quoque ad purgationem feri per cuticulam utilius ipsa exercitatione & motione corporis, quæ ab *Hippocrate lib. de insomn. §. IV.* item *de victu acut. §. 67.* mirifice ad sudorem eliciendum, mane post frictionem, commendatur.

## §. V.

*Mucus quibus educendus e faucibus*

Educendæ demum, quæ restitat materiæ lentæ, ex faucium glanduloso peristromate, serviunt pectoralia, ficus & passulæ, cum spiritu vini accensæ & in sirupum quasi redactæ, balsamum pectorale *Meibomii*, item elixir pectorale, ex gummi ammoniaco, myrrha, radice liquiritiæ, enulæ, croco, benzoë & oleo anisi, cujus resolvens virtus addita tinctura tartari, vel spiritu salis ammoniaci vinoso, adhuc potest intendi.

*Et nati- bus.*

Ad fundendam autem stagnantem in narium cavitatibus pituitam, nihil præstantius sale volatili salis ammoniaci sicco, cum aliquot guttulis, olei majoranæ puri, non foetidi, nec adulterati, essentificato, crebrius illud naribus admovendo.

## §. VI.

*Methodus utendi remediis.*

De applicatione horum remediorum id in genere tenendum: quod matutino tempore expediat perspirationem promovere potu infusorum ex herbis calidorum, nec non jusculorum & usu pulverum temperantium bezoardicorum. Circa noctem vero anodyna & demulcentia dare. Specialis autem medendi methodus, partim in symptomatum mitigatione, partim etiam in oblatione medicamentorum, ratione dose-

doseos & ordinis, consistit, & ad individualem corporum dispositionem est accommodanda, de qua potiora in subjun-  
gendis nunc monitis practicis.

## CAVTELAE ET OBSERVATIONES CLINICAE.

### §. I.

**S**icuti omnis febrilis æstus, ita etiam catarrhalis, lenissime & *Febris ca-*  
placide tractandus est, æger quoque in moderato calore *tarrhalis*  
lecti & hypocausti semper servandus. Exulent igitur omnia *leniter*  
commoventia calidiora & validiora, unacum regimine æstuo- *tractan-*  
so, eo quod materiam acrem magis exagitant, calorem adau- *da &*  
gent & æstuosam partibus diathesin conciliant. Vitentur ve- *caute.*  
ro vicissim omnia refrigerantia, acida & quæcunque perspira-  
tionem turbant. Opiata etiam & theriacalia caute in usum  
vocentur, tanto magis si caput debile & grave, si ætas senilis  
& alvus adstricta.

### §. II.

Cibus sit paucus, potus tepidus & salubris, optimus de-*Cibus &*  
coctum hordei excorticati cum rasura cornu cervi, passulis *potus sit*  
& radice liquiritiæ, item decoctum avenaceum. Vinum au- *congruus.*  
tem, nec non vini spiritus, propter acidum stimulans & spi-  
ritum qui calorem accendit, nullius in hac febre utilitatis.  
In declinatione tamen morbi, si excretiones jam adsunt, vi-  
num bonæ notæ conduxisse, paulo largius etiam sumtum,  
observatum est, eo quod circulum sanguinis promovet &  
æqualem servat perspirationem.

### §. III.

Si æstus est impensior, uti in plethoricis atque choleri-*Nitrum*  
cis, fervor etiam internarum partium percipitur, nitri ali-*quando*  
quot grana pulveribus bezoardicis cum fructu admiscuntur & *profit.*  
emulsiões liberalius usurpantur.

### §. IV.

Quando alvus dura nimis & stricta, sub morbo, præter *Alvus*  
*juscu-*  
quibus



*ducenda sub febre.* iuscula avenacea, mannata, prunata & passulata, nihil convenientius clystere emolliente. Egregium tamen quoque usum præstant pilulæ aloëphanginæ, vel Beccherianæ, ad X. vel XII. grana, cum granis IV. pilularum de styrace, ante lecti introitum sumtæ, eo quod & alvum aperiunt, & violentam siccam tussim moderantur.

## §. V.

*Item de-  
clinante  
febre.* Si etiam declinante febre tussis humida nimis, copiosa & pertinax, ad humorem pituitosum derivandum & per alvum evacuantum, egregie proficit decoctum mannæ largiori dosi, ad uncias duas vel tres, ex aqua veronicæ. Tum quoque profunt pilulæ balsamicæ *Beccheri*, nec non *Rusi*, ex aloë, myrrha & croco, æquali portione commixtis, paratæ.

## §. VI.

*In princi-  
pio pur-  
gantia  
nocent.* In principio vero febris catarrhalis alvum stimulantia non conferunt, præsertim paullo acriora, quia humores serofosos acres ad intestina invitant, tormina & alvi fluxus, non sine periculo febris lentæ, concitant. Quin a mercurio dulci cum resina jalappæ sic dato, in virgine plethorica inflammationem ventriculi inductam fuisse, novi.

## §. VII.

*Tussis fe-  
rina qui-  
bus com-  
ponenda.* Ubi tussis ferina & vehemens, componenda est oleo amygdalarum dulcium recenti, cum sirupo capillari Monspelienfi commixto, item hoc electuario: recipe olei amygdalarum dulcium drachmas tres, spermatis ceti drachmam, sacchari canti albi, sirupi violarum ana unciam, croci serupulum, olei anisi, macis, ligni sassafras, ana guttas sex. M. De quo subinde aliquid deglutiendum.

## §. IIX.

*Quid a-  
gendum  
in mensi-  
bus sup-  
pressis.* Quando in feminis mensium suppressione affectis superius dicta pathemata ingruunt, alvus congruis clysteribus ducenda & diaphoretica propinanda, quæ sanguinis motum ad superficiem corporis urgent, tumq; pulveribus bezoardicis cum fructu adjici potest, croci granum unum, vel aliquot grana florum sulphuris, abstinendum vero ab omnibus expectorantibus & dulcibus.

## §. IX.

## §. IX.

Quæ hypochondriacis accidunt insolita ex ventriculi potissimum inflatione symptomata, clysteribus emollientibus & carminativis, nec non essentis carminativis, cum pectoralibus nuptis, quam optime discutiuntur. Item hy-  
pochon-  
driacis.

## §. X.

Quando superata febre pulmonum restitat laxitas, ut ju-  
sto largior sit screatus, pulveribus bezoardicis addenda ali-  
quot corticis chaccarillæ grana, vel balsamum nostrum sic di-  
ctum vitæ, circa noctem ad aliquot guttas sumendum. Laxitas  
pulmonis  
quibus  
subma-  
venda.

## §. XI.

Sanguinis missio, debito tempore & regimine instituta,  
in plethoricis quam optime frequentem catarrhorum insultum  
arceat. Sed præsentē jam catarrhali febre, penitus ab ea ab-  
stinendum. Tumenim, experientia teste, diuturnitatem ca-  
tarrhi adducit. Venasē-  
dio præ-  
servato-  
ria non  
curato-  
ria.

## §. XII.

In tussi violenta & nimis diu durante, pectoralia dulcia,  
incrassantia, in nimia quantitate oblata, ad cachexiam, im-  
mo ad phthisicum affectum, disponunt, appetitum & dige-  
stionis vim infringendo & pulmonum tonum valde labe-  
factando. Pectora-  
lia dulcia  
nocent.

## §. XIII.

Quamvis juxta Hippocratem lib. VI. epid. Sect. III. his, qui  
ex capite, gravedine & raucedine laborant, ubi febre cor-  
repti fuerint, minus recidivæ fiant, si videlicet morbus cum  
defluxione recte fuerit solutus; nihilominus tamen ne via ster-  
natur ad alium morbum, pariter ex Hippocratis l. c. consilio,  
suadeo, ut convalescentes victus & ventriculi rationem ha-  
beant, & præterea ad perspirationem servandam, potum in-  
fusi theiformis mane adhuc aliquandiu continuent, uti pluri-  
bus supra in præservatione dictum.

## ENARRATIONES MORBORVM.

## OBSERVATIO I.

Febris catarrhalis in hypochondriaco pro maligna male habita.

Vir macilentus, natura sensibilior, a multis annis hypochondriacis pathematibus obnoxius, præter consuetudinem in convivio stomachum non modo variis eduliis, sed & liberali vini potu onerarat. Aliquot horis post noctu, sub aëre vernali humido frigidiusculo, iter fecit, ac domum reversus, correptus est horrore, languore totius corporis magnaue capitis gravitate. Sequuta ingens præcordiorum anxietas, tussis molesta & præternaturalis æstus, cum alvo tensa & adstricta. Suasum uxoris bibit decoctum chocoledæ, quod excepit intensior anxietas, inquietudo, suffocatoria quasi spirandi angustia, nec non inflativus dolor lateris dextri in regione hypogastrii. Vocatus hinc Medicus, qui febrem non modo malignam, sed & peripneumoniaci quid subesse iudicavit, & tincturam bezoardicam cum spiritu cornu cervi, nec non mixturam ex aqua cardui benedicti, diascordio Fracastorii, lapidibus cancrorum, antimonio diaphoretico & sirupo papaveris rheados, exhibuit. Sed frustra & perperam. Quarto enim die, quum ob alvum nimis strictam, clyster injiceretur, evanuerunt quæ metum gravis morbi incusserant symptomata omnia, & tussis tantum, gravativus capitis dolor, raucedo & æstus vesperi increbescens, remanserunt. Ab alio igitur Medico commendatum infusum ex veronica, liquiritia & foeniculo, circa noctem dosis pulveris bezoardici cum grano uno extracti croci & papaveris rheados, alterno die vesperi dosis pilularum nostrarum pectoralium, interdum aliquot grana nitri & succini cum emulsione, & ad expectorationem electuarium ex oleo amygdalarum, spermate ceti, croco & oleo anisi. His procuratus screatus & lenis sudor & reliqua adhuc symptomata fere omnia discesserunt. Ventriculus autem mansit imbecillis, & cibo sumto, gravativum & pressorium fecit dolorem. Tussis etiam noctu fuit acris cum materię copiosæ ejectione, quæ interdum etiam vomitum provocavit.



ritavit. Sed quum corpus equitatione exerceret æger, pilulis nostris balsamicis & inter cibos sale volatili oleoso uteretur, & loco tenuis ascentis cerevisiæ, biberet saturationem & amaricantem, successive pristinae valetudini ex toto fuit redditus.

### *Epicrisis.*

Fuit hæc febris nonnisi catarrhalis benigna, tum etiam popularis. Sed quia incidebat in hypochondriacum corpus, comparuere insolita pathemata. Stomachus etiam cruditatibus jam plenus non potuit non ægre ferre decoctum succoladæ in copia sumtum, quo tunica villosa & osculis ductuum in ipsa obstruſis, inflatio inducta, cui angustia spirandi, præcordiorum anxietas, dolor sinistri lateris tensivus & inquietudo tribuenda. Medicus autem male consuluit famæ, quod præceps nimis in judicando fuit & hæc sibi imponere passus est. Et quod demum diutius hæc febris perſistit, id utique omnibus evenire solet hypochondriacis, in quibus ventriculi robori imminuto convenientibus succurrendum est præterea præſidiis.

### OBSERVATIO II.

Quum anno dñi 1709. post acerrimum hiemale diuturnum <sup>Febres</sup> frigus, Martio mense leniori ex austro spirante vento, nives <sup>catarrha-</sup> & gelu solverentur, Aprili & Majo initiante, Berolini, quo <sup>les epide-</sup> tum degebam, & alibi, quamplurimos corripiebat febris cum <sup>mica.</sup> horripilatione & æstu, summo languore, tussi ferina, nonnullis quasi suffocatoria, ingenti siti & ciborum nausea. Circa noctem invalescebant hæc omnia & somnus inde mirum turbabatur. In quibusdam extrema mox calebant, mox horrebant. Quidam diu decumbebant, præsertim ii, ubi ob pravam humorum diathesin, purpuræ scorbuticæ materia intus deliteſcebat, quæ etiam per vices crebrius maculis rubris & asperis in extrema cute comparebat, ex levi vero causa iterum evaneſcebat. In nonnullis quarto statim die exanthemata rubra morſicantia, urentia, cum magno pruritu, quasi ab urticis inducta, quæ dicunt *die Nesselsucht* / erump-  
bant

bant & tussis æque ac caloris mitigationem inferebant. Alii, præsertim femina phlegmatica sanguinea provectioris ætatis, exquisitos simul rheumaticos dolores patiebantur. Qui vix convalescentes, in publicum prodibant cito nimis, incurrebant ingentem capitis torporem, gravativum dolorem, vertiginem, gravedinem, den *Stoßschnupfen* / languorem corporis cum spirandi angustia & difficili negotio iterum ad sanitatem redibant. Ubi etiam vetus jam erat in pulmonibus vitium ex hæreditate, febre hac discedente, tussis purulenta cum sanguine succedebat sæpe & vera phthisis. Qui porro ab imperitis Chirurgis & Pharmacopœis purgantes accipiebant pilulas, doloribus acerbis ventris affligebantur mirumque debilitabantur, animi defectiones patiebantur cum frigido extremorum sudore, & gravius, & longius, decumbentes. Qui vero & proba victus & regiminis ratione, & dextra medicatione morbo occurrebant, ac pulveribus imprimis bezoardicis sedulo uterentur, cum uno, vel dimidio grano extracti croci, brevi convalescebant iterum.

#### *Epicrisis.*

Epidemicæ hæc raro sunt catarrhales febres, tum maxime, quando ex tempestatum constitutione insolita ejusdemque subita vicissitudine, ob mutationem ventorum, imprimis quando rigidum boream, mox lenior excipit aura zephyri, subnascuntur. Pejoris etiam tum sunt indolis & ægrius persanantur, qui dyscrasia sanguinis & humorum, ab æris intemperie introducta, foventur. Valde dissimilia quoque, pro dispositione habitus corporis, visæ erunt, ætatis, temperamentorum, nec non victus ratione, inferunt symptomata, magis, vel minus benigna. In curatione autem omnia, quæ criticum naturæ motum, feri superflui per glandulosa emunctoria, excretioni dicatum, turbant, morbum graviter exasperant & sanationem impediunt, uti potissimum faciunt purgantia cum corporis refrigeratione. Contra ea optimum utique consilium, corpus in perpetua perspiratione servare & usurpare ea, quæ acredinem mulcent, leniunt atque contemperant, ex medicamen-

dicamentis æque ac alimentis, & quod maximum est, ab omni cerevisia & vino abstinere & decoctum temperans bibere, sine quo refractarii catarrhi difficulter, vel plane non, cedunt.

OBSERVATIO III.

Macilentus, nervosus & animo mobilis vir, quadragin-<sup>Frequens</sup>ta annos habens, quum Baccho & Veneri strenue subinde li-<sup>catarrho-</sup>caret, lauto vivendi genere uteretur, nec unquam tamen<sup>rum in-</sup>sanguinis missionem admitteret, a longo jam tempore, vere<sup>cursus</sup> & autumn<sup>sublatus.</sup>o, crebrius affligebatur catarrhalibus defluxionibus, quæ cum horrore, æstu, extremorum frigore, capitis dorsique dolore, lassitudine totius corporis & inquietudine ipsum invadebant, & accedentibus artuum, coxendicis & nuchæ doloribus, sæpius per aliquot hebdomades detinebant. A me igitur salubre consilium ad arcendum tam frequentem catarrhorum incursum rogans, obtinuit hoc: ut I. aliquot ante æquinoctium hebdomadibus, venæsectionem cum debito regimine institueret; II. ut bis in anno lac cum minerali leniori aqua, Selterana inprimis, ad mensem potaret, loco cerevisiæ biberet ptisanam; III. ut bis hebdomade, pulverem bezoardicum absorbentem, paullo ante quam cubitum iret, assumeret & mane post in lecto infusum veronicæ, cum liquiritia & semine foeniculi, forbillaret, expectando postea lenem sudorem. Quæ omnia, quum per aliquot annos fecisset, liber fere degit a molestis catarrhosis defluxionibus, & animadvertit, eosdem illico infestasse, simulac sanguinis missionem tempestivam neglexisset.

*Epicrisis.*

Per immoderatum vini ac veneris usum, adeo utique infirmantur corpora, ut postea levi ex causa ægrotent, & potissimum incidente subita cœli mutatione, vere & autumn<sup>o</sup>o admodum solenni, catarrhos, gravedinem, coryzam & tussim incurrant, cum febricula. Idem quoque macilentis & plethoricis, post corporis refrigerationem contingere, docet experientia. Venæ sectio autem omnium optime ab his molestiis defendit. Si enim sanguine nimis plena sunt vasa,

(IV.)

S

ob dif-



ob difficilem circuitum, non rite depuratur. Hinc serum fit & copiosum, & impurum. Et impedita postea per cutis poros distillatione, ad interiora, maximeque glandulosa loca, falsus agitur humor, catarrhum cum febricula serosa faciens. Ego certe multiplici confirmatum habeo experientia, catarrhis crebrius obnoxios, ab eorum insultu matura sanguinis missione fuisse liberatos. Observavi quoque eos, qui venæsectionem, certo tempore suetam, intermiserunt, affectos fuisse catarrhali febre.

## OBSERVATIO IV.

*Catar-*  
*rhalis fe-*  
*bris cum*  
*colica V.*  
*S. sanata.*

Dux quidam militaris quinquagenario major, sanguine & succis plenus, ex Italia ad nostras oras accedens, ob insignem aëris, victus & vinorum mutationem, frequentissime affectus fuit acerbis colicis in abdomine doloribus. Bibit hinc, meo ex consilio, præmissa venæsectione & purgatione alvi per infusum mannatum, aquam Sedlicensem, per aliquot hebdomades, quo factum, ut per totum autumnum ac hiemem liber a tormentis ageret. Iterandam igitur hanc curam, medio vere, suasi. Sed antequam id faceret, vino se largius implevit & corpus deambulatione per aliquot horas sub frigido coelo admodum frigefecit. Inde incidit in febrem, cum coryza, capitis dolore, horrore extremorum, præcordiorum anxietate, æstu, inquietudine, tussi valida, & febre fere continua. Post tres tamen dies remisit febris impetus, sed horror cum subsequente æstu versus noctem accessit adhuc, & quod commemorabile, declinante semper paroxysmo, venter flatibus distendebatur & cruciatus in ipso facti, calore vero oboriente mitigati. Interdum etiam in paroxysmo deliravit paullum & facies fuit rubicunda. Manè autem febris semper remisit. Consultus ego quarto morbi die, expensis curate cunctis, ex pulsu pleno ac magno judicavi, venam esse secandam. Factum id remittente paroxysmo in pede feliciter. Alvus dein aliquoties clysterè carminativo & emolliente subducta, & postea curatio, pulveribus diaphoreticis, temperantibus, leniter nitrosis, cum emulsione ex decocto

cocto cornu cervi, amygdalis & semine papaveris albi, sub moderate calido regimine, intra tres hebdomades ex voto confecta, alvo tamen interea bis decocto mannato soluta.

*Epicrisis.*

Venæ sectio in catarrhosis affectibus non quidem directe indicatur; interim tamen, si corpus est plethoricum, si sanguis a calidis & præsertim immoderatori vini usu incaluit & febris catarrhalis subito invadens continua videtur, non nocet, sed prodest, elapsis etiam jam aliquot diebus. Dein hoc in casu commemorabile, quod abdominis dolores, jam per annum silentes, accedente hac febre, fuerint resuscitati, & quidem tempore remissionis, discussi vero per febris calorem. Quod quidem nullam aliam ob causam factum fuisse arbitror, quam quod falsus & acris humor ad intestina delatus eademque moleste affecit, sub æstu vero ad habitum corporis propulsus. Multoties quoque me docuit experientia, pathemata hypochondriaca, colica & spasmodica, in iis qui diu iisdem affecti, catarrhis, tussi, coryza & catarrhali febre fuisse revocata. Et hypochondriacos, eo tempore, quò alii catarrhis vere & autumnò laborant, vehementes tum, quasi paroxysmos mali sui, experiri.

OBSERVATIO V.

Ver erat, quum virgo nubilis, tenerior, sensibilis texture & spongiosi habitus, horripilatione, cum calore præternaturali, languore universi corporis, nec non præcordiorum anxietate corripereetur. Intumescabant circa tertium diem colli glandulæ faucesque levi afficiebantur inflammatione, aderat etiam simul tussis cum gravedine & raucedine. Vocabatur Medicus, qui auri fulminantis, minus puri, grana sex, cum dimidio scrupuli antimonii diaphoretici propinabat. Sumto hoc pulvere, sævissima insequerantur pathemata, animi deliquium, summa anxietas & inquietudo, extremorum refrigeratio & conatus ad vomendum. Opponebantur quidem bezoardica, & fixa, & volatilia, sed incassum. Sequebantur quatuor dejectiones viri-

*Febris catarrhalis ex usu auri fulminantis funesta.*

diffimæ & vomitu ejusdem indolis materia rejiciebatur. Anxietates vero inde nihil minuebantur, sed persistebant perpetuæ cum animi defectione, ardor etiam & constrictorius dolor in præcordiis fixus urgebat & quovis assumpto exacerbabatur, sudor succedebat frigidus, facies Hippocratica & septimo die mors ipsa.

*Epicrisis.*

Miranda sane, febris hujus minus periculosa primum visa, subita catastrophæ, demum funesta. Orta hinc ingens controversia: utrum per se fuerit maligna? an vero simplex catarrhalis usu pharmaci facta fuerit lethalis? Id minimum verum: medicamina metallica non bene preparata & corrosivo sale adhuc imbuta, quale est aurum fulminans non rite edulcoratum, veneni prorsus induere naturam & funestum edere effectum in personis tenerioribus, & ubi jam ad lenem inflammationem, nervosa partes, e quibus etiam ventriculus, jam sunt disposita. Aurum enim, ob gravitatem suam firmiter ventriculi tunicis inhærendo, eam cui insidet partem vehementer exstimulat eandemque spastice constringit, haud secus ac venena, quæ pariter stomacho spasmus inducunt, qui postea per nervorum genus diffunditur totamque œconomiam motuum pervertit. Id quod tanto magis fit in corpore exquisitius sentiente, ubi jam adest febris, quæ nihil nisi universalis fibrarum spastica est contractio. Deinde id pariter certum: materiam causticam lymphaticam foris discernendam, forti ejusmodi stimulo retrahi ad ipsum ventriculum & solam ad inducendam ipsi inflammationem esse sufficientem. Ne dicam, primam corporis regionem succis corrosivis acidis biliosis fuisse obsessam, teste ipso colore eorum quæ secesserunt. Hos autem solos corrosivitate sua propria, multo magis corrosivo adhuc pharmaco adjutos, inflammationem parere posse, nemo negabit. Cautissime igitur mercandum cum medicamentis quodammodo corrosivis ex mineralium familia, ubi stomachus ad inflammationem dispositus & saburra erodente acido-biliosorum humorum

scatet.



scatet. Tum enim medicamentum ab aliis sine damno sum-  
tum, veneni naturam induere potest utique.

## OBSERVATIO VI.

Literatus & vitæ sedentariæ addictus vir, quadragenarius *Catarrhi*  
circiter & corpore habitior, a multis jam annis vere & autu-<sup>cum ce-</sup>  
mno capitis defluxionibus, coryzæ, gravedini, tussi cum in-<sup>phalalgia</sup>  
calescentiâ quadam febrili fuerat obnoxius. Is initiante <sup>narium</sup>  
Octobre, quum poma cydonia cocta crebro & largiter edisset <sup>fluxu son-</sup>  
& alvum inde obtinuisset solito strictiorem, postea etiam per  
aliquot horas liberiori frigido aëri sese exposuisset, sequenti  
mox die, circa vesperam, horripilatione corripitur, intercur-  
rente æstu. Mane sensum tractorium admodum dolorificum  
percipit in humeris & nucha, nec non acutum in anteriori ca-  
pitis parte, maximeque fronte, dolorem, naribus quidem  
calentibus, sed aridis & siccis. Datis medicamentis diapho-  
reticis, leniter nitrosis, cinnabarinis, mitescebant sympto-  
mata pedetentim cum æstu, dolor autem in fronte persistebat  
supra oculos omnemque fere adinebat somnum. Datum  
hinc consilium, ut crebrius naribus adinoveret sal volatile An-  
glicanum ficcum, quod ex sale ammoniaco & sale tartari pa-  
ratur, oleo cephalico, uti est lavendulæ & majoranæ puro,  
essentificatum, non omissis infusis theiformibus, ex herbis  
cephalicis & diaphoresin leniter moventibus. Inde mitiora  
facta tormenta & præter opinionem e naribus fluxit liquor  
flavescens viscidus ad aliquot drachmas, idque aliquoties de  
die, quo facto, post biduum omnis evanuit dolor & æger  
perfecte convaluit.

*Epicrisis.*

Heic origo catarrhalis rhevmaticæ febris cum gravi ca-  
pitis dolore deducenda ab alvæ obstructa & perspiratione  
prohibita, in corpore, ubi caput debile & ad defluxiones  
catarrhales jam tum fuit proclive. Locus autem doloris in  
fronte supra oculos fuit in sinibus ossis frontis, qui vestiti-  
intus tunica nervosa & pituitaria. Huc si cum impetu ruit  
sanguis, a nimio ipsius affluxu & stagnatione oritur dolor, se-

rumque acre transudat, hocque effluente, dolor discedit. Ut adeo verum sit priscum Hippocratis effatum: *sect. VI. aph. X. cui capite graviter dolenti, pus, aqua, vel sanguis e naribus profuit, is a dolore liberatur.*

## CAPVT VII.

DE

## FEBRE VARIOLOSA.

THESES PATHOLOGICAE.

## OBSERVATIO I.

*Variola  
quid?*

**V**ariolosa febris est acuta, exanthematica, contagiosa, in qua motu quodam critico, materia valde tenuis, caustica, corrupta, inflammans & exulcerans, ad summam cutem propellitur, cum gravibus sæpe symptomatibus stipata.

## §. II.

*Morbi  
historia.*

Febrem hanc imminuentem indicant lassitudo corporis, virium languor, somnus inquietus, ciborum fastidium, cum conatu vomendi, capitis dolor, pavor in somno, alvus clausa, stimulus ad tussim & horripilatio intercurrentes. Hæc per plures sæpe dies jam præsto sunt & postea succedit æstus per totum corpus, cum pulsuum celeritate, siti, augetur capitis, lumborum & spinæ dorsi dolor. Infantes potissimum, sæpe ex improvise, epilepsia & rigor ac tremor artuum invadit. Ætate junioribus delirium familiare. Corpus est inquietum & jactatur. Intra tertium & quartum diem conspiciuntur in facie & collo vestigia macularum rubrarum, quæ pedetentim numero plures efflorescunt, post faciem & collum, pectus brachia, ac demum etiam abdomen, dorsum cum femoribus pedibusque occupantes. Durat hæc eruptio ad duos usque dies successive, ac interea decrescit febris cum symptomatibus, ut pulsus cum calore sexto die ferè sit naturalis. Elapso autem quinto incipit fieri suppuratio, eodem modo ut eruptio gradatim a superioribus ad inferiora

ra transiens, quæ ubi in vigore constituta maximeque in facie manibusque succedit, ob ingentem ardorem & dolorem cutisque tensionem fere intolerabilem, accenditur nova symptomata secundaria febris, cum siti, vigilia & præcordiorum anxietate. Quæ symptomata, ubi corpus impurum, pustulæ confluentes & virulenti genii, delirio & convulsionibus accedentibus, nono, vel undecimo die necant. Si vero pauciores & benigniores, pathemata remittunt & fit exsiccatio, donec undecimo & ultra decidant & æger ad sanitatem redeat.

### §. III.

Corripiuntur hac febre tantum non omnes homines, *Prima* cujuscunque sexus, ætatis, temperamenti, quin nationis *origo ex* sint; ideoque in proclivi utique judicare, causam ipsius esse *utero.* universalem omnibusque communem. Unde vero origo hujus omnibus adeo infestæ materiæ repetenda & ubi ipsius sedes, non æque expeditum. Veteres quidem natales ipsius a sanguinis menstrui, sub ingravidatione retenti, immunditie foetui communicatæ, duxerunt. Et vero utique simillimum, primordia hujus virulenti humoris, non ex aëre, victu, aut aliis externis causis, sed ex utero esse materno. Id enim experientia frequenti constat, infantes a matre minus sana & impuris succis scatente progenitos, variolis moris mali & quandoque exitialibus corripi, matre licet sub gestatione vegeta, ob succos pravos in foetum trans-euntes. Vicissim etiam in comperto, gravidas, si proba victus ratione & affectuum moderatione, cacochymia, & plethoræ convenienti sanguinis missione, saluberrimæ quoque per alvum & cutem excretioni prospiciant, infantes in lucem edere, qui variolis correpti, non adeo periculose decumbunt, sed paucas ipsas & benignioris indolis, nanciscuntur.

### §. IV.



## §. IV.

*Sedes  
causa in  
humori-  
bus.*

Sed neutiquam hujus maligni humoris sedes in ipsa sanguinis & humorum massa videtur ponenda. Etenim, quamvis per alios morbos exanthematicos, morbillos, purpuram, scabiem, apostemata, tineam capitis, febres quoque, tota succorum massa exagitata fuerit, dissoluta omniaque ipsi involuta extricata, variolarum tamen materia manet & nihilo secius corpus adoritur. Hinc ad veritatem utique proxime accedere videtur, ex succo quidem chyloso lymphatico impuro & corrupto matris, oriri primum subtilem hunc & virulentum humorem, sed viscositate quadam involutum, firmitusque tubulis quibusdam impactum, delitescere tamdiu, donec in motum fermentativum sui multiplicativum ab aliis causis deducatur, succis insinuetur & critica quasi despumatione e corpore exturbetur. Nec officit, quod post longum interdum tempus in noxam erumpat. Diu enim malignus quidam humor, in tubulosa partium, immo ipsius cutis substantia, tanquam in latibulo sine noxa hærere, & postea demum in motum excitatus, universum systema nervosarum & fibrosarum partium pessime afficere totamque motuum œconomiam pervertere potest. Testatur hoc cancer in glandularum substantia per longum tempus occultatus, testatur venenum canis rabidi, item miasma venereum, quod per lac nutricis infanti communicatum, post aliquot demum sæpe annos reviviscit, vel in adultis per gonorrhœam virulentam suppressam ad interiora pulsam, post longos haud raro annos prodit & virulentiam suam exserit.

## §. V.

*Sed spi-  
nali me-  
dulla.*

Latibulum autem virulento huic qui variolas facit succo, præbent, mea quidem sententia, medullæ spinalis tubuli quidam obstructi. Probabiles minimum quæ id evincunt hæ sunt rationes. Spinalis quippe medulla cum capite omnium primo in utero formatur, & majus præ aliis partibus cito augmentum acquirit. Hoc aliter fieri nequit, quam per liquidum, quod per ejus minimos canaliculos fertur. Quod si

sta-

stagnans obstruit quosdam, ex diuturna mora, ut omnis humor occlusus, valde alienam & perniciosam indolem contrahit. Talis humor compedibus postea liberatus & sui juris factus, non aliam sæpe ac veneni naturam & vim prodit, humores fermentando, eorum texturam & crasin immutando, solidas vero partes vehementer stimulando, arrodendo & vellicando. Quod vero ex imis medullæ, maximeque illius portionis, quæ in inferiori regione spinæ, materia quæ variolas efficit, prodeat, hæc confirmare videtur ratio, quod nullus fere morbus tam subito totum systema nervorum & nervosarum partium adoriatur, quam hic ipse. Testatur id febris acuta celeriter invadens, spasmus nempe totius vasculosi & nervosi systematis, quem ego utique a membranis spinalis medullæ deduco. Testatur idem dolor capitis, dorfi & lumborum, individuus fere comes. Testantur epilepsiæ, convulsiones, tremores artuum, deliria, quæ mox statim in principio, secus ac in ulla alia febre, adsunt. Testantur præcordiorum anxietates, item nausea, vomitus, cardialgia, quæ a spasmis substantiæ nervosæ ventriculi & orificiorum ipsius proveniunt. Testatur alvus stricta & clausa, quæ semper fere primis diebus est. Testatur demum inquietudo cum vigilia, quæ nonnisi molesta generis nervosi affectio & commotio est.

### §. VI.

Sed mittimus hanc paullo subtiliorem de prima origine *Materiae* & sede causæ variolarum theoriam, quia directe non pertinet ad artis usum & therapiam, quæ magis in eo versatur, *caustica* ut naturam, genium, facultatem & potentiam operandi *& putrefaciens.* virulentæ istius materiæ probe indagemus. Indoles igitur hujus videtur mihi duplex, una acris & inflammans, unde dolor, ardor, rubor, tumor, arrosio & exulceratio, altera caustica & putrefaciens, quæ motu subtiliori intestino, crasin & unionem partium mixtum constituentium destruit atque corrumpit, & hæc proprie ad ipsam malignitatem,

magis spectat, atque quam maxime sese prodit in variolis malignis.

## §. VII.

*Triplex  
variola-  
rum ge-  
nus, be-  
nigna.*

Optime vero variolæ distingui possunt in benignas, malignas, & quæ sunt inter has mediæ naturæ. Benignæ his cognoscuntur indicii: si non adeo copiosæ sunt numero; si debito tempore & ordine prorumpunt, suppurantur & exsiccantur; si non nimis profundæ; si bono pure refertæ, sufficienter elevatæ & circulum habent rubicundum; si facta eruptione in superioribus partibus, febris & symptomata notabiliter remittunt & omnia tranquille & placide fiunt. Hæ omni vacant periculo, immo sponte & solius sæpe naturæ beneficio curantur. Tales autem plerumque sunt, quæ temperato vere oriuntur, in corporibus non adeo impuris, nec sero & sanguine repletis, in pueris etiam. Nam acris & caustica materiæ qualitas non modo mediante succo roscido in corpore corrigitur & ad expulsionem in cute, præparatur, sed & affluxu ejusmodi succi, in ipso suppuratorio actu plane mitis & blanda efficitur.

## §. IIX.

*Maligna.*

Vicissim malignum & causticum in variolis subesse virus, inde concludendum: si vel nimis cito, vel nimis tarde prodeunt; si manent depressæ & suppurationem reniunt; si plurimæ livescentis & quædam nigri coloris, vel limbum nigrum habent; si pulsus celer, etiam post eruptionem sufficientem, cum inquietudine persistit; si erecti animo facile linquuntur; si pustulæ sunt sanguinolentæ, vel diarrhoea cruenta, aut mictus cruentus supervenit. Lethifera hæc sunt indicia, & ex viginti vix unus evadit, qui ejusmodi symptomatibus afficitur. In corporibus demortuis hac specie variolarum sanguis fluidus est totus, nec in serum, nec in coagulum secedit, quod aliquoties observavi, manifesto indicio, putrefactione intima ejus crasin plane esse colliquatam & viniculum seri & sanguinis destructum, & hæc est causa ipsius mictionis, nec non dejectionis cruentæ, & quod variolæ sangui-

nem



nem fundunt. Ejusdem variolæ sunt indolis, quando petechiæ sese miscent, vel etiam pustulæ parvæ miliares asperæ, quæ de intima corruptione sanguinis & lymphæ testantur. In quibusdam porro tardius maligna & putrefactiva variolosi humoris indoles sese ostendit, dum post exsiccationem febris manet lenta & in externis partibus, præsertim articulis, in brachiis, manibus, pedibus, tumores oriuntur & ex iis fiunt fœda, exedentia, fistulosa & ossibus cariem inducentia ulcera, quæ difficillime sanationem recipiunt, & procedente tempore, lentam interunt mortem. Interim tamen in genere tenendum, quod malignitas hæc gradu, jam majori, jam minori, differat.

## §. IX.

Virulentæ ejusmodi variolæ sunt plerumque epidemice *ubi & cur* & nascuntur a statu anni temporum plane irregulari, *tales.* anomalo, diuturno, præsertim sub coelo diutius nebuloso, pluvioso humido, ventis destituto, longe magis post diluviones & inundationes aquarum, quando diutius eadem supra terram stagnant & aer ob id, & insectorum, & exhalationum putridarum copia retortus est, tumque ut plurimum simul grassantur, ipsisque etiam variolis complicantur petechiales & aliæ deleteriæ indolis non expertes febres. Deinceps uti variolæ in corpora impura & cacochymica incidunt & ubi primæ viæ magna impurorum succorum colluvie scatent, plus incrementi capit malignitas. Observamus porro miasma sive contagium uno tempore majorem virulentiam habere, quam altero. Accidit hoc non semper ob manifestam quandam sensibus obviam causam, sed dubio procul ex pernicioso varii generis exhalationibus & effluviis, quæ ex animantibus & vegetabilibus surgentes, cum aeris particulis salino-sulphureis sese miscent, ut ipsa unione specificam quandam deleteriam virtutem nanciscantur, non secus ac videmus in chymicis, quod sola commixtione rerum, quæ per se non sunt venenatæ, venenum enascatur.

## §. X.

Tertium genus est variolarum, quas nos mediæ naturæ *Et inter*

*utraq;  
media  
natura.*

dicimus, quia non sunt nec adeo malignæ, nec adeo benignæ, sed medio modo se habent, ideoque prudentem Medicum & idoneam medicinam poscunt. Tales sunt, quæ non sparsim, sed confertim, inprimis in facie & manibus, comparent, & confluentes fiunt; item quæ interiora, nares, fauces, interdum etiam œsophagum occupant, ut ægri non bene deglutire possint. Anceps etiam facit iudicium, quando in suppuratione acris denuo oritur febris, cum æstu, calore & ardore manuum; si caput nimium intumescit & largus salivæ fluxus est, si urinæ porro tenues, copiosæ minguntur & corpus largis sudoribus diffluit. Neque minus ubi novæ semper exsiccatis jam subnascuntur papulæ minores & suppuratio atque exsiccatio nimis protrahitur; ubi cutis tensior & pustulæ profundius sedent, ætas juvenilis, vel virilis, tempus autumnale & hiemale, æstas etiam nimis fervida & sicca præcessit, & præterea non adeo proba victus ratio a decumbente observatur. Et hæc sæpius omnino, nisi solícite præcaveatur, alios relinquunt morbos. Epidemice etiam ut plurimum grassantur, quum benigniores magis sint sporadicæ.

#### §. XI.

*suspecta  
quæ signa.*

In suspectis quoque signis est, quando statim inter initia & ante eruptionem, acuti & pertinaces dolores in spina, brachiis, pedibus, lumbis, nec non coxendice affligunt; si cito nimis, primo illico, vel secundo die, variolarum vestigia in cute comparent, tanto magis quum exanthemata aspera, acicularum capita æquantia, interspersa; si stationem non servant, mox disparent, mox redeunt; si facies non intumescit die tertio vel quarto, vel mox detumescit iterum; si in juvenibus ante eruptionem grave delirium, nec non difficilis deglutitio; si in suppuratione sopor, & post hunc alienatio mentis & incongruus sermo; si etiam nimium salivæ stillicidium.

#### §. XII.

*Alvi fluxus non adeo per-*

Alvi autem fluxus, licet copiosus, non adeo pertimescendus. Eundem enim per totius morbi decursum sine ullo peri-



periculo successisse vidi, tantum abest, ut eruptionem im-<sup>time</sup>tescendiverit. Atque hanc in rem commemoratu dignum, quod <sup>du</sup> scribit *Amatus Lusitanus Cent. III. pag. 234. pervenere hac æstate ad manus nostras plus minus CL. pueri, variolis & morbillis affecti, e quibus omnes evacuati evaserunt, alii vero, quibus parentum ex culpa evacuatio facta non fuit, vitam cum morte commutarunt, numero tres; alii vero quatuor in ulcera difficillima & male morigerata pervenerunt, quæ cum aphthis communionem habent & facile in gangrenam abeunt. Iis similis superstes puer, qui ulcus cancriforme & malignum, cubitum dextri brachii occupans, multis foraminibus perforatum, habet. Scilicet sicuti in febribus malignis petechialibus, alvi profluvium morbi facit solutionem; sic etiam in mali generis variolis idem evenire experientia docet, quæ etiam *Ballonii in epid. & ephemerid.* sententia.*

## §. XIII.

Qui variolis moriuntur, criticis ut plurimum diebus, *Quando* nono, undecimo, vel decimo quarto decedunt, & quidem *& quomodo* maxime convulsionibus, quas exquisitissimus ardor, dolor <sup>mors eveniat.</sup> ac tensio in brachiis, manibus & facie, præsertim si profundius sedent pustulæ, excitat. Quidam catarrho extinguuntur suffocativo. In nonnullis, imprimis si malignitas subest, quando in situ erecto, vel extra lectum sunt, animi obrepit deliquium, maculæ cum pustulis disparent, & convulsione superveniente, intra aliquot horarum spatium mors excipit. Vidi etiam variolis jam exsiccatis, juvenes quosdam subito insultu apoplectico esse extinctos, posteaquam in ipso morbo capitis gravitate, vigilia & per intervalla mentis emotione, laborassent. Novi quoque infantes unius aut duorum annorum, quum absoluta exsiccatione in vado prorsus esse viderentur, macula erysipelacea livido-nigricante maligna, quæ totam fere suram, vel pedis regionem occupavit, ex improvviso fuisse affectos & subito mortuos, manifesto sphacelationis & magnæ corruptionis in sanguine indicio.



## §. XIV.

Post va-  
riolas  
alii sani.

alii vale-  
tudinarii.

De iis autem, qui variolarum morbum superant, multiplici confirmatum habeo experientia, quod pueri qui ante illum valetudine minus firma usi, variis oculorum & aurium defluxionibus, tinea capitis, doloribus artuum, imbecillitate pedum, rhachitide & tabe, nec non adultiores mensium retentione laborarunt, postea integram sanitatem, corporis robur & nutritionem latiore accepserint. Viciissim vero novit etiam alios, qui antea sani & valentes, in variolis vero perversa medicatione excepti, vel commissis in diæta erroribus, valetudinarii postea facti, phthisin, febrem lentam, tabem & asthma incurriile, visus vitia, ophthalmias, epiphoras, maculas & albugines contraxisse, aut ulceribus sordidis in facie & artuum juncturis fuisse affectos.

## §. XV.

Variola  
contagio-  
sa.

Ceterum ultimo adhuc loco probe tenendum: quod materia variolarum semper sit indolis fermentativæ & sui multiplicativæ. Unde vix ullus alius morbus, excepta forsitan pestilentia, adeo contagiosus, ac variolarum. Quo etiam fundamento nititur, cum fructu ab Anglis potissimum instituta variolarum insitio, qua purulento ex varioloso decumbente humore in fauciatam sani variolas nondum experti hominis cutem immisso, protinus idem hic morbus, cum febre omnibusque quibus stipatur symptomatibus, suscitatur atque inducitur.

## CURATIO.

## §. I.

Indica-  
tiones cu-  
ratorie  
naturæ  
ductui  
confor-  
mes.

Natura, per quam partium solidarum & fluidarum corporis ad motus vitales & excretorios dispositionem, intelligimus, tam exactum in hoc morbo, si moratus, quam in nullo alio servat ordinem & tempus, & haud raro sponte, citra artificiosam medicationem, eundem percurat, quando videlicet crasis sanguinis & humorum viscerumque conditio, ita comparata, ut correctioni materiæ causticæ & expulsiōi ejusdem non

non obſtent. His naturæ viis merito inſiſtendum Medico, nec aliud agendum, quam ut eidem in opere correctorio, expulſorio & ſuppuratorio congruis auxiliis ſubveniat. Igitur ita inſtituenda medicatio, ut I. materia acris, vitioſa, cauſtica contemperetur & ex veterum loquendi more coquatur, ſimulque eſtrenes in vaſorum & nervoſarum partium ſyſtemate primis diebus motus ad moderamen traducantur; II. ut eruptio ſecundetur & languentes circa eruptionis tempus motus erigantur, quo omnis ad corporis habitum pellatur materia, accedens autem in ſuppuratione ſecundaria febris moderata ſervetur & graviora arceantur pathemata; III. ac demum declinationis & exſiccationis tempore ſanguinis & humorum maſſa ſub morbo dyſcrasia & impuritate aſſecta, repurgetur, ſicque oriundi ex reliquiis morbi tempeſtively præſcindantur.

§. II.

Acridinem materiæ mulcent ſimulque nimiam ſanguinis exaſtuationem, ipſam excretionem impediētem, blande componunt pulveres temperantes, leniter diaphoretici, cuius generis hic eſt: recipe cornu cervi philoſophice præparati, uſti, antimonii diaphoretici, lapidum cancrorum, matris perlarum ana drachmam, cinnabaris rite paratæ drachmam ſemis, nitri puri ſcrupulum. M. f. pulvis, de quo pro diverſitate ætatis dandum & doſis ſumma eſt dimidia drachma. Propinatur commodiſſime in vehiculo ex aqua ſcorzonæræ, nucleorum ceraſorum, florum ſambuci, acaciæ, herbæ cardui benedicti & ſcabioſæ. Dein eundem in finem utilia decocta humectantia & temperantia, avenaceum tenue, cum amygdalis in emulſionem reductum, ſerum lactis dulce, noſtra methodo paratum, aqua hordei cum ficibus decocta. Item emulſio ex decocto ſcorzonæræ & cornu cervi, amygdalis ſeminibusque quatuor frigidis cum ſaccharo. Cui ad motuum vehementiam moderandam, commode ad-jicitur ſirupus papaveris albi.

§. III.

## §. III.

*In eru-  
ptione.*

Quando natura segnior in expulsiōe sub eruptionis tempore, danda hæc emulsiō: recipe seminis napi, cardui Mariæ, aquilegiæ ana drachmam, aquæ florum sambuci, galegæ, cardui benedicti ana unciam f. l. a. emulsiō, adde antimonii diaphoretici drachmam semis, sacchari perlati quantum satis est. M. Efficaciter etiam expellit liquor bezoardicus ad mentem Bussii paratus, cum tripla portione liquoris nostri anodynī mineralis nuptus. Item elixirium alexipharmacum, sine spirituoso menstruo sic confectum; recipe radicis dictamni, angelicæ, vincetoxici, contrayervæ ana unciam semis, herbæ scordii, cardui benedicti ana manipulum, fiat extractio in aqua scordii libra medica & liquoris anodynī mineralis unciis tribus, additis prius salis tartari, croci & myrrhæ ana drachmis duabus; de quo viginti minimum & ad summum quinquaginta guttæ, præbendæ.

## §. IV.

*In suppu-  
ratione.*

Eadem profunt quando suppuratio lenta nimis & pustulæ elevari renuunt. Tum quoque utilis hæc mixtura: recipe myrrhæ electæ drachmam dimidiam, croci, salis tartari ana scrupulum, aquæ scorzonæræ uncias duas, coquatur, coletur & usui servetur. De hac dimidium, vel unum cochlear in emulsiōe, ex aquis analepticiis & diaphnoicis cum seminibus quatuor frigidis, præsertim circa noctem, porrigendum.

## §. V.

*Et exsic-  
catione.*

Sub exsiccatione demum propinanda sunt remedia, quæ putredini resistunt, item quæ sordes relictas, vel sub morbo genitas, per congrua emunctoria evehunt. Utilis tum pulvis ex lapidibus cancerorum, antimonio diaphoretico, pauxillo myrrhæ, succini & croco. Proficuum quoque infusum theiforine ex herba scordii, summitatibus millefolii & semine fœniculi, cui si pectus simul affectum, veronica cum liquiritia addenda. Potissimum hoc tempore interponenda blanda laxantia, balsamicæ simul indolis, uti sunt instar omnium pilulæ Beccherianæ, vel ad earundem exemplar paratæ.



CAVTELAE ET OBSERVATIONES  
CLINICAE.

§. I.

**E**Venit haud raro, ut in principio, præsertim infantibus, *Quibus* accendant crebræ & anxix vomitiones. Ad has com- *Vomitus* pescendas & spasium ventriculi laxandum, egregie proficit & epile- liquor noster anodynus mineralis, vel solus, vel cum ali- *psia com-* quot guttis spiritus bezoardici Bussiani remixtus. Idem hic *pescenda.* noster liquor eximii usus si convulsio epileptica, in lactantibus maxime & difficulter dentientibus periculi non experts, ur- get nimis. Conducit etiam pulvis Marchionis, cum cinna- bari & pulvere lumbricorum terrestrium. Et alvus clystere molliente solvenda, qua clausa in principio, epilepticum malum augefcit.

§. II.

Quando æstus acrior, nitri dosis in pulveribus augenda *Æstus mi-* & tuto etiam præbenda tinctura rosarum, quatuor florum cor- *tigandus.* dialium, cum phlegmate vitrioli parata, cui multum *Vald-* schmidius atque *Dolens* tribuerunt. Nec male, quum in cor- poribus juvenilibus sanguineis, maximeque ubi variolæ ma- li moris ad putredinem pronæ grassantur, ratione & expe- rientia teste apprime profit; licet non omnem malignitatem extinguat, neque universale adversus copiosas variolas sit præ- servativum.

§. III.

Frequens juvenili inprimis ætati symptoma est salivæ flu- *Salivatio* xus, qui suppurationis tempore ut plurimum effusior acce- *moderan-* dens, non modo hanc, sed & somnum, non sine periculo, *da.* impedit. Moderandus igitur, tam per alvi apertionem me- diante clystere emolliente, quam diaphoreticum bezoardi- cum medicamentum, cui aliquot grana florum sulphuris ad- denda & bibendum desuper infusum theiforme ex betonica, veronica & floribus chamomillæ officinalis, quo aucta sic per- spiratione, a salivæ fontibus divertantur humores.

(IV.)

V

§. IV.

## §. IV.

*Ardor & dolor faucium mulcendus.*

Obsident pustulæ variolarum semper fere interiora faucium laryngem & pharyngem, ibique ardorem, dolorem & difficilem deglutitionem, quandoque etiam aphthas, excitare solent. Molesto huic accidenti succurrendum gargarismatè demulcente, ex decocto hordei & rob diamoron, adjecto pauxillo lapidis prunellæ, quo sapius os eluendum. Utile quoque decoctum avenaceum, cum butyro infuso, sirupo violarum vel granatorum, & nitri tantillo. Et ad mulcendum ardorem, pustulæ & aphthæ subinde tangendæ & illinendæ mucilagine seminis cydoniorum, cum aqua rosarum facta.

## §. V.

*Oculi defendendi.*

Oculos quoque nonnunquam occupant pustulæ & suppurantes vitium eisdem inducunt. Hinc sub eruptione statim ab iis defendendi, quod optime fit linteo duplicato, cui spiritus rosarum in quo camphora cum croco macerata, instillatus, quod tamen ante applicationem in loco calido tantisper siccandum, quo potior spiritus portio avolet. Mihi frequens, aquam rosarum & florum sambuci, adjectis aliquot liquoris nostri anodynæ mineralis guttis & momento camphoræ, adhibere eademque palpebras inungere. Quod si vero a pustulis pellicula relicta, cito eadem post declinationem absumenda hoc liquore: recipe aquæ rosarum unciam, reginæ Hungariæ drachmas duas, vitrioli cyprini grana quatuor, sacchari saturni grana duodecim. M. quo frequentius cum subtili penna tangenda est exurescentia. Idem hic liquor, omissio tamen vitriolo, egregiæ virtutis, in oculorum acri, calida & ardente defluxione, cum rubore, quæ variolis crebro succedit.

## §. VI.

*Venæ sectio quando proficit.*

Pulsuum vehementia & robur, faciei rubor, capitis lumborumque gravitas ac dolor, venarum turgescencia, ætas juvenilis, ingenii activitas, diata vinosa, sanguinis missio sueta & evacuatio critica suppressa, sanguinis subtractionem in variolis, primo vel secundo statim die, indicant. Sic evanescent.

nescunt mox pectoris anxietates & oppressiones, maculae confertim in cute efflorescunt, nec adeo gravia post eruptionem metuenda pathemata. Sæpius enim observavi, nimiam sanguinis redundantiam sufficientem materiæ variolosæ ad corticem corporis propulsionem impedire, & efficere, ut discretæ tantum prodeant pustulæ, intus autem relicta materia, circa declinationem varia symptomata spasmodica, convulsiva, deliria, catarrhos suffocativos, quin apoplexiam, inducat. Contra ea, ubi pulsum durities, humilitas & exilitas, vasa minus turgent, vires languent, temperamentum phlegmaticum, ætas infantilis & puerilis, corpus obesum, vomitus in principio adest, tussis & alvi fluxus, laborans etiam alias sub sanguinis missione facile animo linquitur, vena non pertundenda, ne nimia sanguinis copia subtracta, materia intus detineatur & eruptio ad plures dies, non sine periculo, protrahatur.

*Et noceat*

### S. VII.

Haud levis inter Medicos est controversia: utrum emetica in principio variolarum prosint, nec ne? Nos ita censu-  
semus. Quum variolæ circumeunt, ad præservationem expedit utique dare ea, quæ sordes copiosas & crudos succos non modo ex primis viis, sed & biliosos & vitiosos humores ex hepate eliminant, quibus retentis, justus metus est, ne graviolem reddant morbum. Primo etiam invasionis die locum adhuc habere possunt, quando turgere primam regionem vitiosorum succorum colluvie adsunt indicia, ex agripotissimum voracitate incongruorum liquidorum & solidorum, nausea, oris amaritie & ructibus, desumenda. Tum omnino lene emeticum, tartarus emeticus, solutus prius, ad unum vel duo grana in adolescentibus in aqua menthæ, vel cinnamomi, additis aliquot mixturæ simplicis guttulis, cum fructu datur, evanescentibus postea quæ eruptionem impediunt anxietatibus, ut pustulæ intra tertium & quartum diem prompte erumpant. Si alvum simul expurgandi intentio, tartarus emeticus cum infuso mannæ dandus, in infantibus ad

*in princi-  
pio prof-  
cua.*



quartam vel dimidiam partem, aut pondus unius grani. Pro-  
miscue autem tale remedium alternis diebus porrigere, empi-  
ricum est consilium.

## §. IIX.

*Alvus an-  
te eru-  
ptionem  
ruto sub-  
ducitur.*

De purgatione per alvum hæc monenda. Ante mor-  
bi insultum omnino sunt utilia laxantia, non vero fortio-  
ra purgantia, neque etiam mercurius dulcis, præsertim  
in infantibus & pueris tenerioribus. Optimum decoctum  
tamarindorum cum rhabbarbo, vel manna. Et si suspi-  
cio, crassa intestina scybalis, duris esse farta, præmitten-  
dum clystima emolliens & stimulans. Sub totius etiam morbi  
decurfu nunquam permittendum, ut alvina secessio nimis diu,  
ad octo vel decem dies restitet. Si fecus fit, inde potissimum  
in infantibus, vel suffocativi accidunt catarrhi, vel purpura  
variolas, aut erumpentes comitatur, aut suppuratis iisdem,  
non sine insigni virium jactura & symptomatum vehementia,  
excipit. Neque hanc ob causam eveniens & per totum sæpe  
morbi decursum durans cum bonis ægrorum rebus alvi flu-  
xus est compescendus. Eruptionis autem tempore, etiamsi,  
uti ordinario fieri suevit, alvus sit siccior, ab omnibus eam  
moventibus abstinendum, ipsis etiam enematis, quæ tum  
retineri, retenta angustias parere maximas & demum post  
aliquot dies reddi, novi.

*Sub illa  
non.*

## §. IX.

*In suppu-  
ratione  
an & qui-  
bus du-  
cenda.*

An suppurationis tempore in febre secundaria proficua  
sint alvum ducentia? inter Medicos Anglos fuit disceptatum.  
*Freindius* peculiari scripto adstruxit variis observationibus  
utilitatem, ita tamen, ut nonnisi decoctum mannæ admittat.  
Nos etiam hanc methodum non improbamus, si adsint,  
quæ purgationem indicant, alvus nempe per totum morbi  
decursum sicca fuit & constricta, copiosa in suppuratione  
salivatio & pectus copia humorum obsessum, ut anxia in-  
de & difficilis sit respiratio. Sed ego semper laxantibus  
præterre soleo clysteres, emollientes alvinas duras feces &  
educentes. Qui, si non sufficiunt, laxantia mannata præ-  
fer-

fertim in infantibus, quibus prima regio & præcordia crassis viscidis humoribus obfessa, commodam omnino locant operam. Quin novi, me infantibus lactentibus, unius anni, vel ante eruptionem, vel in suppuratione, quum ob difficultatem & angustiam spirandi suffocationis metus esset, cum præsentaneo levamine porrexisset lene emeticum, ex sexta, vel quarta parte grani tartari emetici, soluti in aqua veronica, addito pauxillo sirupi violarum. Ceterum, quam *In decli-* utilia mannata in principio & incremento variolarum, tam *natione* perniciosa esse aliquoties observavi, post declinationem, *non man-* morbo soluto. Ingentes tum enim creant flatulentias, pe- *na.* ctus lentis, viscidis succis obruunt anxietatesque efficiunt, quandoque etiam ut ulcerationes sequantur in ipsa cute, faciunt.

## S. X.

Ante pustularum eruptionem, & sub ipsa etiam, im- *Vitanda* probanda porro merito omnia calidiora expellentia, tam *calida* quæ vulgo dantur semina nasturtii & aquilegiæ cum sterco- *omnia.* reis, succus nimirum stercoreis ovilli & equini, quam etiam tinctura bezoardica, alexipharmaca, nec non spiritus cornu cervi, cum æstuoso, quoad lectum & conclave, regimine. Inde enim sanguinis & humorum massa mirum exagitur, æstus, anxietas, convulsiones, spasmi, quin delirium, si adest, exacerbantur. Inde materia variolosa major inducitur acrimonia atque subtilitas, ut ex benignis facile fiant malignæ. Et tantum abest, ut his æquabilis & constans eruptio procuretur, ut potius cito nimis minus præparata foras agatur materia, stationem non servatura, sed cum majori damno mox iterum ad interiora reversura. Quin potius tantum calidos, infusa theiformia & decoctum fabarum coffeæ, liberalius usurpata, experientia edocti, rejicimus. Nimum enim sanguinis massam dissolvunt & materiam roscidam nutrientem cum viribus inter largos sudores dissipant. Temperatum igitur sit regimen, remedia temperata. Semper tamen distinguenda natura, quæ si segnio-

res, expulsionem juvantia, partitis sed vicibus data, profunt utique, & circa sextum etiam & septimum diem, eruptionem regimine tantisper calidiori secundare licet.

## §. XI.

*Aëris puritati studendum.*

Pariter in variolis oppido nocivum decumbere in loco humiliori, ubi plures eodem morbo detenti. Nam ibi aër, qui pabulum vitæ, impuris ac foetidis exhalationibus est refertus, quæ respiratione attractæ, organa subeunt vitalia & internam humorum corruptionem adaugent. Hæc etiam subest, cum regimine calido, ratio, quod ex plebejis plurimi, variolis, licet bonæ alias sint indolis, occumbant. Hinc præstat, uti sæpius cum fructu suasi, aërem gravem, contexto prius probe agro, ex apertis fenestris emittere, purioremque immittere. Neque minus ad corrigendum inquinatum aërem, expedit collo appendere camphoræ frustulum, vel si caput odorem ferre nequit, in remotiori conclavis loco illud reponere.

## §. XII.

*Linteamina caute mutanda.*

An corpore sudore persuso linteamina, indusia & lectum mutare liceat? non levis ad curationem momenti est quæstio. Ego, uti largissimos sudores in variolis nunquam sine periculo esse, si diu perseverant, observavi: ita longe majus imminere discrimen, expertus scribo, ex mutatione linteorum, quæ humidum & frigidiusculum aërem adhuc fovet. Cavendum itaque ne facile æger in alium lectum transportetur, nisi prius diu in hypocausto calefacto steterit. Neque linteamina & indusia mutanda, nisi prius calore sint probe siccata, vel ab alio gestata. Si hoc negligitur, in exquisitis sentientibus ejusmodi corporibus, qualia sunt, quæ effusius sudant, cutis quam facile frigescit, maculæ & pustulæ disparent & cum vitæ discrimine recedunt.

## §. XIII.

*Recedentes qui-*

Quandocunque pustulæ, vel ob deficiens naturæ robur,



bur, vel ob terrorem, refrigerationem, aut situm extra le-<sup>bus ex-</sup>  
 ctum diuturniorem erectum, subito concidunt, æger in vitæ <sup>pellenda.</sup>  
 discrimine versatur certo, & nisi prudens Medicus illico ana-  
 leptico & expellente remedio succurrat, mors in propinquo.  
 Ego cum fructu tum dedi liquorem cornu cervi succinatum,  
 cum liquore anodyno minerali, in aqua cinnamomi sine vi-  
 no & cardui benedicti, forbillare jussi poculum infusi theæ,  
 idque aliquoties iterare & præcordiis pedibusque calida ap-  
 plicare fomenta.

## §. XIV.

Mictus sanguinis, alvus cruenta, hæmorrhagia narium <sup>Sanguis</sup>  
 & sanguinolentum ex pustulis serum manans, magnam <sup>per al-</sup>  
 sanguinis & humorum acrimoniam & colliquationem in-<sup>vum, uri-</sup>  
 dicant, ac pessimum, plerumque lethale, præbent omen. <sup>nam, na-</sup>  
 Hæc ubi præsto sunt, acidula, refrigerantia & acrimo-<sup>res & pu-</sup>  
 niam demulcentia, uti lac ebutyratum & serum lactis, <sup>stulas ex-</sup>  
 plus opis præstant, quam cetera omnia exquisitissimi artificii <sup>iens quid</sup>  
 remedia. <sup>poscat.</sup>

## §. XV.

Periculosum symptoma est, si gravidæ variolas nanci-<sup>Abortus</sup>  
 scuntur & circa eruptionis tempus, vel etiam in suppura-<sup>incidens</sup>  
 tione, abortus accidit. Sanguis enim cum impetu utero <sup>periculo-</sup>  
 effertur. Majus adhuc periculum ipsiusque mortis justus <sup>sus.</sup>  
 metus, si foetus non cito exturbatur. Vehementius enim  
 sanguinis fit profluvium, sub quo animi accedit deliquium,  
 expulsionem materiæ adversum. Si etiam sanguis parcius ema-  
 nat, ejus motus ad caput convertitur, subsequente inflam-  
 matione & delirio. Neque periculo vacat, quando menses & <sup>menfi-</sup>  
 primis diebus, vel in suppuratione erumpunt copiosiores, id <sup>um fluxus</sup>  
 quod eam plerumque ob causam accidit, quod sanguinis <sup>copiosus.</sup>  
 missio neglecta.

## §. XVI.

Observavimus, si æstas nimis sicca & diu arida, vario-<sup>Alvi flu-</sup>  
 las maxime esse inflammatorias & alvi fluxu quam facile sti-<sup>xus salu-</sup>  
 pari; qui tamen nullo modo sistendus, sed tantum de-<sup>tatis.</sup>  
 mul-

mulcentibus & terreis diaphoreticis excipiendus. Vitanda tum quoque omnia calida expellentia, cum regimine æstuoso, vitanda vero etiam refrigerantia & corporis refrigeratio. Neque alvi profluvium nocet, quando petechiæ, pariter ob valde irregularem temporum anni constitutionem complicantur, ut potius remedio sit & malignos humores optime expurget, ideoque providum ac peritum delideret Medicum.

## §. XVII.

*Confluentes quo-  
modo ar-  
cenda.*

*per in-  
oculationem.*

Quum variolis benignis, non facile quispiam, nisi ex Medici, aut proprio delicto, pereat, sed confluentibus, præsertim si mali moris fuerint; ex centum autem vix unus sit, qui variolas non experiatur: ego certe ut funestæ hæ arceantur, non certius novi consilium, ac eo tempore, quo malæ indolis variolæ grassantur, exquisitam victus & vitæ rationem servare, succos corporis convenientibus evacuantibus & decoctis pro potu temperantibus & mundificantibus a sordibus liberare & ad futurum forsan morbi insultum præparare. Eundem in finem commendabile novum illud inventum insitionis, seu inoculationis variolarum, quod ex oriente in Europam translatum, numerosis admodum exemplis ab Anglis potissimum Medicis cum successu celebratum, ea tamen lege, ut pus variolosum ex papulis maturis & benignis promatur corpusque ante operationem probe prius præparetur.

## §. XVIII.

*Vesicatoriorum  
usus.*

De vesicatoriorum peculiari in hoc morbo efficacia, quam nostro hoc ævo, Angli inprimis Medici, mirifice colaudant, pro certo ego quidem affirmare possum nihil. Rarius enim eadem adhibui, nisi ubi pueri, vel adolescentes, in ingentem soporem ac torporem inciderant, aut finito morbo, vitium oculi contraxerant, rubore ac defluxione affecti.

## §. XIX.

*Foveæ &  
cicatrices  
quibus a-  
vertenda.*

Quum variolæ præsertim confluentes & profundiores faciem rugis, foveis & cicatricibus mirum deformare soleant;

ant; puellæ imprimis pulchritudini studentes enixe ut hoc avertatur rogant. Multi quidem ut faciem a variolis defendant, primis statim diebus ex invento *Sylvii* suadent, ut pedes frequenter pediluvio immittantur & sic materia ex superioribus ad inferiores partes trahatur. Sed ego, ne quid dissimulem, nunquam periculum feci, nec ea propter certum quid de experimento hoc affirmare possum. Interim non penitus rejiciendum censeo, sed frequentibus & circumspectis id commendo observationibus. Longe minus iis assensum præbere possum, qui papulas in facie pinguibus & oleosis, inungere jubent. His enim pori oblinuntur, diffusio impeditur, profundiores redduntur abscessus & vestigia cicatricum longe magis conspicua. Optimum potius consilium, quando præter superius dicta interna sanguinem depurantia, exterius, antequam penitus arefiant papulæ, linimentum applicatur ex humana axungia, spermate ceti, cera alba, pauxillo balsami de Copaiva & camphoræ. Favet etiam nitori ac ruborem tollit aqua florum fabarum, rosarum, radice sigilli Salomonis, tribus partibus remixta cum una parte aquæ sic dictæ sclopetariæ.

## §. XX.

Accidit haud raro, ut exsiccatis jam, quæ primum effloruerant pustulis, ultimis diebus novæ & minores compa-  
*floruerant pustulis, ultimis diebus novæ & minores compa-*  
*reant aliæ. Hæ neutiquam negligendæ & refrigeratione aut*  
*improba victus ratione excipiendæ. Si enim recedunt, præ-*  
*ter spem fieri possunt funestæ. Hinc curandum, ut sub mo-*  
*derata & æquabili perspiratione hæ pariter & maturefiant,*  
*& arefiant.*

## §. XXI.

Superatis tandem variolis, providendum est, ne alii morbi ex  
 pejoris indolis, supra jam nominati morbi, succrescant.  
 Hunc in finem imprimis necessarium, ut prima regio a for-  
 tibus, tam in morbo, quam post eum ob languidam dige-  
 stionem contractis, nec semel, sed aliquoties repurgetur,  
 & quidem per laxantia balsamica, acori & corruptioni resi-



stentia, inter quæ eminent rhabarbarina, pilulæ *Avicennæ*, *Rufi* & quæ in curatione commendavimus *Beccherianæ*, quæ commodissime prius in aqua destillata, uti menthæ, solutæ, propinantur. Dein convalescentes non nimis cito in publicum prodeant, sed aliquandiu adhuc vitent aërem liberum, tanto magis humidum & frigidum. Servent potius constantem perspirationis successum, eundemque secudent, tam per pota mane infusa theiformia ex herba veronicæ, scordii, semine fœniculi & anisi, quam etiam pulveres leniter diaphoreticos, per aliquod postea tempus alternis diebus vesperi usurpatos. Fugiant frigidum potum cum gravis materiæ & insalubribus alimentis cunctis, & ad perfectam sanguinis depurationem, abstineant a cerevisia & bibant aliquandiu decoctum temperatum ex radice scorzonæræ, cichorei, farsaparillæ & semine fœniculi. Neque omittant inter cibos uti iis, quæ languentem stomachi digestionem, ad novos bonos succos ingenerandos necessariam, fulciunt ac firmant.

## ENARRATIONES MORBORVM.

## OBSERVATIO I.

*Variolæ epidemica anni MDCXCIIIX.*

*Constitu-  
tio aëris  
præce-  
dens.*

**I**nsolita plane per aliquot ex postremis superioris sæculi annos fuerat tempestatum constitutio. Æstas inprimis, propter crebriores boreales ventos, humida ac frigidior, autumnus fere naturam gesserat, ut raro etiam fructus & uvæ recte potuerint maturefcere. Autumnus effusis pluviis & subinde nivibus, cum pruinis ac nebulis incedens, tempus sordidum, aërem densum, cœlum obscurum & modice frigidum attulerat. Et hiems regnarat mirum mutabilis, squalida, sine constanti & acriori gelu. Accesserat præterea vere anni *MDCCXCIIIX.* maxima in tractu nostro ex torrentibus inundatio, & ob stagnantes passim alveis elapsas aquas, aërem insigniter vitiat. Ut sic perfecta esset ubique ad epidemicum morbum dispositio.

*Irrue-*

Irruebat igitur hoc anno mense Septembri maxima cum *Variola*  
vehementia variolarum morbus, & infantes, pueros, adul- *populares*  
tos, utriusque sexus, gravidas item, puerperas atque nu- *ex & sine*  
trices, inquilinos ac hospites, adoriebatur, ut non facile *contagio.*  
immunis maneret unus, qui non prius morbo hoc defunctus,  
& variolosorum numerus fere ad bis millesimum, in nostra  
hac urbe ascenderet. Nonnullis sine, plurimis ex contagio  
accidit. Ex illis fuerunt potissimum improbo victui, intem-  
perantiæ & compotationibus dediti, iracundia commoti,  
terrore ex aspectu ægrotantium maxime aut mortuorum per-  
culsi, timentes & horrentes morbum, nec non qui circum-  
euntibus jam variolis, præsertim in domo quæ ipsos tenebat,  
purgantibus illarum incursum arcere susceperunt. Conta-  
gium vero penetrans maxime & efficax fuit, quod ex fanie  
jam suppurantium pustularum venit, idque non tantum in ea-  
dem domo commorantes infecit, sed in alias ædes, quin re-  
motiora etiam loca translatum, perniciousam suam vim in di-  
spostis corporibus exseruit, infestum potissimum personis  
constitutionis sanguineæ, phlegmaticæ, pituitosæ, spongio-  
si & mollioris corporis habitus.

Sic autem incessit & sic decurrit epidemica hæc variola-Sympto-  
rum lues. Antequam in conspectum prodiret exanthema, *mata an-*  
omnes fere conquæsti sunt, de dolore dorsi, capitis, lassitu- *teceden-*  
tudine corporis, calore præternaturali, intercurrente hor- *tia eru-*  
ripilatione, cum pulsu frequenti, appetitus prostratione & *ptionem*  
somnia inquieto. In nonnullis infantibus, rarius in adultis, *benigna-*  
incepit enormibus vomitationibus, quæ per aliquot interdum *rum.*  
perstiterunt dies. Qui non vomuerunt, continuum tamen  
persenserunt conatum vomendi, nauseam & anxietates præ-  
cordiorum, modo graviores, modo mitiores. In adultis  
quibusdam & infantibus alvus fluxa, eruptionis tempore  
iterum consistens; in aliis primum adstricta, & tertio, vel quar-  
to die demum aliquoties sine damno fluens. Frequens etiam  
multis mingendi stimulus, paucioribus urina, sine damno  
tamen, per aliquot dies suppressa. Tenelli & lactantes in-

ter continuos ejulatus, pavoribus in somno, alvi adstrictione, vel profluvio, corporis calore & circa finem tertii diei levioribus quandoque epilepticis insultibus fuerunt affecti. Serosis solennis fuit somnolentia, pruritus corporis, ardens & pruriginosus palpebrarum dolor, illacrymatio & sternutatio. Multis compunctorius in dorso & pectore sensus. Pueris circa tertium diem nares saepe sanguinem stillarunt. Ex his etiam primis diebus magnam ascaridum copiam excreverunt nonnulli sine, nonnulli cum periculo. Adulti mirum fuerunt impatientes, subinde aliena multa loquuti delirarunt plane; quod tamen sufficienti narium stillicidio mitigatum, insufficienti vero adauctum.

*Maligna-  
rum.*

Hæc pathemata præcesserunt ut plurimum benignas, ubi vero pejoris indolis suberant, alia adhuc fuerunt præsto. In infantibus clamores intensissimi, nulla requies, tremores, extremorum mox frigus, mox intensus calor, cum insueto languore, in pessimis fuerunt. In adultis dolor artuum immanis, nec non lumborum, nephriticum & ischiadicum mentiens, gravis præcordiorum angor, delirium cum diarrhoea, punctorius exquisitus in pectore, vel hypochondrio sensus, tremores, horrores, membrorum incurvatio & contractura. Virium autem a primo statim insultu notabilis prostratio, vertigo, vigilia assidua, sub erecto situ lipothymia, pulsus debilis & frequens, effusus sudor, copiosa urina, salivatio & insolita muci e naribus ejectio, malignam plane prodiderunt indolem, licet interdum nec dolor, nec calor notabilis, nec anxietas, nec sitis adessent.

*Signa  
bona*

Intra tertium & quartum diem in benignis contigit eruptio. Nox antecedens plerumque gravis existit & inquieta, anxietatibus, tremoribus, phantasiis, hæmorrhagiis, quin nonnunquam epilepticis commotionibus, quidam etiam bis vel ter dejecerunt. Tum comparuerunt primum maculae rubrae, magnitudine differentes, quandoque exiles & successive incrementales, quandoque latae, in distinctas postea pustulas coeuntes. Factum id primum in superioribus, postea mani-



manibus pedibusque copiosissime, tum cruribus pectore ac dorso parcius & in abdomine parcissime. Cum iis in facie effluerunt simul in faucium & laryngis internis, labiis & lingua, tumque obortus dolor, ardor, pruritus ac tensio harum partium. In ipsis quidem oculorum tunicis vidimus nullas, sed in superciliis & palpebrarum interna æque ac externa facie collectim confidentes. Unde acerbus oculorum dolor, pruritus & ardor, & sexto die accedente faciei intumescencia, eorum oclusio ad suppurationem usque durans. Interim promte satis successit eruptio, & ubi pauciores quinto, ubi copiosiores, sexto die, penitus fuit absoluta, symptomata vehementiam posuerunt, pulsus antea concitatissimus, nunc tranquillus, æqualis & fere naturalis, somnus placidus, mens sibi constans & pectus ab angore liberum redditum.

Malum autem fuit, quando protinus secundo, vel in *et malo* principio tertii diei, variolarum apparuerunt in facie vesti-<sup>eruptio-</sup>gia, vel his interjectæ pustulæ varos referentes, vel etiam <sup>nis.</sup> exanthema miliare, rubrum aut album; & vicissim quando septimo demum vel octavo die, novæ eruperunt ob materiæ copiam & naturæ imbecillitatem variolæ. Malæ etiam fuerunt, quæ non rubicundæ, sed lividæ, pallidæ, aut fuscæ, sessiles item, duræ & aridæ, cum fovea in medio. Pessimæ, quæ facta eruptione, symptomatum non attulerunt levamen. Seri præterea copiosa effusio, sive per sudorem, sive per urinam, in adultis per alvum, sive salivationem, cum morbo incipiens & sub eruptionis æque ac suppurationis tempore durans, ut plurimum observata funesta. Mictum tamen cruentum, frequens alias malignarum symptoma, non annotavimus, sanguinem autem ex sinistro oculo, mirum statim tumescente, in puero quinto die mortuo, manasse, novimus. Quibus prævia horripilatione, sub erecto corporis situ, vel ob animi commotionem, disparuerunt variolæ, ingens accidit anxietas corporisque debilitas & haud leve vitæ periculum. Qui mortui, quinto, sexto, vel septi-

mo die obierunt, vel delirio cum convulsione, vel sopore cum convulsione, aut tetano, posteaquam prævio notabili horrore, evanuisse cuncta ferme exanthemata.

*Suppurationis successus in benigna.*

Sexto die in benignæ indolis inchoavit suppuratio, ac uti eruptio, gradatim a superioribus ad inferiora processit, nono die ut plurimum, in copiosioribus undecimo, quin decimo demum septimo die, desinens. Elevatæ tum sunt sensim pustulæ, molles, albæ, rotundæ globosæ comparuerunt, limbum rubicundum & pus bonum ex albo flavescens contraxerunt, cutis interjecta tensa, facies & manus, rarius pedes, intumuerunt, & vultus quidem adeo, ut palpebræ clauderentur. Successit ardor, rubor, dolor & tensio in facie potissimum & manibus, accensa denuo febris cum pulsus celeritate, inquietudine & præcordiorum anxietate, in quibusdam, licet innoxie, extremorum tremore. Fuerunt symptomata hæc jam mitiora, jam vehementiora, pro majori, vel minori, papularum in partibus præsertim extremis copia. Leniora etiam eadem observata, in infantibus, feminis, sanguineis, sanguineo-phlegmaticis, fero abundantibus & laxiori cutis habitu præditis. Graviora vicissim in adultis, cute stricta, tensa ac dura & ubi pustulæ profundiores. Nonnunquam in adultis complicata frequens salivæ ejectio, in infantibus diarrhoea, ut quotidie ter vel quater deicerent, interdum cinerei coloris, interdum purulenta plane, sine damno tamen. In vigore suppurationis, in iis maxime, quibus alvus per aliquot dies clausa, prodierunt aphthæ, cum ardore & dolore inflammatorio & viscosorum humorum in os confluxu, externis ut plurimum tempestive discussæ.

*Et malignæ indolis.*

Contra ea mali ominis fuit, quando pustulæ non elevatæ, nec sanie repletæ, sed depressæ manserunt, vacuæ, instar corticis pisi, item si lividæ, cineræ & viridescentes aut in medio faveola nigricante conspicuæ. Quod postremum quidem non semper lethale indicium fuisse notavimus, aliis benignis symptomatibus concurrentibus; minimum tamen alieni coloris papulæ profundius subjectam cutem eroderunt.

Peri-



Periculosum dein animadvertimus, si in facie, vel manibus, tumor exiguus, aut plane nullus, aut etiam subito iterum disprens. Quando saliva non bene fluxit, sed viscosa fuit & circa decimum, vel undecimum diem pectus cum suffocationis metu oppressit. Neque minus in ancipiti versati, quibus saliva a primo morbi insultu eo usque copiose effluxit, quibus, licet rarius id factum, diarrhoea accidit, cruentus vomitus, aut alvi secessus. Maximum periculum imminuit a graviore inflammatione, acerbiori dolore sicco, tensione, pulsu cito, intensa inquiete & anxietate stipata. Tanto certius, quando frigore & horrore interpolata, ægri de interno ardore & siti & externo frigore conquesti. Inflammatio hæc ut plurimum mortis fuit causa. Febrem enim accendit maxime æstuosam, delirium fecit, vigiliam perpetuam, inquietudinem maximam & corporis in lecto jactationem, quæ demum excepit horror notabilis, pustulas albas reddens ac demum convulsio lethifera. Factum id maxime in adultis, die nono, undecimo, aut decimo quarto. Infantes autem plerumque perierunt suffocatione, procul dubio, quod fauces interius copiosis pustulis obsessæ & variolosi-humoris acrimonia ipsos nervos pnevmonicos tunicasque nerveas in spasmodicam exitialem adduxit contractionem.

Ex singularibus observatis fuit, quod sanguis ex papulis suppuratis stillare visus in binis infantibus, uno trium, altero octo annorum, illo evadente, hoc decimo sexto die mortuo, posteaquam die quinto cutis utriusque manus & die nono crurum, colorem ex atro brunum contraxisset, in luculentum sanguinis subsistentis in sphacelum proni indicium. Duo etiam alii servati, qui non debita perfuncti suppuratione, sed ingentem copiam furunculorum ardentium loco hujus in universo corpore nacti, simul passim efflorescentibus maculis latis, rubicundis, ardentibus.

Qui suppurationem superarunt, in iis, si clementes pustulæ, nono, si copiosiores, undecimo, si copiosissimæ, decimo quarto die, detinuerunt iterum partes, ardor imminutus, phan-

pulsi *men-*



pulsus sedatior, somnus quietus, pustulæ sanie turgidæ factæ, maturuerunt, & vel sponte dehiscentes, vel perforatæ, pus fuderunt coctum. Id eadem ratione ac inruptione & suppuratione, factum primum in facie, postea in manibus ac tandem in pedibus. In dorso autem & pectore molliores semper manserunt, nec tanta copia puris repletæ sunt, nec crustas crassas conceperunt, forsân, quod ob poros magis ibi apertos & calorem, materia non tam glutinosa & arida fieri potuerit. Maturæ pustulæ dein sunt corrugatæ, fossulam in medio natæ, exaruerunt demum & deciderunt, non sine ardore & pruritu relicto. Quod, quo citius confectum, eo minus subjecta cutis exesa est & foveis deformata, quo tardius, compactis in unum crustis, extus aridis, subtus saniem putridam habentibus, eo magis nævi & cicatrices deformantes superfuerunt. Contigit id maxime in iis, quæ tempore suppurationis & exsiccationis cineræ & viridescentes apparuerunt, nec non ex ægrotis hîs, qui scalptu intempestivo minus maturas lacerarunt earumque debitam exsiccationem sic impediverunt.

*Et post  
quam pa-  
themata.*

Absoluta exsiccatione, orti in quibusdam furunculi & abscessus minuti, omnem corporis ambitum cum dolore, ardore & febrili calore obsidentes. Aliis accidit temporaria manuum pedumque imbecillitas, vel contractura, balneis & linimentis spirituosus promte in plurimis quidem abacta, in nonnullis tamen cacochymicis & maturam opem negligentibus, transiens in ulcera circa articulorum epiphyfes ægerime sanabilia, quæ incongruis remediis in pessimas & tabificas fistulas degenerarunt. In serosis & catarrholis successerunt tumores glandularum, imprimis colli, insignes, duri & renitentes, emplastris tamen emollientibus & discutientibus feliciter cedentes. Infantibus præsertim & adolescentibus, post variolas frequens fuit malum epiphora, sive continuum lacrymarum stillicidium, cum dolore, rubore & luminis intolerantia. Cui, nisi cito occursum, turbidi redditæ oculi & tenues in cornea enatæ runicæ, visum quodammodo

modo imminuentes. Qui nimis cibos, gravis materiæ, as-  
sumferant, vel carnes avidius comederunt, aut præmature  
lecto surgentes, corporis experti sunt refrigerium, incurre-  
runt de novo anxietates, vomitus, immo diarrhoeas, magna  
quidem cum debilitate, sed sine periculo.

Jam in debellanda epidemica hac lue ita sum ver-  
fatus. Incursum quidem ipsius arcere ab iis, qui non-  
dum experti, per remedia fuit irritum, optimum fuga  
tantum contagii. Id tamen observatum, vitæ temperan-  
tiam, victum laudabilem, naturæ cujuscunque accommoda-  
tum, abstinentioniam a liquoribus spirituosus & calidis inebrian-  
tibus & animum tranquillum, tantum effecisse, ut pauca, be-  
nignæ & periculi ut plurimum expertes variolæ in cutem exi-  
verint. Tanto certius, quando frequens usus pulveris absor-  
bentis, præcipitantis, nitrosi, adjunctus. Ii quoque qui  
primam regionem aliquoties a sordibus repurgarunt, minus  
copiosas minori periculo sunt nacti. Sed clementibus, rha-  
barbarinis, tamarindinatis, mannatis & tartareis, non vero  
aloëticis, colocynthiacis, acribus & resinosis, id fuit perfi-  
ciendum, optime ante morbum, priusquam sanguis a mia-  
smate infectus, licet id sine damno etiam factum noverim,  
quum præsto jam essent symptomatum nonnulla. Vomito-  
riis autem uti, interdixerunt ut plurimum circumstantiæ, li-  
cet alio tempore eadem alexipharmacis nupta apprime pro-  
ficua deprehenderim. Neque universalis fuit illa variola-  
rum copiam arcendi methodus, quam post Sydenhamum,  
Vvaldschmidius aliiq̃ue celebres in Hassia Medici dilaudarunt,  
per crebriorem spirituum mineralium acidorum bene præpa-  
ratorum, ante infectionem, vel etiam primis morbi diebus,  
usum, sub temperato tantum regimine. Non enim potuit  
hoc remedium, omni etiam diligentia adhibitum, extinguere  
malignitatem in nonnullorum sanguine, nec variolas nume-  
rosas declinare. Quin observavi, complures ex illustribus,  
aliquot antivariolosi liquoris absumsisse ante & post invasio-  
nem uncias, nihilo tamen secius copiosis conspersos fuisse

(IV.)

Y

pustu-



pustulis, vehementissimis symptomatibus stipatis. In quibus id præterea singulare fuit, quod papulæ siccescentes magnam exseruerint corrosivitatem, profundius serpendo & depascendo subjectam carnem, insigni cum dolore, ardore & inquietudine.

*Quid factum ante eruptionem.*

Qui igitur morbo affecti, his æquabile caloris temperamentum commendavi, & suasi, ut quamdiu vires ferrent, lectum vitarent, aut minimum culcitris ex corio, minus calentibus, uterentur. Ab omnibus etiam calidis, expellentibus, sic dictis alexipharmacis & bezoardicis, volatilibus, ipsa bezoardica tinctura, abstinui, præsertim in juvenili & florida ætate, in sanguineis atque plethoricis. Laudatissimus inventus spiritus nitri probe dulcificatus, (cujus loco jam inventum a me liquorem anodynum mineralem, majori adhuc cum fructu, usurpare soleo) cum anatica portione sirupi papaveris erratici mixtus, additis aliquot mixturæ simplicis guttis. Frequens etiam fuit usus pulveris temperantis, ex matre perlarum, antimonio diaphoretico, cornu cervi sine igne parato, cum tantillo nitri puri. Et vehiculum præbuit aqua scordii, scabiosæ, florum tilia, sambuci, papaveris rhœados & ceraforum nigrorum. Eadem quoque usurpata ubi malignitatem prodiderunt symptomata, & præterea pulveri pro una dosi adjectum vel dimidium granum theriacæ coelestis, vel momentum camphoræ, cujus præstabilem virtutem cum nitro in malignis variolis deprehendi semper.

*Sub eruptione.*

Ingruente eruptione, præscripta ut plurimum emulsio, ex aquis florum sambuci, acaciæ, fœniculi, scabiosæ, scordii, ceraforum nigrorum, seminibus napi, aquilegiæ, cardui maria, cum matre perlarum & julapio rosaceo. Tum etiam corpus curatius a frigoris accessu defendere jussi, & calorem, præsertim die quinto & circa noctem, tantisper intendere, ita tamen, ut subjecti semper haberetur ratio, nec non diversæ ætatis, temperiei, copię vel motus sanguinis. Docuit enim experientia, deficiente calore externo sufficiente, eruptionem, in infantibus potissimum & phlegmaticis



cis, minus expedite ſucceſſiſſe, puſtulas jam protruſas iterum collabi lenteque reſugere coepiſſe, relicta quadam præcordiorum anxietate. Hinc quando in cutem jam plenius iwiſſent variolæ, ad expellendum reliquum, eſſentia ſcordii probe ſaturata, vel liquore bezoardico Buſſiano, cum liquore anodyno minerali remixto, cum fructu ſum uſus, tanto magis in malignis.

Exulcerationis tempore, ſi ob naturæ ſegnitiem puſtu-Suppura-  
la manſerunt depreſſæ & elevationem renuerunt, præſtantiſſime  
fuit facultas myrrhæ, aliquot granis, cum pauxillo croci & pul-  
vere bezoardico oblata. Sed nonniſi in principio. In ſta-  
tu enim ſuppurationis inflammatoria febris a myrrhatis in-  
crevit. Neque unquam uſurpata hæc, ubi ſuppuratio ſpon-  
te recte ſucceſſit. Urgente in exulcerationis vigore æſtu &  
ardore, emulſione inſtituti, ſubſtituto in locum ſeminis napi,  
ſemine papaveris albi, & in locum julepi roſarum, ſirupo  
papaveris.

Absoluta ſuppuratione, ficceſcentibus jam in facie & exſic-  
manibus puſtulis & febre deſerveſcente, proficuum obſerva-  
tione.  
vi pulverem ex lapidibus cancrorum, antimonio diaphoretico,  
myrrha electa & croco, qui exſiccationem & conſolida-  
tionem, balſamica & temperante ſua virtute egregie pro-  
movit. Per totum præterea morbi decurſum, loco cereviſiæ,  
decoctum ex cornu cervi raſpato, radice ſcorzoneræ, hor-  
deo mundo, ſemine foeniculi & ficubus, tepefactum (ver-  
ſchlagen) bibere juſſi, cum emolumento; ſed infuſa calida  
herbarum, veronicæ, ſcabioſæ, herbæ theæ, eruptionis &  
ſuppurationis tempore, liberaliter pota, minus proficua de-  
prehendi.

Ex ſymptomatibus narium hæmorrhagia caute fuit ex-ſympto-  
cipienda. Si enim principio ſtatim repreſſa, ſanguis cum  
impetu ad caput latus, phrenitidem, vertiginem, deliria alia-  
que horrenda ſymptomata intulit. Si nimium excretum, de-  
fecit vis ad expellendam extrorſum variolarum materiam.  
Optimum igitur ſub profluvio pedes a refrigeratione defen-  
gĩa.

dere, interius usurpare dialcordium *Fracaſtorii* cum nitro, & externe, ſi effuſior excretio, naribus attrahere & collo atque temporibus tepide apponere, acetum roſaceum cum camphora.

*Delirii  
& alio-  
rum.*

Ad delirium in eruptionis puncto nimis atrox, nec emiſſis jam in cutem variolis ceſſans, componendum, ne in phrenesiſin mutetur, expertæ virtutis fuit, ſpiritus vini camphoratus, cum oleo ligni Rhodii, tam naribus hauſtus, quam tepide iterato fronti & temporibus admotus. Adverſus præcordiorum anxietates, tremores, inquietudines, pavores in ſomno, convulſiones, horrores & variolarum retroceſſionem, probati uſus hoc: recipe eſſentiaſtæ caſtorei paululum inſpiſſatæ drachmam unam, camphoræ grana tria, extracti croci granum unum. Quo præſentiſſimum ægris levamen allatum.

*Diarrhœæ*

Diarrhœas ſiſtere periculofum fuit; ſi tamen nimia & virium defectus urſit, pulvere bezoardico cum chaccarillæ cortice, id præſtitum. Nec prætereunda nitri in compeſcendis his alvi fluxibus facultas, experientia, contra vulgarem ſententiam, multoties confirmata.

*Faucium,  
narium  
& oculo-  
rum pa-  
thematibus.*

Faucium, laryngis & œſophagi ardorem ac dolorem ab inſidentibus puſtulis, lenire & ab ulteriori inſeſſu defendere juſſi decocto ſorum ſambuci, liquiritiæ & ficuum, nec non ſolo lacte calido, cum ficubus & croco decocto. Si anginoſa ſubfuit inflammatio, juvit aqua ſorum ſambuci, cum roſdiamoron, nitro & croco. Aphthæ & labia dolentia inuncta mucilagine feminis cydoniorum. Eadem mucilago cum aqua ſorum ſambuci & roſarum extracta, adjecto croci & camphoræ momento, mirifice proſuit in pruritu, ardore & rubore oculorum, nec non ad eos, ſi clauſi, aperiendos. Nares obturatæ litu olei amygdalarum dulcium, vel lini, adaptæ.

*Cutis vi-  
tiorum.*

Cruſtæ papularum duræ emollitæ & cutis ſubtus ab acri humore exeſa consolidata linimento ex tinctura tartari, eſſentia myrrhæ, oleo amygdalarum dulcium & camphora.

Ad



Ad delendas, decisis crustis, cicatrices, conducibile fuit unguentum ex axungia humana, spermate ceti, saccharo saturni, magisterio blumuthi & oleo tartari per deliquium. Resistuntia demum ulcera unguento de cerussa camphorato utiliter tractata.

Ceterum sanguinis missio, neque ad præservationem, *Observa-* neque ad curationem, utilis observata. Ab opiatis & soporiferis interius abstinui, aliorum medicatione edoctus, inde *ta de V.S.* in variolis copiosis majores obortas anxietates, & ante exquilitum suppuracionis tempus, periculosum soporem cum *opiatu ex papaveraceo* tremore & membrorum succussione fuisse suscitatum. Papaveracea autem lenissima, semen papaveris albi in emulsione, aqua papaveris rheados ejusdemque sirupus, utique fuerunt saluberrima.

Atque hæc est illa methodus & hæc sunt remedia, quibus ego usus sum in magno ægrotantium, centum minimum & quinquaginta numero, e quibus aliquot illustrissima multique generosa stirpe geniti, hac in Academia tum commorantes. Felix etiam fuit per DEI gratiam successus, maxima pars evasit & vigesima vix mortua, & ex his maxime qui malignis affecti. Servavi postea eandem semper medendirationem, & triginta qui inde elapsi sunt annorum experientia confirmatum habeo, vix ulla alia in variolarum morbo proficua esse atque accommodata.

## OBSERVATIO II.

Generosus adolescens, exquiliti sensus, activæ indolis *parthema-* & macilentus, superiori anno variolis affectus est, quæ sine *ta insoli-* vehementia symptomatum, placide satis & ordine in *ta ex alvo-* spectum venerunt. Quum vero circa sextum diem ad suppuracionem accederent, præter opinionem miris afflictus est *obstructa* præcordiorum anxietatibus, conqueustus simul de dolore abdominis, inquietus fuit, somnum capere non potuit & desidendi stimulus ipsum dimidia quavis hora e lecto surgere coëgit, sed sine secessu. Licet autem hæc ultra diem & noctem urgerent, æstus tamen nec intensior, nec pullus cele-



rior factus. Ego accersitus in consilium, inquisivi, num sub morbo jam dejecerit? responsum tuli: nec in morbo, nec, quantum quidem recordari posset, triduo ante ipsum id esse factum. Illico igitur injicere jussi clysterem emollientem, oleosum, cum modico salis, flatuum vero & excrementorum renisus non totum, sed tertiam vix partem admisit; ad fellam tamen expertus est instinctum, ibique persensit inharens orificio ani stercus durum & grandi mole, licet egerendi irritus esset conatus. Hinc iterato enema infundere jussi, & interius dare non dubitavi ptisanam mannatam, cum cremore tartari & oleo amygdalarum dulcium. Soluta inde alvus & per aliquot sedes incredibilis fere scybalorum induratum copia egesta, æger etiam a prioribus symptomatibus liberatus, somnum recepit, variolæ rite suppurationem subierunt & cura reliqua ex voto successit.

*Epicrisis.*

Quale sit alvi beneficium, in omni morbo quærendum. Si enim quis in morbum, maximeque in variolas & morbillos, in quibus ordinario primis diebus alvus adstricta, incidit, & intestina jam tum stercoreum copia farcta, magna non possunt non insequi pathemata, quorum causam medicus vix perspicere valet. Hinc in quocunque morbo ab initio statim prospiciendum, ut alvus ab excrementis sit depleta, sive id commodissime fiat per enema, sive per laxans internum.

OBSERVATIO III.

*Variola  
mali mor-  
ris ex vi-  
tio ma-  
terni  
succ.*

A matre hysterica, inordinate vivente, sub graviditate autem optime semper valente, procreati erant tres infantes. Has anno 1719 corripuit variolarum morbus publice grassans. Is licet non adeo mali esset in aliis moris, in his tamen insolita habuit pathemata. In uno quippe, puero quinquenni, eruptio, licet febris cum consuetis symptomatibus adesset, per octiduum duravit & suppuratio etiam longius quam fieri suevit, protracta fuit. In altero, puero quatuor annorum, secundo statim die prodierunt, interspersis maculis asperioribus quasi purpureis, æstus & pulsus per to-

tum morbum fuit idem præternaturalis, pustulæ manserunt sessiles, pus non conceperunt & plurimæ punctulo nigro fuerunt conspicuæ. Et in sorore, puella septenni, variolæ confertim occuparunt fauces & guttur, ut vix solidi vel fluidi quippiam deglutire, quin spiritum trahere posset. Nihilominus usu convenientium & tutissimorum remediorum, temporis beneficio, discessit hic morbus. Sed quum appetitu redeunte, plus ingererent, quam debile corpus ferre posset, nec rigidam & ventosam auram vitarent, factum est, ut in tribus his infantibus passim orirentur dolores & tumores in articulis, junctura præsertim cubiti, in digitis manuum, plantis pedum, ipso etiam in collo, cum febre lenta. Medicus & Chirurgus omnem quidem contulerunt operam, nihilo tamen secius nata inde ulcera ferina, carnem exedentia & ossa cum nigrore corrumpentia, accessit tabes & virium maxima prostratio, ut etiam pueri bini sub initio tertii mensis fatis cederent. Puella autem, non adeo malignis ulceribus affecta, servata. Ego quippe in consilium vocatus, pro potu suasi emulsionem ex decocto hordei, seminibus cucurbitæ & melonum cum saccharo. Sumtus cum hac pulvis noster bezoardicus, crebriori, sed parciori dosi, adjectis quandoque aliquot granis reguli antimonii medicinalis, quandoque nitri. Ad alvum laxandam datus sirupus rosarum solutivus cum extracto rhabbari & mercurio dulci, omniaque hæc per aliquot hebdomades continuata interius. Exterius vero ulceribus putridis injectum balsamum nostrum vulnerarium, cujus principale ingrediens balsamus sulphuris antimoniatum, cum oleo terebinthinæ paratus, idque potissimum, remixtum cum essentia myrrhæ, succini & balsamo Peruviano, miram præstitit opem in ulcere quatuor foraminibus in olecrano hiantem. Tumoribus quoque indolentibus ac duris, quibus pedes passim obfessi, impositum emplastrum *Vigonis* de ramis, aucta mercurii portione & admixtis floribus sulphuris. Quibus demum intra aliquot menses ex mortis faucibus erepta puella.

*Epicrisis.*

I. Feminae valetudinariae, si uterum gerentes minus aegrotant, infantes edere solent infirmos & potissimum in variolis & morbillis graviter decumbentes, & credibile, confluisse in embryonem impuros matris succos.

II. Variolarum morbus in se satis mitis est, si benignos in corpore offendit succos earumque materia non adeo est virulenta; contra ea, quando in corpus incidit impurum & fermentum a prima nativitate contractum malignum, pessimi generis emergunt variolae, licet tum in aliis admodum sint benignae.

III. Ubi exanthemata variolosa malignae ex symptomatibus cognoscendae sunt indolis, nunquam iis fidendum, etiam si jam aruerint & lapsae sint pustulae. Ita enim sanguinis & humorum massam inquinare solent, ut accedente improba victus ratione, perspiratione intercepta & neglecta repetita primae regionis & ipsius sanguinis repurgatione, postea insequantur gravissimi & lethales morbi, apostemata, abscessus in internis partibus, in mesenterio maxime & pulmonibus, cum febre lenta & hectica, in externis vero pessima & foeda ulcera cancrofa, exedentia.

IV. Quae autem tum variolas excipere solent mala, non aliter oppugnanda, ac morbi, qui extremae humorum corruptioni debentur. Unde memini, a peritis Medicis & Chirurgis ejusmodi maligna ulcera inunctione leviori cum hydrargyro, item mercurio dulci cum laxante dato, nec non decoctis temperatis, cum antimonio crudo, fuisse perfanata, modo febris abfit.

## OBSERVATIO IV.

*Scabies,*  
*furunculi,*  
*morbilli &*  
*variola*  
*in uno*  
*successive.* Juvenis literarum studiosus, victus & vivendi rationis incuriosus, scabie humida & pustulosa per aliquot menses laboravit, liberatus decoctis & linimento, quod pro basi habebat flores sulphuris. Non ita multo post correptus est morbillis, tum epidemicis, quos pariter evasit. Sed post binas hebdomades effloruerunt sensim in universo corpore furunculi



runculi copiosi, quorum nonnulli insigni inflammatione stipati, in profundos ægre sanabiles abscessus abierunt, donec decoctis mundificantibus, laxantibus appropriatis, maxime mercurialibus, & lenioribus diaphoreticis, sanarentur tandem. Elapso inde circiter mense, denuo in variolarum incidit morbum, gravibus symptomatibus incedentem. Erant enim maxima ex parte confluentes, septimo vix die, licet febris adesset, comparuerunt, ægre quoque subierunt suppurationem, depressæ potius manserunt, nec post eruptionem pulsum frequentia ex toto remisit. Egregium tamen levamen æger obtinuit solutione myrrhæ & croci in dilutiore liquore salis tartari, a cujus usu ad sensum successit suppuratio & variolæ cum symptomatibus ad legitimum decursum traductæ. Continuatus igitur longius hujus remedii usus, siccatis etiam jam & decidentibus pustulis, & notabile fuit, sub ipsa suppuratione alvum quotidie sponte vel septies fluxisse, æstumque febrilem, qui tum alias auctior, fuisse mitigatum. Quo etiam factum, ut juvenis hic integram penitus recuperaret sanitatem.

### *Epicrisis.*

I. Variolarum & morbillorum materia, sive, ut ita loqui liceat, fermentum, neutiquam in massa sanguinis & humorum delitescit, neque etiam a sola impuritate, sive caco-chymia humorum venit. Alias enim repurgatis in hoc juvene per scabiem & furunculos sanguine & luccis, non amplius potuisset habere locum. Hinc potius credibile, materialem horum exanthematum causam infixam esse firmitus tubulis partis cujusdam stabilis, ibique, haud secus ac cancri & canis rabidi virus, tam diu oculi, donec a contagio, vel specifico quodam liquido, vel aëre, in actum deducatur & sui juris fiat.

II. Alvi fluxus, non uti vulgaris est sententia, in hoc morbo adeo est pertimescendus, nec suppurationem semper impedit, nec materiam ad interiora vocat, sed in variolis etiam mali moris, sæpe, expurgando excrementitios suc-

cos, in salutem cedit, haud secus ac febres malignas diarrhoea haud raro solvi novimus.

III. Solutio myrrhæ, cum croco, in liquore alcalino minus spirituofo, egregia omnino ad sanguinis depurationem, sulphur blandum & balsamicum vappidis humoribus reddendum & ad præscindendos multos, qui variolas excipere solent, graves affectus.

#### OBSERVATIO V.

*Variola  
in gemel-  
lis diver-  
sa.*

Binæ puellæ gemellæ quatuor annorum, quarum una habitior, grandior, animo segnis & torpida, altera macilentior, statura minor, animo autem magis sentiens & vegeta, uno tempore eundem variolarum morbum incurrerunt, sed in alterutra diverso modo & eventu succedentem. In utraque erant confluentes, sed in obefiori illa tardo admodum, die septimo, prodierunt, pus contrahere noluerunt, in facie & manibus fuerunt sanguinolentæ & apertæ serum plorarunt sanguineum, ægram interim miræ discruciarunt anxietates, cum febre & siti continua somnique defectu, donec undécimo die expiraret. Altera vero omnia habuit mitiora, tertio die venerunt papulæ, nono aruerunt, deciderunt & ipsa mox convaleuit.

#### *Epicrisis.*

Infantes hi eodem succo matris nutriti, eodem victu & regimine usi, eidem morbo impliciti, eodem contagio infecti, eadem methodo iisdemque medicamentis tractati sunt, plane dissimili tamen successu & eventu. Patescit igitur, sanitatem corporis, animi viriumque integritatem, morborum originem, decursum & finem, non tam a causis externis, cibo, potu, aëre, regimine, quin medicamentis, dependere, quam potius a peculiari & specifica partium solidarum structura, proportionem & dispositionem, & hanc ob id omnino magis a Medico esse considerandam, quam solam conditionem fluidorum horumque naturam.

#### OBSERVATIO VI.

*Variola*

Juvenis succulentus & sanguineus, generosus, cujus familiae

iniliæ variolarum morbus maxime fatalis, degerat ruri & autumnali tempore venationi, & mane, & in seram usque noctem, plus justo sub coelo pluvioso ac nebuloso indulserat, & postea huc delatus, crapula ex vino & esu ostrearum corpus debilitarat & stomacho vim fecerat. Altero die post incidit in variolarum popularem eo tempore morbum. Invasit quippe eundem primum horror & vehemens anxius æstus, insequente nocte admodum inquieta. Die post impatiens fuit, conquestus de exquisito spinæ & capitis dolore, delira & absona multa protulit & alvus fuit adstricta. Injectus hinc ad avocandos a capite humores clyster, quo alvus respondit. Data quoque æstum refrænantia, acidula, nitrosa, pulveres præcipitantes & absorbentes. Inde mitigatum delirium & intra tertium & quartum diem eruperunt in facie maculæ exiles, aciculæ capitis magnitudine, simulque pustulæ asperæ miliares albæ & rubræ. Quinto die manus & pectus occuparunt pustulæ, tam numerosæ, ut vix spatium inter ipsas esset relictum. Hoc factò, remiserunt quidem symptomata cum æstu, pustulæ autem ægre maturuerunt, facies justo minus intumuit, pulsus semper mansit frequens, & septimo die tam exquisitus ardor & dolor tensivus in manibus obortus, ut plane esset intolerabilis, lectum & locum mutare voluit ager frigidaque ad manuum incendium restingendum contrectare, somnus aderat nullus, spiratio vero anxia & difficilis & pectus obsessum humorum copia, suffocationem minitante. Applicata enemata, exhibitæ emulsiones cum pulveribus bezoardicis ac temperantibus, sed omnia incassum, eodem potius die accidit extremorum refrigeratio, subsequente convulsione & brevi post ipsa morte.

*Epicrisis.*

Haud adeo infrequens est, variolas certis familiis magis esse infestas atque funestas, cujus tamen causa minus cognita. Id vero in comperto, multum ad pessimam variolarum naturam conferre corporis refrigerationem, ingluviem incongruorum & ebrietatem. Quæ si præcesserunt & paul-



lo post morbus impetit, expedit omnino, antequam tota oeconomia motuum turbetur, colluviem ex primis viis idoneo laxante vel emetico exturbare. Primæ enim regionis sordes mirifice impediunt materiæ variolosæ salutarem exitum, immo vim morbi augent. Et si tum natura alvi movet fluxum, egregie pro fanitate est. Ut plurimum vero variolosi moriuntur convulsione, quæ suscitatur ab intolerabili æstu ac dolore in suppuratione pustularum, in primis si cuti profundius insident, corpus juvenile est ac tenerioris texturæ.

## OBSERVATIO VII.

*Variola  
in lactante  
cum  
dentitione  
sanata*

Subito corripiebatur infans lactans unius anni motibus epilepticis, qui singulis horæ quadrantibus impetentes, per XXIV. horas insistebant. Prorumpiebant inde dentes canini & aculeos visui & tactui fistebant, die post comparebant etiam variolæ, non ut ordinarie solet, sed primum in manibus & pectore, & postea in facie. Nutrici magis quam tenello dabantur medicamenta. Huic quidem præter pulverem Marchionis, cum specifico cephalico *Michaëlis*, fere nihil, & illi pulvis bezoardicus noster cum præcipitante remixtus, elixir pectorale crocatum & liquor ex myrrha, croco & salis tartari solutione. Quibus & dentitio & variolæ successerunt feliciter.

*Epicrisis.*

Non mirum eruptionem, & dentium, in primis caninorum, & variolarum, tam atroces præcessisse insultus epilepticos. Quod autem variolæ serius in facie effluerint, id procul dubio tribuendum spasticis tractionibus & strictionibus ex dentitione in hac regione vigentibus, poris inde nimium coarctatis, materiam impuram non admittentibus. In lactantibus tenellis variolis affectis, medicamenta magis nutrici sunt præbenda talia, quæ acrimoniam imbibendo, succum chylorum & nutritium dulcem ac roscidum reddunt, quo materia caustica, quam optime cicuratur ac temperatur.

## OBSERVATIO IX.

*Variola*

Adolescens generosus incidit in variolas, non quidem conflu-

confluentes, nec nimis copiosas, nec intensa febre, nec aliis <sup>maligna</sup> gravibus symptomatibus stipatas; pulsus tamen absoluta et <sup>post situm</sup> iam ferme eruptione debilis & frequens mansit, somnolentia <sup>erectum</sup> adfuit fere continua, æger semper & a somno magis languit, pustulæ elevatæ quidem, sed pellucido humore plenæ, in medio complanatæ & nonnullæ punctulo nigro insignitæ. Nono die, æger e lecto, ab adstantibus sternendo, levatus, sellæ in conclavi calido & stragulis tectus impositus est, sed per quadrantem vix horæ erectus sedens, rogavit, ut in lectum ipsum cito transferrent propter obrepentem animi defectionem. Factum id. Conciderunt tamen subito papulæ, pedes frigefacti, pectus oppressum, spiritus interclusus & subsequuti motus convulsivi, quibus post aliquot horas æger extinctus.

### *Epicrisis.*

Malignitatis characteres habuerunt hæ variolæ a principio statim, pulsum, somnolentiam cum virium lapsu, pustulas pellucidas, in medio depressas & nigricantes. Sub ejusmodi morbi facie & virium languore, semper admodum perniciosum, ægrum paullo diutius in erecto situ servare. Languidior enim cordis pulsus non sufficit ad trudendum perpendiculari via versus caput sanguinem, unde animi fit deliquium, sub quo motus sanguinis elanguescit, ad interiora convertitur, cor obruitur, extrema frigent, cutis contrahitur, materia virulenta ad interiora & nervosas partes repellitur, in capite sanguis stagnat & convulsionem demum facit lethalem.

### OBSERVATIO IX.

Generosa virgo, quatuordecim annorum, grassantibus <sup>Emerico-</sup> variolis de ingenti capitis & lumborum dolore conquerebatur, <sup>laxans in</sup> cum æstu præternaturali, siti & corporis lassitudine, cutis <sup>eruptione</sup> mox horrebat, mox calebat. Medicus vocatus, variolarum <sup>variola-</sup> morbum subesse conjiciens, mixturam ex spiritus nitri dulcis & tincturæ bezoardicæ ana drachma & scrupulis duobus <sup>rum cum</sup> sirupi papaveris rhœados, singulis horis, ad quadraginta gut- <sup>fructu</sup> <sup>datum.</sup>

tas porrigebat, sed ægra post hujus usum alimenta omnia vomitu rejiciebat, & inquietudo cum anxietate & virium prostratione admodum urgebat. Dabatur igitur hæc mixtura: recipe aquæ florum sambuci, acaciæ, cornu cervi citratæ ana unciam unam semis, theriacalis drachmam semis, lapidis bezoardici orientalis scrupulum, spiritus salis ammoniaci, guttas X. croci grana tria. Qua binis vicibus assumpta, ægra stragulis obtegebatur & in hypocausto calido ad sudorem coquebatur. Sedabatur vomitus & intra secundum & tertium diem cum æstu intensissimo prodibant maculæ. Sed quum ob calorem ardentem strata removerentur, mox corripiebatur horrore & maculæ illico disparebant, insequente summa inquietudine, anxietate & vomendi stimulo. Eveniebat hæc vicissitudo aliquoties quotidie, ut bis vel ter aucto calore comparerent, & diminuto disparerent iterum. Medicus certior factus præcessisse malam diætam & ingluviem fructuum horæorum dulcium, lacticiniorum, casei & acetariorum, ventriculum & primum intestinum multa obsessum esse saburra ratus est, ideoque, quum præterea alvus per quatuor dies fuisset strictior, hanc in usum vocavit potionem: recipe mannæ electæ drachmas sex, tartari emetici granum, aquæ cardui benedicti uncias duas, mixturæ simplicis guttas decem. M. D. Assumpta hac, plus quam decem sequuti vomitus, pituita viscidæ & subviridis, nec non aliquot secessus. Postea data essentia theriacalis, cum aqua liliorum convallium, paulisper spirituosâ, qua vomitus & alvi fluxus sedatus, anxietates omnes remiserunt, & diffuso per universum corpus calore æquabili, copiosissimæ cum impetu quasi in facie, manibus, pectore & pedibus eruperunt variolæ, stationem servantes & suppurationem quam optime subeuntes, sine sævis symptomatibus. Inprimis plantæ pedum variolis fuerunt refertæ, sub cute ibi crassiori delitescentibus & sub exulceratione graves suscitantibus dolores, qui tamen spiritu vini camphorato cum oleo amygdalarum dulcium deliniti, secedente in exsiccatione cuncte totius plantæ.



*Epicrisis.*

Nil certe pejus est, ac si variolarum morbus invadat corpus in quo ventriculus & primæ viæ cruditarum colluvie obfessæ. Inde enim augentur anxietates, spasmi invalescunt, & ad extremam cutem diffusi, horripilationem ibi faciunt ejusque constrictionem. Inanis hinc labor est, tum expulsiōnem internis & calore externo urgere, quin noxius ante debitum eruptionis tempus, eo quod vi pulsæ variolæ admodum sunt instabiles & cum pathematum exacerbatione iterum recedunt. Utile potius ventriculum convenienti laxante & emetico a saburra deplere, quod etiam ipsa natura per nauseam & vomendi desiderium innuit. Patet igitur, emetica, ante eruptionem data, non tam facile nocere, sed potius, levata ab onere natura, eandem promovere. Sed imperitus non facile imitetur heic facta cum fructu. Semper enim distinguendum est inter vomitum & conatum vomendi, qui ab illuvie vitiosorum humorum prima in regione, & inter illud, qui ab acrimonia subtili caustica nervosis tunicis inhaerente oboritur. In illo utilissima vomitoria, in hoc nocentissima. Ceterum pluribus, tam de sanguinis missione, quam evacuantium usu evolvendam commendo *Medicinam consulta.*

*Tom. V. Dec. V. cas. IIX. pag. 359. sqq.*

## OBSERVATIO X.

\*Puer quadriennis, grassantibus in parentum domo variolis, iisdem, quam quibus invadere solent, afficitur pathematibus. Mater hinc ipsum includit hypocausto & lecto calido pedibusque lagenam aqua fervente plenam admovet. Medicus senex consultus omnia habet rata, & præterea ob pavores & ad promovendam eruptionem spiritum cornu cervi cum essentia castorei porrigit. Sed secundo die insultus accedunt epileptici, cum anxia & quasi suffocatoria respiratione, somno terroribus pleno maximaque inquietudine. Me igitur advocant, qui adveniēns fenestras provide aperire & stragula nimia removere jubeo, & loco spiritus cornu cervi, spiritum nitri dulcem, cum sirupo papaveris rhoeados, item pulverem

*Noxa ex calore regiminis & medicamento- rum in variolâ.*

pulverem Marchionis, cum nitro & cinnabari exhibeo. Inde post paucum tempus symptomatum vehementia mitigata penitusque remisit, maculæ placide & copiose prodierunt, totiusque morbi curatio ex voto successit.

*Epicrisis.*

Pessimus, vulgi inprimis, mos est, variolosos calidissimo regimine excipere & pessimum consilium expellentia & sanguinem exagitantia offerre. Pereunt enim hac ratione plures, vel minimum in gravia adducuntur pathemata. Memorabilis de eodem hoc cornu cervi spiritu est casus in *Ammanni Medicina critica*, de tribus liberis, a paullo liberaliori ejusdem dosi, enectis. Hinc laude merito dignus *Sydenham*, qui primus fere hunc errorem detexit, & contrariam plane suasit methodum, temperantia nempe, motum sanguinis nimium sedantia, anodyna & acidula temperata, cum moderato regimine.

OBSERVATIO XI.

*Cancrofa  
corruptio  
in labio  
post va-  
riolas le-  
thalis.*

Diu admodum tertiana laborarat puella quindecim annorum, qua demum discedente, variolæ publice circumeuntes successerunt, ut illa in has tantum non mutata videretur. Prodibant interim feliciter & sanabantur. Sed exsiccatis iisdem, remanebat macula rubicunda acerbè dolens in labio inferiori, quæ aucto paullatim rubore, cum acri ardore in tumorem plane elevabatur. Imposito a balneatore cataplasmate ex albumine ovi & bolo Armena, nigra cum vicina carne comparebat, sine omni sensu. Sphacelum igitur adesse ratus, applicabat decoctum sic dictum nigrum, ex herbis amaricantibus, foliis quercus, cum aceto & vitriolo, sed malum longe magis invalescebat & brevi adeo putrida increfcebat corruptio, ut labia cum gingivis penitus absumerentur ipsique dentes nigrore inficerentur. Admovebantur quidem alia putredini efficaciter resistentia, unacum internis alexipharmacis, sed frustra plane, agra ob id, consumtis post aliquot hebdomades viribus, miserrime pereunte.

*Epicrisis.*

Causa horrendæ atastrophes vix alia, quam quod variolæ inciderunt in corpus, in quo per diuturnam febrem & calorem vires consumptæ, & benigni ac temperati succi dyscrasiam viscidam, impuram excrementitiam contraxerunt. Quum enim ipse variolæ jam ejus sint indolis, ut roscidos corporis succos consumant & putres ulcerationes ob id sæpe relinquant; mirum non est, cancrasam corruptionem in tam imbecilli & impuro corpore fuisse subortam. Discant autem hinc Medicinam facientes, variolas in sordidis & infirmis corporibus circumspecte esse tractandas, & superatis iisdem, eo quàm maxime, evitandum, quo dyscrasia humorum per laxantia, diaphoretica, decocta & infusa, tollatur penitus.

## CAPVT. IIX.

## DE

## FEBRE MORBILLOSA.

## THESES PATHOLOGICAE.

## §. I.

**M**orbillosa febris est catarrhalis exanthematica, ut plurimum epidemica, qua motu vitali cordis & arteriarum aucto, materia acris, caustica, inflammans, ex interioribus, nervosis maxime partibus, sub forma macularum rubrarum ad cutem pellitur. *Morbillosa febris descriptio*

## §. II.

In scholis & scriptis Medicorum plerumque quidem morbilli simul cum variolis pertractantur. Nec negandum, multum utrisque esse affinitatis. Vtraque enim febris exanthematica, contagiosa & epidemica, omnibus hominibus perpetienda; utraque certis temporibus, magis, vel minus benigna & sequitur quam maxime athmosphærae statum, corporis *Ejus diagnosi & differentia a variolis.*

(IV.)

Aa

poris



poris dispositionem ac temperamentum. Sed mihi placuit morbillorum morbum seorsim perquirere, quum insignis tam quoad causam & genium, quam diagnosin & prognosin, utrisque intercedat differentia. In morbillis quippe materia non tam pernicialis, non tam caustica, nec exulcerans ut in variolis, febris etiam torusque morbus ob id longe mitior, nec tam multos jugulat. Ante eruptionem morbillorum adsunt quidem pariter inquietudines, pavores in somno, cordis palpitationes, facta efflorescentia cessantes, sed materia magis infesta est pulmonibus, ideoque id singulare habent, quod indivulsus comes sit, tussis violenta, ferina, qua infantes sæpe per quatuordecim & longius ante dies excruciantur. Præcedit etiam ut plurimum serosi humoris per nares & oculos, cum sternutatione & palpebrarum intumescencia secessio. Et hæmorrhagiæ quoque tam narium, quam in feminis per uterum, cruentus quin vomitus, morbillis longe magis solennes, quam variolis. Præterea non modo mitius, sed & citius decurrit morbillorum morbus & sæpe primo die, ut plurimum tamen post tertium diem, prodeunt maculæ, pro varia corporum succorumque dispositione diversæ, in aliis latiores & ampliores, in aliis minores, in quibusdam instar morsus pulicum, modo rubicundi & purpurei, modo pallidioris & magis plumbei aspectus. Maculæ hæ non elevantur in pustulas, ut variolæ, sed lenticulari aliquali eminentia planam cutis superficiem excedunt, facies & cutis in extremis minus intumescit, & brevi tempore, quinto interdum, vel sexto die, ruborem sensim exuunt, & sub auctiori perspiratione iterum evanescent. Quumque nulla eveniat suppuratio, neque dolor & ardor persentitur, sed insignis declinante morbo pruritus in genis, labiis & toto corpore, agros ad scalpum excitans. Neque etiam foeda relinquunt vestigia, neque ulcera in articulis & partibus externis, sed supersunt communiter squamulæ fursuracæ, successive decedentes.

## S. III.

Hæc qui novit, morbillos ex facili ab aliis cutaneis efflorescentiis discernere poterit. Petechias enim amplitudine & elevatione tantisper notabiliori superant, longe mitioribus etiam symptomatibus stipantur & malignitatis ut plurimum sunt expertes. In purpura alba, secus ac in morbillis, ex maculis pustulæ exiguæ pellucidæ surgunt, in rubra eminentiæ miliares sunt, duræ & asperæ. Rubellæ & rosalia ad erysipelaceam magis indolem accedunt, febrem habent irregularem & præterea in illis exanthematicæ maculæ minoris amplitudinis, ac morbilli, in his vero majoris, ut in statu universum corpus quasi erysipelate affectum, videatur. Et scorbuticæ maculæ latiores sunt ac morbillorum, coloris obscure rubicundi, ut plurimum sine febre.

*Alique  
exanthematis.*

## S. IV.

Vnde vero hujus omnibus communis morbi origo, haud secus ac de variolarum causa admodum est obscurum. Si tamen probabili ratione concludendum, verum omnino simile est, materiam morbillorum esse ex recrementis primi succi nutritii in utero, vel materni lactis extra uterum, glandulis quibusdam forsan firmitus impactis & ex longiori mora corrosiva plane indole imbutis. Sed bona fide hæc ignorare potest Medicus, etiam rationalis, dummodo pernicialem indolem ex effectibus & quo pacto his obviam eundum, sciat.

*Ejus origo undet*

## S. V.

Interim morbilli per se minus periculi habent, & sæpius, potissimum in plebejis sine Medici ope, debito tantum regimine, iterum discedunt. Interdum tamen, ob præcedentem anormalem, insalubrem, diuturnam temporum constitutionem, malignam habent, epidemici inprimis, indolem. Vel accidentales etiam possunt accedere causæ, ægros in discrimen adducentes. Malignitatem autem prodit virium impensa prostratio, extremorum frigus, inque-

*Que maligna.*

tudo summa, vomitus, deglutitio difficilis mentisque alienatio. Malum dein, quando aliæ maculæ, virulentia non expertes, uti petechiæ, purpura, vel etiam pustulæ scorbuticæ, complicantur, vel in fine cum vitæ discrimine superveniunt. Tussis porro continua, cum alvi profluvio & inquietudine magna, infaustum prælagire solent eventum. Neque boni ominis sunt sudores largi, præsertim in provectionibus, qui ob malam diætam & spirituosorum potum, calidum alunt & impurum sanguinem; ex facili enim admissio levi frigore, maculæ, funesto plerumque eventu, recedunt. Finito etiam morbo, si tussicula cum rauedine persistit, nisi cito idoneis succurratur remediis, in phthisin & hæticam fit transitus.

## §. VI.

*Quomodo  
nacet.*

Qui autem morbillis occumbunt, maxime ex infantibus, nono plerumque die suffocantur, evidenti indicio, nervosa & glandulosa pulmonum bronchia, ob copiosam inflammantem materiam, spasmis & stagnatione humorum fuisse affecta & ex nimio feri affluxu demum suffocationem inductam. In quibusdam superato morbo remanet alvi fluxus ad aliquot hebdomades durans, tabem cum morte demum inducens. In nonnullis etiam, præsertim plebejis, febris succrescit lenta, cum atrophia & abdominis tumore, funesta, ubi post mortem ut plurimum glandulæ mesaraicæ magnæ & pulmones latentibus vomicis obsessi, deprehenduntur.

## CURATIO.

*Medicatio.*

Medicatio morbillorum, iisdem quam variolarum perficienda, acrimoniam nimirum temperantibus, diluentibus & demulcentibus, cum iis, quæ sub moderato lecti & hypocausti calore, materiam hostilem acrem ad corporis extrema agunt. Prosumt igitur pulveres absorbentes & diaphoretici fixiores, leniter cinnabarini, item emulsiones & decocta. Quæ, quum præcedenti capite jam sint ube-

rius



rius descripta, specialia autem in cautelis dicenda, plura de  
his heic afferre supervacaneum.

CAUTELAE ET OBSERVATIONES  
CLINICAE.

§. I.

Si suspicio est in infantibus primam corporis regio-<sup>Sub initi-</sup>  
nem copiosis & crudis succis redundare, expedit in primo <sup>um que</sup>  
insultu leni emetico, uti ex dimidio tartari emetici grano, <sup>facienda.</sup>  
cum sirupo de chichoreo cum rhabarbaro, eandem deplere.  
Quando etiam lumbricis laborant, & metus est, incursum  
epidemice jam grassantis morbi, e re est, ut intestinorum  
canalis prius a verminosa progenie liberetur, quod com-  
modissime perficitur pilulis *Rusi*, cum mercurio dulci &  
semine fantonici. Quod si negligitur, difficulter morbus  
superatur. In provectioris autem ætatis personis, si san-  
guis redundat, ut primis statim diebus subtrahatur necesse  
est. Declinantur sic non modo hæmorrhagiæ ominosæ,  
sed vidi etiam, hoc facto, remisisse illico anxietates cum  
inquietudine & prodiisse per universum corporis ambitum  
exanthemata.

§. II.

Sicuti impensius calefacientia, cum nimio externo ca-<sup>Calida &</sup>  
lore, materiam deteriore ac subtiliorem reddendo, æstum <sup>frigida</sup>  
cum anxietate augendo & vires dissipando, nocent; ita vicif-<sup>nocent.</sup>  
sim nitrosa & nimium refrigerantia, in ætate maxime infantili,  
oppido damnosa. Retardant enim eruptionem, & retenta  
materia, ad sphacelum fit dispositio.

§. III.

Quando morbilli accidunt feminis, quæ spasinis hy-<sup>Hystericæ</sup>  
pochondriaco-hystericis obnoxia, vel mensium instat flu-<sup>spasmi</sup>  
xus, haud raro animi deliquia, spirandi angustia, cum gut-<sup>mitigan-</sup>  
turis constrictione & ingenti præcordiorum anxietate, jun-<sup>di.</sup>  
gi solent, quibus materiæ in cutem exitus præcluditur. Igi-

tur tum neutiquam pellentibus calidioribus eruptio urgenda, sed potius adhibenda ea, quæ spasmos leniunt, enemata ex paregoricis & carminativis parata interdum venæsectio, nec non pauxillum castorei & nitri pulveribus bezoardicis admixtum; brevi post in conspectum veniunt maculæ.

## §. IV.

Tussis.

Molestissimum in morbillis symptoma est tussis ferina, ad quam complacendam nihil utilius oleo amygdalarum dulcium, recenter ex non rancidis expresso, cum sirupo capillari remixto & in decocto avenaceo ad dimidium cochlear crebrius porrecto. Conducit etiam pulveribus absorbentibus & diaphoreticis admiscere dimidium granum extracti croci, & uti infuso theiformi, ex herba veronicæ, radice liquiritiæ, floribus papaveris rhœados & semine fœniculi.

## §. V.

Diarrhœa

Diarrhœa si concurrit, provide eadem tractanda, nec facile compescenda. Solvit enim sæpe morbum & multa ac copiosæ sordes e corpore per ipsam secedunt. Ex turcissimis tum adeluendam ex intestinis acrimoniam, clysteres ex puris demulcentibus parati. Si vero finito morbo pertinacius insistit diarrhœa, commode pulveribus bezoardicis admiscenda aliquot chaccarillæ corticis grana, vel etiam tantillum theriacæ cælestis.

## §. IV.

Quibus  
medendū  
hemor-  
rhagia

Quum sanguinis profusiones nimix mali sint ominis & plerumque malignitatis indices, easdem cum bonis ægrorum rebus moderari non minimæ res est prudentiæ. Exulent omnia positive adstringentia, item eminentius opiata & anodyna. Ego quidem sapius cum fructu usus sum hac mixtura: recipe aquæ florum acaciæ, sambuci, tiliæ ana uncias duas, theriacalis drachmastres, antimonii diaphoretici, diascordii Fracastorii ana drachmam semis, spiritus vitrioli guttas XX. sirupi papaveris rhœados drachmas duas. M. Liquor quoque noster anodynus mineralis, cum pulvere præcipitante nitroso sumtus, exoptatam sapius præstitit opem. Per amuleta vero fluxum hunc compescere velle, noxium potius, quam salu-

salutare deprehendi. Infita enim propria virtute nihil operantur, sed tantum impensiori animi impressione, quæ tamen in periculosis ejusmodi affectibus omni studio evitanda.

§. VII.

Vbi malignioris sunt indolis, apprime ex usu est pulvis *Maligni-* noster bezoardicus, cujus basis bezoardicum minerale, *quitati.* non modo sudorem & eruptionem blande elicit, sed simul etiam humores corruptos imbibendo, sedem movet, cum euphoria. Præstabilem etiam sæpe deprehendi virtutem sulphuris antimonialis, nostra peculiari methodo præparati & ad dimidiam, vel quartam grani partem oblati.

§. IIX.

Si sudore corpus nimium diffluit, ut lintheamina ex *Et sudo-* to madescant, provide eadem sunt mutanda, prius probe exsic- *ribus* canda & leniter calefacienda, ne ab eorum frigore materia exanthematica cum periculo certissimo recedat. Idem in mutatione lecti tenendum. Maximopere etiam cavendum est, ne quis subito ex calido in frigidum concedat. Mortem enim inde intra aliquot horarum spatium vidi.

§. IX.

Quum plures, qui finita febre & discussis jam maculis *Post mor-* præmature liberiori aëri sese committunt & salubrem victus *bum faci-* vitæque rationem spernunt, ob retentas sic & adauctas impu- *enda.* ras morbi reliquias, in peiores morbos incidunt, asthma, vel suffocativum catarrhum, phthisin & tabem, quin uti observavi in contracturam; serio monendi sunt convalescentes, ut per aliquot adhuc hebdomades perspirationem solite custodiant & eum in finem utantur infusis theiformibus, leniter diaphoreticis & sanguinem mundificantibus, interposito nonnunquam, ad sordes per alvum evehendas, balsamicarum pilularum usu. Victum vero habeant tenuem & aliquandiu a cerevisiæ potu abstineant bibantque decoctum temperans & diluens, ex rad. scorzonæræ, farsaparillæ, cichorei, liquiritiæ, hordeo mundo, cortice ligni assafras, vel semine fœniculi. Quod sicuti in omnibus fere morbis, sic etiam in febribus exanthematicis, utile est & maxime salutare.



## ENARRATIONES MORBORVM.

## OBSERVATIO I.

Post mor-  
billos cum  
purpura  
gutta se-  
rena.

Conquerebatur generosa puella, duodecim annorum, de lassitudine, inappetentia, languore virium & doloribus lancinantibus in cruribus & brachiis, præterea lividum & plumbeum faciei offerebat aspectum. Octiduo post corripiebatur horripilatione, subsequente æstu & gravi dolore capitis lumborumque. Tertio die post in conspectum veniebant maculæ morbillorum, tum epidemiorum, tussis simul affligebat molestissima, & propter capitis oculorumque dolorem continuum, nec somnum capere, nec lucis ferre poterat aspectum. Quinto die sensim iterum evanescebant maculæ ex totius fere corporis ambitu, sed dolor capitis & oculorum remanebat & præterea alvus a primo morbi insultu erat sicciore, ut nonnisi clystere sollicitata responderet. Quum sic jam declinare videretur morbus, præter spem de novo accidebat summa præcordiorum anxietas, cum æstu totius corporis, siti, virium prostratione & difficili respiratione, prodibat postea purpura rubra, intermixta alba, sive miliari, & dolor in oculis & capite supra frontem pertinaciter insistebat. Pugnabatur quidem contra hæc tam gravia mala iis, quæ acridinem humorum cum spasmis mulcere & eruptionem placide promovere poterant. Convalescebat etiam, sensim remittente capitis dolore, puella, Sed superato morbo visio erat imminuta, & sensim incrementum sumens, intra mensem in veram guttam serenam transiit, ita, ut nihil plane visu dignoscere posset; licet oculi integri, & pupilla tantum duplo naturali amplior, comparerent. Multa & probata adversus hoc oculorum vitium adhibebantur remedia, sed frustra. Erumpentibus autem decimo quarto anno primum mensibus, splendorem aliqualem receperunt oculi rursus. Hinc in consilium vocatus, suasi, ut tempera-

tis

tis balsamicis mensium negotium secundaretur, vesicatorium mirius aliquandiu gestaretur, oculi crebrius quotidie pinguedine viperina recenti inungerentur & cum cibo nonnumquam aliquot guttæ balsami nostri vitæ assumerentur. Quibus non quidem in totum, sed tamen in tantum restitutus visus, ut sub certo oculi situ objecta, & quidem tantum dimidiata facie, conspiciere posset, ceterum optime valeret, ingressa haud ita pridem matrimonium.

*Epicrisis.*

Semper suspectum in variolis & morbillis, quando ægri diu ante eruptionem male habent & de doloribus artuum, vel certam partem pertinacius infestantibus conqueruntur. Heic successit morbillis evanescentibus purpura, tam rubra, quam alba. Aut igitur duplex specificæ indolis materia impura intus delituit, quæ non simul critico motu, sed definito & successivo fuit expulsa. Aut purpuræ materia forsan per ipsum febrilem in morbillis sanguinis motum de novo fuit progenita. Dein nunquam etiam non suspectum, si gravis capitis & oculorum dolor, alias facta eruptione cessans, per totum morbum durat. Grave enim ut plurimum capitis vitium relinquere solet. In hac guttam serenam. Quæ quidem insanabile semper fere vitium, in infantibus tamen & tenerioris texturæ puellis, accedente menstrua purgatione, & immutata per hanc totius corporis, quoad solida & fluida, natura, discutitur iterum, præsertim si naturæ sanationem moliens arte juvetur.

OBSERVATIO. II.

Juvenis cholericæ & siccæ constitutionis, qui per aliquot annos in Academia plus Veneri & Baccho, quam Musis litarat, commovebatur aliquando vehementi ira, die post afficiebatur æstu insigni cum languore artuum & dorsi dolore, noctem transigebat insomnem & tussî exercebatur valida, quæ ferina plane fiebat & comites habebat anxietates & cardialgias. Datis ardorem nimium temperantibus, post tertium diem comparebant maculæ numerosissimæ intra

*Morbilli  
retroce-  
dentes al-  
vi fluxus  
soluti.*

XXIV. horarum spatium universum corporis ambitum occupantes. Mirum autem inquietus erat æger & impatiens, corpus jactitabat, tantum temperatum etiam lecti calorem respuebat, & admissa subinde aura frigidiori, ut maculæ omnes brevi iterum evanescerent faciebat. Oboriebantur hinc anxietates cum magna inquietudine & siti inexhausta, ut intra diem & noctem quatuor minimum pitifanæ & emulsio- nis amygdalatæ epotaret mensuras. Porrigebatur quidem ad revocandam extus materiam lene diaphoreticum, sed propter ægri impatientiam & jectigationem nihil proficiebat, sitis potius reddebatur intensior, ut vix posset extinguui, & æger vel septem mensuras liquidorum absumeret. Inde incidebat in alvi fluxum & vel decies intra diem dejiciebat, urina etiam effuse fluebat, ægro tamen de interno ardore, siti & anxietate conquerente largissimeque potum ingurgitante. Fluebat sic alvus per quinque dies, calidus potus cum medicamentis spernebatur, neque maculæ amplius comparebant. Nihilominus symptomata sensim mitiora fiebant, æger melius habebat & præter spem intra XIV. dies convalescebat.

*Epirisis.*

Singularis plane hic est casus largi alvi fluxus, quo morbillorum morbus, & quidem retrocedentium, solutus. Iam quidem nullum est dubium, quin materia morbillorum sit causticæ & inflammatoriæ indolis, quæ exitu præcluso intus retenta, vel expulsa retrocessit, firmiusque nervosis partibus impacta est, graves, immo exitiales, efficere possit affectiones. In nostro ægro insedit utique ori, faucibus, ventriculi & intestinorum tunicis, ac sitim & ardorem cum leniori inflammatione ibi concitavit. Liquidorum vero & quidem accommodatorum copioso potu, caustica materia, tam intra tunicas hærens; quam in succis hospitans, mitigata atque correctæ fuit, & proritus alvi fluxus, quo impuri ex universo corpore succi eo confluerunt & evacuati sunt. Ego quippe crebrius observavi, in variolis & morbillis, ob impuros & redundantes corporis succos, malum genium exhibentib;

spon-



sponte obortum alvi profluvium, non modo sine periculo, sed & admodum salutare fuisse. Neque etiam facile in periculi plenis morbis desperare debet Medicus, licet ægri magnam potus copiam appetant, modo per alvum, urinam & sudorem iterum emittatur. Plures enim sine, quam cum liquidorum appetentia, occumbunt.

## OBSERVATIO. III.

Infans decennis, feliciter, ut videbatur, superarat morbillos, sed tamen ea restitabat alvi laxitas, ut quævis assumpta citissime per inferiora transirent, aderantque præterea tormina ventris cum dolore pedum, qui tactu semper erant frigidi. Ad compescendum hunc fluxum, Medicus minus perterritus porrexit pulverem ex radice tormentillæ, terra de cætechu & unicornu fossili, cum pauxillo laudani opiati. Inde enim alvus quidem constitit, sed acerbissimus dolor occupavit tibiam sinistram in malleolo, quem mox tumor excepit durus & renitens, qui tandem suppuratus & apertus sanguinem cum copioso ichore fudit. Successit postea serpens ulcus, totum ferme pedem depascens, accessit febris cum tussi & difficili respiratione, quumque ob nimium pectoris infarctum infans non libere spirare posset, suffocativo demum catarrho fuit extinctus.

*Epicrisis.*

Sæpius notavi, in infantibus alvum per totum variolarum & morbillorum morbum, & etiam post eum, sine periculo fluxisse. Neque alia utilia deprehendi, quam diaphoretica fixa, ut cornu cervi philosophice præparatum, ustum, antimonium diaphoreticum, lapides cancorum, succinum præparatum, quibus pauxillam corticis chaccarillæ admixtum. In usum quoque vocavi jascula ex carnibus cum ossibus contusis, item cornu cervi parata, adjecta semper olei amygdalarum dulcium recentissimi portione quadam. Neque minus clysteres emollientes, ex decocto raparum exsiccatarum una cum butyro insulso, admodum fuerunt proficui, qui omnium optime ac redinem humorum, coli membranarum

potissimum in ejusmodi diarrhoeis infidentem, contemperant ac mulcent. Contra ea periculosum omnino, alvi hunc fluxum adstringentibus sistere. Sic enim materia acris caustica, intus remanens & succis reddita, ad alia sæpius loca relegatur, ubi postea atrocia ciet mala.

## OBSERVATIO. IV.

*Emeti-  
cum in  
morbillis*

Lactans infans unius anni incidit in calorem præternaturalem, cum pavore in somno & vomitu. Die secundo eruperunt morbilli numerosi, sed asperi & cutem quasi stringentes. Die quarto accessit summa respirandi difficultas & pectoris angustia, cum anxietate, inquietudine, vigilia & pavoribus. Dedi sextam partem grani tartari emetici, cum drachmis duabus aquæ florum tilia & quatuor guttis essentia castorei. Hinc quinquies dejecit infans viridissimam instar glutinis materiam, eoque facto vigor accessit toti corpori, respiratio facta liberior & morbilli rubore perfusi magis. Oblata postea ad calorem temperandum gelatina cornu cervi in tenui decocto hordei, & feliciter evasit tenellus.

*Epicrisis.*

Colluvies vitiosorum humorum in ventriculo, morbillorum processum turbare & gravia symptomata iis adjicere potest utique. Omnia enim quæ circa quartum diem, quo alias morbus remissior, hoc in infante præsto fuerunt pathemata, non ex morbillis, sed cruditatibus acido-viscido-biliosis prima in regione stagnantibus atque corruptis, ortum traxerunt. Hinc exterminatis iis per lenissimum emeticum, symptomata non modo protinus conquieverunt, sed & ipsa natura gravi onere levata, eo felicius ipsi potuit succurrere morbo. Quin patet, nec quarto & critico die, ejus modi in casibus leniora & prudenter exhibita evacuantia nocere, inter quæ emetica, in infantibus præsertim lactantibus, merito primastinent.

## OBSERVATIO. V.

*Morbilli*

Puer undecim annorum, rubicundus facie, ingenio alacris,

cris, sanguine plenus & constitutionis calidæ, correptus est cum ha-  
immani æstu, dorsi capitisque dolore, datis tamen tempe-  
rantibus nitrosis pulveribus, altero die habuit meliuscule. Ter-  
tio autem rediit urens æstus & quarto die sequutum narium  
stillecidium. Hoc quinto remisit, sexto vero effusius rever-  
sum. A septimo ad decimum mitiora erant symptomata  
& sanguinis fluxus siluit, erumpentibus passim morbillorum  
maculis. Sed breves induxiæ. Vndecimo quippe die, rur-  
sus copiosa e naribus facta hæmorrhagia & maculæ evanue-  
runt. Duodecimo largius adhuc fluxit sanguis, ita ut vires  
mirum corruerent & æstus internus invalesceret. Decimo  
tertio die mitiora pathemata iterum, die autem post cum  
hæmorrhagia recruduerunt, donec consumtis prorsus viribus,  
decimo quinto die æger efflaret animam.

*Epicrisis.*

In variolis & morbillis deterioris semper notæ sympto-  
ma est, effusior sanguinis, per quæcunque loca, fluxus. In-  
dicat enim vehementes spasticas internarum partium, præser-  
tim viscerum abdominis, stricture, quibus inæqualis redditur  
sanguinis progressus & ex uno loco in alterum cum impetu  
urgetur. Per nimiam etiam profusionem virium inducitur  
jactura, & minimorum ad extrema excurrentium canalium, per  
quæ in cute eruptio fieri debet, exinanitio & subsidentia. Un-  
de materia caustica retenta, novos ciet spasmos novasque  
hæmorrhagias ac demum funesti eventus fit causa. Magnæ  
itaque prudentiæ est, hæmorrhagias in morbis quorum ma-  
teria per cutem excernenda, moderari perite, ne deficiat ex-  
pulsionis facultas. Ego quidem tum commendare soleo, ut  
omne frigus & frigidus potus vitetur, & partes extremæ,  
manus & pedes, quæ ordinario frigidæ existunt & contremi-  
scunt, calore bene foveantur & vel lecto probe obtegantur,  
vel etiam aquæ calidæ vino mixtæ immergantur, quo revul-  
sio sanguinis a capite fiat simulque spastica fibrarum contra-  
ctio laxetur. Dein eo quam maxime annitendum, quo  
caustica materia foras mittatur eumque in finem danda dia-



phoretica cum temperantibus, cujus generis hæc mixtura: recipe aquæ cardui benedicti, florum sambuci ana uncias duas, theriacalis unciam semis, diascordii Fracastorii, antimonii diaphoretici nitri ana drachmā dimidiā mixturæ simplicis guttas XX. sirupi acetositis citri drachmas duas, M. D. de qua bina, binis quibusvis horis, cochlearia sumenda, superbibendo semper calidum haustum. Et si præterea æstus junctus nimius, interponendus est pulvis bezoardicus nitrosus.

## OBSERVATIO. VI.

*Morbilli  
retroce-  
dentes  
funest.*

Vir generosus, macilentus & fibrosæ corporis structuræ, triginta sex annos habens, aulico ministerio fungens, ab aliquot jam annis, vini potui liberaliter indulserat & sæpe inter potatores egerat tantum non heroem. Incidit is in morbillorum, aulicis tum familiarem & ab ipso nondum superatum morbum, sub quo ipsum præter immoderatum æstum & inquietudinem, violenta tussis & summæ anxietates præcordiorum, noctu æque ac interdii affligerunt, corpore a principio statim sudore diffluente. Medicus aulæ ordinarius in consilium vocatus, quatuor quibusvis horis, triginta guttas essentiae alexipharmacæ admodum calidæ porrexit, & ad sitim extinguendam liberalem potum cerevisiæ valde spirituosæ concessit. Interim expulsi maculis anxietates remiserunt & spiritus liberior meavit. Quum autem indusium sudore totum madescens & frigidum mutaturus, a ministro imperito recens minusque calefactum acciperet, illico omnes omnino quibus corpus confertim obsessum maculæ disparuerunt. Inde tanta sequuta inquietudo, anxietates cum virium jactura, ut omnibus morti videretur proximus. Ego tum temporis præsens accersitus exhibui illico pulverem meum bezoardicum cinnabarinum cum aqua analeptica, nec non liquorem anodynum mineralem cum tinctura antimonii temperata & aliquot guttulis spiritus Buffiani; quibus paullo post & sudor & maculæ redierunt, æger melius habuit & pulsus antea inæqualis, celer & debilis, plenior ac æqualis redditus. Sed septimo die, quum sudor effusus abhuc manaret

naret & æger in alium lectum ob madorem se conferret, rursus cuncta evanuerunt exanthemata, extrema frigida facta, accessit anxietas maxima & spiratio difficillima, pulsus etiam contractus & parvus redditus, & brevi post, præcedente rigore & convulsione artuum, est extinctus.

*Epicrisis.*

Morbilli, non secus ac alii morbi exanthematici, sequuntur maxime constitutionem solidarum & fluidorum partium corporis ægrotantis, adeo, ut quo intemperatior hæc, eo pejoris indolis sit ille. Potissimum, de vini potui creditis, crebriori confirmatum habeo experientia, quod raro ex febribus exanthematicis evadant, eo quod febrilis illa intestina partium sanguinis commotio, in plenariam tandem dissolutionem abit, cujus index largissimus sudor cum insigni virium lapsu. Medicus igitur, calida essentia, quæ æstum magis accendit, nocuit potius, quam profuit. Si quoque dissolutior talis humorum vitalium est status, levis etiam in rebus externis error, uti refrigeratio, linteaminum mutatio, situs erectus, immedicabilem possunt inducere noxam. Et quo languidiores sunt in exanthematicis vires, eo plus semper metuenda retrocessio materię exanthematicę, qua vitę nihil est infensus.

OBSERVATIO. VII.

Puelli tres, unus sex, alter quinque & tertius trium annorum, filii viri perillustri Serenissimo Duci in Saxonia inferiori a consiliis, corripiebantur successive morbillis, Commendatione generosę feminę in consilium vocabatur novellus Medicinę Doctor, qui intempestivo nitri amore præceptoribus imbutus, larga & repetita dosi, præter pulveres refrigerantes nitrosos, exhibebat nihil. Inde retardabatur molarum eruptio, spiratio fiebat angusta & difficilis, tussis continua sine creatu, accedebat asthma intensum & intra septem dies, tres pueri occumbebant, cum ingenti parentum luctu,

*Epicrisis.*

*Epicrisis:*

Non ex unius, sed plurimum fide dignorum relatione, de tragico hoc casu certior sum factus, & crebrior ac liberalis refrigerantium nitroforum usus utique taxandus. Nam licet nitrum purum merito principem teneat locum inter ea præfidia, quæ æstus extinguunt & spasticas commotiones componunt, & ego etiam jam ante quadraginta annos eodem frequentius usus sim, quin forsan primus, testantibus id variis scriptis, tum dissertationibus, tum *notis ad Poterium*, salubrem nitri facultatem perspexerim & exposuerim; nihilo tamen secius usus ipsius, haud secus ac aliorum magnæ virtutis remediorum, peritum ac prudentem exigit Medicum, & ex ejus abusu, ab iis, qui Medicinam rationalem nec callent, nec exercent, damna inducta novi, & plura, & gravia. Certe in morbis exanthematicis, ubi non nimius urget æstus, in febribus catarrhalibus, item malignis, in quibus humorum potius corruptio, quam exæstuatio metuenda, in corporibus maxime humidioribus & infantilibus, omni modo a liberali nitri usu abstinendum. Ob nimiam enim refrigerationem remanet intus foras excernenda infensæ indolis materia, atque ut putredinosa dissolutoria humorum corruptio magis augeatur, facit. Et quum materia morbillorum maxime infensæ hujus sit indolis, ut firmiter insideat nervis pnevmonicis & tunicis pulmonum nervosis, nullum omnino est dubium, quin in his puellis non emota, ibi impacta hæserit & suffocatorias humorum stases suscitavit. Ceterum hoc loco monendum duxi, me in infantibus, quando morbilli prodire noluerunt ipsorumque materia altius insidens pulmonum bronchiis suffocativum intentavit catarrhum, insigni cum fructu usum esse vesicatorio, quo sopiti canalium ad expulsiorem necessarij motus, quam optime resuscitantur.

## OBSERVATIO. IIX.

*Morbilli  
in hypo-  
chondria*

Comes illustrissimus, vigintiannorum, cholerico-sanguineus, nondum venæsectionem passus & pathematibus spasticohypo-

hypo-



hypochondriacis , cum stomachi inflatione & crebriori post cibum vomitu , obnoxius , grassantibus epidemice morbillis languere cœpit & conqueri de anxietate præcordiorum , dolore capitis , dorsi ac pedum , tussi sicca , interno æstu , intercurrente horripilatione , cute arida & sicca. Tertio die comparuerunt in fronte stigmata rubicunda nonnulla , pathemata tamen noluerunt remittere , nec plures etiam postero die efflorescere maculæ , pulsu interim pleno cum celeritate vibrante. Vena in pede pertusa , sanguis cum impetu exsiliit floridus , variegatam post refrigerationem contrahens cuticulam , & inde illico anxietates & vehementes capitis dolores remiserunt. Quin licet primum stigmata in fronte disparere viderentur & pulsus admodum celer cum durtie micaret , æger etiam noctem insomnem fere ob æstum & compunctorium in cute sensum duceret ; mane tamen in conspectum venerunt in facie & pectore maculæ morbillorum , pallidiores initio , successive autem magis rubentes & reliquas quoque corporis partes confertim occupantes. Discessit hoc facto capitis , dorsi & pedum dolor , cum pectoris angustia , tussi & interno calore , ac æger melius habuit , conquestus tantum de molesto pruritu ardente & tensione cutis. Potissimum vero ipsum excruciauit oculorum ardens dolor cum rubore adnatæ & illacrymatione , ita ut lucem ferre non posset & noctu palpebræ conglutinantur. Nono die obortus sudor largus , decimo etiam manans & acidum foetidum odorem spirans. Vndecimo intra nycthymeron sexies deiecit sine torminibus sponte & maculæ ruborem sensim exuerunt , decimo tertio die penitus discussæ , subsequente cutis desquamatione & sanitate.

*Epicrisis.*

Quum in iis , qui spasticis hypochondriacis detinentur pathematibus , nunquam non major succorum impuritas & acrimonia esse soleat , huic etiam illustrissimo agro ejusdem constitutionis ea fere unice exhibita sunt , quæ demulcent ac temperant , pulveres nempe temperantes & diaphoretici , leniter

nitrosi, emulsiões, exoptato cum successu. Venæsectiōnem autem, quum pulsus admodum plenus & vasa turgida essent, eruptio quoque retardaretur, necessariam duxi, crebriori experientia edoctus, sanguine nimium redundante, difficillime, eodemque subtracto, promptissime, succedere materia exanthematica expulsiōnem. Insolitus vero ille oculorum ardor, rubor & fluxus serofus, tribuendus utique eorum debilitati in pueritia jam ex crebrioribus & diuturnis acribus defluxionibus contracta. In quibusvis enim fere morbis solenne est, ut partes ex prægresso morbo debilitatæ, præ reliquis graviter afficiantur, ob decubitum humorum promptius ibi contingentem.

## CAPVT. IX.

## DE

## FEBRE PURPURATA.

## RVBRA ET ALBA MILIARI.

## THESES PATHOLOGICÆ.

## §. I.

*Purpure descriptio* **F**ebbris purpurata est catarrhalis amula, exanthematica, qua motu systematis tam vasculosi, quam nervosi intensiori, materia lymphatica corrupta, specificæ indolis, ex interioribus, maxime nervosis partibus, ad summam cutem, ceu conveniens emunctorium, sub forma pustularum minimarum miliarium, asperarum, rubrarum vel albarum, salutariter protruditur.

## §. II.

*Materia exanthematicum differt.* Jam omnis quidem materia exanthematica in eo convenit, quod acrimonia sua nervos male afficiat ac in ætiosum intensiorem motum universum genus vasorum & sensibilibus partibus extimulet, eoque tandem exterminetur. At tamen

tamen sicuti acrimonia caustica in vegetabilium & mineralium venenis peculiarem obtinet indolem, & ob id peculiariter cuius speciei propria suscitatur pathemata, ita etiam singularem & specificam cuius exanthematicæ materiæ esse naturam, non tam a priori, quam potius a posteriori, effectibus & phænomenis obviis, innotescit. Scilicet in petechiis, variolis, morbillis, febre urticata, scarlatina, rossaliis, rubecolis, maculis scorbuticis, scabie, herpette, phlyctænis, epinyctidibus, gutta rosacea, impetigine & sudaminibus, subest semper acris quædam materiæ, quæ modo cum, modo sine febre, per cutis emundatorium proscritur, sed unumquodque ex his exanthema peculiaribus incedit symptomatibus, de quibus singulis suo loco seorsim.

## S. III.

Nunc quomodo ab aliis exanthematicis mor-<sup>Quibus</sup> bis purpuraceus differat, exponendum duntaxat. Hi autem <sup>purpura</sup> ipsius sunt characteres. Efflorescunt pustulæ minimæ semen <sup>ab aliis</sup> milli amplitudine æquantes, numerosissimæ, cum corrugatione, asperitudine & ariditate cutis & spargunt foetorem peculiarem plane. Nullum aliud exanthema tam instabile, crebro ac celeriter retrocedens, iterumque comparens, ac purpuraceum. Nullum etiam, tam crebro intercurrente mox pruritu & punctura stipatum. Alia exanthemata omnibus æque regionibus incumbunt, & nobiliorem æque ac sequiorem sexum infestant, purpura autem in certis tantum locis familiaris & quasi endemia, ac præterea feminas magis quam viros, maximeque puerperas, corripit. Alia magis epidemica sunt, contagiosa & sequuntur constitutionem æris, sed purpura magis ex vitio viscerum & succorum, quam æris oboritur, nec epidemica est, nec contagiosa adeo.

## S. IV.

Ipsa dein purpura inter se differt & definit a Medicis in <sup>Rubra est</sup> rubram & albam dispescitur. Vtræque magis, vel minus <sup>vel alba.</sup> acuta, benigna, vel maligna. Rubra ob pustulas rubicundas ita dicitur, ac ut plurimum minus periculosa, febris ex-



pers & chronica est, ut non modo diutius corpori inhære-  
 scat, sed & sæpius stasis anni temporibus redeat, de qua in-  
 ferius sigillatim. Interdum tamen etiam febre stipatur & a-  
 cutæ indolis esse observatur. Alba vero magis acuta est,  
 nec facile sine febre occurrit, ideoque plus alit periculi. Hæc  
 etiam non tam facile redit ac rubra, puerperasque magis &  
 feminas juniores, teneriores serofas corripit, quam rubra,  
 quæ adultioribus potius, succis & sanguine fartis ipsisque vi-  
 ris familiarior est.

## S. V.

Idiopa-  
 thica, vel  
 sympto-  
 matica a-  
 cutæ in fi-  
 ne

principio.

nec non  
 catarrha-  
 libus ac-  
 cedens.

Nonnunquam porro purpura idiopathica est, nonnun-  
 quam symptomatrica, & aliis, maxime continuis febribus, ad  
 exitum vergentibus, supervenit. Admodum enim familiare  
 est, quod purpura rubra, vel alba, vel utraque simul, va-  
 riolis, morbillis, synochis putridis, ardentibus quoque &  
 petechizantibus aliisque epidemicis, in declinatione accedat,  
 novam febrem accendat, & ægrum, fractis a priori morbo  
 viribus, iugulet. Id quod potissimum evenire solet in iis, qui  
 intemperantius vixerunt, largiori & quotidiano potui indul-  
 serunt, veneris nimio exercitio vires consumierunt & pere-  
 grinam succis induxerunt diathesin, nec non iis, in quibus  
 sub morbi decursu alvus diutius clausa, aut inconsulta medi-  
 catione refrigerantia & julapia nimis liberaliter sunt usurpa-  
 ta. Quandoque etiam in acutis his febribus, maximeque  
 variolis & morbillis, primis statim diebus, cum cutis aspre-  
 dine apparet purpuræci quippiam, rarissime pariter cum fe-  
 lici morbieventu. Neque minus catarrhalibus febribus, cum  
 tussi & spirandi angustia, subinde in infantibus sese associat  
 purpura, vomitu, vel etiam alvi fluxu stipata. Quam, si  
 inclinât morbus, pedum & quandoque abdominis intume-  
 scentia, cum, vel sine aridura superiorum partium, excipit, do-  
 nec tandem sudoribus, vel spontaneis, vel arte prolectis, ex  
 toto cedit.

## S. VI.

Idiopa-  
 thica.

Idiopathica autem purpura his potissimum incedit sym-  
 ptoma-

ptomatibus. Præcedit levis horripilatio, quam subsequitur corporis exæstuatio, cum ingenti languore viriumque interdum ad lipothymiam usque dejectione. Præcordia stringuntur, pectus angitur, adsunt alta suspiria, inquietudines, vigiliæ, vel somnus minimum laboriosus & interturbatus. Aestus & compunctorius in dorso sensus percipitur, alternante frigoris, horroris & caloris intra cutem affectione, in vola manuum maxime sensili. In puerperis lochiorum fluxus retinetur & lac e mammis resorbetur ac stillare cessat. His succedit cutis asperitas & instar anserinæ corrugatio, exurgentibus innumeris pustulis, sive albis, sive rubris, sive utrisque sibi invicem appositis, milii semen figura & exiguitate referentibus, quæ primum collum, deinde pectus & dorsum ac postea brachia & manus occupant. His in summa cute efflorescentibus, graviora antea pathemata mitigantur, pulsus durior prius, contractior & celerior, mollius, liberius & remissius undulat, animo vigor dejectus redit, arida cutis madescit & alvus ante hac compressa tam firmiter, ut nec flatibus transitus pateret, laxatur, & non solum hos, sed & nonnunquam stercora, sponte protrudit. Postea vesiculæ sensim sensimque explicantur ichore foetido plenæ, urina magis saturata prodit & sudor singularis huic exanthemati proprii foetoris erumpit, sanguinis per lochia fluxus repetit, & intra septem vel plurimum adhuc dierum decursum, cum insigni extremorum pruritu, pustulæ disparent, arescunt, squammularum instar decidunt, & æger sensim vires recipiens, ad pristinam redit sanitatem.

## S. VII.

Materia porro, quæ exanthematicum hunc morbum proxime facit, ex pravo & corrupto in corpore est succo; ita tamen, ut, quum duplex sit purpuræ genus, duplex hic etiam sit asserendus. Tam uti in macrocosmo, sic et resuscit. iam in microcosmo, duplex datur liquidorum corruptio, una acido-vappida, paullo fixioris indolis, altera sulphurea foetida, indolis magis alcalinæ atque volatilis.

lis. Illa cadit in succos qui salino & sulphureo elemento minus instructi sunt, potissimumque in pellucidum, insipidum illum gelatinosum lymphaticum humorem; hæc autem in sanguinem & succos, qui copiosa sulphurea & salina substantia scatent, inter quos quam maxime connumerandus, ille, qui sanguini admixtus, spissior tantisper variique coloris atque saporis, serum dictus. Hunc igitur corruptum purpuræ rubræ, illum vero albæ & miliaris causam esse, censemus.

## §. IIX.

*In alba  
lymphæ  
acido va-  
pida.*

Lympham enim alba in purpura acore esse infectam, evincunt plura. Nimirum solennis & tantum non essentialis huic exanthemati est nimia seri secessio, per sudores effusos, urinas copiosas tenues, salivationes quandoque, quandoque dejectiones aquosas. Acidi autem is effectus, ut sanguini insinuatam, partes ejus crassiores in coagulum mittat, serosis secessum facientibus. Dein omnis generis acida & refrigerantia, ipsum quin nitrum, largius sumpta nocentissima: quæ vicissim acidum obtundunt & sanguini ac lymphæ blandam spirituscentiam conciliant, saluberrima. Feminis porro quæ horæis fructibus, acetariis, dulcibus, farinaceis, acscentibus, sub otiosa & sedentaria vita delectantur, frequens quam maxime in puerperio febris miliaris. Ne dicam, multos illos sanguinis grumos, quos in vasis majoribus & thalamis cordis invenerunt, qui purpura alba defunctos disseccuerunt, luculenter arguere, præsto fuisse acidum coagulans.

## §. IX.

*In rubra  
serum ac-  
re-sul-  
phureum.*

In rubra purpura subesse vicissim serum acre salino-sulphureum, testatur pruritus & ardor cutis, in hac longe impensior, ac in alba. Idem ex eo patescit, quod rubrum hoc exanthema, maxime eos invadere soleat, qui sanguinis impuri copiam alunt, scorbuticis, senibus, feminis, quæ menstrui, & viris, qui hæmorrhoidum defectu laborant, diætæ salsa, vinosa, cerevisiis crassioribus & tabaci fumo delectantur, prætereaque laxiori corporis habitu præditi, vi-

tam



tam agunt motus expertem. Quod porro fordes acres serosæ, per cutis poros eliminandæ, ab aura frigidiori, a potu nimis perfrigerato, corpori sudanti ingesto, aut repentino terrore, ad interiora repressæ, frequentissime talem morbum inducant exanthematicum. Quod etiam medicamenta, quæ salium spicula involvunt, item temperantia, rubram purpuram egregie protelent; calefacientia autem & volatilia, nec non æstuosum regimen, eodem modo ac in scabiæ aliisque cutis defœdationibus, ex prava, acri & salsa humorum dilathesi oriundis, doloris, ardoris & pruritus faciant augmentum.

## §. X.

Omnia igitur, quæ succorum & abundantiam & impu- *Causa*  
ritatem ingignunt, ad generationem purpurati mali con- *præcatar-*  
currunt remotius. Evenit autem hoc in iis, qui lauto & *rica &*  
pollucibili victu, nonnisi leves cibos, farinacea, placentas, *subjecta*  
dulcia, fermentescibilia & horraeos fructus admittente, item  
qui potu parco, crasso & aqua quoque impura & squalida  
utuntur; qui in aere degunt insalubri, minus puro, sed vappido,  
multisque sordidis & putridis halitibus referto atque corrupto;  
quo purpuram subinde generari, maligniorem fieri, epidemiam  
quandoque, nonnullis etiam locis magis familiarem, certisque  
anni temporibus, Martio inprimis atque Aprili frequentio-  
rem, experientia docet. Frequens porro purpuræ genesis in iis,  
qui alvum gerunt strictiorem, qui perspirationem incuriosius  
habent; quibus criticæ suppressæ, aut consuetæ sanguinis  
evacuationes omissæ, quibus vicissim largius sanguis effluxit,  
vel subtractus, cum virium defectu, qui animo crebrius  
jactantur, moerori inprimis ac diuturnæ sollicitudini indulgent,  
qui vigiliis & impensioribus meditationibus robur atterunt,  
qui demum vitam ducunt otiosam motusque expertem.  
Neque minus præ aliis huic morbo patent, qui laxiorem  
corporis habitum & temperamentum sic dictum sanguineum,  
vel phlegmaticum obtinent, ætate magis infantibus, quam  
adultis, senibus  
*quam*

quam floridis, sexu, magis feminis, quam viris. Ex feminis, non tam plebejis & minus delicatis, quam potius teneris ac nobilioribus, fluore albo ante affectis & omnium maxime puerperis.

## §. XI.

*Car puer-  
peris infe-  
sta purpu-  
ra alba  
maxime  
& mali-  
gna.*

His autem quod adeo infesta sit purpura, & quidem alba, plerumque maligna, ob peculiare quasdam fit causas. Videlicet feminarum plurimæ redundantius in corpore alunt lymphaticos & aquosos humores, adeoque acidæ potius patent humorum vappescentiæ, quam salino-sulphureæ corruptioni, & ob id purpuram potissimum nanciscuntur albam. In gravidarum dein utero, sanguinis tam progressus, quam regressus, ob nimium eo appulsum & vasorum distensionem, valde languidus est ac tardus. Hinc subsistente ibi diutius sanguine, lymphaticus humor in vasa ipsi vehendo dicata, magna copia secedit. In quorum diverticulis quasi incarcerationis hærens, longiori mora vappescit, corrumpitur & acorem contrahit, avolantibus quæ mixtionem conservant spirituosis & subtilioribus particulis. Quandoque igitur enixo foetu, uterus concidit iterum, neque squalidus lymphaticus humor cum sanguine fœculento lochiali sufficienter expurgatur, accedente ordinario tertio puerperii die, motu febrili, Germanis *das Milch-Fieber* in vasa majora is reprimatur ipsique cordi infunditur, ex quo maligni instar fermenti per corpus diffunditur totamque sanguinis & lymphæ massam inquinans, vires deiecit, vigorem animi pessundat, anxietates, pectoris compressiones, suspiria, cordis tremores cum spiritus difficultate facit, sudores colliquativos mucidos, corruptum acorem redolentes, nonnunquam plane frigidos, suscitatur, somnum arceat, donec vel brevi post, die tertio aut quarto a puerperio, interdum septimo, quandoque etiam decimo quarto demum die, in conspectum prodeat album hoc exanthema.

## §. XII.

Sed quum enumeratæ hactenus purpuræ causæ præstiterint

fuerint jam pridem omnes ; disquirendum merito : cur ante <sup>origo ipi</sup> aliquot demum lustra prodierit & subinde latius serpat ? Jam <sup>hinc re-</sup> vero exiis , quæ succis vitalibus materiam , temperiem & in-<sup>consuetud</sup> temperiem largiuntur , nihil novimus immutatum , præter frequentissimum factum potuum calidorum , herbæ thée inprimis & fabarum coffée , usum . Experientia etiam docuit , non plebejos & inopes , qui victu simplici & potu sueto utuntur , sed honoratiores , opulentos , qui laute vivunt & potum calidum in deliciis habent , purpura potissimum infestari , & in locis ubi mos invaluit liberalius ejusmodi potum sorbilandi , purpuram etiam plus regnare & propagari , alibi non sic . In hunc igitur culpam esse rejiciendam admodum credibile . Non jam dicam , fabas coffée exoticas , peregrini quippiam nostri mixtioni sanguinis minus congruum custodire , sub adu-  
stione aliquid sulphuris empyreumatici nervosis partibus minus amici suscipere , ac præterea saccharum cum decocto hoc assumptum copiosius fermentescere & cruditates mucosas , acidas , augere . Id potius minimum pro certo habendum , calidum potum sordes intestinorum & salia scorbutica acria per urinam evehenda in sanguinem agere & unacum hoc ad cutis emunctorium pellere , ubi non ut sudoris materia promte diffusi possunt , sed obhærescunt maculasque sive pustulas protrudunt ; inprimis quum post ejusmodi calidum potum perspiratio non secundatur , sed concessione in frigidam auram sufflaminatur . Vt adeo neutiquam mirandum sit , quod sub incon-  
sueto alias , jam vero communi abusu frequentissime & statim post cibum assumpti potus calidi , ipsa naturalis mixtio & crasis partium sanguinem constituentium multum immutetur & nova plane ac alia ingignatur , qua in utero cum sanguine materno in foetum transfusa , ipsius purpurati morbi semina & ad illum dispositio jam latius propagentur ; uti quidem pluribus docui in dissertatione *de purpura genuina origine , indole & curatione* .

§. XIII.

*Purpura*

Ceterum purpuram albam periculosiorem esse rubra jam <sup>quando pe-</sup>  
(IV.) Dd dixi-<sup>riculosa</sup>



diximus. Prognosis vero de successu & eventu hujus morbi ex dispositione corporis laborantis potissimum desumenda. Aegrius quippe sanescit magisque anceps est omnis purpura, quæ cadit in corpus impuris succis fartum. Hinc viri quibus hæmorrhoides & feminae quibus menses restitant, parcius fluunt, aut plane ob ætatis rationem emanent, nec non quibus lochia suppressa, gravius semper & diutius hoc morbo decumbunt. Hinc gravidæ, quæ alvi adstrictioris & sub sedentario vitæ genere, neque medio gestationis tempore, neque ultimis mensibus sanguinem redundantem mittunt, in puerperio majorem purpuræ experiuntur vehementiam. Dein majus etiam semper discrimen in imbecillitate, siue natura, siue ex morbo, siue alia ex causa affectis, omnium vero maxime in iis, qui per crebriores animi commotiones, diuturnam inprimis moestitiam, genus nervorum reddiderunt debile & ad spasticos anomalos motus concipiendos proclive. Neque minus plus metuenda, quæ sub aëris constitutione insalubri, febres malignas, petechiales passim ingignente, impetit.

## §. XIV.

*Signa suspecta.*

Inter suspecta vero in purpura signa connumeranda hæc. Quando exanthematibus sufficienter expulsis, pulsus præter naturam durus & auctus manet, somnus nullus, inquietudo magna & spiritus difficilis. Quando statim sub initium & per totum morbi decursum sudores effusius manant, urina pallidæ copiosæ redduntur, vel continuus ad mingendum stimulus; vel etiam urina crassa antea & tincta, subito limpida, tenuis & pallida prodit, nec non quando alvus cum torminibus fluxa nimis, inprimis in puerperis. Mali præsagii est, si pustulæ purpuraceæ modo comparent, modo evanescunt & symptomata vehementia semper infestant eadem. Pejus adhuc, si materia relapsa interioribus firmitus inhærescit omnique expulsionem obsistit, hincque pectoris cum suspiriis oppressio intenditur, fauces stringuntur, virium prostratio increfcit & præcordiorum anxietas cum inquietudine augetur.

*& funesta.*

Funesta demum indicia, quum hærente intus deleteria materia,

ria, interiora ardent & extrema frigent ac rigent simulque copioso frigido sudore perfunduntur; aut vicissim quando extrema æstuant & in abdomine frigoris sensus percipitur notabilis. Hæc enim ubi præsto sunt, æger ut plurimum lipothymia occumbit lethali, ob inflammationem & sphacelationem, quæ ventriculum, intestina, cerebrum, vel in puerperis ipsum uterum, affecit.

PRAESERVATIO ET CURATIO.

§. I.

Nullus quidem morbus tam ægre penitus extirpatur ac purpura, quæ plerumque relinquit fermentum ipsam denuo inducens. Sed hoc inprimis proprium chronicæ illi purpuræ, quæ quo pacto sitarcenda, inferius dicetur. Iam de febre miliari. Quæ quum potissimum feminis, & quidem puerperis, sit solennis, qua ratione hæ ab ipsius incurfu defendendæ, tradendum. Sub graviditate igitur exacta victus ratio servanda, corpus motu moderate exercendum, venter a refrigeratione defendendus, sanguinis copia venæsectione, ter, vel quater, in superioribus instituta, minuenda & alvina excretio subinde secundanda per mannata, rhabarbarina & tartarea. Instante dein partu, non per præmaturum nisum vires convellendæ, nec pellentibus humores exagitandi, post partum vero necessarium, quo impurus sanguis expurgetur utero & succi a cacoehymia contracta liberentur. Sedato hinc secundo die impetu, omnis generis excretiones modeste promovendæ & alternis diebus pilulæ balsamicæ roborantes, vel solæ, vel si citatior adhuc pulsus, cum pulvere temperante nitroso, deglutiendæ. Tum quoque conducit cum jusculis tenuioribus dare ea, quæ spasmos leniunt, sanguinem grumosum dissolvunt simulque perspirationem servant, sperma scilicet ceti, oleum amygdalarum dulcium, infusum theiforme ex floribus sambuci, chamomilla & summitatibus millefolii, pulveres diaphoreticos, nec non mixturam ex aquis

*Methodus  
præser-  
vandi pu-  
erperas.*

analepticis & diapnoicis, cum aceto destillato, lapidibus can-  
crorum & sirupo acetositis citri.

## §. II.

Curatio-  
nis indi-  
cationes.

Ipsa vero purpuræ curatio ad tria hæc redit momenta: I. ut vitiosa quæ subest acris, nervosis partibus infesta materia corrigatur ac temperetur; II. ut spastica fibrarum nervearum inde productæ stricturæ laxentur; & III. præparata materia placide per cutis emunctorium evacuetur, nec retrocedat. Ego quidem has medendi indicationes perfecti hisce ex multis probatissimis auxiliis. Ad acredinem diluendam & nervosas male affectas partes mulcendas, apprime utilia decocta humectantia, ex rasura cornu cervi, radice scorzonæ cum hordeo & liquiritia, gelatina cornu cervi, nec non serum lactis, nostra methodo paratum dulce. Idem faciunt & præterea expulsionem juvant emulsiones, ex aquis diapnoicis & antispasmodicis, cum semine napi, cardui Mariæ & papaveris albi. Inprimis etiam duplici hoc nomine conducunt pulveres temperati bezoardici, cujus generis est *Ludovici* atque *Senner-  
ti*, nec non noster. Quibus ad æstum temperandum & spasmos componendos subinde succum citri instillare, pulverem præcipitantem nitrosum, vel tantillum croci, aut castorei, pro circumstantiarum ratione admiscere, vel etiam horum usum interdum liquoris anodynus mineralis dosi interpolare, sicque in vehiculo appropriato ex aquis destillatis propinare soleo. Et si purpuræ eruptio justo impeditior, vel retrocessio metuen-  
da, aut jam facta, instar omnium est idem anodynus liquor, remixtus cum tertia parte spiritus bezoardici, ad mentem *Bussi* parati & a me in *observationibus physico-chymicis Lib. II. obs. XXIX. pag. 238.* descripti.

CAVTELAÆ ET OBSERVATIONES  
CLINICAE.

## §. I.

Purpura, morbus omnium delicatissimus, nihil plane fert  
excessi.



excessivum, in regimine æque ac medicatione. In regimine *Tensa in*  
quidem æger semper in moderato & æquali calore, tam lecti, *regimine.*  
quam hypocausti, detineatur, eo quod nimis æstuosum vires  
frangit ac pruritum ardoremque cum anxietatibus auget, fri-  
gidius exanthematum eruptionem impedit, subsequente lan-  
guore & angore; & inæquale expulsiorem retardat, vel mi-  
nimum instabilem facit purpuram. Vitetur etiam stragulo-  
rum & indusiorum quantum fieri potest mutatio, ac potius  
jam trita, sicca & fumigata injiciantur.

§. II.

Quam graviter dein calida & alexipharmaca medica- *Calida &*  
menta noceant, docuit sane uberius experientia, qua con- *alexi-*  
stat, eadem cum æstuoso regimine, in causa esse, quod ingru- *pharmaca*  
ente primum novo hoc morbo, omnes fere perierint, quum *nocent.*  
jam sub temperata methodo plurimè evadant. Quin libera-  
lior tantum infusorum & decoctorum calidorum potus, sudo-  
rem nimium movendo & serum plus justo exhauriendo, offi-  
cit. Vbi vero metus est retrocessionis, vel hæc jam facta,  
tum potus calidus præsentis efficaciam & moderata quoque ex-  
pellentia inveniunt locum utique.

§. III.

Vicissim refrigerantia & intestinum motum nimis sedantia *Item re-*  
intus detinent materiam, & anxietates ob id ac languores cum *frigeran-*  
periculo intendunt. Ipsum nitrum circumspice ulurpandum. *tia.*  
In alba enim purpura & ubi malignitatis indicia, refrigera-  
tiones externæ cum æstu subinde intercurrente, præsto sunt,  
ab eo plane abstinendum. In rubra vero purpura, sive al-  
ba cum rubra conjuncta, ubi internus adest æstus, cum siti  
& pulsuum magnitudine, medicamenta diaphoretica leniter  
nitrata omnino accommoda.

§. IV.

Cerevisiæ etiam potum nullus minus fert morbus quam *Nec non*  
purpura, eo quod multas impuras, crassas & heterogeneas *cerevisiæ*  
partes in sanguinem & lympham invehit. Hinc ego quidem *potum.*

semper purpura laborantibus auctor sum, ut ab omni cerevisiarum genere abstineant & bibant decoctum ex radice scorzonerae, farsaparillae & cichorii, cum rasura cornu cervi, hordeo mundo & pauxillo seminis foeniculi, vel anisi stellati.

## §. V.

*Alvus aperienda  
caute.*

Alvus in purpura nec nimis laxa, nec nimis stricta esse debet. Si enim diutius retinetur, morbus inde nanciscitur pa-bulum & longius extrahitur; si vero purgantibus, quin laxantibus omni virulentia destitutis, intempestive ducitur, materia per poros eliminanda revocatur & praecordiorum angustias, tormina & ardores in ventre, nauseam & stomachi subversionem inducit. Hinc in purpura tam idiopathica, quam quae aliis exanthematicis accedit, tanto magis maligna, alvum nec paullo ante, nec paullo post eruptionem irritare licet, sed quando vis morbi deferbuit & purpura siccescere incipit. Neque tum vix aliud expedit remedium, quam clyster emolliens, injiciendus sub symptomatum remissione, quae plerumque matutino tempore major, quam vespertino & nocturno.

## §. VI.

*Venasectio cum  
distinctione ad-  
mittenda*

Sanguinis missio maxima cum prudentia instituenda. Nam in purpura alba & maligna, quam summa virium prostratio, cum largis sudoribus & debilitate ac frequentia pulsus, arguit, admittenda est plane non. Contra ea insigniter prodest, quin necessaria est in puerperis, quando lochii retentis, symptomata purpuram comitantia ejus incursum nunciant; cito tamen administranda. Sic enim saepius observavi, summas praecordiorum anxietates, animi defectiones, laboriosam & anxiam spirationem feliciter fuisse sublata & mox summo cum levamine in universo corpore purpuram proripuisse; id quod pluribus docui & adstruxi in dissertatione de venesectionis prudenti administratione pag. 18. sqq.

## §. VII.

*Virium  
ratio habenda.*

Quum porro vires plerumque hoc in morbo admodum sint prostratae & ad lipothymias propensio, summo omnino caven-

cavendum est studio, ne æger ex lecto surgat, aut diutius erectus sedeat, quia facile sic obrepit animi defectio, & motu humorum ad interiora converso, exanthemata cum discrimine disparent. Subinde potius vires refocillandæ per mixturas analepticas, ex aqua melissæ citratæ, vel Turcicæ, liliorum convallium, cerasorum nigrorum, florum acaciæ, rubi idæi, cum spiritu nitri dulci, matre perlarum & sirupo acetositis citri. Quibus pro circumstantiarum ratione lenia diaphoretica, uti cornu cervi philosophice præparatum & antimonium diaphoreticum; vel etiam si sudores colliquativi effusius manant, succus citri & species de hyacintho, cum fructu adjici possunt.

§. VIII.

Vesicatoriorum utilitatem in purpura jam dilaudavit *Ha-* *Vesicantis*  
*milton de febre miliari* eademque scapulis apponere suadet. *condu-*  
Recte omnino. Subtrahunt enim humorem serosum impu- *cunt.*  
rum & fibras delassatas nerveas ad contractionem exstimulant, ut materiam morbificam promte excutiant. Hinc sub tarda eruptione & motu humorum ad interiora ipsumque caput converso, sæpius cum fructu præcepi, ut suris apponeretur vesicatorium, cujusmodi concinnare soleo ex emplastro de meliloto, pulvere cantharidum, cum pauxillo balsami Peruviani.

*ENARRATIONES MORBORVM.*

OBSERVATIO. I.

Feminam novi viginti aliquot annorum, vegetam & a- *Febbris*  
lacrem, sanguineo-cholicam, quæ virgo levi ex causa hy- *purpura-*  
sterica experta fuerat pathemata, sub axillis quoque & pedi- *ta in pu-*  
bus largiter sudarat, bene ceterum appetens & corpus dome- *erpera su-*  
stica negotia obeundo probe exercens. Hæc utero gerens *nesta.*  
ex hilari præter morem fiebat tristis, sudores sueti successe-  
bant, a medio gestationis tempore perpetuo largus lactis in  
mammis erat proventus & quinto mense circa hypochondria  
exquisitus oboriebatur dolor ardens, quasi ex prunis candentibus.  
Post partum admodum laboriosum ingenti horrore  
febrili corripiebatur per totum corpus, quem excipiebat capitis dolor & inquietudo. Quinto die lochia sistebantur &  
accede-



accedebant præcordiorum anxietates, cum horripilatione febrili, intercurrente æstu, ardore in ventre & tandem deliriis. Datis diaphoreticis sub temperate calido regimine, in cordis scrobiculo collo & dorso, nec non brachiis, purpura & rubra & alba efflorescebat quidem; sed quum gravi commoveretur iracundia, cutis iterum fiebat arida & sicca, delirium in furorem plane transibat, lac post partum etiam copiosissimum, retinebatur, in ventre oboriebantur borborygmi, spiritus intercludebatur ac demum decebat.

*Epicrisis.*

I. Adduxit utique hunc morbum sanguinis & feri impuri abundantia, ob vitæ genus ex mobili in sedentarium mutatum, sudores suetos suppressos & venæsectionem sub graviditate plane omissam, contracta. Nunquam etiam boni ominis in gravidis, si de ardore & æstu in interioribus abdominis conqueruntur. Signum enim præbet, hisce in partibus congestionis atque infarctus, qui successive ipsum sanguinem magis corrumpit, a quo natura post partum febrili motu se liberare intendit.

II. Nihil certe in morbis acutis deterius gravi animi affectu, inprimis iracundia vehementi. Si enim in sanis corporibus magna horum affectuum nocendi facultas, quidni in ægrotis? Hæc quidem inde sanguinis & humorum motus ad caput conversus, phrenitidem cum morte attulit.

OBSERVATIO. II.

Post purpuram a-nimi tur-batio, Ca-rolinis facta.

Tenera, sensibilis & ad iram proclivis femina, triginta annorum, sterile per decem annos duxerat matrimonium, sanima tamen & vegeta. Quum vero maritus inopinata morte extingueretur tempore menstrui, fluxus substitit hic & misera tota luctui sese dedit, inquieta fuit, nec dormivit, nec appetiit. Paulo post horripilationem cum æstu persensit, nec non tremulam manuum & colli agitationem cum cynico spasmodico, anxietatibus subinde affecta & lypothymiis. Datis antispasmodicis & antihystericis, conquieverunt tantisper hæc symptomata, subinde tamen, licet initius, repetentia, donec die tandem tertio, cum horripilationis & tractionis in cute sensu,

sensu, in collo, dorso & universo corpore purpura rubra cum alba prodiret, alvo per aliquot dies ante & sub eruptione clausa. Interim spastica priora symptomata remiserunt, somnus vero non rediit, prætereaque perpetuus ad urinam fuit stimulus, quæ tamen parce stillavit. Sed quum inopinato percelleretur terrore, disparuerunt illico exanthemata omnia, sequuta ingens præcordiorum anxietas, redierunt pathemata hysterica spastico convulsiva ac mentem plane turbare visa sunt. Hinc sanguis e vena missus floridus & datus postea liquor anodynus mineralis cum spiritu bezoardico, ternis singulis horis ex infuso theiformi. Inde tertio die post comparuit iterum purpura, stationem tamen non servavit, sed post corporis refrigerationem & injectum clysterem denuo maxima ex parte recessit. Successit hoc facto mentis confusio, ut sine causa subinde vel in cachinnos, vel in lacrymas ægra solveretur multaue absurda loqueretur. Corpore autem melius habuit, cibos sumsit, somno non penitus caruit, & sensim eo pervenit, ut domestica iterum obire potuerit negotia. Elapso inter hæc semestri spatio, meo ex consilio usa est Carolinis thermis, quibus purpura per omnem corporis ambitum expulsa, qua post septimum diem squamarum instar secedente, mens restituta, corpus & vires ex voto per DEI gratiam confirmata.

*Epicrisis.*

Purpuram in sanguineo corpore ex sanguine menstruo repente suppresso generari posse, ex hac historia patet utique. Excrementitia autem purpuræ materia, intus retenta, nervosis quam maxime infesta est partibus, easdemque spasmis & convulsivis plane motibus afficit. Quin diutius delitescens in interioribus, ipsam mentem turbare potest, hanc procul dubio ob causam, quia nervosis cerebri membranis firmius insidet easdemque exagitat. Carolinarum igitur præstans maxime est virtus ad depurandos corporis succos, recrementitiam materiam solidis & fluidis partibus intime insinuatam separandam & per cutis poros expellendam.

(IV.)

Ec

OBSER-

*Purpura  
alba idio-  
pathica  
sanata.*

## OBSERVATIO. III.

Sanguineus ac robustus juvenis corripiebatur horrore, frigore, æstu postea & ingenti præcordiorum anxietate. Scabatur secundo statim die vena, quarto & quinto totum corpus occupabat purpura alba confertim. Æger in conclavi calido detentus, de molesta gravitate & tractione in sinistro latere conquerebatur, ad mingendum quidem stimulabatur, sed paucam reddebat cum stranguria urinam, alvo simul per sex dies clausa. Dabatur ipsi loco potus decoctum ex avena, radice scorzonerae, cum semine papaveris albi & cornu cerviusto, ac præterea quater quotidie dosis hujus pulveris: Recipe cornu cervi sine igne parati, oculorum cancri, antimonii diaphoretici ana drachmas duas, cinnabaris antimonii drachmam cum dimidia. M. Inde melius habuit, urinam etiam facilius misit & exanthemata uberius prodierunt in universo corpore. Nono die vesperi nares sanguinem stillarunt & alvus sponte soluta. Nihilominus per totum morbum somno fere caruit, hinc data hæc potio: recipe aquæ florum sambuci, acaciæ ana uncias duas, antimonii diaphoretici, oculorum cancri, ana drachmam dimidiam, sirupi papaveris albi drachmas duas, mixturæ simplicis drachmam. M. Qua, continuato simul pulverum bezoardicorum usu, undecimo die ex toto convaluit.

*Epicrisis.*

Purpura alba admodum quidem periculosa, si aliis acutis & exanthematicis morbis accedit, si vero idiopathica cum febre recte prodit & ordinatum servat typum, non adeo est pertimescenda, modo recte temperato regimine & temperatis diaphoreticis excipiat. Hæc quidem sanguinis copia multum fecit ad generationem morbi, ideoque venæ sectio mature administrata commodam locavit operam, quæ in cachymicis & symptomatica purpura, plus ut plurimum damni, quam emolumenti affert.



## OBSERVATIO. IV.

Tertio post partum laboriosum die, femina succulenta <sup>Purpura</sup> sanguineo-cholerica, viginti & aliquot annorum, conquesta <sup>post alvi</sup> est de capitis, dorsi & totius corticis corporis dolore, <sup>als vvenn laxatio-</sup> *ibr die Haut sehr vveh thate*, nec non de spastico stupefactivo <sup>nem feli-</sup> in manibus sensu & scintillis igneis oculis obversantibus. <sup>Ac-</sup> *citer solu-* cefferunt dein anxietates præcordiorum, agrypnia, ardor <sup>ta.</sup> febrilis, virium prostratio, sitis, oculorum rubor & squalor. Datis lenioribus diaphoreticis cum regimine temperate calido, die quarto erupit purpura, quinto & sexto die omnem corporis ambitum occupans, interpersa in pectore, manibus & abdomine rubræ alba. A sexto die alvus fuit adstricta & lochiorum fluxus substitit ad nonum usque. Hinc ad alvum solvendam & lochia revocanda data dosis pilularum Becherianarum, quæ lenem fecit laxationem, & data altera dosi, lochiorum fluxus rediit cum magno foetore, sequuti sudores largissimi, acidi & foetentes ad diem usque undecimum, urina quoque secessit graveolens. His excretionibus solutus morbus, vires successive redierunt cum somno & ægra sanitatem recepit.

*Epicrisis.*

Omissa sub graviditate sanguinis missio in sanguineo hoc corpore seri & sanguinis impuri genuit copiam, ex qua purpura. Quia vero a lochiorum itemque alvi suppressione succorum impuritas aucta, optimo utique consilio, pilulæ Becherianæ oblatae, quippe quæ primo statim die in puerperio datæ materiam & causam febris ac purpuræ tempestive præscindere solent. Ut adeo pateat: temperata laxantia in purpura non penitus esse reformidanda.

## OBSERVATIO. V.

Femina tres supra triginta annos nata filiolum edidit <sup>Post ery-</sup> num ac vegetum & ipsa quoque per tres hebdomades optime <sup>sipelas</sup> habuit. Post iracundiam vero & terrorem dextram mam- <sup>purpura</sup> mam, sub alvo a triduo adstricta, occupavit erysipelas, quod <sup>ex prima-</sup> tamen pulvere <sup>rum via-</sup> ex farina fabarum, cerussa & floribus chamo- <sup>rum for-</sup> millæ ditie,

millæ confecto discuffum. Tercio die ingens accessit horror ac frigus, subfequente acri æstu per totam noctem durante, alvus dura fuit ac tenfa, fomnus parvus & nullus. Durarunt hæc per tres dies; quarto autem erupit purpura, quæ postquam per triduum molesto ardore & dolore pungitivo summam cutem divexasset, decidit, æstus cum pulsus celeritate viriumque dejectione remisit & ægra tandem & morbum & puerperium feliciter superavit. Nihil autem aliud usurpatum, quam leniora & fixiora diaphoretica cum humectantibus, clysteres emollientes ex decocto cremoris avenæ cum chamomilla vulgari, addito oleo amygdalarum dulcium & fale communi, & remittente morbo ac febre, subjunctus usus pilularum nostrarum balsamicarum,

*Epicrisis.*

Puerperæ hanc etiam ob causam tam frequenter in exanthematicas, erysipelaceas & purpuratas febres incidunt, quia primas vias a sordibus graviditatis tempore contractis non convenienti pharmaco expurgarunt. Quando enim prima regio corrupta ac impura materia repleta, vel levis animi affectus, ut ira, terror, vel improvida corporis refrigeratio, illam commovendo & sanguini invehendo, febrem suscitât exanthematicam. In nostra erysipelas primum productum, eodemque repulso, de novo febris accensa, subfequente exanthemate purpureo.

OBSERVATIO. VI.

*Puerpera  
purpura-  
ta venæ-  
sectione  
servata.*

Femina triginta aliquot annorum, foecunda jam plurimum liberorum mater, semper fere in puerperio laborarat purpura, feliciter tamen eandem superarat. Quum vero septima vice expectatione citius partus ei, omiffa ultima venæsectione, obtigisset, die quinto post experta est horrorem cum subfequente æstu, lochia parcius iusto fluentia substituerunt plane, anxietates ipsam infestarunt, fomnus defuit, caput doluit & universum corpus languit. Data quidem temperata diaphoretica cum temperantibus & die quarto post sparsim efflruit, inprimis in cordis scrobiculo, purpuraceum exanthe-

ma.

ma. Symptomata autem discedere noluerunt, sed potius spasmi in artubus & abdomine accesserunt, purpura disparuit iterum, anxietates fuerunt summæ, ægra corpus jactitavit, delirare coepit & animo subinde linqui, ut omnia jam conclamata esse viderentur. Hinc vena incisa in brachio & quatuor circiter sanguinis uncia subtracta. Quo facto, protinus præcordiorum angor remisit, animi defectio cessavit, ægra ad se rediit, corpus totum calore & madore perfusum ac paullo post erupit copiosissima purpura, quæ debito regimine & congrua medicatione ex voto perfanata.

*Epicrisis.*

Fundatum quidem in experientia est, non tentandam esse sanguinis missionem, ubi purpuræ eruptio instat, aut modo facta; dantur tamen casus, ubi summopere necessarium, ut hoc etiam tempore sanguis mittatur. Nonnunquam enim, lochiis resistentibus, aut parcius justo fluentibus, sanguis redundans, ob spasmos in abdomine, cum impetu urgetur & congeritur ad cor ac cerebrum, ibique atrocia & lethifera suscitatur symptomata, quæ perperam vulgo retrocessionis materiæ exanthematicæ tribuuntur. Hinc si per venæsectionem sanguis superfluus subtrahitur, cessant illico pathemata & liberior ac æquabili factio circuitu, eruptio expedite succedit summo cum levamine.

OBSERVATIO. VII.

Purpurata febris, novus & incognitus Veteribus morbus, post quam circa annum Æ. C. MD LII. Lipsiæ primum coepit, successive adeo vires sumit & longe lateque processit, ut in plurimis, Germaniæ minimum locis, jam notus sit atque solennis. Quo vero penetravit, haud exiguum primum edidit stragem multumque negotii facessivit Medicis, priusquam ipsa edocuerentur experientia, cujus esset indolis, quæ ferret, quæ non, in medicatione æque ac regimine. Hinc sapiustam in, quam extra Germaniam, Medici meum exquisiverunt iudicium atque consilium, qualis sit incognitus hic morbus & quo pacto eadem feliciter occurrendum? Quum igitur adhuc latius quo-



tidie serpat, non infructuosum erit, heic inferere ea, quæ quum anno MDCCXXII. Francofurti ad Moenum primum compareret, ad mea Medicis perscripta, unacum iis, quæ respondendi. Ita autem habebat missa mihi relatio historica: *In-festavit ab aliquo tempore puerperis nostra hac in urbe novus quidam morbus, hunc potissimum in modum incedens atque decurrens. Partum enixa, secundo vel tertio puerperii die corripuntur horrore cum subsequente calore, conqueruntur de summa pettoris oppresione & crebrioribus suspiriis, lochii ut plurimum resistantibus. Interjectis aliquot diebus, erumpunt pustulae miliares, inprimis circa cordis regionem conspicua, excipiunt deliria & nervorum subsultus, & plurima ex agris occumbunt, alia circa quintum, plures nono morbi die. Licet autem morbo huic omnibus viribus sit occursum, efficacissimis alexipharmacis, imperata quiete, regimine calido, vesicatoriorum applicatione & cucurbitulis ficcis; irrita tamen fuerunt omnia & tritum obtinuit adagium: interdum docta plus valet arte malum. Hinc quaritur: qualis sit hic morbus; & qua methodo quibusque medicamentis sit expugnandus?*

#### JUDICIUM CVM CONSILIO.

Per scriptam morbi ignoti historiam curate & perlegi & expendi. Est autem is febris maligna miliaris, quæ nostris in oris, inprimis Misniæ tractu, a plurimis annis admodum frequens & puerperis sæpius funesta fuit. Ante sexaginta circiter annos nostris pariter incognitus fuit hic morbus, primum Lipsiæ observatus, ideoque <sup>νατ εφορν</sup> febris purpuratæ Lipsiensis nomen obtinuit. Jam longius processit ac vires sumsit, ut non modo puerperæ, sed & viri, inprimis tamen feminæ, eodem crebrius decumbant, modo acute & brevius, modo longius, per tres, quin sex quandoque menses. Hinc in chronicam & acutam purpuram dispescitur. Illa quidem admodum molesta, sed non periculosa, nec febre stipata; hæc autem semper febrem habet comitem, nec periculo caret. Periculum tamen in hac eo majus est, quo magis corpus quod

quod corripit ex prægressa tempestatum diuturna insalubri constitutione, pravo victu & vivendi genere, nec non aliis causis vel debile est, vel impuris succis repletum. Et chronica illa etiam vehementius & diutius insistit, pro corporis in quod cadit dispositione. Dein purpura, vel rubra est, vel alba. Illa non tam malignæ & deleteriæ indolis quam hæc, quæ, si, ut sæpius evenit, aliis acutis exanthematicis febribus in fine accedit, mortem ut plurimum infert.

Causa hujus tam fontici morbi maxima ex parte corruptæ, vappescenti & corrosivæ lymphæ tribuenda videtur. Quando enim lymphæ in diverticulis & tubulis glandulosis stagnat & diutius subsistit, corrumpitur & acrem corrosivam indolem induit. Quæ postmodum succis & sanguini insinuata & cum hoc ad partes nervosas delata, truculenta illam purpura obviâ pathemata inducit, anxietates præcordiorum, cardialgias, angores, inquietudines, dolores, & tractiones in artubus languores, respirationem difficilem, oppressiones pectoris, horrores, lipothymias, pruritus aliaque. Omnia tamen hæc remittunt symptomata, si beneficio naturæ materia acris ad corporis superficiem propellitur. Singulare autem habet hoc exanthema illud, quod admodum sit variabile, mox compareat, mox evanescat, & hinc symptomata jam leniora, jam graviora inferat.

Chronicam purpuram observavi sæpius in feminis, quæ antea fluorem album expertæ, hunc subito siccarunt, disparente iterum, hoc repetente, purpura. Dein notavi, feminas, quibus post quinquagesimum annum menses emanferunt, purpuram crebrius incurrisse. Frequens quoque idem hic morbus omnibus, qui vitam colunt sedentariam, animi affectibus, ira præsertim ac terrore jactantur, lacticiniis, dulcibus & placentis delectantur, nec legitimum experiuntur alvi beneficium. In acutis febribus, variolis & morbillis si alvus justo diutius adstricta, vel diarrhæa contingens subito sistitur; purpura subsequi solet, ob retentas acres, salsas, sulphureas sordes. Maxime omnium vero frequens & anceps est hic mor-

morbus in puerperis, eo quod sub graviditate, ob retentos menses, sanguis nimius fit & impurus, tanto certius, si accedit inordinatum vitæ genus, vita sedentaria, animi angor & somnus nimius. Impetere solet purpura vel cum, vel paulo post febrem lacteam, quæ subsistentem passim corruptam lympham e latibulis excutit & in sanguinem agit. Quod autem purpura jam frequentior sit, quam antea, id perverso potissimum abusu potuum calidorum, inprimis decocti Coffeæ, tribuendum. Quamvis enim potus hic, si alvum simul laxat, non facile nocet; certum tamen, quod, si liberalius sub alvo clausa ingurgitatur, multas recrementitias ex intestinis in sanguinem pellat sordes, & sudori movendo aptus sit, cujus tamen successus post eundem incuriosius habetur, ut succi hinc non possint non fordescere.

Ad arcendum porro hunc morbum nonnulla ante, nonnulla post partum sunt tenenda. Sub graviditate sanguis quantum fieri potest ab impuritate vindicandus. Hunc in finem in sanguineis, quæ bene comedunt & minus corpus exercent, bis vel ter, quarto; sexto & in medio noni mensis, vena percutienda. Alvus semper in officio retinenda, cujus si obliviscitur, admonenda alimentis, vel pilularum balsamicarum, Becherianarum, Stahlianarum, aut nostrarum usu, nec non potione ex manna cum rhabarbaro & cremore tartari. Perspirationis quoque saluberrimæ successus secundandus per corporis motum, diluentia, juscula, potum tenuem, vitando dulcia, acida, fructus horæos & omnia quæ spissum & viscidum sanguinem ingignunt. Ventriculus, præsertim in cœna, non nimia ciborum copia onerandus, somnus longior arcendus & animus in tranquillitate servandus. Ex medicamentis pro sunt quæ ebullitionem sanguinis componunt leniterque cuticularem excretionem promovent, diaphoretica nempe fixa cum temperantibus & nitro. Post partum e re est, ut sedata sanguinis exæstuatione & pulsus vehementia, secundo post die, dosis pilularum supra dictarum assumatur, quæ non modo in-

testi-



testina, sed & uterum expurgant simulque lochialem fluxum promovent, eaque propter altero iterum die easdem deglutire expedit, inprimis si lochiorum fluxus tardus nimis, vel insufficiens. Tertio demum die, si febris lactea ingruit, necessarium est, quo bis quotidie dimidia drachma pulveris mei bezoardici, cum præcipitante remixti, sumatur.

Quando autem purpura adest, in curatione rite adoranda, ante omnia in lochia inquirendum, an recte & sufficienter secesserint? Quod si hoc non factum, post pediluvium, vena in pede secanda. Tum vitandus omnis calor, tam in regimine, quam medicatione; vitanda vero etiam refrigeratio & refrigerantia remedia, ipsoque nitro caute utendum, ac non nisi ubi sanguis æstuat & pulsus celer. Alvus quoque nec nimis sit adstricta, nec intempestive, vel acrioribus irritetur. Inter medicamenta nulla magis proficua deprehendi, quam pulverem meum bezoardicum, præcipitantem & liquorem anodynum mineralem, unacum pulvere castorino cinnabario. Si pectus cum angore opprimitur, soleo liquorem anodynum, tribus partibus, cum una parte spiritus bezoardici Busii & dimidia parte essentiae castorei miscere, & alternatim propinare hunc pulverem: recipe pulveris Marchionis drachmam, cinnabaris nativæ præparatæ scrupulum, pulveris castorei grana X. M. f. pulvis, dividatur in doses IV. Loco potus ordinarii præbere suadeo decoctum ex rasura cornu cervi, radicis scorzonæ, farsaparillæ, ana uncis binis, decoctis in quatuor aquæ mensuris. Infusum theæ autem liberalius bibere non conducibile, sed sufficit aliquot tantum patellas interdum sorbillare. Quod si demum alvus nimis sicca, enemate domestico, ex floribus ahamomillæ, sale communi & nitro cum decocto avenaceo, subducenda.

Atque hæc sunt medicamenta & hæc est methodus, quibus ego per DEi gratiam multos purpura decumbentes feliciter sanavi. Quæ rogatus cándide sic exponere volui, debui Halæ d. X. Decembr. Anni MDCCXXII.

## CAPVT. X.

## DE

FEBRIBVS EPIDEMICIS EXANTHEMATICIS CATARRHALIBVS  
SIVE PETECHIZANTIBVS.

## THESES PATHOLOGICAE.

## §. I.

*Descriptio-  
morbi.*

**F**Ebres hæc sunt lenes continuæ, cum virium prostratione, vigilia, inappetentia & quandoque cum eruptione macularum in summa cute junctæ, ortæ a feri excrementitii copia & intestina dissolutione, non sine contagio & vitæ periculo.

## §. II.

*Insultus  
& decursus.*

Ab initio statim iminutatur faciei aspectus in morbidum, & agrotanti tribus vel quatuor antequam lecto affiguntur diebus, conqueri solent, de spontanea lassitudine, gravativo corporis & artuum dolore, quasi ossa contusa essent & fracta, de virium languore, inappetentia, levi animi defectione, nausea cardialgica *vbelseyn*, capitis dolore & somno inquieto, alvo simul adstricta. Accedit postea vesperi horripilatio & frigus, sequitur æstus, increscunt symptomata, major virium fit jactura, ut vix imbecilles & teneri erecti manere queant, capitis dolor cum vertigine & inquietudine ingravescit, in quibusdam dorsum, vel etiam latera exquisite dolent, præcordia anguntur, interna ardent, fauces arent, pulsus contractus, celer ac debilis est, urina pallida sine sedimento, & spiritus difficillime trahitur. Tum prodeunt in nonnullis quarto, vel circa septimum diem, in dorso potissimum, petiore & brachiis, cum, vel sine levamine, maculæ, in aliis copiosiores, in aliis pauciores, coloris varii, vel, ut in plerisque, purpurei, vel lividi fusci, vel pallidioris rosei, modo

latio-

latiores, modo minores, in plurimis instar morfus pulicum, a quibus tamen dignoscuntur, dum compressæ non relinquunt vestigium in medio rubicundum. Ob quam macularum diversitatem, febres hæc variâ sortiuntur nomina, ut vel purpuratæ, vel punctulares, vel petechiales spuria, audiant. Sub hoc morbi statu, sive vigore, acerbiora sunt omnia, inquietudo maxima, corporis jacatio ejusque decubitus insuetus, mens turbata, sermo delirus, somnus nullus, sudor frigidiusculus, angustia spirandi intensior & pulsus contractus, inæqualis, celer & frequens.

### §. III.

His si accedunt tendinum subsultus, sitis defectus, borygmi in ventre, singultus, faucium ab aphtis inflammatio, convulsiones, aut syncope, cum extremorum refrigeratione & sudore largissimo, certa sunt mortis indicia. Quando autem circa dies criticos, vel in ipsis, septimo, undecimo, vel decimo quarto, liberalius prodit tepidus sudor, per aliquot sæpe dies, licet cum virium languore manans, vel etiam alvus per aliquot dies fluit, salutis est indicium, tanto certius, quando postea pulsus mutatur, antea contractus, increbescit, durus mollescit, celeritatem tantisper ponit magisque æqualis fit, quando animus fit erectior, situs & decubitus corporis quietior, auditus difficilis, urina turbida & sedimentum ponens, quod quidem circa dies criticos certum fere fausti eventus indicium. Hoc quippe facto, successive postea somnus, appetentia & vires redeunt, quod tamen non facile ante diem accidit decimum quartum.

### §. IV.

Veteribus hæc febres quotidianæ continuæ serosæ, vel etiam recentioribus catarrhales malignæ vocari solent, quia leniter procedunt ab initio & coryza, gravedo pectoris, infarctus, tussis sæpe primis diebus junguntur & vesperi per noctem exacerbationes fiunt. Formalis autem earum ratio consistit maxime in par-



zium sanguinis, vel potius feri dissolutione, mediante motu febrili, cuius beneficio impuræ, corruptæ, heterogeneæ partes, si robur adhuc inest naturæ, nec adeo corrupta solidorum & fluidorum dispositio, evolvuntur, earumque subtilior serosa pars per largum sudorem, crassior & mucida per nares, fauces & bronchia, biliosa mucida per alvi secessum, & putrida salino-sulphurea, sub forma macularum, per tubulosam & fibrosam cutis substantiam, postea salutariter propellitur. Exanthematicam enim materiam non causam, sed potius effectum, neque etiam perpetuum hujus febris esse, ex eo patescit, quod morbus non sola efflorescentia exanthematum feliciter & perfecte solvi solet, sed plures, eadem copiose licet facta, pessime habeant, alii sine ea evadant & decedant quoque, nunquam vero firma salutis spes sit, nisi solennis evacuatio, vel per alvum, vel sudorem, diebus convenientibus criticis fiat. Quod autem dissolutio humorum fiat, intolerabilis & extraordinarius plane foetor sordium, quæ per alvum, sudorem & urinam copiosissime secedunt, planum facit testatumque.

## §. V.

*Materialis causa.*

Materialis igitur harum febrium causa, utique ingens & insolita plane humorum excrementitiorum salino-sulphureorum & mucidorum corruptibilium impuritas, quæ unionem & mixtionem sanguinis ingressa, eundem in intestinum dissolutorium motum deducit. Sed unde hæc primum habet ortum, disquirendum merito. Nam licet semper, etiam secundum naturam, vitalibus succis insit impurum, per varii generis emunctoria excernendum jugiter: illa tamen impuritas, quæ hunc facit morbum, longe magis a succorum indole aliena est, quam ordinaria, & præterea ita comparata, ut sese intime uniat cum lymphæ & sanguine eorumque crasin & mixtionem ingrediatur. Interim sicuti omnis morbosa impuritas, sive cacochymia, ab ingestis intemperatis & incongruis excretionibusque, præsertim per alvum & cutim, suppressis, originem ducit: ita etiam hæc corruptiva impuritas, febrium catarrhalium mali moris & exanthematicarum causa, pariter ab

ingestis, maxime potu, incongruis simulque excretionibus, præsertim cuticulari, suppressus, oboritur.

## §. VI.

Epidemias autem plerumque esse has febres, experientia *Ex aëre.* docet ac a præternaturali extraordinaria temporum anni tempestatumque constitutione oboriri tali qua multa in corpore gignuntur recrementa, eorumque per cutis poros secessione impedita, accumulantur. Quin aëris constitutionem sequuntur hæ febres epidemicæ, ac inde magis, vel minus deterioris sunt genii. Inprimis per multiplicem constat observationem, diu perseverantem aëris australis humidus, calidus, nebulosus & ventis destitutus, præsertim vere & autumnò, statum, accedentibus postea frigidioribus septentrionalibus ventis; febres mali moris putridas, exanthematicas afferre. Neque minus constat, quod si æstas diutius siccior, autumnò, spirante vento boreali, prodeant affatim febres epidemicæ, acutæ, intermittentes, exanthematicæ, petechiales, purpuracæ & dysentericæ, uti quidem annis 1690, 1691, 1692, 1693, 1694, 1695, 1696, 1697, 1698, 1699, 1700, 1701, 1702, 1703, 1704, 1705, 1706, 1707, 1708, 1709, 1710, 1711, 1712, 1713, 1714, 1715, 1716, 1717, 1718, 1719, 1720, 1721, 1722, 1723, 1724, 1725, 1726, 1727, 1728, 1729, 1730, 1731, 1732, 1733, 1734, 1735, 1736, 1737, 1738, 1739, 1740, 1741, 1742, 1743, 1744, 1745, 1746, 1747, 1748, 1749, 1750, 1751, 1752, 1753, 1754, 1755, 1756, 1757, 1758, 1759, 1760, 1761, 1762, 1763, 1764, 1765, 1766, 1767, 1768, 1769, 1770, 1771, 1772, 1773, 1774, 1775, 1776, 1777, 1778, 1779, 1780, 1781, 1782, 1783, 1784, 1785, 1786, 1787, 1788, 1789, 1790, 1791, 1792, 1793, 1794, 1795, 1796, 1797, 1798, 1799, 1800, 1801, 1802, 1803, 1804, 1805, 1806, 1807, 1808, 1809, 1810, 1811, 1812, 1813, 1814, 1815, 1816, 1817, 1818, 1819, 1820, 1821, 1822, 1823, 1824, 1825, 1826, 1827, 1828, 1829, 1830, 1831, 1832, 1833, 1834, 1835, 1836, 1837, 1838, 1839, 1840, 1841, 1842, 1843, 1844, 1845, 1846, 1847, 1848, 1849, 1850, 1851, 1852, 1853, 1854, 1855, 1856, 1857, 1858, 1859, 1860, 1861, 1862, 1863, 1864, 1865, 1866, 1867, 1868, 1869, 1870, 1871, 1872, 1873, 1874, 1875, 1876, 1877, 1878, 1879, 1880, 1881, 1882, 1883, 1884, 1885, 1886, 1887, 1888, 1889, 1890, 1891, 1892, 1893, 1894, 1895, 1896, 1897, 1898, 1899, 1900, 1901, 1902, 1903, 1904, 1905, 1906, 1907, 1908, 1909, 1910, 1911, 1912, 1913, 1914, 1915, 1916, 1917, 1918, 1919, 1920, 1921, 1922, 1923, 1924, 1925, 1926, 1927, 1928, 1929, 1930, 1931, 1932, 1933, 1934, 1935, 1936, 1937, 1938, 1939, 1940, 1941, 1942, 1943, 1944, 1945, 1946, 1947, 1948, 1949, 1950, 1951, 1952, 1953, 1954, 1955, 1956, 1957, 1958, 1959, 1960, 1961, 1962, 1963, 1964, 1965, 1966, 1967, 1968, 1969, 1970, 1971, 1972, 1973, 1974, 1975, 1976, 1977, 1978, 1979, 1980, 1981, 1982, 1983, 1984, 1985, 1986, 1987, 1988, 1989, 1990, 1991, 1992, 1993, 1994, 1995, 1996, 1997, 1998, 1999, 2000, 2001, 2002, 2003, 2004, 2005, 2006, 2007, 2008, 2009, 2010, 2011, 2012, 2013, 2014, 2015, 2016, 2017, 2018, 2019, 2020, 2021, 2022, 2023, 2024, 2025, 2026, 2027, 2028, 2029, 2030, 2031, 2032, 2033, 2034, 2035, 2036, 2037, 2038, 2039, 2040, 2041, 2042, 2043, 2044, 2045, 2046, 2047, 2048, 2049, 2050, 2051, 2052, 2053, 2054, 2055, 2056, 2057, 2058, 2059, 2060, 2061, 2062, 2063, 2064, 2065, 2066, 2067, 2068, 2069, 2070, 2071, 2072, 2073, 2074, 2075, 2076, 2077, 2078, 2079, 2080, 2081, 2082, 2083, 2084, 2085, 2086, 2087, 2088, 2089, 2090, 2091, 2092, 2093, 2094, 2095, 2096, 2097, 2098, 2099, 2100, 2101, 2102, 2103, 2104, 2105, 2106, 2107, 2108, 2109, 2110, 2111, 2112, 2113, 2114, 2115, 2116, 2117, 2118, 2119, 2120, 2121, 2122, 2123, 2124, 2125, 2126, 2127, 2128, 2129, 2130, 2131, 2132, 2133, 2134, 2135, 2136, 2137, 2138, 2139, 2140, 2141, 2142, 2143, 2144, 2145, 2146, 2147, 2148, 2149, 2150, 2151, 2152, 2153, 2154, 2155, 2156, 2157, 2158, 2159, 2160, 2161, 2162, 2163, 2164, 2165, 2166, 2167, 2168, 2169, 2170, 2171, 2172, 2173, 2174, 2175, 2176, 2177, 2178, 2179, 2180, 2181, 2182, 2183, 2184, 2185, 2186, 2187, 2188, 2189, 2190, 2191, 2192, 2193, 2194, 2195, 2196, 2197, 2198, 2199, 2200, 2201, 2202, 2203, 2204, 2205, 2206, 2207, 2208, 2209, 2210, 2211, 2212, 2213, 2214, 2215, 2216, 2217, 2218, 2219, 2220, 2221, 2222, 2223, 2224, 2225, 2226, 2227, 2228, 2229, 2230, 2231, 2232, 2233, 2234, 2235, 2236, 2237, 2238, 2239, 2240, 2241, 2242, 2243, 2244, 2245, 2246, 2247, 2248, 2249, 2250, 2251, 2252, 2253, 2254, 2255, 2256, 2257, 2258, 2259, 2260, 2261, 2262, 2263, 2264, 2265, 2266, 2267, 2268, 2269, 2270, 2271, 2272, 2273, 2274, 2275, 2276, 2277, 2278, 2279, 2280, 2281, 2282, 2283, 2284, 2285, 2286, 2287, 2288, 2289, 2290, 2291, 2292, 2293, 2294, 2295, 2296, 2297, 2298, 2299, 2300, 2301, 2302, 2303, 2304, 2305, 2306, 2307, 2308, 2309, 2310, 2311, 2312, 2313, 2314, 2315, 2316, 2317, 2318, 2319, 2320, 2321, 2322, 2323, 2324, 2325, 2326, 2327, 2328, 2329, 2330, 2331, 2332, 2333, 2334, 2335, 2336, 2337, 2338, 2339, 2340, 2341, 2342, 2343, 2344, 2345, 2346, 2347, 2348, 2349, 2350, 2351, 2352, 2353, 2354, 2355, 2356, 2357, 2358, 2359, 2360, 2361, 2362, 2363, 2364, 2365, 2366, 2367, 2368, 2369, 2370, 2371, 2372, 2373, 2374, 2375, 2376, 2377, 2378, 2379, 2380, 2381, 2382, 2383, 2384, 2385, 2386, 2387, 2388, 2389, 2390, 2391, 2392, 2393, 2394, 2395, 2396, 2397, 2398, 2399, 2400, 2401, 2402, 2403, 2404, 2405, 2406, 2407, 2408, 2409, 2410, 2411, 2412, 2413, 2414, 2415, 2416, 2417, 2418, 2419, 2420, 2421, 2422, 2423, 2424, 2425, 2426, 2427, 2428, 2429, 2430, 2431, 2432, 2433, 2434, 2435, 2436, 2437, 2438, 2439, 2440, 2441, 2442, 2443, 2444, 2445, 2446, 2447, 2448, 2449, 2450, 2451, 2452, 2453, 2454, 2455, 2456, 2457, 2458, 2459, 2460, 2461, 2462, 2463, 2464, 2465, 2466, 2467, 2468, 2469, 2470, 2471, 2472, 2473, 2474, 2475, 2476, 2477, 2478, 2479, 2480, 2481, 2482, 2483, 2484, 2485, 2486, 2487, 2488, 2489, 2490, 2491, 2492, 2493, 2494, 2495, 2496, 2497, 2498, 2499, 2500, 2501, 2502, 2503, 2504, 2505, 2506, 2507, 2508, 2509, 2510, 2511, 2512, 2513, 2514, 2515, 2516, 2517, 2518, 2519, 2520, 2521, 2522, 2523, 2524, 2525, 2526, 2527, 2528, 2529, 2530, 2531, 2532, 2533, 2534, 2535, 2536, 2537, 2538, 2539, 2540, 2541, 2542, 2543, 2544, 2545, 2546, 2547, 2548, 2549, 2550, 2551, 2552, 2553, 2554, 2555, 2556, 2557, 2558, 2559, 2560, 2561, 2562, 2563, 2564, 2565, 2566, 2567, 2568, 2569, 2570, 2571, 2572, 2573, 2574, 2575, 2576, 2577, 2578, 2579, 2580, 2581, 2582, 2583, 2584, 2585, 2586, 2587, 2588, 2589, 2590, 2591, 2592, 2593, 2594, 2595, 2596, 2597, 2598, 2599, 2600, 2601, 2602, 2603, 2604, 2605, 2606, 2607, 2608, 2609, 2610, 2611, 2612, 2613, 2614, 2615, 2616, 2617, 2618, 2619, 2620, 2621, 2622, 2623, 2624, 2625, 2626, 2627, 2628, 2629, 2630, 2631, 2632, 2633, 2634, 2635, 2636, 2637, 2638, 2639, 2640, 2641, 2642, 2643, 2644, 2645, 2646, 2647, 2648, 2649, 2650, 2651, 2652, 2653, 2654, 2655, 2656, 2657, 2658, 2659, 2660, 2661, 2662, 2663, 2664, 2665, 2666, 2667, 2668, 2669, 2670, 2671, 2672, 2673, 2674, 2675, 2676, 2677, 2678, 2679, 2680, 2681, 2682, 2683, 2684, 2685, 2686, 2687, 2688, 2689, 2690, 2691, 2692, 2693, 2694, 2695, 2696, 2697, 2698, 2699, 2700, 2701, 2702, 2703, 2704, 2705, 2706, 2707, 2708, 2709, 2710, 2711, 2712, 2713, 2714, 2715, 2716, 2717, 2718, 2719, 2720, 2721, 2722, 2723, 2724, 2725, 2726, 2727, 2728, 2729, 2730, 2731, 2732, 2733, 2734, 2735, 2736, 2737, 2738, 2739, 2740, 2741, 2742, 2743, 2744, 2745, 2746, 2747, 2748, 2749, 2750, 2751, 2752, 2753, 2754, 2755, 2756, 2757, 2758, 2759, 2760, 2761, 2762, 2763, 2764, 2765, 2766, 2767, 2768, 2769, 2770, 2771, 2772, 2773, 2774, 2775, 2776, 2777, 2778, 2779, 2780, 2781, 2782, 2783, 2784, 2785, 2786, 2787, 2788, 2789, 2790, 2791, 2792, 2793, 2794, 2795, 2796, 2797, 2798, 2799, 2800, 2801, 2802, 2803, 2804, 2805, 2806, 2807, 2808, 2809, 2810, 2811, 2812, 2813, 2814, 2815, 2816, 2817, 2818, 2819, 2820, 2821, 2822, 2823, 2824, 2825, 2826, 2827, 2828, 2829, 2830, 2831, 2832, 2833, 2834, 2835, 2836, 2837, 2838, 2839, 2840, 2841, 2842, 2843, 2844, 2845, 2846, 2847, 2848, 2849, 2850, 2851, 2852, 2853, 2854, 2855, 2856, 2857, 2858, 2859, 2860, 2861, 2862, 2863, 2864, 2865, 2866, 2867, 2868, 2869, 2870, 2871, 2872, 2873, 2874, 2875, 2876, 2877, 2878, 2879, 2880, 2881, 2882, 2883, 2884, 2885, 2886, 2887, 2888, 2889, 2890, 2891, 2892, 2893, 2894, 2895, 2896, 2897, 2898, 2899, 2900, 2901, 2902, 2903, 2904, 2905, 2906, 2907, 2908, 2909, 2910, 2911, 2912, 2913, 2914, 2915, 2916, 2917, 2918, 2919, 2920, 2921, 2922, 2923, 2924, 2925, 2926, 2927, 2928, 2929, 2930, 2931, 2932, 2933, 2934, 2935, 2936, 2937, 2938, 2939, 2940, 2941, 2942, 2943, 2944, 2945, 2946, 2947, 2948, 2949, 2950, 2951, 2952, 2953, 2954, 2955, 2956, 2957, 2958, 2959, 2960, 2961, 2962, 2963, 2964, 2965, 2966, 2967, 2968, 2969, 2970, 2971, 2972, 2973, 2974, 2975, 2976, 2977, 2978, 2979, 2980, 2981, 2982, 2983, 2984, 2985, 2986, 2987, 2988, 2989, 2990, 2991, 2992, 2993, 2994, 2995, 2996, 2997, 2998, 2999, 3000, 3001, 3002, 3003, 3004, 3005, 3006, 3007, 3008, 3009, 3010, 3011, 3012, 3013, 3014, 3015, 3016, 3017, 3018, 3019, 3020, 3021, 3022, 3023, 3024, 3025, 3026, 3027, 3028, 3029, 3030, 3031, 3032, 3033, 3034, 3035, 3036, 3037, 3038, 3039, 3040, 3041, 3042, 3043, 3044, 3045, 3046, 3047, 3048, 3049, 3050, 3051, 3052, 3053, 3054, 3055, 3056, 3057, 3058, 3059, 3060, 3061, 3062, 3063, 3064, 3065, 3066, 3067, 3068, 3069, 3070, 3071, 3072, 3073, 3074, 3075, 3076, 3077, 3078, 3079, 3080, 3081, 3082, 3083, 3084, 3085, 3086, 3087, 3088, 3089, 3090, 3091, 3092, 3093, 3094, 3095, 3096, 3097, 3098, 3099, 3100, 3101, 3102, 3103, 3104, 3105, 3106, 3107, 3108, 3109, 3110, 3111, 3112, 3113, 3114, 3115, 3116, 3117, 3118, 3119, 3120, 3121, 3122, 3123, 3124, 3125, 3126, 3127, 3128, 3129, 3130, 3131, 3132, 3133, 3134, 3135, 3136, 3137, 3138, 3139, 3140, 3141, 3142, 3143, 3144, 3145, 3146, 3147, 3148, 3149, 3150, 3151, 3152, 3153, 3154, 3155, 3156, 3157, 3158, 3159, 3160, 3161, 3162, 3163, 3164, 3165, 3166, 3167, 3168, 3169, 3170, 3171, 3172, 3173, 3174, 3175, 3176, 3177, 3178, 3179, 3180, 3181, 3182, 3183, 3184, 3185, 3186, 3187, 3188, 3189, 3190, 3191, 3192, 3193, 3194, 3195, 3196, 3197, 3198, 3199, 3200, 3201, 3202, 3203, 3204, 3205, 3206, 3207, 3208, 3209, 3210, 3211, 3212, 3213, 3214, 3215, 3216, 3217, 3218, 3219, 3220, 3221, 3222, 3223, 3224, 3225, 3226, 3227, 3228, 3229, 3230, 3231, 3232, 3233, 3234, 3235, 3236, 3237, 3238, 3239, 3240, 3241, 3242, 3243, 3244, 3245, 3246, 3247, 3248, 3249, 3250, 3251, 3252, 3253, 3254, 3255, 3256, 3257, 3258, 3259, 3260, 3261, 3262, 3263, 3264, 3265, 3266, 3267, 3268, 3269, 3270, 3271, 3272, 3273, 3274, 3275, 3276, 3277, 3278, 3279, 3280, 3281, 3282, 3283, 3284, 3285, 3286, 3287, 3288, 3289, 3290, 3291, 3292, 3293, 3294, 3295, 3296, 3297, 3298, 3299, 3300, 3301, 3302, 3303, 3304, 3305, 3306, 3307, 3308, 3309, 3310, 3311, 3312, 3313, 3314, 3315, 3316, 3317, 3318, 3319, 3320, 3321, 3322, 3323, 3324, 3325, 3326, 3327, 3328, 3329, 3330, 3331, 3332, 3333, 3334, 3335, 3336, 3337, 3338, 3339, 3340, 3341, 3342, 3343, 3344, 3345, 3346, 3347, 3348, 3349, 3350, 3351, 3352, 3353, 3354, 3355, 3356, 3357, 3358, 3359, 3360, 3361, 3362, 3363, 3364, 3365, 3366, 3367, 3368, 3369, 3370, 3371, 3372, 3373, 3374, 3375, 3376, 3377, 3378, 3379, 3380, 3381, 3382, 3383, 3384, 3385, 3386, 3387, 3388, 3389, 3390, 3391, 3392, 3393, 3394, 3395, 3396, 3397, 3398, 3399, 3400, 3401, 3402, 3403, 3404, 3405, 3406, 3407, 3408, 3409, 3410, 3411, 3412, 3413, 3414, 3415, 3416, 3417, 3418, 3419, 3420, 3421, 3422, 3423, 3424, 3425, 3426, 3427, 3428, 3429, 3430, 3431, 3432, 3433, 3434, 3435, 3436, 3437, 3438, 3439, 3440, 3441, 3442, 3443, 3444, 3445, 3446, 3447, 3448, 3449, 3450, 3451, 3452, 3453, 3454, 3455, 3456, 3457, 3458, 3459, 3460, 3461, 3462, 3463, 3464, 3465, 3466, 3467, 3468, 3469, 3470, 3471, 3472, 3473, 3474, 3475, 3476, 3477, 3478, 3479, 3480, 3481, 3482, 3483, 3484, 3485, 3486, 3487, 3488, 3489, 3490, 3491, 3492, 3493, 3494, 3495, 3496, 3497, 3498, 3499, 3500, 3501, 3502, 3503, 3504, 3505, 3506, 3507, 3508, 3509, 3510, 3511, 3512, 3513, 3514, 3515, 3516, 3517, 3518, 3519, 3520, 3521, 3522, 3523, 3524, 3525, 3526, 3527, 3528, 3529, 3530, 3531, 3532, 3533, 3534, 3535, 3536, 3537, 3538, 3539, 3540, 3541, 3542, 3543, 3544, 3545, 3546, 3547, 3548, 3549, 3550, 3551, 3552, 3553, 3554, 3555, 3556, 3557, 3558, 3559, 3560, 3561, 3562, 3563, 3564, 3565, 3566, 3567, 3568, 3569, 3570, 3571, 3572, 3573, 3574, 3575, 3576, 3577, 3578, 3579, 3580, 3581, 3582, 3583, 3584, 3585, 3586, 3587, 3588, 3589, 3590, 3591, 3592, 3593, 3594, 3595, 3596, 3597, 3598, 3599, 3600, 3601, 3602, 3603, 3604, 3605, 3606, 3607, 3608, 3609, 3610, 3611, 3612, 3613, 3614, 3615, 3616, 3617, 3618, 3619, 3620, 3621, 3622, 3623, 3624, 3625, 3626, 3627, 3628, 3629, 3630, 3631, 3632, 3633, 3634, 3635, 3636, 3637, 3638, 3639, 3640, 3641, 3642, 3643, 3644, 3645, 3646, 3647, 3648, 3649, 3650, 3651, 3652, 3653, 3654, 3655, 3656, 3657, 3658, 3659, 3660, 3661, 3662, 3663, 3664, 3665, 3666, 3667, 3668, 3669, 3670, 3671, 3672, 3673, 3674, 3675, 3

culosum sit, post diurnum calorem, corpus vespertino frigido humido aeri exponere.

## §. VII.

*Et corporis constitutione.*

Neque tamen omnes tales febres petechizantes sunt epidemica, id est, ex communi vitio aeris veniunt, sed quandoque etiam sine hoc oriuntur, in corporibus præsertim impuris, incongruis & pravis alimentis saginatis, & nimia & crebriori refrigeratione affectis. Inde enim fit, quod febres hæ hieme potissimum grassentur, & eos quam maxime corripiant, qui pravo victu ac regimine usi, ac præterea corpus intensius refrigerarunt. Vidimus id ipsa hac hieme, qua ex civibus nostris multi, intemperantiæ in baccho ac venere indulgentes & traha diutius sub cælo rigido vecti, inciderunt in has febres & voluptatis dederunt poenas. Neque etiam ea propter effluvia ex iis, qui his exanthematicis febribus graviter decumbunt, aut mortui sunt, omnes inficiunt promiscue, sed eos tantum, qui dispositionem ad hujusmodi morbum, summam nempe succorum impuritatem gerunt, ceteris, qui ab hac immunes, a contagio etiam liberis.

## §. IIX.

*Vnde symptomatum varietas.*

Ceterum quia sanguinis impuritas non in omnibus unius ejusdemque indolis; hinc varii generis subinde his in febribus prodeunt exanthemata variaque accidunt symptomata, magis vel minus periculosa. Etenim si deleteria prorsus tubest impuritas, ad putredinosam dissolutionem humorum tendens, graviora sunt omnia & petechiæ magis emergunt veræ atque lethales, fusci, vel nigri coloris, de quibus infra. Quando vero non adeo corruptivæ indolis, sed mitioris salino-sulphureæ, symptomata non tam atrocia, sed ordinate magis morbus decurrit maculæque magis sunt purpureæ & rosei coloris, ac febris ob id purpurea, vel petechialis spuria, sive petechizans, audit. Ubi serum falsum acre, recenter a perspiratione prohibita subnatum, sese adjungit, coryza, sternutatio, tussis ferina, cum defluxione salis ad fauces & epiglottidem, complicantur, eamque ob causam febris cat-



tarrhalis malignæ nomine insignitur. Quandoque etiam ob copiam partium salino-sulphurearum acrium sub ipso motu febrili dissolutorio evolutarum, maculis petechialibus sese associat easque antecedit, vel sequitur purpuraceum exanthema miliare, idque tam rubrum, ex pruritu, ardore, cutis aspitudine & foetore specifico acido cognoscendum, quam, quod pejus adhuc, album, cujus pustulæ miliares nonnunquam in vesiculas ampliores, sero acerrimo turgidas, explicantur. Id quod vero, si declinante morbo, undecimo, vel decimo quarto die, vel serius adhuc, cum magna anxietate, inquietudine, spirandi angustia, animi deliquio & extremorum frigore, accedit, æger utplurimum, ob vires jam nimium fractas, succumbit.

### S. IX.

Qui naturæ & corporis robustioris, plebeji & vitæ rusticæ addicti, solo sæpe convenienti externo regimine, sine singulari artificio, patienter expectando tempus, melius & felicius evadunt, quam qui naturæ sunt imbecillioris, animi meticulosi, vel inœrore, curis aut intemperantia potus & ingluvie, desidïa quoque, aut nimia mentis fatigatione, corpus reddiderunt morbidum & imbecille. Mali porro ominis effusæ excretiones ab initio statim & extra dies criticos, per sudorem, alvum & urinam quoque. Qui autem occumbunt, inflammatione meningum, sive phrenitide, vel faucium & œsophagi, ex aphthis, vel ipsius stomachi, pereunt. Sanguis qui his in febribus extrahitur, conspicuum monstrat vitium & vel valde fluidus & serosus, rubicundus, vel etiam nimis crassus & nigricans, comparet.

### CURATIO.

#### S. I.

Felix harum febrium exanthematicarum eventus atque *Curatio* curatio, non tam in arte Medici, quantumvis periti atque *nititur* sagacis posita, sed potius a corporis naturæ bonitate ac vi-*natura* *robore.* *gore*

gore & convenienti regimine pendet. Hinc si enormis succorum impuritas, vires imbecilles, corpus laxum, spongiosum & minus perspirabile, nec selectissima remedia, nec optima medendi methodus, quicquam proficient. Contra ea quando non tota sanguinis & humorum massa adeo inquinata est, quando vigor adhuc motuum vitalium, animus etiam erectus, corpus nervosum, gracile & pori aperti, feliciter vel levi artificio, vel sponte plane, succedunt omnia. In his enim dissolutoriis, exanthematicis, acutis & periculosis febribus quam maxime valet practicus ille *Hippocratis* veterumque canon: naturam esse optimam morborum medicatricem, per se doctam, quæ congrua servet & incongrua rejiciat.

## §. II.

Indicationes curatoria.

Igitur id tantum in medicatione tenendum Medico prudenti, ne motus & excretiones, quæ etiam sine artificio in salutem vergunt, turbet & pervertat, sed placidæ agat, ab omnibus tam fortiter commoventibus & evacuantibus, quam sedantibus & sistentibus, abstineat, & naturæ opus perire juvet. Proinde hos unice in fines medendi methodus dirigenda: I) ut plenaria dissolutio sanguinis & humorum moderate compefcatur & impediatur; II) ut acrimonia salino-sulphurea humorum diluatur ac temperetur succique simul servantur fluxiles; III) ut excretiones per alvum, cutim, urinam quoque & sputum, modeste promoveantur; ac IV) ut vires fractæ foveantur ac restaurentur.

## §. III.

Usurpanda acidula.

Ad impediendam putridam humorum resolutionem, spectatæ virtutis temperata acidula, quippe quæ putredinosum miasma, ad naturam alcalini sulphurei accedens, cicurant eidemque efficaciter resistunt. Hac virtute splendent ex vegetabilibus acetum vini simplex & destillatum, succus citri, limonum, aurantiorum, berberum, granatorum, ribii & confecti ex iisdem sirupi, nec non succus acetosæ & acetosellæ cum destillatis ex ipsis aquis. Ex mineralibus clyffus antimonij

monii sulphuratus, spiritus vitrioli vulgaris & sic dictus philosophicus, spiritus salis, nitri & maxime omnium sic dicti dulcificati, quos inter ceu specificum eminet spiritus salis dulcis probe elaboratus, ex oleo vitrioli, cum sale communi & spiritu vini, per cucurbitam destillatus.

#### §. IV.

Dein tam ad dissolutionem corruptivam intercipiendam, *Tempe-* quam acrimoniam acidam obtundendam, conducunt blanda *rantia.* diaphoretica & terrea fixiora alcalina, bolus nimirum Armena, terra sigillata, unicornu fossile, lapides & chelæ cancrorum, mater perlarum, cornu cervi philosophice preparatum, nec non ex compositis, pulvis bezoardicus *Sennerti, Ludovici,* nofter, Anglicanus, lapis bezoardicus & lapis de Goa. Quæ *Hume-* porro humectant & acrimoniam diluunt sunt maxime pro *stantia.* potu usurpanda, decoctum scilicet hordei, cum scorzonera & rasura cornu cervi, nec non succo vel sirupo acetositis citri, aqua ipsa pura, vel Wildungensis, cum saccharo, cornu cervi usto & succo citri, ptisana decocta cum cerasis ficcis contusis, item juscula tenuia gallinarum, cum succo limonium, vel aurantiorum, decoctum avenaceum tenue, vulgo *Habergriße* / nec non cerevisiæ leves diuretica.

#### §. V.

Inter ea quæ excretiones secundant, & quidem per cu- *Secu-* tem, præter jam dicta bezoardica terrea, aqua scabiosæ, ga- *danda cu-* legæ, cardui benedicti, scordii, florum sambuci; item mixtura *ticulari.* simplex, acetum foliis rutæ, cardui benedicti, scordii & galegæ infusum, nec non essentia bezoardica, ex radice vincetoxici, angelicæ, pimpinellæ, dictamni, valerianæ, cortice cascarillæ, herba cardui benedicti & scordii, cum moderate spirituoso & *alvina* menstruo, vel melius adhuc, spiritu salis dulci, nostra metho- *excretio.* do confecta. Alvinam vero excretionem juvant tutissime clysteres emollientes domestici, ex decocto avenaceo, oleo amygdalarum dulcium, floribus chamomillæ vulgaris, sambuci, sirupo violarum, sale communi, nitro. Eundem etiam in finem utile decoctum mannatum, circumspicte & tempo-



re debito datum, ex mannæ unciis duabus, cremoris tartari drachma, in aqua scorzonera decoctis, addito sirupo violarum & oleo de cedro. Ex iis demum, quæ vires custodiuntur & reficiunt, præter modicum vini cum aliis diluentibus usum, laudem merentur aquæ rosarum, liliorum convallium, florum tilia, rubi idæi, fragorum, melissæ citrata, cinnamomi cydoniata, gelatina etiam cornu cervi, cum succo limonium, pomorum Chinenfium & saccharo.

## S. VI.

*Remedia  
inprimis  
probata.*

Potissimum vero polychresta & expertæ a nobis per multos annos virtutis tria hæc commendamus medicamenta: Recipe antimonii diaphoretici, cornu cervi sine igne parati, lapidum cancerorum, matris perlarum ana drachmam, nitri depurati drachmam dimidiam. M. f. p. Hic pulvis a scrupulo uno, ad drachmam dimidiam, pro dosi sumendus, quandoque solus, quandoque cum drachma succi citri, ex decocto, vel ptisana, quandoque etiam in hac mixtura: recipe aquæ cardui benedicti, florum sambuci, liliorum convallium, ceraforum nigrorum ana uncias duas, rosarum, cinnamomi sine vino, ana unciam dimidiam, spiritus nitri dulcis guttas XXX. sirupi acetositis citri unciam semis. Alterum utilissimum remedium mixtura hæc: recipe aquæ galegæ, cardui benedicti, ceraforum nigrorum, florum acaciæ, ana uncias duas, aceti destillati unciam, lapidum cancerorum, antimonii diaphoretici ana drachmam cum dimidia, cinnabaris scrupulum, mixturæ simplicis, spiritus nitri, vel salis, dulcis, ana guttas XXX. sirupi acetositis citri drachmas sex. M. D. S. Mixtur davon wohl umgerührt alle zwey Stund ein Pössel voll zu geben. Terrium est hæc mixtura bezoardica: recipe tincturæ bezoardica, superius descriptæ nostræ, vel *Michaëlis*, sirupi papaveris rhœados, liquoris nostri anodyni, ana drachmas duas. M. de qua quadraginta, vel quinquaginta guttæ pro dosi sumendæ.

## CAUTELAE ET OBSERVATIONES CLINICAE

CVM

## METHODO MEDENDI SPECIALI.

## S. I.

**M**aximum periculosis hisce febribus rite medendi mo-<sup>Regimen</sup>mentum, regimine continetur congruo. In hoc pri-<sup>fit tempe-</sup> mum est, ut aeger semper in æquali & temperato calore de-<sup>raturum &</sup> tineatur per totum morbi decursum. Sub nimio enim æstu<sup>equale.</sup> dissolutorius in sanguine motus magis intenditur, alvus siccat, anxietates augentur, impuri & salsi acres humores accuuntur, vires exhauriuntur, sudor fit justo copiosior & cito nimis majorique copia, sine emolumento, ad cutem propelluntur exanthemata. Frigore autem improvide admissio, præsertim ad pedes, perspiratio facile cohibetur, maculae & exanthemata retroaguntur, tormina in ventre & diarrhoea cum singultu inducuntur & criticae evacuationes turbantur. Et ab inæquali regimine ac subita aëris calidi in frigidum, vel contra mutatione, eadem fere, quam ex frigido accidunt incommoda. Interim quia aër impurus continuo haustus inspiratione, viribus insensissimus, cavendum, ne aeger in humiliori conclavi vapido aëre pleno decumbat, sed aër potius morbidis exhalationibus foetus, provide emittendus & purus admittendus.

## S. II.

Dein summo providendum est studio, ut corpus in æ-<sup>Perspira-</sup>quali semper maneat perspiratione & quo cutaneum cribrum, <sup>tio custo-</sup> in his morbis admodum sensibile, cujus tamen beneficio opti-<sup>diatur.</sup> mie materiae peccantis secretio fit atque excretio, in æquabili semper servetur tono. Hinc fugienda omni modo mutationes linteaminum, indusiorum & stragulorum, nec non transitus ex uno lecto in alterum. Ego quidem hanc ob causam interdicerere soleo, ut ægri crebro surgant, quin tempore critico & quo exanthemata pronepunt, præsertim si debiles ad-  
Gg 2 mo-



modum decumbentes, præcipio, ne lectus sternatur, nec, si lintheamina nimis madida, nova injiciantur, sed trita antea & exsiccata probe. Est quoque admodum salutare corpus involvere tunicæ talari manicatæ quam vocant *einen Schlafrock* / pedesque tibialibus induere sicque in lecto decumbere, quo omnis auræ frigidioris accessus arceatur.

## §. III.

*Situs erectus vitandus.*

Tum vitandus erectus corporis & capitis, tam in, quam extra lectum situs, tanto magis, ubi pulsus debilis & summa virium prostratio, nec non ubi morbus in vigore. Inde enim ob debilem cordis pulsum non sufficiens sanguinis copia perpendiculari vi ad caput pelli potest, lipothymia facile obrepit, imminuitur, vel sistitur cordis & sanguinis motus, omnes motus ad interiora vertuntur, fibrosa & tubulosa cutis substantia contrahitur, materia exanthematica, peioris nunc quam antea indolis, retropellitur, & ad nervosas partes delata, convulsiones, deliria, vel etiam sphacelationes funestas paullo post fuscitat. Id quod plurimis exemplis habeo confirmatum & uberius meo ex consilio excussum est in dissertatione *de situ erecto in morbis periculosis noxio*.

## §. IV.

*Animus sit tranquillus & erectus.*

Porro animus tranquillus & erectus servandus omnesque occasiones præscindendæ, quæ ad metum, pusillanimitatem, iram, vel terrorem ægrum permovere aptæ. Mens potius solatio & salutis spe erigenda, quam mortis periculi denunciatione dejienda. Ego certe novi febribus ejusmodi decumbentes, qui forsitan non fuissent mortui, nisi a Theologis & Medicis intempestiva mortis prædictione & inculcatione, horror & metus ipsis fuisset incussum ingens, omnibus postea illico in pejus mutatis.

## §. V.

*Alimenta vitentur.*

Præterea neque in principio, neque in declinatione, multo minus in statu morbi, laborantes onerare decet alimentis, quæ ex carnibus, ovis & pinguibus parata, uti sunt illa juscula sic dicta confortantia, *die Krast-Brühen*. Non enim  
non



non in manifestum damnum cedere possunt, quia præsente jam virium defectu & humorum impuritate, vires magis aggravant, cruditates generant, materiamque & vomitem morbi augment. Memori potius mente tenendus verissimus ille practicus Hippocratis canon: *corpora impura quo plus nutritur, eo magis laeseris.* Mihi quam plurima nota sunt exempla eorum, quibus remittente morbi & symptomatum atrociam, præpostera liberalitate cibi alibiles oggesti, cum præsentaneo damno, subsequente mox anxietate præcordiorum, inquietudine, virium debilitate, quin ipsa morte.

§. VI.

In medicamentorum autem usu, ceu perpetuum axioma *Pharmatenendum*; nunquam validiora commoventia & volatilia, *ca valida emetica, purgantia, diuretica, nec non sudorifera nimis spirituosam & expellentia, esse propinanda.* Nihil enim vi & impetuose hoc in morbo agendum, in quo naturæ quam maxime viget opus, cui omne nimium inimicissimum, temperata vero & moderata amicissima.

§. VII.

Deinceps quum hæc febres habeant certos suos typos, suas *Medicaperiodos*, certis temporibus exacerbationes & remissiones; *mentamultum omnino refert, ut Medicus hæc tempora & medendi opportunitatem observet.* Quod si non facit, plus damni, *danda.* quam emolumenti affert. Res enim in medendo maximi momenti, ut quis sciat, quæ tempore exacerbationis, ante, & post hanc, sub declinatione & remissione, danda. Paucis igitur in genere notari velim: quod sub æstu & symptomatum intensione, humectantia, diluentia, pulveres absorbentes nitrosi, superius descripti, nec non acidula, cum valde moderato externo regimine propinare expediat. Finito vero paroxysmo, quando cutis laxa, mollior & ad excretionem disposita, analeptica, excitantia, vel, si opus bezoardica, perspirationem moventia, nec non infusum theiforme ex veronica, scordio & liquiritia, exhibere decet. Et quum alvi fluxu sapius solvi soleat morbus, is utique nunquam sistendus, præsertim

circa tempora critica, nec adstringentibus, nec sedativis, nec opiatibus, sed si natura ad hanc excretionem inclinatur, nec tamen rite succedit, secundanda potius eadem tutissime per laxans mannatum, supra descriptum & tamarindinata.

## §. IIX.

Corporis  
tempera-  
mento ac-  
commo-  
danda.

Quia etiam corpora ægrotantium non sunt unius ejusdemque indolis ac temperamenti, sed in quibusdam motus vegetiores & intensiores, humores quoque calidiores & agiliores; in aliis vicissim motus languidiores & tardiores, ac humores lentiores magisque viscosi; curate utique hæc a prudenti Medico discernenda cum humorum quantitate, & motus ubique ad temperamentum, convenientem proportionem & æquilibrium reducendi. Hinc ubi nimius æstus internus & externus, oris siccitas cum siti & inde vigiliæ nimie pertimescendæ; ibi nitrosa & potus diluentes, crebrius, sed moderate, offerre expedit. Contra ea, quando in temperamento segni, phlegmatico, meticuloso, mitis admodum calor, sitis nulla, pulsus debilis & languidus, cum virium prostratione, somnolentia mentisque torpore, a refrigerantibus abstinendum & analepticis potius ac bezoardicis essentiis, crebrius item, sed parcius datis, pugnandum. Quum impuritas sulphurea & acetosa in humoribus peccat & exanthemata magis ad rubræ purpuræ naturam accedunt, pulveres bezoardici fixiores, item diluentia, demulcentia, emulsiones & liquor noster anodynus mineralis omnibus fere palmam præripiunt. Et in vappescentia sive corruptione lymphæ acetosa, accedente ea propter alba purpura, præter fixa diaphoretica, liquor bezoardicus *Busii*, cum liquore anodyno, proficiuus.

## §. IX.

Sympto-  
matibus  
meden-  
dum.

Quamvis autem in periculosis hisce febribus, non adeo scrupulosa symptomatum ratio sit habenda, sed potius affectus primarii, cujus hæc effectus & producta; quandoque tamen necessarium est, ut imminetia eadem arceantur, vel periculum quod præsentia minantur, avertatur. Ex his sunt cephalalgia

atque



atque deliria, ad quæ declinanda optimum utique est domesticum remedium, pullos columbarum, vel gallinarum recenter discissos, capiti raso applicare, vel epithema ex pane, cum sale, nitro, camphora, oleo ligni Rhodii & nucleis cerasorum vel persicorum, fronti atque temporibus circumponere. In animi deliquiis, vomitu, singultu, syncope, cardialgia & summis angustis, emplastrum ex theriaca, oleo nucistæ expresso, camphora, balsamo Peruviano, croco, oleo de cedro & pauxillo spiritus vini, præcordiorum regioni applicandum. In faucium ardore & siccitate, gelatina cornu cervi, cum succo limonum & saccharo cantho, sirupus diamoron, nec non oris collutio cum decocto ficuum, sirupo diamoron & nitro, opem ferunt egregiam. Urgente sopore, fricentur suræ & plantæ cum aceto rutaceo, vel vesicatorium nostrum temperatum, magnitudinē dimidii thaleri, furis apponatur. Et si purpura retrocedens anxietates facit & inquietudines, liquor bezoardicus *Buissi*, vel liquor cornu cervi succinatus, cum spiritu nitri dulci, vel liquore anodyno minerali, ex usu. In tussi oleum amygdalarum dulcium & croci extractum.

### §. X.

Inter excretionēs quæ metum incutiunt est sanguinis per nares stillicidium. Prodit hoc sanguinis ad caput jam infirmum congestionem, ex spasms interiorum. Hinc si proportionatus & moderatus est fluxus, cum sanguinis in corpore abundantia, non adeo nocet, sed potius graves capitis affectus avertit, id quod tamen rarius evenit. Quando vero pauca tantum sanguinis guttæ stillant, nullum inde levamen, sed potius præsagium delirii & inflammationis faucium. Et ubi effusius manat, vires prosternuntur, excretionēs cutaneæ ad interiora restringuntur & exanthemata quæ adsunt non sine discrimine disparent. Ad avertendum igitur sanguinis ad caput confluum, pedes semper in moderato calore & madore fervandi omneque frigus arcendum. Hunc etiam in finem conducibile vesicatorium, nostra ex inventione temperatum, nec nimis dolens, furis apponere al-

vum.



vumque servare apertam, vel per temperate nitrosâ, moderate & crebro data, vel clystere, vel infuso mannato. Et eadem quoque juvant, si hæmorrhagiæ nimix. Ubi vero parcius justo nares stillant, sanguis tamen, testibus oculis rubicundis, torvis & arteriis temporalibus valide pulsantibus, ad caput impetuosius confluit, præter jam dicta revellentia, derivantia & cucurbitulas nuchæ admotas, stillicidium pro-ritare expedit, vel per intrusum naribus stramineum cul-mum, vel sacrificatorio instrumento. Ubi nimius alvi flu-xus, pulveribus bezoardicis aliquot tantum grana corticis chaccarillæ admiscenda, externis tamen potius, quam inter-nis excretio moderanda & abdomen balsamo stomachali ex oleo nucistæ expresso, menthæ & balsamo de Peru in-ungendum. In sudore effusiori stragulorum calor quam ma-xime evitandus, & abstinendum a potu infusorum theifor-mium, ac usurpandæ species de hyacintho cum nitro. Et si vomitus & singultus urgent, præter commendatum externum linimentum, liquore anodyno cum liquore bezoardico, nihil efficacius.

## §. XI.

*V. S. eme-  
tica &  
vesicato-  
ria cum  
distin-  
ctione u-  
surpanda.*

Venæsectio in exanthematicis hisce febribus cum sum-ma circumspeditione administranda. Magis enim ad præfer-vationem facit, quam ad curationem. Hinc in gravidis & feminis, quæ nimis sanguinis per uterum profluviis obnoxix, quum tempus vernum & hiems præcessit nimis rigida, non sine fructu sanguis mittitur, id quod etiam tenendum de iis, qui purpuræ scorbuticæ patent & morbi hujus insultum metuunt. Vicissim, ubi jam virium enormis lapsus, morbus ex cacochymia ortus, jam præsens est, catarrholæ affectiones complicantur, febresque ob aërem vappidum nebulosum malignæ & putri-dæ grassantur, plane a sanguinis missione abstinendum. De primam regionem vacuantibus monendum: quod si morbus invadit corpus, cujus ventriculus, copia alimentorum, præ-fertim incongruorum, recenter factus, tartarus emeticus, in infuso mannato ad unum, vel duo grana datus, eximie sit pro-ficiuus.

ficuus. Nam licet ejusmodi pharmacum vacuans malignitati non directe resistat, quia tamen materiam & tomitem morbi subtrahit, multum omnino facit ad curationem ipsam. Sed si quid movendum, heic maxime, sapienti Hippocratis effato, movendum in principio. Vesicatoriis multum in his febribus tribuunt plures. Ego vero ita censeo: habent locum si metus retrocessionis exanthematum, si natura corporis tarda in excretionem, sopor & torpor adest. Tum novi, a vesicatoriis brachiis, vel furis apposis, mox totum corpus purpura rubra vel alba fuisse conspersum. Sed nostrum temperatum hic etiam commendamus vesicatorium.

## ENARRATIONES MORBORVM.

### OBSERVATIO I.

#### FEBRIS MALIGNA PETECHIZANS ANNO dñi MDCXCIX. HALAE EPIDEMICA.

Varium admodum, maxima tamen ex parte nubilum & *Constitu-*  
pluviosum coelum, autumnno anni superioris sæculi xci ix. re-*tio aëris*  
gnarat, hiems quoque præter morem tepida & humida, au-*præce-*  
tumno fere similis fuerat, & ver subsequens anni xcix. pa-*dens in-*  
riter justo calidiorem & humidiorē habuerat aëris statum, *salubris.*  
ventis semper fere ex austro spirantibus. Hæc autem præ-  
ternaturalis diuturna & insalubris temporum anni constitu-  
tio pessime mortalium affecit corpora. Inde quippe fibræ  
motrices nimium laxatæ, succorum spirituscentia depressa,  
vitalis humorum progressus multum retardatus, se & excre-  
tiones, potissimumque omnium saluberrima perspiratio, tur-  
bata, omnibus succis impuritas ad corruptionem prona in-  
ducta corporibusque magna ad morbos dispositio ingenta.  
Exceperunt igitur varii morbi, partim putridi & maligni,  
partim a feri redundantia & in locis glandulosis stasi penden-  
tes. Inter eos, qui populares habuerunt circuitus fuerunt  
variola & febres malignæ petechizantes. Nimirum circa  
æquinoctium autumnale anni xci ix. coepit variolarum mor-

bus & per sex fere menses tanta institit vehementia, ut vix ullus, qui ipsum nondum expertus, maneret immunis, uti quidem superius *capite VII. pag. 162. seqq.* enumeravimus. Circa æquinoctium autem vernale anni *xcix.* gravior adhuc prodit lues, adultis præcipue infesta, & stragem edidit haud levem, febris nempe maligna, petechiis variisque exanthematibus comitata, cujus genium, ingressum atque decursum, ex propria attenta observatione jam fufius paulo delineabimus.

*Quos inva-*  
*saferit*  
*morbis*  
*quibus*  
*capitalis.*

Scilicet invasit hic morbus ratione ætatis, maxime juvenes & viros; tenellis, puerili ætati & senibus pepercit: ratione sexus majorem edidit stragem in maribus, quam feminis. Dein infestavit potissimum personas constitutionis sanguineæ, item sanguineo-phlegmaticæ, nec non sanguine abundantes, obesos, habitus corporis laxioris, spongiosioris & venis plurimis, angustis tamen & exilibus distincti. Graciliores autem, cholericos & illos, quibus fibræ magis strictæ & venæ amplæ, non tam frequenter eodem affecti. Infensissimus, immo lethalis fuit iis, qui ex nimia intemperantia, præsertim vini generosi abusu, nimia voracitate & crebrioribus animi commotionibus, sanguinis impuritatem & cacochymiam sibi contraxerunt, vel ex morbis prægressis, aut aliis causis corpus obtinuerunt jam imbecille. Sine contagio ipsum hunc morbum fuisse subnatum & intus progeneratum, frequens docuit experientia. Contagii autem vis non in omnes promiscue se exseruit, sed maxime in vicinos atque dispositos, ita ut plures iisdem in ædibus simul ægrotarent. Rarissimi fuerunt ex peregre accedentibus, qui lue infecti.

*sympto-*  
*mata es-*  
*sentialia.*

Omnes autem, quotquot corripuit hic morbus, hisce affecit pathematibus, ex quibus, ceu pathognomonicis signis, cognoscendus fuit. Insignis & subita statim inter initia & per totum decursum morbi durans, adfuit virium jactura atque prostratio, & tanta lassitudo & gravitas detinuit membra, ut ægri præ debilitate nec corpus movere, nec erecta

( ) statura



statura incedere potuerint, sed illico vertigo, vel leve animi deliquium, non sine insigni vitæ discrimine, accefferit. Pulsus dein arteriarum deprehensus debilis, parvus, frequens tamen, interdum majori, interdum minori celeritate & inæqualitate micans. Calor porro ut plurimum visus remissior & minor, sitis quoque non adeo magna & urina sanorum similissima, sed vigilia, aut in aliis somnolentia, perstitit continua.

Pro temperamentorum tamen ætatumque diversitate, *Quoad* nec non rerum externarum accessione, discreparunt sympto-*tempera-*mata. In sanguineis confusus & inconstans fuit decursus, *menta* dorfi autem dolor major, anxietas præcordiorum gravior, *diversa.* cephalalgia acutior, cum faciei & oculorum rubore, vigilia & delirio, maculæ etiam rubræ affatim in iis fuerunt conspicuæ. Qui sanguinem mobiliorem & biliosum aluerunt, sub strictiori corporis habitu, majorem experti sunt ardorem externum, vigiliam cum æstu, corporis jactatione & inquietudine; accessit etiam in his loquacitas, faucium inflammatio, delirium, oculis simul protuberantibus, ferocibus atque splendentibus. Qui laxiorem & obesum corporis gesserunt habitum, cum sanguine copioso, sero viscido scatente, non adeo mordaci calore, nec siti, nec inquietudine affecti sunt, sed somnolenti, debilissimi & morose taciturni jacuerunt. Somnus vero ut plurimum fuit turbulentus, variisque absonis insomniis interturbatus, a quo male habuerunt & expergefacti leviter ut plurimum delirarunt. In melancholicis similia observata symptomata.

Quoad excretiones etiam diversa annotata phænomena. *Nec non* In nonnullis per totum morbum diarrhœa moderata *excretio-* neque insalutari spumosa & variegati coloris secesserunt. *nes &* Plurimis accidit id circa dies criticos, septimum, nonum, *quidem* undecimum, vel decimum quartum, cum copioso sudore, ac *diarrhœ-* critica quam maxime salutaris fuit excretio. Quin, non tantum hoc tempore, sed & alio, quo similes continuæ putridæ febres grassatæ, notavi, semper magis e re agrorum fuisse,

isse, quando alvus lubrica & fluxa, quam si obstructa. Tum enim majores anxietates, cephalalgia, inflammatorii faucium affectus, vel purpura alba, cum vitæ discrimine successerunt.

*Sudores.*

Sudorum ratio non fuit ubique eadem. Continui quippe & per totum morbum manantes, morbi malignitatem, naturæ imbecillitatem infelicemque significarunt eventum. Lenis autem sudor & mador continuis boni ominis præbuit signum. Quando etiam ægri nono, vel undecimo die copiosius sudare coeperunt, præcedente, vel etiam erumpente simul alvi fluxu, symptomata multum remiserunt, animi rediit vigor atque constantia, nec non pulsuum æquales ictus, cum optata spe sanitatis. Nec quisquam fere morbum hunc evasit periculosissimum, quam diarrhœa, vel sudore, vel utroque simul. Interdum tamen effusius & longius manavit sudor, ad hebdomadem fere, ac vires exhaustiens hæctici morbi motum incussit.

*Hæmorrhagias.*

Narium hæmorrhagia largior ex voto non cessit, præsertim crebrius repetens; vidimus tamen & in principio copiosam, cum diarrhœa simul erumpentem, sine vitæ periculo. Mensium quoque fluxus liberalis admodum tertio, vel quarto morbi die prodiit, innoxius tamen. Sanguinis vero per ani venas stillicidium, quantum quidem novi, visum est in nemine.

*Urinam.*

Urinæ ut plurimum fuerunt sanorum similes, interdum tenues & turbidæ ac pallidæ, sine sedimento, quod circa decimum quartum, immo vigesimum diem, cum aliis faustis prælagii signis, comparuit. A nonnullis tamen urinæ statim post emissionem turbidæ redditæ, non sine foetore. In quibusdam tertio statim morbi die effuse secessit, succedente gravativo simul capitis dolore, torpore mentisque stupore ac turbatione, quæ accedente die septimo copioso sudore, feliciter evanuerunt & ægri servati. Quidam vicissim, maximeque ii, qui diarrhœam, vel vomitum frequentem experti, per aliquot dies parcissime reddiderunt urinam, limpidam instar aquæ.

Vomi-

Vomitum cum singultu per totum fere morbi cursum *Vomitum.* observavimus lethalem. Conatus autem ad vomendum fuit frequentior, præsertim post assumpta medicamenta, vel quando ægri ante morbi insultum gravi terrore perculsi, aut in principio emeticum assumerunt validius. In nonnullis peculiare hoc funesti ominis symptoma visum, quod liquidum assumtum & in stomachum delatum, accedente leviori corporis commotione, vel erectione tantum, iterum in os cum murinare ac borborygmo accenderit, ac limpidus humor, duo fere cochlearia complens, eructatus. Vidi inprimis hoc cum singultu per aliquot dies in viro honorato, in quo instituta post mortem sectione, hepar in concava parte plane putridum, nigrum, instar picis, nec non in diaphragmate, duodeno & parte pylori, sphacelosa comparuit corruptio.

Exanthematibus quidam plane caruerunt, quidam con- *Et exanthemata.* fertim obsessi. Hæc in nonnullis antequam lecto affigerentur, quum adhuc nonnisi de languore conquererentur, inter initia statim comparuerunt, minus fausto eventu. In aliis circa diem septimum, vel nonum in conspectum prodierunt, bono cum omine. Occuparunt autem ut plurimum collum, dorsum, femora, parcius abdomen pedes & manus, rarius etiam faciem, in uno tamen circa frontem, tempora & mentum rubicundæ admodum conspicuæ fuerunt maculæ petechiales. Meliores fuerunt parvæ & rubræ, pejores magnæ, lividæ & ad viridem, vel violaceum colorem accedentes. Præterea in iis, quibus alvus tensa erat & dura cutisque ficca & arida, nono inprimis, vel decimo morbi die, quum petechiæ disparere inceperunt, maximis cum anxietatibus, extremorum refrigeratione summaque virium & animi defectione, successit exanthema pessimi moris miliare, purpura nempe alba, multosque tam antequam prodiret atrocissimis symptomatibus, quam etiam postquam prodisset, ob vires penitus jam fractas, interfecit.



*Signa  
mala.*

Rarius morbum evaserunt, continua mortis formidine detenti, nec non qui medicamenta respuerunt, qui obesi fuerunt & copiosum ac impurum aluerunt in venis sanguinem. Funesti ominis fuerunt sudores frigidi, cum pulsu frequenti, debilissimo & intermittente, respiratione intenta & accisa, deliriis, convulsivis motibus, seu tendinum in manuum carpi contractione. Delirium nunciarunt oculi feroces, cum rubedine & illacrymatione, sitis defectus, inquietudo & jactatio corporis, pulsus celer & faciei inflatio. Pessima quoque macularum retrocessio, quæ vel admissio improvide frigore, vel terrore incusso, vel corpore diutius erecto, inducitur. Hac enim facta, mox summa debilitas, corporis refrigeratio, respiratio anhelosa & anxietas præcordiorum gravissima, cum vitæ discrimine, subsequuta. In bonis vicissim fuerunt, quietus corporis decubitus, mentis constantia, sitis, somnolentia, macularum die septimo demum, vel nono processus legitimus, alvus liquida, surditas circa diem criticum eveniens & aliquamdiu perdurans, idque maxime in iis, qui habitu fuerunt graciles, tennes, cum fibris strictioribus.

*bona.*

*Eventus.*

Qui mortui, die ut plurimum undecimo, nonnulli tamen etiam septimo, diem obierunt. Qui autem sanitatem recuperarunt, die undecimo, vel etiam decimo quarto, quin decimo demum octavo, virium restorationem & symptomatum remissionem sunt experti. Sex tamen plerumque hebdomadam spatio, antequam perfecte sanarentur, opus habuerunt, ac medio quippe tempore febris soluta est, & reliquum, tam ad tollenda supervenientia accidentia, quam ad vires colligendas impensum.

*Vitæ &  
regimen.*

In regimine commendata usura aëris sereni, limpidi, puri, temperate calidi; hypocausta enim nimis calefacta, vel excessivus calor a stragulis, semper fere, vires exhauriendo & excretorios actus turbando, nocuerunt. Cibi, præcipue solidi, admissi nulli, sed in declinatione & post illam, tantum liquidi & facili solutionis assumti. Usus vero ciborum liberalis, etiam nutrientium & jusculorum sic dictorum con-

for-

fortantium; particulis oleosis alibilibus foetorum, praesentissimum attulit damnum, inprimis circa dies criticos, in statu morbi, aut praesentibus evacuationibus criticis, & inde mox major virium jactura cum excretionum turbatione inducta. Quin novi, largiorem ciborum solidorum declinante morbo ulum, gravem peperisse recidivam. Nihil autem fere magis nocivum fuit, quam situs erectus. De quo quidem silent praetectorum libri; ego vero non tantum in hoc, sed & aliis malignis & acutis exanthematicis morbis notavi multoties, quod si aegrotantes diutius corpus in erecta servarint statura, sive surgentes, sive in lecto sedentes, vehementia morbi mirifice increverit, quin ipsa mors exceperit. Inde enim illico summa affecti debilitate & animi quasi deliquio, anxietate praecordiorum, extremorum frigore & maculae in cute conspicuae evanuerunt, cum vitae periculo. Neque hoc, uti vulgo creditur, ob admissum frigus accidit, sed iis etiam, qui in calore detenti & ab omni frigoris accessu probe sunt defensi, ob languidiorem sanguinis ex corde perpendiculari via ad caput pulsus.

Ex medicamentis alexipharmaca, salia volatilia, bezoar-<sup>calida</sup> dica calida & spirituosa, licet ceu efficacissima vulgo commendentur, plus damni, quam emolumenti attulerunt, praeser-<sup>alexipharmaca</sup> tim liberalius & cum calido regimine exhibita. Dissolutio-<sup>ca nocuerunt.</sup> nem enim sanguinis elementorum promoverunt & ob id majorem petechiarum ecerunt copiam; vel cephalalgias etiam, anxietates, inflammationes, vel etiam sudores copiosos, suscitaverunt. Quin novimus his ad praeservationem cum regimine assumtis, mox ipso contagio corpus fuisse affectum. Fuit tamen, ubi haec volatilia alexipharmaca analeptics mixta, moderate & caute usurpata, opem tulerunt egregiam, tum nempe, ubi ex macularum retrocessione, vel corporis, sive ex terrore, sive ex frigoris externi admissione, aut statura erecta, refrigeratione, anxietates & debilitates insensissimae subsequatae. Suavissimus etiam moderatum horum usum statim in principio, quum circulatio sanguinis adhuc in vigore esset, quo

quo magna materiæ peccantis portio cum fructu dissipata. Sudoriferum tamen non simul injunximus regimen, nec iis usi sumus in plethoricis & cacochymicis. Neque minus eo tempore, quo crisis institit, vel etiam jam adfuit, bezoardica volatilia in moderata dosi, criticas evacuationes, debilem & languidum motum resuscitando, egregie secundarunt. Cauti tantum fuimus & parci, ne nimios sudores efficeremus & ad lentas febres induceremus dispositionem.

*De V. S.*

Sanguinis missio ad arcendum morbi incursum proficua observata, in corporibus plethoricis & quibus sanguinis evacuationes tam spontaneæ, quam artificiales consuetæ. Contra ea, quando jam debilitas & virium prostratio insignis adfuit, minus feliciter cessit venæ sectio. Non enim putredinem tollere apta fuit, sed corpora inde magis potius debilitata, ut morbo superando facta imparia.

*De vomitiis,*

*ve-*

*ficantibus*

*& opiatis.*

Vomitioria lenia in iis, quibus prima corporis regio vitioforum humorum copia obsessa, præservationis ergo ante insultum morbi, opem tulerunt exoptatam. Novi etiam ipso in morbi principio eadem profuisse, verum circa morbi progressum ac statum, continuum vomendi desiderium, nauseam, ardorem circa regionem cordis & anxietatem cardiacam suscitaverunt, vel potius hisce malis præbuerunt causam. Vesicatoria ab aliis nobis eximie laudata, in statu morbi, ubi delirium, vel sopor & convulsiones ægrum affligerunt, cervici admota. Opiata omniaque soporifera rejecimus, propter pulsum debilem & motus vitales jam languentes, quippe quæ vires magis debilitando & excretiones retardando, majorem efficiunt malignitatem & ad mortem aditum parant placidum quidem, sed certum.

*Materia*

*medica-*

*mentoria.*

Materia vero eorum, quæ a nobis usurpata & salubria deprehensa, fuit hæc: ex aquis; florum sambuci, acaciæ, tiliæ, ulmariae, rosarum, herbæ scordii, scabiosæ, cardui benedicti; ex sirupis: acetositis citri, granatorum, cum julepo rosarum; ex pulveribus: mater perlarum, antimonium diaphoreticum, lapides cancrorum, succinum, terra sigillata, cornu



cornu cervi ustum, philosophice præparatum, nitrum purum; ex alexipharmacis: camphora, essentia & extractum scordii, vincetoxici, mixtura simplex, spiritus & tinctura bezoardica; ex acidis: spiritus vitrioli philosophicus & nitri dulcis; ex humectantibus: decoctum scorzonerae, rasura cornu cervi, item gelatina cornu cervi; ex analeptics: aqua florum aurantiorum, oleum citri recens cum saccharo, confectio alkermes, de hyacintho, balsamus noster vitae externae; ex antispasmodicis: essentia castorei, cinnabaris, spiritus cornu cervi succinatus.

Ex his varii generis formulæ pro circumstantiarum ra-<sup>Medendi</sup> tione concinnatae & methodus iisdem utendi ita instructa: <sup>methodus.</sup> in principio morbi pulvis bezoardicus, cum nitro & pauxillo camphoræ remixtus, iterato aliquoties exhibitus; per morbi dein progressum & statum, mixturæ ex aquis temperatis, diaphoreticis, analepticis, antispasmodicis & pulveribus cordialibus bezoardicis cum succo citri aliquamdiu datae. Potui inditum nitrum, vel spiritus vitrioli philosophicus, aut clyssus antimonii sulphuratus, qui alvum fluidam servat. Et frequens potus decocti cornu cervi citrati, item radicis scorzonerae, calidus & frigidus, admodum proficiuus notatus. Circa diem criticum leniora alexipharmaca & quæ sudorem promovere poterant adjecta, quando natura ad sudorem movendum se armavit & non suffecit. Hinc vel mixtura, vel tinctura bezoardica, vel essentia scordii, mixturis indita.

Hæc optima & securissima fuit medendi methodus & <sup>Sympto-</sup> plus quam centies probata. Symptomatibus autem hac ob-<sup>matum</sup> viam itum ratione. In nimio vomitu, anxietate præcordio-<sup>medica-</sup> rum, enormibus diarrhoeis & ventris torminibus, externe <sup>tie.</sup> theriaca cum oleo nucis moschatae expresso, camphora, oleo caryophyllorum & balsamo Peruviano mixta, regioni stomachali apposita. In diarrhoea etiam nimia vires exhauriente usurpatus pulvis bezoardicus nitrosus, cum momento camphoræ & theriacæ coelestis. In phrenitide & acuto capitis dolore cum fructu externe admovimus spiritum vini camphoratum & salis ammoniaci, cum oleo rutæ, lavendulae.

Si alvus nimis adstricta, vel tormina in ventre affligerunt, expertissimi fuerunt clysteres lenientes, vel pure oleosi. Ad erigendas vires, spirituosa, confortantia, aromatica, externe pulvis & serobiculo cordis apposita, vel naribus suscepta, opem tulerunt egregiam. Ad fallendam sitim egregium fuit electuarium, ex saccharo Canariensi & spiritu nitri dulci.

*Præfer-  
ratio.*

Qui demum ab epidemica hac lue sibi metuerunt, ii prudenti Medicorum consilio defensi purgationibus lenioribus, pilulis nempe ex extractis balsamicis amaricantibus, rhabarbarinis & aloëticis. Plethoricis sanguinis subtractio rite administrata. Ad sanguinem vero fluxilem servandum, & dyscrasiam cum malignitate arcendam, commendari meruit infusum veronicæ & scordii, omnibus individuis accommodum. Accedere præterea debuit decens vivendi ratio, cibis & potus esse moderatus, temperatus nec varius; abstinendum ab affectibus animi, vires omni modo custodiendæ, corpus omni modo a refrigeratione defendendum, & ipse aer humidus vapidus corrigendus accensione lignorum & gummatum resinosorum.

## OBSERVATIO II.

*Constitu-  
tio aeris  
& morbo-  
rum epi-  
demica  
anni  
1728.*

Ego quidem per omnem vitam non facile memini, ullum annum adeo, quoad tempestatum aerisque constitutionem, ab ordinario statu declinasse & quasi præternaturalem fuisse, quam elapsum MDCCXXIIX. Etenim Martio jam mense coelum regnavit præter morem calidum & subsequen- tibus mensibus calor cum siccitate adauctus sicque ad medium usque Septembris duravit. Intervenerunt tamen subinde dies & noctes frigida admodum & rigida, quibus adeo in contrarium mutatus subito aeris habitus, ut præcipitante etiam Aprili noctu in glaciem a gelu aquæ densarentur. Autumno postea tempestas ingruit ac persistit humida & frigidiuscula foecunda. Sub finem demum, Decembri & Januario sequenti, successit præter consuetudinem algidissima hi-  
ems,

ems, ita ut gelu VI. VII. X. XII. & XIII. Januarii die, intensissimum illud post hominum memoriam anni MDCCIX, si non superaret, certo tamen æquaret. Frigidissimam autem hanc tempestatem subito iterum excepit lenissima australis die XIV. aura, quæ copiosissimam nivem cum glacie mox liquavit, interspersis subinde pluviis. Mira etiam sub hac cœli vicissitudine observata argenti vivi in barometro, ratione descensus & ascensus, crebra & quotidiana fere mutatio, qualem me per triginta annos vix unquam vidisse recordor, adeo etiam, ut vel una nocte, a vigesimo septimo gradu, ad duodecimum, quin octavum delaberetur; luculento indicio, non modo valde subitam ratione caloris & frigoris in thermometro, sed etiam gravitatis aëris, mutationem ac varietatem factam fuisse. Hæc autem insolita & peculiaris aëris annique temporum constitutio, non potuit non ingentem etiam mutationem animantium & maxime humanis corporibus inferre, functiones tam vitales, quam naturales, potissimumque secretorios & excretorios actus, turbare atque pervertere, & materiam ac dispositionem ad diversi & insueti etiam generis morbos ingignere. Hinc igitur factum est, ut non modo in universa Germania, sed & Belgio, Anglia & alibi, tam uberi proventu enati morbi, quam vix alio tempore visum unquam. Decurrente quippe vere, æstate & autumno, febres variæ intermittentes, tertianæ simplices, duplices & continuæ, quartanæ simplices & duplices, crebrius recidivantes, valde anomalæ & irregulares, in quibusdam malignitatis speciem referentes, contagio infestæ, sæpe purpuraceo exanthemate stipatæ, prodierunt affatim. Variolæ quoque & morbilli non siluerunt, & quidam præterea diarrhoea & dysenteria affecti. Octobre vero & Novembre appetente desierunt intermittentes irregulares & successerunt catarrhales, pro diversitate & impuritate corporum, plus minus benignæ vel malignæ, ac per Decembrem etiam ac Januarium infestarunt, factæ simul contagiosæ, cum exanthematibus, petechiis spuriiis ac purpura. In plurimis cum horripilatione, virium prostratione, con-



tussivo artuum dolore, temulentia capitis, juncta raucedine, gravedine & pectoris infarctu, inceperunt, & quotidie circa noctem, quæ ut plurimum insomnis fuit, major facta inquietudo cum æstu. In spurcis admodum corporibus, quarto, vel etiam septimo die comparuerunt exanthemata, petechiæ maxime spuria & purpura alba, vel rubra, vel utraque simul, modo cum, modo sine levamine. Optime potius morbus solutus vel sudore largo, vel alvi fluxu, vel copioso sreatu. In benignioribus catarrhalibus cum violenta & convulsiva tussi, faucium tumore, quandoque exulceratione, pectoris copioso infarctu, parotidum, quin erysipelaceo faciei tumore, ego diluentibus, sanguinis æstum & acrimoniam temperantibus cum fructu sum usus. Evacuationem alvinam per infusum usitatum mannatum movi, quod sine ulla molestia sex, vel septem sedes proritavit, humorumque a pectore, faucibus & capite impetum efficaciter derivavit. Et postea pulveribus diaphoreticis cum pauxillo extracti croci, nec non infusis theiformibus, cura ex voto absoluta. In iis autem febribus, quæ genii minus benigni visæ, eadem, quam supra expositum, ratione, medicationem institui.

*Historia  
febris pe-  
techialis  
spuria  
cum pur-  
pura alba*

Ex his quibus exanthemata juncta, memorabilis potissimum petechialis mitior, cum purpura alba, cujus historiam, in primis ex observatione numerosissima praxi occupati Medici, sigillatim percernere, operæ erit pretium. Coepit scilicet hæc in plurimis cum horripilatione & subsequente æstu mitiusque per duos aut tres primos dies afflixit, ita ut agri non penitus lecto affigerentur, sed tantum de doloribus tensivis in dorso & artubus, capitis temulentia, virium appetitusque prostratione conquererentur. Nonnulli conatum vomendi, quidam etiam vomitus experti, plerique tamen primos hosce dies somnolenti, dormituriens magis, quam vigilantes, transegerunt. Accedente autem quarto die, motus febriles graviores accesserunt & vix sequenti mane tantisper remisit æstus, simulque ipso hoc die in quamplurimis sanguinis per nares erupit stillicidium, ac paullo post sub leni madore prodie-

dierunt etiam petechiæ. Fuerunt præterea in plerisque quibus alvi circa hoc tempus obtigit lene profluvium, ad septimum usque diem, quin quandoque undecimum durans, quod morbi vehementiam imminuit magis, quam adauxit. Absoluta macularum eruptione, in junioribus potissimum, minus meticulosus & de vita sollicitus, febris postea, sub levi mentis turbatione, placide & tranquille decurrit & circa decimum quartum diem ad faustum exitum pertigit, tantum quod in quibusdam tussis & surdaster status per octo, vel plures dies durans, remansit. Quod si autem post exanthematum efflorescentiam febris impetus cum deliriis increvit potius, undecimo, vel decimo quarto die certo expectanda fuit purpura alba. Quæ priusquam comparuit, ægri summa præcordiorum anxietate, insomnia & strîcturis circa collum sunt affecti, ut conquerebantur fauces strangulari, se cistæ esse inclusos, teneri in alieno conclavi & inter peregrinos versari, rogantes, vincula ut laxentur ipsique suis & quieti redderentur &c. Quod si tamen sub hoc angore & pathematum vehementia purpura in conspectum venit & deliria cum reliquis symptomatibus postea cessarunt, & hi feliciter evaserunt. Sed quibus circa nonum diem tendinum subsultus, motus tremuli, respiratio anhelosa, involuntaria urinæ & alvi excretio acciderunt, licet etiam demum purpura proreperet, decimo, undecimo, vel decimo tertio die sub convulsivis motibus obierunt. Medendi hinc febribus methodus fuit hæc. Adultis & qui venæsectioni assueti, simulac conqueri cœperunt, sanguis ad sex, vel octo uncias subtractus in pede, omnibusque quies, moderatus calor & abstinentia injuncta. Conclavia semper in æquali tepore servata, nulli, quam poscenti, cibus datus, potus vero ex cerevisia tenui tepius & parcis haustibus pro lubitu unicuique concessus. In medicatione, rejectis expellentibus & alexipharmacis, ternis singulis horis, exhibitus pulvis temperans, ex absorbentibus, tam simplicibus, quam acido saturatis, cum antimonio diaphoretico & nitro, vel loco hujus potio temperata ex aquis destillatis, cum temperantibus &

siropo acetositis citri. Comparantibus autem exanthematicis, ad impediendam eorum retrocessionem, pulveribus temperantibus, interpositus subinde parcis dosibus, usus essentiae bezoardicæ, infusum theiforme potui datum & regimen diaetnoicum injectum. Alvus quidem in paucissimis adstricta, sed ubi fuit, clystere emolliente soluta. Adversus cephalalgias usurpatus spiritus vini camphoratus, vel etiam epithema illud domesticum ex mica panis, baccis juniperi, sale & cummino. Reliquorum symptomatum, ut inappetentiæ, somni defectus & lassitudinis, minus rationem habuimus & præter analeptica temperata, datum præterea nihil. Ceterum feliciter per Dei gratiam, in omnibus fere qui consiliis medicis in diæta & regimine rite obtemperarunt, curatio successit, ii vero, qui hæc pensi habuerunt, maxima quidem etiam ex parte evaserunt, sed in morbos postea inciderunt corruptos, lentescentes.

*Historia  
febris ma-  
ligna ex-  
anthema-  
tica.*

Idem hic morbus, iisdem fere symptomatibus, eodem tempore infestavit milites nostros præfidiarios. Scilicet fama percrebuerat, potentissimum Porussæ Regem huc venturum, milites lecturum. Hinc præfecti meditationes instituerunt campestres, suosque per aliquot dies ante diluculum in campum eduxerunt, ut armis luderent. Erat autem October jam aduktus, coelum frigidiusculum, nebulosum ac subinde pluviosum, milites tamen minus adversus æris injurias ob vestitum leviolem muniti. Male inde ipsorum corpora affecta & dispositio ingenita morbosa, inprimis quum non deessent, qui liberali vini adusti potu corpus calefacere perperam satagerent. Ex eo igitur languere coeperunt multi & plures ægrotare, alii catarrhis, alii rheumatismis, alii diarrhoeis, alii intermittentibus febribus, maximeque quartanis refractariis, affici, donec exeunte Novembre longe plures adoriretur febris continua maligna exanthematica, & successive vel centum inficiens, ad finem usque Decembris infisteret. Quotquot hæc corripuit, omnes primum de insolito corporis artuumque languore conquesti sunt, cum capitis gravitate, appetitus defectu & nausea. Sequutus dein horror

corpo-



corporis, quem excepit calor & pulsum celeres, debiles tamen ictus. Postea nonnullos primum mitius afflixit pectoris infarctus, cum tussi & coryza; alios vicissim mox ita prostravit morbi vehementia, ut lecto affigerentur, & simulac vel caput tantum erigerent, lipothymiis afficerentur. Incruebunt tum, inprimis accedente quarto die pathemata, somnus defuit, nausea urfit, caput & dorsum doluit, pectus oppressum fuit, in nonnullis nares sanguinem stillarunt, aliis vomitus, aliis conatus ad hunc accidit, fuerunt maxime inquieti, delirarunt, corpus jectigarunt, de summo simul angore conquesti. Exactis inter hæc aliquot diebus, circa quintum, ut plurimum tamen septimum diem, prodierunt maculæ petechiales, optimæ rosei & purpurei, pessimæ lividi & fusci coloris. Exanthema quoque miliare, maculis hisce quandoque fuit interspersum rubrum, vel album, morbumque multum exacerbavit. Longe pejus tamen fuit, si post nonum; aut undecimum diem hoc accessit, viribus jam nimium attritis; quin die demum vigesimo primo uno id contigisse novimus, lethali eventu. In quibusdam critico septimo die sudor manavit; in plurimis vero circa quintum vel septimum diem alvus fluere cœpit, ad nonum, vel undecimum usque diem. Et hæc quidem excretiones criticæ ægris in salutem evenerunt. Quod si vero sudor statim ab initio fuit effusior, exanthematibus præsentibus nulla remissio, nullum criticis diebus in urina sedimentum, alvus adstrictior, cutis arida, sitis nulla, malum præbuerunt omen, invalescente haud ita multo post delirio, inquietudine, accedentibus cum singultu convulsionibus ac tandem morte. In medicatione harum febrium regimen injunctum moderatum, potus tepidus sufficiens, ex decocto potissimum hordei, cibus interdictus, rejecta calida & alexipharmaca, vomitoria & purgantia, omissa quoque venæsectio, quæ in binis primum infelicitè cesserat. Danti tantum pulveres temperantes nitrosi ac diaphoretici, modo cum, modo sine succo citri, item potiones ex aquis analeptis ac diapnoicis cum antimonio diaphoretico, matre perla-

perlarum, cinnabari & aceto. Alvus obstructa emollientibus clysteribus referata, nimis fluxa calore & pulverum diaphoreticorum usu ad moderamen traducta, & de reliquo eadem fere ratione ac supra dictum symptomatibus ceteris obviam itum. Feliciter etiam cessit curatio, ita ut ex omnibus vix ultra decem mortui, & hi quidem vel nono statim die, vel undecimo accedente purpura. Ceteri fere omnes superato decimo quarto die sensim vires cum somno & appetitu receperunt ac successive cum sanitate in gratiam redierunt. In quibusdam tamen per aliquod adhuc tempus restitit præter languorem tussicula, in aliis etiam passim in carnosis externis partibus effloruerunt furunculi admodum molesti, congruis præfidiis demum etiam sanati.

*Consest-  
via.*

Id igitur ex epidemicæ hujus febris historia notatu dignum: quod a sola paulo intensiori perfrigeratione corporis atque transpiratione prohibita, pro dispositione corporum, quatenus plus vel minus impuros in venis inque prima regione alunt succos, varii generis morbosæ affectiones, plus vel minus mali moris, intermittentes nempe, item catarrhales rhevmaticæ, petechiales & purpuratæ gigni possint. Dein & illud observationem meretur, quod contagiosa quidam hæc febris fuerit, non tamen omnes, sed tantummodo milites infecerit, qui similem perfrigerationem eo tempore passi, immunibus a contagio & iis, qui in eadem domo habitarunt, & qui visitarunt ægrotos. Quod quidem luculento est testimonio, contagium, ut effectui detur, supponere & requirere corpora, quæ succos ad recipiendum miasma & ejus activitati obsecundandum dispositos alunt. Tum non prætereundum est, quod milites valde proceræ staturæ vehementius agrotaverint & difficilius evaserint, quam alii minus proceri. Quia enim in proceræ staturæ corporibus, ob longum ac difficilem sanguinis per venas perpendiculari via regressum ad cor, circuitus tardior est & languidior ac in parvæ staturæ, excretionum autem & maxime perspirationis negotium cir-

culum

culum sanguinis tardiozem, vel celeriozem sequitur, facile patet, sub languidiori sanguinis & humorum circuitu, corpora magis & facilius reddi impura & avtocratiam quoque naturæ in vincendis morbis, quæ consistit maxime in circulatione sanguinis vegetiori & promptis excretionibus, valde languidam esse & insufficientem. Tandem memorabile omnino quod venæsectio etiam in principio administrata noxam potius quam opem attulerit, quæ alias non tam facile in robustis hominibus, ut militibus, nocet. At quum a transpiratione prohibita & retentione excrementorum, quæ per cutim diffantur, primos malum traxit natales, aliquot jam septimanis languor & ciborum ante invasionem febris inappetentia adfuit, facile constat, sanguinis missione imbecillitatem adauctam, perspirationem vero magis imminutam fuisse, quod utrumque non potuit non cum damno accidere.

## CAPVT XI.

DE

# FEBRIBVS PFTECHIALIBVS VERIS.

## THESES PATHOLOGICAE.

### §. I.

**F**ebres petechiales veræ, sunt valde malignæ, contagiosæ, *Descriptio mor-*  
capiti & viribus quam maxime infestæ, cum varii coloris *maculis* junctæ & ortæ a succorum vitalium corruptione *ac bi.*  
subsequente putrida dissolutione, eaque propter lethales.

### §. II.

Merito hæ febres exanthematicæ vocantur malignæ, seu *Nominia*  
venenatæ. Etenim plerumque a tenuissimo, activæ, virulen-  
tæ indolis vapore, sive miasmate, e corpore decumbentis ha-  
lante, ortum ducunt & propagantur. Dein difficulter sana-  
tionem recipiunt & brevi sæpe plures jugulant. Tum vi-  
(IV.) Kk res,



res, a quibus motus vitam sustinentes pendent, & celeriter, & graviter, pessundant ac destruunt. Demum, non secus ac maligni homines, mitem prima facie exhibent indolem medicosque cum adstantibus, ac si catarrhales tantum essent, saepe decipiunt, postea vero pernicialem effectum tanto majori exerunt vehementia.

## §. III.

*Indicia  
& sym-  
ptomata.*

His tamen indiciis deleteria indoles morbi cognoscenda. Ab initio statim ægri conqueri solent de virium summa prostratione atque debilitate, ut erecti vix consistere, vel pedibus incedere queant, sed mox animo deficient, quum in aliis continuis & acutis morbis demum in statu & vigore ejusmodi imbecillitas observetur. Caput ab initio valde dolet, fervet, cum torpore, animus illico dejicitur, anxius & sollicitus est ac salutis spem abjicit, pessima quævis ominatur. Assidua urget vigilia, nec ullus reficiens adest somnus, appetentia plane perit, faciei vigor intercidit, pulsus languidus, parvus & inæqualis micat, decubitus in lecto insolitus est atque incompressus, membris quasi convolutis & corpore huc & illuc jectigato, pectoris est oppressio, quandoque cum tussi sicca, musculorum fibræ undulatorio quasi & tremulo motu convelluntur tendinesque contrahuntur atque subsultant. Plures nec de siti, nec æstu, nec dolore, nec anxietate queruntur, & asseverant potius, nihil mali se perferre, præter languorem & somni defectum. Urina primum mingitur ut plurimum tenuis sanorum simillima. Quarto, quinto, vel etiam septimo die in conspectum prodeunt maculæ, in dorso potissimum & lumbis, plus minus copiosæ, varii subinde coloris, plerumque tamen sine levamine, ideoque symptomaticæ magis, quam criticæ.

## §. IV.

*Nomina  
& differ-  
entia.*

Exanthemata veteres generali denominatione has dicunt maculas. Latino ab Italis idiomate pedicularium petechiarum & petechialium nomine efferuntur, a voce pedechio, pulex, quia pulicum morius figura æmulantur; a Gallis ob colorem purpureum, purpuratæ; ab Hispanis taberdillo, a colore ex flavo rubro; a Germanis lenticulares, propter lentis quam referunt

fig.

figuram & colorem, aut puncticulares, vernacula *die Reb-Flecke*. Hungari vero propter gravem capitis dolorem & delirium complicatum nominant Germana voce *die hitzige Haupt-Kranckheit*. Ab aliis autem exanthematibus præter figuram in eo discrepant, quod non modo sine omni ardore, sine pruritu, cutis elevatione, asperitate & exulceratione prodeant, sed & ut plurimum sine levamine, quia materia eorum non est salina caustica, sed potius putrida & corrupta.

§. V.

Tantum hinc abest, ut maculæ hæ salutis spem faciant, *Prognosis* ut rotius quo copiosiores compareant, eo majorem corruptio is gradum, quin lividi, plumbei & ex atro viridescens coloris, sphacelofam plane corruptionem arguant. Qui etiam evadunt, non cutanea excretionem, sed vel sudoribus largis, foetidum acorem spirantibus, vel alvi fluxibus criticis, convalescunt. Sed nonnisi naturæ benignitate ac robore id accidit, in his, ubi non adeo eminens succorum corruptio, sed temperata adhuc & quasi quodammodo alexipharmaca indoles. Plurimi potius occumbunt, vel sphacelosa corruptione in ventriculo, intestinis & aliis visceribus, vel phrenitide, frequentius anginosa faucium & oesophagi inflammatione, cadaveribus mox post mortem intolerandum plane foetorem spirantibus. Quem funestum eventum signa præsagiunt hæc: si fitis vel nulla, vel plane inextinguibilis, si lingua arida, discissa, nigricans, fauces inflammatae & squalore obsessæ, cum deglutitione difficili; si post exanthematum eruptionem respiratio anhelosa & pectoris angustia persistit & invalescit, vel post sudorem & alvi fluxum delirium cum aliis pathematibus ingravescit, nec urina turbida fit nec sedimentum ponit; si demum oculi obscurantur, mens plane delira fit, ægri floccos carpunt, tendines subsultant, excrementa involuntarie elabuntur, sudor frigidus manat & convulsiones accidunt, spiritum cum vita præcludentes.

§. VI.

Formalis perniciosarum harum febrium ratio consistit *Formalis* in putrida dissolutione, sive colliquatione sanguinis & suc-*ratio.*



corum vitalium, potissimumque in fluidi lymphatici elastici tenuissimi, quod in sanguine contentum, in cerebro ac spinali medulla separatum, per nervos in universum corpus distributum, sensum & motum partibus præstat cunctis, inquinazione & vitiosa plane diatthesi. Etenim venenatum illum vaporem, quo etiam sana corpora inficiuntur, ejus naturæ esse atque potentia, ut non modo sanguini aliisque humoribus putredinosam successive inducat fermentationem, sed & immediate ad interiora cerebri nervearumque partium pervadat fluidumque ibi corrumpat subtilissimum, ex eo planum fit, quod suscepto ipso, illico vires tam naturales, quam vitales & animales languescere incipiant omnes, in perfecte sanis corporibus, salva adhuc sanguinis & humorum crassi & a corruptione immuni.

## §. VII.

*In corpus  
delatum.*

Hoc virulentum multiplicativæ indolis miasma, corpus maxime subit per nares, fauces & bronchia. Nam nullibi tam aperti minusque tecti discurrent nervi ex prima & secunda conjugatione, ac in narium cavo. Hoc igitur dum pertransit cum aëre vectus deleterius vapor, non mirum est, eundem immediate, proxime & intime pertingere ad nervos ipsumque cerebrum & infectos ea propter mox temulentia, capitis torpore, virium languore, nec non vertigine affici. Maxime omnium vero commiscet sese salivali latici contagiosum miasma & cum hoc descendit ad ventriculum, qui etiam, ceu pars nervosa, primam fere sedem præbet contagiosis hinc febribus. Hinc in ventriculo & præcordiis primum se prodere solent prava symptomata, nausea scilicet cum vomendi conatu, alvi frequens cum torminibus dejectio, vel etiam fortis adstrictio, ciborum fastidium, anxietas præcordiorum, cardialgia, *das Ubelseye* & frequens copiosæ lymphæ ex stomacho eructatio. Hinc testantur observationes anatomico-practicæ, in his febribus defunctis ventriculum maxime omnium sphacelosa corruptione affici. Dum vero miasma hoc & salivæ in ore & liquori menstrualis gastrico & pancreatico in stomacho misce-



scetur, multum ejus vis propagativa & multiplicativa intenditur. Etenim inter omnes constat, salivales hos succos, intimæ alimentorum digestionis servientes, valde subtilis, spirituosæ, aëreo elasticæ fermentescibilis naturæ esse, eaque propter dulcia quibus commiscetur illico fermentativo motu perire. Quare quia hi succi in motu intestino fermentativo jam constituti, longe utique facilius obsecundant delato illuc subtilissimo putredinoso miasmati, ut hoc sese propaget & augeat, non secus ac exigua pars fermenti panifici ingentem farinæ massam fermentat.

§. IIX.

Hinc facile jam elucescit ratio, quare ad contagium perniciosi hujus morbi arcendum, nihil præstabilius jam pridem a peritissimis Medicis annotatum, quam ut infectorum, præfertim quum ad extrema & putredinis acumen ventum, halitum facie averia vitemus, salivam crebrius exspuendo rejiciamus, ac ore contineamus ea, quæ salivam eliciunt, radicem angelicæ, zedoariæ, imperatoriæ, pimpinellæ, aut masticem, vel fumigemus tabacum. Neque minus inde patet causa, cur miasma hoc deleterium longe facilius suscipiatur longeque citius pernicipalem vim exferat, in ventriculo copiosis cruditatibus, & pituitosis ac salivalibus sordibus obfesso; & cur vicissim leniora emetica, alexipharmacis nupta, in recenter infectis, certæ & securissimæ ad præscindendum prima in herba morbum sint efficaciæ.

§. IX.

Primam autem harum contagio infestarum febrium originem recte omnino cum Hippocrate ex communi aëris vitio deducendam esse reor. Nimirum diuturnus humidus, pluviosus, nebulosus, nec non austrinus calido humidus aëris status, ob eminentem vaporum aqueorum copiam, vim ætheris vividam, elasticam, expansivam, quæ solidorum & fluidorum ad vitam necessarium in corpore motum, sustinet, obtundit ac deprimit. Inde salutiferæ excretiones, maximeque perspiratio, elanguescunt ac turbantur, inutiles, super-

fluæ & corruptæ partes retinentur, quibus in sanguine & succis accumulatis, non potest non summa ad corruptionem & dissolutionem prona ingigni dispositio. Accedit quod sub aliena ejusmodi tempestatum constitutione, ipsa vegetabilia & frumenta alienam naturam corpori inimicam contrahant. Nam notum est, humido & pluvioso cælo diu regnante, in secale potissimum uberem esse proventum lolii esculenti, vernacula *des Mutter. Korns*, quod noxiæ & tantum non venenatæ est indolis. Neque prognatum hoc tempore secale, tantam copiam spiritus vini per fermentationem præbet, neque tam salubrem & reficientem panem largitur, ac illud, quod temporibus anni siccis & calidis producitur. Ut adeo non mirum sit, insalubria & corrupta hinc confecta alimenta ingesta, simul ipsa corpora disponere ad putredinem.

## §. X.

*Vel a pravis effluviis.*

Dein aëri insalubritas & ad ingignendos putridos morbos aptitudo inducitur ex crebra ac diuturna aquarum inundatione. Hac enim facta, humor stagnans, accedente imprimis solari calore, putrescere incipit multaque putrida in atmosphæram mittit effluvia. Insectorum quoque varii generis copia circa aquarum stagna succrescit, a quibus causticæ, salinæ, deleteriæ materiæ subtiles multæ in aërem eleuantur. Quæ quidem omnia quam sint sanitati insensa, historiarum utique docent monumenta, quibus uberius constat, post aquarum diluviones magnas, contagiosas & tantum non pestilentis naturæ febres fuisse subortas, de quo pluribus evolvenda dissertatio *de temporibus anni insalubribus*, item *tomus II. Medicina ration. system. pag. 278.* Ejusdem infestæ naturæ est aër exhalationibus putridis ex cadaveribus inhumatis putrescentibus, vel excrementis animantium surgentibus, refertus, tanto magis incarcerationatus & accessu purioris destitutus.

## §. XI.

*Et corporis dispositione.*

Neque tamen aër tantum impurus & insalubris ad generationem horum morborum facit, verum etiam ipsius corporis ad putredinem intus concipiendam habitus ac dispositio.

tio. Per ipsam certe experientiam uberius constat, phlegmatico-sanguineos, habitus corporis laxioris & spongiosioris, animo meticulosos & anxios, quorum vires luxuria, ingluvie alimentorum valde incongruorum, ebrietate, venere, fame, diuturna mœstitia, vigiliis, laboribus, hæmorrhagiis, fractæ atque exhaustæ, facilius & crebrius gravi hoc morbo prehendi, & difficulter quoque evadere, nullam aliam ob causam, quam quod ipsorum corpora impura atque debilia ad putredinem ac corruptionem admodum proclivia. Neque minus de feminis cachecticis, mensium suppressione laborantibus, item de lue venerea, vel minimum hujus reliquiis affectis novi, quod ex facili corripiantur, sed ægerrime emergant.

§. XII.

Quæ quum ita sint, in proclivi sane est judicare, quare *Hinc in* contagiosæ hæ febres in militum castris quam maxime circumspectis & ob id castrenses appellari soleant. In castris enim *locis publicis familiaribus.* omnes quas enumeravimus hujus morbi causæ fere conveniunt. Ibi quippe milites aëris humido-calidi & postea humido-frigidi experiuntur injurias, sub dio dormiunt in locis uliginosis, humidis sæpe atque palustribus, excrementa animalium & hominum passim non desunt, nec tamen vento ob circumductum vallum aditus ad dissipandos foetidos halitus patet, cibis vescuntur incongruis, nonnunquam plane corruptis, semicoctis, aquas quoque stagnantes & putres bibunt, fame & vigiliis corporis robur atterunt. Hinc quando ex laborioso & difficili hoc vitæ genere in hibernia concedunt, corporaque quieti dant ac ciborum copia onerant, corruptio interna sensim contracta adeo demum increscit, ut apertius in capitalem hunc morbum erumpat isque ob id frequentior in hiberniis, quam castris observetur. Eandem fere ob rationem malignis contagiosis ejusmodi morbis, pauperes, in tenebris & coeno versantes, aëre fruantes in angustis tuguriolis vappido minusque puro, frequentius afficiuntur, quam opulenti, quibus unctius vivendi genus & sanitatis regulas quoad aërem & victum



viſum obſervandi copia. Idem evenit in noſocomiis, orphanotropheis & ergaſtulis publicis, ubi plures ſimul converſantur, & vitam colunt inopem, corpus ad concipiendum contagium diſponentem.

PRAESERVATIO ET CURATIO  
CVM  
OBSERVATIONIBVS CLINICIS.

§. I.

*Præſervatio quoad diætam & regimen.*

Curatio quidem harum exitialium febrium, tam ratione indicationum, quam regiminis, remediorum, medendi que rationis, nec non obſervationum practicarum, convenit utique, cum iis, quæ capite antecedenti de febribus petechizantibus fuſe ſatis tradidimus, ut ſupervacaneum eadem heic etiam exponere foret. Sed longe magis a perito Medico petendum conſilium ad arcendum ejusmodi morbum, quippe quod multo tutius, multoque certioris effectus ipſa curatione. Præcipuum vero præſervationis momentum in eo quam maxime conſiſtit, ut inſalubri ad ingignendos mali moris morbos apto anni tempore, ſolicite evitetur aër vaporibus & exhalationibus noxiis foetus & vivida, elatiſtica expansione deſtitutus. Quum dein ſub ejusmodi aëris conſtitutione corpora jam tum admodum debilia & ad morbos contrahendos diſpoſita ſint, expedit omnino, temperare ſibi ab omnibus, quæ viribus adverſa languidioresque faciunt excretiones, animi ſcilicet vehementes commotionibus, mœrore, terrore, cura, impenſioribus meditationibus, vigiliis protractionibus & nimia venere, item corporis refrigeratione, præſertim noctu, cum leviori tempeſtate frigiduſcula veſtitu. Porro præſcindendus curate cruditatum prima in regione proventus, abſtinendum ab ingluvie tanto magis inſalubrium, a crapula, continua tabaci ſumigatione & effuſiori potus coſſée uſu, qui ſicuti ventriculo, ita longe minus nervoſis partibus & mixturæ ſuccorum vitalium amicus eſt. Ut deinum aër purus & ſalu-

salubris hauriatur studendum, & fugienda ob id loca humiliora, in quibus aer facile fit vappidus, nec non ædificia quæ ventorum perflatui minus patent, ac præterea nimia humiditas accenso igne & suffimigiis ex mastiche, succino, baccis juniperi, corrigenda.

## §. II.

Inter præsidia porro, quæ ad declinandos hos morbos *Vinum* valent, ego quidem præstabilius novi nullum, convenienti-*optimum* ti & moderato vini optimæ notæ, & quidem Rhenani, usu. *præservativum.* Hoc quippe mane, vel etiam inter cibos quotidie potum modice, vires mirifice reficit & sustinet, sanguinis progressum cum excretionibus promovet, ciborum digestionem juvat, ac optime putredini ac corruptioni resistit, præsertim quando moderatior etiam corporis motus & alius diluens potus simul conjungatur. Ego sane longiori experientia edoctus, id pro certo affirmare possum, grassantibus populariter morbis ab æris constitutione humida, eos, qui exquisitam victus rationem tenuerunt & quotidie moderate bono vino usi, incommodi sensisse nihil. Ipsa etiam in pestilentia ex præstantissimis præservativis vinum esse testantur, qui ex instituto de eadem scripserunt. Quin in petechiis quoque, vinum postremis diebus facta crisi debito modo potum, vires dejectas erigendo & cuticularem excretionem secundando, omnia fere alia auxilia superare assevero.

## §. III.

Ipsa autem in curatione ex omnibus remediis statim in *Acida* principio optimam opem conferunt acida, maximeque suc-*profunt.* cus citri, ptisanæ potandæ ad extinguendum calorem & arcedam putredinem inditus, item acetum vini, sive simplex, sive destillatum, mixturis ex aquis & pulveribus fixioribus diaphoreticis nuptum. Præter hæc conducunt, quæ vires servando salivalem etiam laticem colliquant & pectus ab infarctu liberant. Id enim ego & celeberrimus olim Erfurtensis Professor, *Cramerus*, quem Præceptorem colui insignem, observavimus, non facile quempiam his in morbis decedere,

cui saliva & sputum liberius fertur. Quam ob rem idem hic in arte exercitatus vir frequentissimo in usu habuit mixturas alexipharmacas, quas ingrediebatur, cum aceto destillato, vel aceto scordii, cinnabaris, interdum bezoardicum minerale & oxymel squilliticum. Contra ea pessimus omnino Practicorum mos est, in principio statim volatilia, bezoardica & sudorifera cum regimine calido & infuso theiformi fervente exhibere. Sic enim intestinus ille putredinosus motus invalescit cum orgasmo, majorque virium subsequitur prostratio.

## S. IV.

*Alvi fluxus salutaris.*

In morbo declinante nulla magis salutaris excretio, quam quæ fit convenienti tempore per alvum. Ego certe praxi quadraginta sex annorum uberius confirmatum habeo, rarius solo sudore & hæmorrhagia, sed frequentius per diarrhoeam septimo, nono, aut undecimo die erumpentem, solutos fuisse hos morbos, & vicissim nihil perniciosius fuisse diarrhoea gravi statim inter initia, vel alvi fluxu critico cohibito. Neque minus compertum habeo, si catarrhales malignæ & exanthematicæ alvi fluxu solutæ fuerunt, ægros immunes fuisse a purpuræ albæ incursum, quæ haud raro pulsu jam æquali facto, declinante undecimo die morbo, non sine magno periculo supervenit. Perplexerunt etiam jam pridem salubritatem alvini fluxus, artem cum attentione exercentes. Ipse Hippocrates lib. epid. memorat, laborantes hujusmodi acutis febribus alvi excretionem fuisse sanatos. In quadam pestilenti constitutione diarrhoeam admodum salutarem fuisse Galenus de air. bil. cap. IV. testatur. Inprimis Gerhardus Columba de pestil. febr. multus est in laudando egregio effectu fluxus alvini, pag. 231. sic habens: *omnes quibus alvus copiose ejecit, licet cum signis cruditatis fuerit, tandem liberati. Procedente enim alvi fluore, indies coctionis signa superveniebant; morbus evadebat clementior, & tandem alvi fluore perseverante, fideliter & integre agri judicabantur.* Ut mittamus quæ passim hanc in rem memoriæ prodita a Valleriola observ. lib. VI. de



de febb. Schenckio observant. lib. VI. de febb. Riverio observant. Cent. I. obs. XLVII. & LVII. item Cent. II. obs. XXXIV. & LXXXVII. Horstio obs. X. Joanne Rhodio Cent. II. obs. LXXXV. Secreta de febre castrensi maligna cap. IV. pag. 331. cap. pag. 175. Boneto in thes. pract. de febb. putr. pag. 71. item de causo capp. II.

§. V.

Hæc igitur naturæ via, cui insistendum ab artifice, ea-Hinc pro-  
demque, si deficit, juvanda. Mihi omnino firmum & multipli-movendus  
ci observatione confirmatum, quicquid in putridis, malignis &  
pestilentialibus febribus curandis expectandum ab arte, id ma-  
xime in eo contineri, ut Medicus convenienti tempore ea usur-  
pet remedia, quæ ad alvum solvendam sine damno faciant. Sed  
hoc circa hos maxime dies faciendum, qui audiunt critici, a  
septimo ad decimum quartum usque, non primis, quibus ob  
materiam nondum coctam & excretioni aptam, parum opis  
conferunt. Sicuti vero ad alvum vacuandam per totum ha-  
rum febrium decursum nil pestilentius illis pharmacis, quæ  
acrimonia quadam caustica agunt, nec exceptis fennæ et-  
iam foliis: ita nil certe hanc in rem magis proficuum iis, quæ  
nihil alieni & quod vires frangat in mixtione habent, sed blan-  
de & placide alvum subducunt. Eminent hæc inter benedicta  
illa manna, cum cremore tartari, hisce etiam febribus ob  
aciditatem non adverso, nupta & sufficienti dosi data. Con-  
ducibilis quoque sirupus rosarum solutivus, mixtus cum sali-  
no stimulo, ex cremore tartari, sale polychresto, vel nitro  
antimoniato & convenienti dosi ac tempore cum sufficienti  
diluto vehiculo, uti sero lactis nostra methodo dulci, vel  
aquis etiam temperatis mineralibus, ut Wildungensibus &  
Antonianis, oblati. Non minus spectata virtus tamarindo-  
rum pulpæ, vel decocti ex his cum manna, aut rhabarbaro.  
Quam egregium enim effectum præstent hoc in casu laxan-  
tia testis eximius est *Moræus de malign. febr. parox.* plus quam  
viginti exemplis confirmans, se ad alvum laxandam summo  
cum fructu usum fuisse tamarindorum pulpa, item infuso ex  
Ll 2 rhabar-

rhabarbaro, foliis sennæ, cremore tartari, manna & aqua acetosellæ concinnato.

## §. VI.

*V. S. pra-  
servato-  
ria magis*

De venæsectionis autem utilitate his in febribus discipulant adhuc medentes. Et certe tanta utique malignarum differentia, ut experientissimi etiam Medici in iisdem experiundo demum discere cogantur. Id tamen verum: quum eadem plethoricos & plethorico-cachochymicos infestant, commodum omnino in his & præterea sanguinis missioni assuetis, diæta lauta & vinosa utentibus & vitæ sedentariæ indulgentibus, invenit locum ad præservationem. Experientia enim sum edoctus, post venæsectionem, vel plane non corripì, vel lenius ægrotare & facilius convalescere, sanguinis subtractionem passos, quam non expertos.

## §. VII.

*Recidiva  
arcenda  
abstinen-  
tia.*

Id vero omnibus curate tenendum: quod tam sub, quam declinante hoc morbo, stomachus valde languescens non alimentorum, multo minus insalubrium, præsertim carniùm mole sit onerandus. Est hoc familiarissimum, vulgo hominum plebejorum inprimis, præjudiciùm, ut credant vires cibis esse reficiendas. Sed ipsum hoc est una ex præcipuis causa, quod agri in portu sese jam constitutos censentes, sæpius naufragium faciant, recidivante priori, cum majori vitæ periculo, vel superveniente alio novo morbo.

## ENARRATIONES MORBORVM.

## OBSERVATIO I.

HISTORIA FEBRIS PETECHIALIS AN. MDCLXXXIII.  
IN PRINCIPATV MINDENSI GRASSANTIS.

Quum anno MDCLXXXIII. copiæ Brandenburgicæ ab expeditione contra Turcas ex Hungaria redeuntes, in Principatum Minden. em hiematum reducerentur, attulerunt simul morbum castrensem, febrem nempe malignam petechialem & successive multos pagos & vicos in quibus sumserant hiber-

berna luc infecerunt eadem. Ego juvenis adhuc Medicus provincialis a Serenissimo Electore Brandenburgensi Fridenrico Wilhelmo constitutus ibi, feci quod muneris postulavit ratio, decumbentes passim visitavi, in morbi hujus maligni statum inquisivi & operam contuli omnem, ut pro mea tunc scientia perniciosam hunc morbum congruis praesidiis oppugnarem & ne latius progrediretur, praecaverem. Excurri igitur & potissimum in praefectura Schlüsselburg, plus quam centum hac febre laborantes offendi, in quibus praeter summam virium prostrationem & consueta alia malignarum symptomata, peculiare fuit, quod plurimi statim in principio atroci & diuturna cephalalgia, in sincipite inprimis, cum vertigine, oculorum rubore, oblivione ac postea delirio, afficerentur; conquerentes simul de magno tinnitu & surro aurium. Quidam de raucedine, pectoris infarctu, faucium ardore & falso catarrho conquerebantur. Quibus mox corpus petechiis lividis & flavescentibus obsessum, moriebantur omnes, cum iis qui incongruo, vel nimis calido, vel nimis frigido, regimine excepti & a balneatore alexipharmacis, expellentibus & theriacalibus usi fuerunt. In quibusdam tanta erat corruptionis vehementia, ut aegri surgentes & in pavimento frigido ambulantes aliquandiu, funestum in plantis pedum nanciscerentur sphacelum, uti in duobus vidi. Qui autem paucas, & rubras habuerunt maculas, nec non ex plebejis, qui nec medico, nec medicamentis usi, ac minus meticulosi, solo regimine temperato, & potu seri lactis, vel decimo quarto die, remittente symptomatum vehementia, vel per largos & frigidos valde debilitantes sudores, vel per diarrhoeam sunt judicati. In bonis fuit status surdaster circa declinationem accedens & aliquandiu persistens. Qui evaserunt vix intra aliquot menses ad perfectam sanitatem redierunt. In plurimis restitit tumor pedum, vel etiam abdominis, cum lenta febre & appetitus dejectione. Quidam diu stupidi & obliviosi manserunt. Nec detuerunt, qui, praetertim si caput frigidiori aerae nimis cito exposuerunt, post morbum gravitate



capitis & difficultate auditus affecti sunt, quin nonnulli facti sunt & manserunt per totam vitam surdi. In pago, Raden dicto, eodem morbo infecto, commorabatur destillator quidam Chymicus, qui gloriabatur, summo se cum fructu uti spiritu nitri, instillatis in mensuram aquæ puræ, vel cerevisiæ Mindensis levis, quinquaginta ad manifestam usque aciditatem guttis, dato postea liberaliter tepido potu hoc medicato. Nec contemnendæ virtutis deprehendi hoc experimentum, quo in aliquibus fluxus alvi cruentus quandoque suscitatus, non sine levamine cephalalgia aliorumque symptomatum, tantum quod qui eodem servati, paulo diutius imbecillitate ventriculi & intestinorum laborarunt, cachectici quasi facti, demum tamen etiam congruis remediis ad sanitatem traducti. Ego vero ad præscindendum ulteriorem contagii progressum, iis, qui nobilioris fortunæ & conditionis erant, præter moderationem & temperantiam, in victu, regimine & animi affectibus, & vitanda refrigeratione, suasi moderatum vini boni usum. Qui sanguine crasso & gravi abundarunt, uti Westphali ob victum durum & crassum fere omnes, his sanguinem subtrahere jussi, & mane alternis diebus assumere dosin tincturæ bezoardicæ, vel pulveris bezoardici, expectando postea sub temperato calido regimine cuticularem excretionem auctiorem. Quæ etiam tam in locis infectis, quam alibi versantibus, egregie profuerunt. Ceterum sanos ab ægrotis, quantum fieri potuit, separari jussi: pro medicina pulverem ex cornu cervi usto & lapidibus cancrorum leniter nitrosum, cum pauxillo camphoræ cum roob sambuci, aqua & aceto vini singulis fere assumendum ordinavi: qui in primo morbi insultu sæpius usurpatus alios statim a morbo liberavit.

*Epicrisis.*

Nulla fere regio tam ferax morborum acutorum & præsertim febrium catarrhalium mali moris atque petechialium, quam Austria & Pannonia. Unde etiam peculiare & grave hujus morbi genus Hungarica ~~vel italis~~ febris, audit. Evenit

nit autem hoc plures ob rationes. Æstus interdum his in regionibus est intensior; etiam autumnus, & vina ob id generosa admodum & dulcia facit, noctu vero succedit algidior aura, & ob excessivam hanc subitam cœli mutationem excretio salutifera, potissimumque quæ per cutis poros succedit, mirifice turbatur ac intercipitur. Dein victus ibi sollemnis admodum plenus, ex esu carnum & vini generosi potu, aquæ autem non adeo salubres, quibus sanguinis facile corruptibilis copia ingeneratur. Hinc non mirum est, quod frequentes ibi corrupti & putridi maligni morbi, imprimis in militibus & qui victus illius insueti, simul inordinate vivunt, semicoctis & male præparatis cibis ventriculum onerant, noctu excubias agunt sub frigida aura & in locis humidioribus & frigidioribus degunt ac dormiunt. Neque etiam mirum, dispositionem ad hos morbos cum militibus huc venientibus alio transportari, sub quiete & ingluvie in hibernis, corruptos succos augeri, cruditates prima in regione accumulari ac tandem in apertum perniciosum morbum, hieme præsertim, erumpere.

Id autem peculiare habet hic morbus, imprimis in iis qui sanguine abundant, ut caput petat, hinc statim in principio venæ sectio suadenda, si vero ex stomacho vitiosorum humorum ex ingluvie & toto corpore huc confluentium colluvie obfesso, eveniat, optimum utique consilium statim in principio, clementi, efficaci tamen emetico, stomachum, vel intestinorum simul canalem expurgare. Quem in finem ego quidem commendare soleo decoctum mannatum, cum dimidia vel una drachma radicis hypecuanhæ, aut infusum mannæ ex vino cum duobus tartari emetici granis. Sic datis post hanc evacuationem bezoardicis & leniter diaphoreticis, cura succedit longe felicius.

Ex singularibus etiam in hac lue fuerunt sudores copiosi, frigidi, per aliquot dies & noctes manantes, vapidorum aco-rem spirantes, non tamen funesti. *Hippocrates* enim Sect. IV. apb. 37. malos eos pronunciat & mortis prodromos. Nos quo-

quoque largimur, quod sudor frigidus qui internæ visceris cujusdam inflammationis, vel sphacelationis comes & tantum particularis est, internis calentibus & externis frigentibus, plerumque sit funestus. Sed longe aliam ejus frigidi sudoris esse rationem, qui a defectu caloris & virium prostratione oritur, docet experientia. Luculentum hanc in rem est testimonium Raygeri in schol. observ. Spinaleri obs. XCV. sic habens: *vicissim sapius & ego in morbi declinatione post XIV. dies viribus bene constitutis & rite se habentibus, reliquisque bonis signis apparentibus, in calido corpore frigidos observavi sudores, post febres acutas & malignas bene judicatas, cum allevatione magna erupisse & ultra XXIV. horas durasse.* Quanquam autem hujus generis sudores non ad mortem tendant, magnam tamen dissipationem caloris & virium indicant. Hinc si unquam, certe tunc succurrendum analeptics, diæticis æque ac pharmaceuticis, corpus crebrius linteis calidis detergendum & fricandum, quo per externa internus calor excitetur, nec æger in limine recuperandæ sanitatis constitutus deficiat.

Vicissim in pessimis signis fuerunt sudores ab initio & per totum morbum effusius manantes, cum urina perpetuo tenui & copiosa. Hæ enim symptomaticæ sunt excretiones manifestumque præbent indicium colliquationis & dissolutionis elementorum sanguinis mixtionem constituentium. Et secedente tam copiose sero, crassior evadit cruor & ad cerebrum delatus, in vasis meningum capillaribus facile stagnat & inflammationem inducit.

Quod præterea spiritus nitri crebro & liberaliter in aqueo vehiculo datus, quibusdam eximie profuerit, partim acido tribuendum, quod putredini resistit optime, partim stimulo quem intulit intestinis, quibus vellicatis sanguinis & humorum impetus a capite ad inferiora vocatus & alvi fluxus cum euphoria proripitur. Sed longe tutior clystus antimonii sulphuratus, cum diluente tenui potu sufficienti copia exhibitus, quem



quem ego, ceu præstantissimum auxilium, deprehendi & commendo.

Ceterum invadentibus exitialibus hisce morbis, id potissimum perito agendum est Medico, ut propagationem & progressum contagii tempestive antevertat. Etenim longe facilius est, corpora ab insuku harum febrium defendere, quam infecta & oppressa perfanare. Ac nisi peculiare beneficium naturæ in curatione concurrat, omnia frustra molitur Medicus, quantumvis doctus atque peritus.

## OBSERVATIO II.

Juvenis robustus, sed ob vitam sedentariam sanguine non *Febris pe-*  
adeo puro plenus, animuin laxandi causa Januario exeunte *techialis*  
ruri exspatiatus, societatem cerevisiam gravem & spirituosam *sub diar-*  
potantium offendit. Assidet cum iis, & vesperi domum iterum *hæa fu-*  
concedens, corpus admodum perfrigerat. Die post de mo- *nesta.*  
lesto dentium conqueritur dolore, cum corporis lassitudine viriumque languore plane insolito. Altero die accedit tussis, cum sreatu, coryza, & æstu, non tamen adeo gravi. Aucta vero præterea debilitas, appetentia periit cum somno, intercursarunt subinde horripilationes & extremorum refrigerationes, caput torpidum fuit, licet æger non lectum peteret, sed officio suo fungeretur. Accedente quarto die morbus ægrum affixit lecto, hinc consultus Medicus, qui serum ex lacte cocto succo citri coagulato bibere jussit. Factum id, sed subsequutus alvi fluxus vigesies & ultra ægrum intra diem & noctem ad sellam urgens. Inde vires magis collapsæ, partium tremor cum delirio, alvo quamvis fluente accessit, sub quo quinto die comparuerunt maculæ petechiales, atrociam morbi tamen non levantes, sed sexta stercora & urinam sine sensu reddidit, respiratio facta anhelosa & nocte septimum diem antecedente mors excepit.

### *Epicrisis.*

Hanc etiam febrem fuisse ex malignis illis catarrhalibus & petechialibus, quæ per aliquot menses nostra hac in urbe

circumiverunt, testatur dentium dolor rheumaticus, coryza, & raucoedo cum tussi. Malignitatem autem junctam ingens statim virium lapsus, appetitus plane prostratus & somni defectus, cum pulsu celeri, debili atque frequenti, nec non capitis dolor ac torpor faciunt testatum, licet ægrôti, adstantes ipsique minus periti Medici, hæc haud raro minus ex æquo attendere soleant. Serum igitur lactis in principio ad alvum laxandam & sistendam sanguinis ebullitionem, non quidem sine fructu commendandum. Sed ubi catarrhales affectus jam per aliquot dies adfuerunt, minus proficua sunt ea remedia, quæ alvum turbant & serum impurum ad interiora ac inferiora vocant. Licet etiam alvi laxitas, in catarrhalibus malignis criticis diebus sponte proveniens, admodum sit salutaris; primis tamen diebus alvum stimulantia nocent. Intus enim retinent materiam malignam, ac ut inflammatio ventriculi & meningum tandem iphacelosa inducatur, faciunt. Tum potius semper perspiratio servanda libera & serum corruptum dissipandum per blanda diaphoretica & regimen moderatum. Neque minus in plethorico ejusmodi corpore ante invasionem admodum proficua fuisset venæsectio, subjuncta postea moderatiori & longiori diaphoresi.

## OBSERVATIO III.

*Petechia  
in sorore  
& fratre  
diversa.*

Virgo triginta aliquot annorum, mensium anomaliis ab aliquot annis obnoxia, anno abhinc affecta fuerat erysipellate capitis, quod in fistulas mali moris, glandulas colli, genus faucesque perforantes, desiit. Sanata tamen adhibita omni diligentia a Medico & Chirurgo, sed ab eo tempore languidior mansit & macilenta. Januario hujus anni ineunte subito ipsam infestavit ingens capitis dolor, cum torpore, somnolentia, virium languore, valida quoque tussi sicca. Increvit hæc debilitas indies, nihil plane appetiit, nec dormivit, simul conquesta est de præcordiorum & spirandi angustia, pulsu frequenti, sed debili micante. Sexto die passim in pectore comparuerunt punctula, septimo accessit delirium, sequutæ

quartæ convulsiones epilepticæ ac mors, post quam maculæ magis venerunt in conspectum. Frater demortuæ insperato hoc discessu mirum contristatus, paullo post pariter conqueri cœpit de dolore capitis & artuum, sine catarrhosis defluxionibus, vires conciderunt, appetitus periit, somnusque defuit, quarto die petechiæ visæ ac pathemata mitigata, septimo cum caloris incremento sub inquietudine & anxietate accessit purpura & petechiales maculæ disparuerunt. Successive tamen convaluit, terreorum bezoardicorum & absorbentium cum succo citri & aquis diapnoicis & analepticis usu ac potu ptisanæ.

*Epicrisis.*

In virgine hac orta febris sine contagii suspitione. Sed docet omnino experientia, corpora valetudinaria, imbecilliora & ubi impuritas ex mensibus retentis, gonorrhea, vel lue venerea in sanguine & succis lymphaticis restitat, facile corripitur grassantibus ex communi aëris insalubris vitio morbis & promte quoque suscipere contagium, quod nihil metuentibus a Medicis, Chirurgis & assistentibus contagiosis morbis decumbentibus, affertur. Quod autem ab initio statim exquisitus & continuus capitis adfuit dolor, cui deinde delirium cum convulsionibus epilepticis junctum, id procul dubio ob debilitatem capitis ex perpeffo erysipelate exulcerato factum. Dein frequentioris etiam experientiæ est, contagiosis morbis defunctorum consanguineos, sola sæpe animi perturbatione ac mœstitia diuturna, in eundem incidere morbum. In his vero a sanguinis missione, nisi corpus sit eminentius plethoricum, merito abstinendum, item a valide commoventibus & evacuantibus, ac vires potius erigendæ, perspiratio secundanda & succorum vitalium integritas conservanda. Petechias comparente purpura rubra disparuisse, in exanthematicis hujus anni febribus sæpe visum, & quidem sine damno, sed ubi declinante petechiali morbo supervenit purpura alba, id ut plurimum fuit lethale.



## OBSERVATIO IV.

*Petechialis febris ex situ erecto lethalis.*

Acres cum commilitone rixas habuerat adolescens viginti annorum, simulque terrore fuerat percussus. Nocte insequenti somno caruit, ac debilitatem, lassitudinem appetitusque prostrationem per dies aliquot perferens. Quinto post die horrore, præcordiorum anxietate & astu præternaturali affectus est, cum pulsu celeri ac debili. Medicus in consilium vocatus, statim exhibuit vomitorium, sanguinem subtraxit & subjunxit tincturam bezoardicam, nec non pulverem bezoardicum cum & sine nitro. Sexto die comparuerunt maculae rubæ & nares aliquoties sanguinem stillarunt, somnus fuit paucus, vel nullus, urina sanorum similis, vires tamen non penitus visæ prostratæ, sed æger surrexit subinde & obambulavit, defuit quoque delirium. Bene igitur omnia cessura spes fuit & morbus lenissime bezoardicis temperatis tractatus. At quum septimo die electo surgeret æger & per horæ quadrantem erectus sederet in conclavi licet moderate calido & sufficienter tectus, subito in lipothymiam incidit cum horrore cutis, pleræque petechiæ evanuerunt & quæ manserunt nigrae comparuerunt, accessit ingens præcordiorum anxietas cum furore, ita ut gladium in adstantes stringere & ex fenestra se præcipitem dare vellet. Usurpatus quidem pulvis bezoardicus cum nitro & camphora, conquievit etiam tantisper delirium, sed debilitas increvit, horripilatio perstitit, accesserunt convulsiones & sub finem diei septimi mors inopina.

*Epicrisis.*

Nunquam periculo carent petechiæ, licet omnia videntur pacata & Medicus conferat cuncta. Quodvis enim accidens in pejus omnia mutare valet. Hæc situs erectus tam perniciosam mutationem, delirium & mortem adduxit. Qui quantopere in morbis acutis & exanthematicis sit noxius, supra jam pluribus monuimus ac ut evitetur iterum monemus iterumque.

OBSER-

OBSERVATIO V.

Generosa femina quadragenaria, corporis obesi, laxi & *Petechia-*  
 spongiosi, genio indulgens variisque edulis dulcibus, acidis, *lis febris*  
 lacte, vino quotidie delectata, tempore quo malignæ exan- *vino potu*  
 thematicæ febres circumibant, iisdem fere, quam quibus hæ *sanata.*  
 incedebant affecta fuit pathematibus. Adfuit quippe corpo-  
 ris lassitudo cum inquietudine, cutis horripilatione, capitis  
 dorlique dolore, accedente postera die præcordiorum anxie-  
 tate viriumque prostratione. Datum illico lene emeticum,  
 quod miram vitiosorum humorum colluviem evexit, & anxie-  
 tatum & cephalalgiae levamen attulit. Tertio die vena in ma-  
 nu pertusa & sanguis largiter eductus, qui frigefactus crustam  
 glutinosam in superficie contraxit. Sed post venæsectionem  
 pejus habuit, sopor præsto fuit continuus, facies tumida &  
 fauces squalidæ factæ, urina vero tenuis naturali similis seces-  
 sit. Quinto die spiritus factus difficilis & post noctem admò-  
 dum inquietam prodierunt maculæ rubræ in collo, dorso ac  
 manibus, quæ quidem anxietates levarunt, soporem autem  
 non sustulerunt. Interim ob alvum clausam clysteres injecti,  
 qui ingentem foetidorum stercoreum copiam evocarunt. Se-  
 ptimo etiam die largo corpus sudore perfusum. Nihilo ta-  
 men minus sine sensu ac motu jacuit ægra, appetens vinum,  
 quod ipsi suspensa manu concessum. Quum vero inde melius  
 haberet ac virium animi corporisque sentiret incrementum,  
 post trihorium quatuor iterum vini Rhenani unciae potui datæ,  
 iisdemque potis, mirifice se viribus refici asseveravit. Sequu-  
 tus postea sudor largior, infuso theæ adjutus, sopor mentis-  
 que stupor discessit, corpus quoque cum animo vires recepit  
 & ægra ad sanitatem demum traducta, alternis semper, vel  
 ternis diebus, alvo laxantibus subducta.

*Epicrisis.*

Quo major pravorum succorum prima in regione col-  
 luvies; eo graviora etiam in febribus popularibus mali mor-  
 ris adsunt symptomata. Urinæ quoque plerumque mingun-

tur tenues, præcordia anguntur & caput exquisite dolet. Ad hanc igitur circumstantiam artifici cum cura attendendum semper. Tum enim optimum consilium, illico leni emetico sordes expurgare. Merito etiam sanguinis missioni præmittitur purgatio. Venæsectio heic quidem minus feliciter cessisse visa est, sanguine ad caput allecto & soporem faciente. Quare etiam Practicorum plurimi venam in superioribus pertundere dissuadent, ac ut potius in pede id fiat præcipiunt, eo quod inde non facile congestio sanguinis ad caput proritetur. Crusta autem illa glutinosa sanguini emissio innatans non mali fuit ominis. Nam *Baglivus* jam *lib. I. opp. pag. 149.* disertis verbis scribit ac testatur: *observamus in xenodochio omnes fere ab acutis evasisse, quorum sanguini venæsectione extracto crusta alba atque chylosa supercrevebat: contra mortuos, quorum sanguis valde rubicundus.* Et certe sanguis consistentia crassior non tam facile dissolutorio motui intestino obsecundat, quam tenuis partibus salino-sulphureis scatens. Demum notandum & hoc, quod vinum temperatius, in malignis & petechialibus etiam febribus, non noceat, facta petechiarum eruptione & poris adapertis, sed quod potius vires refocillando, secretorios & excretorios actus partium effoetarum egregie juvet. Cavendum vero ab eo, si inflammationis adsunt indicia in ventriculo & primis viis, si phrenitidis, si cutis arida & sicca.

## OBSERVATIO VI.

Febris  
maligna  
contagio-  
sa venæse-  
ctione  
compres-  
sa.

Biennio abhinc febris maligna contagiosa, non quidem epidemice, sed tantum sporadice circumibat potissimumque complures ex domesticis orphanotrophei Halensis infestabat. Eundem hunc morbum nanciscebatur filius Inspectoris hujus orphanotrophei, Theologi, tam eruditione, quam pietate & moderatione celebris, ipse pædagogii Regii alumnus. Pater impensius hunc suum natum deamans, contristari non modo coepit & de salute tam capitali morbo correpti angi, sed & crebrius decumbentem visitavit, quin lecti & hypocausti socium fecit, ac cum universa familia eodem in conclavi ci-  
bos



bos cepit. Hinc autem factum est, ut omnes successive a contagio inficerentur. Pater quidem statim tertio post die summum virium languorem, capitis artuumque dolorem, somnum inquietum, anxietatem & ardorem circa præcordia, cum plenaria ciborum inappetentia expertus est. Accessit tonsillarum tumor, ardor & æstus faucium, quinto die delirium, postea sudores colliquativi, nono placida mors. Decumbente hoc adhuc, uxorem idem morbus prostravit iisdemque affecit pathematibus, eodem, altero post obitum mariti die, funesto eventu. Excepit virgo his consanguinitate juncta, quæ quinto die pariter expiravit. Ita ut intra quadriduum tres hæ personæ obirent. Medici qui curationi præerant, catarrhalem morbum esse censuerant & ob id venæsectionem omiserant. Sed quum morbus ad reliquos etiam domesticos procederet & rumor passim increbesceret, eundem tantum non esse pestilentem, alius Medicus in consilium vocatus, qui ob capitis dolores, venæsectionem instituendam esse in principio suavit. Hinc omnibus, quotquot postea corripuit, simulac conqueri cœperunt, vena in pede pertusa & conveniens sanguinis quantitaseducta, tam felici effectu, ut non tantum morbus mitior incederet, maculæ petechiales cum purpura, secus quam in primis comparerent, verum etiam ex septem nec unus occumberet, ac ipse contagiosus morbus sic desineret.

*Epicriss.*

Perquam utique notatu dignum, servatos esse qui sanguinis missionem admiserunt, qui omiserunt sub gravi & diuturno delirio periisse, ad quem tamen eventum summa animi tristitia multum torte contulit. De venæsectione quidem, an in ejusmodi acutis, malignis contagiosis & exanthematicis febribus prosit vel noceat? Medici adhuc in utramque partem disceptant. Ego vero cenfeo, absolute nil posse definiri, sed considerandas esse a Medico circumspæcto ac perito circumstantias omnes, quoad indolem, causam, symptomata & tempus morbi, quoad subjectum, corpus ægrotans  
sol-

solidorumque & fluidorum in eo dispositionem. Ego quidem multiplici edoctus sum observatione, verum esse generalem hunc practicum canonem: si corpus est admodum plethoricum, amplis vasibus instructum, sanguinis missioni assuetum, si morbus sanum antea corpus corripuit, nec a communi ad putredinem inclinante aëris vitio obortus, si vehementer statim caput petit ac delirium metuendum; tum utique ante invasionem tam ad præservationem, quam etiam mox in principio, nunquam nocere potest moderata sanguinis missio in pede; quin sub his circumstantiis in morbo Hungarico ipsaque pestilentia venæsectio est utilissima. Subtracta enim nimia sanguinis & humorum copia, cordis & systematis vasorum systole longe liberior redditur atque vegetior, una cum motu humorum ad exteriora, quo per universale illud emunctorium cutis nocens materia expellitur atque diffilatur. Neque minus a sanguinis in partibus inferioribus missione insignis ipsius a capite fit derivatio. Nam res certa est experientia, sub acerbo capitis dolore, illico cordis & arteriarum pulsus immutari, irregularem fieri & inæqualem & pendentem inde functiones vitium capere; & vicissim si caput cum cerebro & nervis a sanguinis stagnatione liberatur, pulsus mox in melius mutari unacum motu humorum progressivo vitali. Quod si vero adductæ hæ circumstantiæ desunt, corpusque minus sanguine redundat, noxia omnino & pernicialis sanguinis missio intempestiva. Quumque pauci ex Medicis prudentia polleant discretiva, non mirandum, generoso hoc remedio plus sæpe damni, quam emolumenti asserri.

## OBSERVATIO VII.

*Febris  
maligna  
exanthem  
atica  
jugulata  
emetico.*

Quum anno MDCLXXXIX. hiemali tempore grassaretur febris maligna, quandoque exanthematibus stipata, multosque, præsertim perversa medicatione exceptos, trucidaret, tota domus Consilarii cujusdam aulici eodem infecta est, & ipse cum uxore graviter decubuit, nostra tamen opera, benedicente DEO, regimine maxime temperato & lenioribus diaphoreticis, convaluit. Postea fratrem ipsius similis inva-

fit

fit morbus, iisdem cum symptomatibus, virium prostratione inprimis, capitis & artuum dolore, cum inquietudine. Ego statim in principio vocatus, lene exhibui emeticum ex aqua florum sambuci, cardui benedicti ana uncia, tartari emetici granis duobus, mixturæ simplicis guttis XX; quo assumpto ter vomuit viscidos cum bile humores & post vomitum valide sudavit. Promotus hic sudor circa noctem pulvere ex cornu cervi usti, antimonii diaphoretici, lapidum cancrorum, ana drachma una, cinnabaris, nitri puri ana drachma dimidia, camphoræ granis duobus, qui in sex doses divisus & ter quotidie assumtus. Potui præterea data ptisana ex cornu cervi, scorzonera, cum succo citri. Quibus morbus prima in herba feliciter jugulatus & æger post aliquot dies sanus prodiit ac vegetus. Quumque brevi post famuli bini eodem modo conqueri inciperent, eadem methodo facili & explicita curatione ipsos ex ancipiti levavi.

#### *Epicrisis.*

Attentionem utique hæc meretur observatio, cujus generis plures notavi, malignum scilicet periculosum morbum, præsertim si a contagio accidit corporibus alias bene valentibus, nec adeo impuris, vel imbecillis, mox in principio congruis remediis opprimi posse ac jugulari. Scilicet quum mialma contagiosum primo omnium sese cum salivali latice misceat, sub hoc fermentescibili succo acrem malignam virtutem propaget atque multiplicet, hincque in naribus, faucibus ac œsophago catarrhosi quid simulet, & salivale fermentum destruendo, appetitum obtundat, quin etiam acredine sua nauseam & cardialgiam faciat; sane nihil magis indicatur atque e re est, quam ut istud proxima via per efficax conveniens pharmacum ocysus, antequam latius procedat ex primis viis, vomitu & salivatione evertatur, postea vero ministerio accommodi diaphoretici reliquæ miasmatis virulenti per poros cutis evaporent. Sed cavendum omnino ab alexipharmacis, inter quæ minime connumeranda camphora, præsertim cum nitro remixta. Nam hæc neutiquam, ut vul-



garis fert opinio, sanguinem commovet, sed vel unica olei cinnamomi, aut caryophyllorum guttula, plus exæstuat, quam camphoræ drachma dimidia. Non tamen præmittendus potus diluens sufficiens temperatus ex ptisana, ad componendum sanguinis orgasmum. Ego novi, Præcticum quendam non infelicem in more habuisse, in principio catarrhalium & malignarum petechialium, simulac languor & ardor corpus infestavit, serum ex lacte cocto cum succo citri factum, largiter, sed per vices potui dare, tam felici effectu, ut post aliquot dies ardor, dolor, languor & gravedo disparuit.

## OBSERVATIO IIX.

*Purgatio  
ad præ-  
servatio-  
nem mi-  
nus prosi-  
cua.*

Plures adhuc suppetunt observationes, sed ne nimii sumus in historiis, brevitatis causa quædam duntaxat salutaria ex observationibus deprompta monita afferemus. Scilicet frequentiori experientia compertum habeo, uti in quacunque exanthematica & contagiosa febre, sic etiam in petechizante & petechiali, non ita multo post contagio tactos fuisse, præsertim ex domesticis, qui ad arcendum morbum laxans, vel purgans assumsere. Licet autem alvi subductio in benignioris indolis exanthematicis minus noceat, si tamen peioris naturæ, uti petechiales, præstat utique ab omnibus alvum stimulantibus abstinere. Etenim ad cicurandam veneni contagio concepti indolem ipsumque iterum exturbandum, tum ad prævationem in metuentibus, tum ad curationem in affectis, nihil aptius & efficacius, quam perspirationem liberam servare & integram, qua, præsertim in imbecillioribus, per alvum vacuantia imminuta, venenum hoc magis detinetur intus. Hinc *Celsus* jam inter præcepta ad pestilentia incursum arcendum etiam habet hoc: quod alvus non sit movenda, aut si jam per se mota est, comprimenda.

*Ex regi-  
mine &  
dieta per-  
versa re-  
cidiya.*

II. Crebriori edoctus sum experientia, declinante ac finito morbo, periculosiores, immo lethales excitari recidivas, quando ægri corpus plus justo auræ frigidiori exponunt, in pavimento nudis pedibus incedunt & ventriculum adhuc lan-

guen-

guentem nimia ciborum, tanto magis carniū, insalubrium aut semicoctorum copia, simul ac semel onerant. Quare minus etiam sanitati suorum consulunt ii medentur, qui nimis cito appetentiam usu elixiriorum stomachicorum, quæ spiritus mineralis acidus ingreditur, excitare contendunt. Et novi utique tum a copiosiori cibo, si non recidivæ, tamen statum quandam cachecticum, cum tumore pedum & abdominis accessisse & tardissime penitus convaluisse ægros.

III. Neque minus experientia constat, diu omnino latere posse susceptum in corpore contagium, interdum per aliquot septimanas, antequam in actum ducatur & pernicialem vim exserat. Atque hinc fit, ut qui eadem cum ægris domo contenti, sæpe successive unus post alterum aliquot hebdomadam spatio morbo afficiantur, licet jam antea aliquamdiu de lassitudine spontanea & functionum vitalium & animalium languore fuerint conquiesci. His igitur cito succurrendum congruis diætetis & pharmaceuticis, præsertim iis, quæ circulum sanguinis & perspirationem placide juvant, quæ putredini resistunt & crasin sanguinis custodiunt, de quibus supra mentio facta, quo ocyus venenum iterum e corpore proscrubatur.

IV. Sæpius quoque observavi, quod tempore insalubri, quo ob aërem gravem febres mali & benigni moris catarrhales & petechiales populares habuerunt circuitus, ex benigna facta sit præter spem maligna, a contagio, quod Medici a vere malignis & petechialibus decumbentibus, cum vestimento aut capillitio attulerunt. Ut adeo non sine ratione a Principum aulis & persona arceantur Medici, qui curationem malignorum & contagiosorum morborum, tractant & sæpius inter ægrotos versantur.

## CAPVT XII.

DE

## FEBRE PESTILENTIALI.

## THESES PATHOLOGICAE.

## §. I.

*Definitio.* **F**ebbris pestilentialis est acutissima, a miasmate venenato ex locis orientalibus advecto orta, ac nisi vigore motuum vitalium venenum per bubones & carbunculos cito propellatur, lethalis.

## §. II.

*Differen-  
tia.*

Differt in eo hæc pestilentialis ab aliis contagiosis, malignis & exanthematicis febribus, quod omnium sit acutissima, ac interdum primo statim, vel secundo die jugulet. Dein nostris in regionibus nec epidemia, nec sporadica ex prava victus vel vivendi ratione, aut insalubri aëris constitutione prognata, sed sub aëre saluberrimo, a solo contagio ex calidissimis jam infectis orientalibus plagis advecto, ortum ducit. Tum hoc habet peculiare, quod non ut aliæ malignæ febres & putridæ, per largos sudores, alvi fluxus, aut alias excretiones, sed tantum quod veneno ad partes externas glandulosas critice & salutariter protruso, per tumores in abscessus desinentes, solvatur. Porro secus ac in aliis contagiosis & petechialibus quoque febribus, tanta constantia & tenuitas miasmatis pestilentialis est, ut promte adhæreat rebus porosis, & ad multa milliaria, integra manente perniciali sua vi, transferri possit. Demum singulare in hoc miasmate infectivo, quod prava & multiplicativa ipsius indoles intenso frigore non modo cicuretur, sed & plane extinguatur, quo fit, ut tempestate frigida & in regionibus præfrigidis, rarius, vel plane non, sub calido autem coelo & vehementissime & frequentissime grassetur.

## §. III.



§. III.

Quemadmodum vero in omnibus contagiosis & mali-<sup>Initium.</sup>gnis febribus miasma venenatum cum aëre haustum salivali fermentescibili latici sese insinuat, ac in his quas pertransit partes perniciosam suam vim exserit primum: ita idem etiam quam maxime evenit in pestilentiali contagio. Hoc enim mox caput, cerebrum, nervos & purissimum illud lymphaticum nervorum fluidum petens, capitis torporem, gravitatem, somnolentiam & acerbum dolorem, sensuum stuporem, rerum omnium oblivionem, inquietudinem, vigilias ac virium prostrationem inducit. Per fauces ad ventriculum ventum, ciborum fastidium, nauseam, præcordiorum anxietatem, cardialgiam syncopitica, vomendi conatum, nec non vomitum facit. Dein ad membranas medullæ spinalis tunicasque arteriarum nerveas delatum, horrorem, pulsum languidum, parvum, contractum, frequentem, quin lipothymiam, producit. Quæ quidem omnia statim inter initia sunt ordinaria pestis indicia atque symptomata, tanto vehementiora & celerioris operationis, quo plus venenum pestilentialiale aliorum contagiosorum & malignorum morborum miasma virulentia superat.

§. IV.

Quæ dein sub ipso morbo præsto sunt pathemata gravia <sup>Et decur-</sup> & multa, nullibi plenius & accuratius enarrata, ac in prima <sup>sus morbi.</sup> de hoc morbo descriptione, quam vetustissimus Historicus Thucydides, lib. II. de bello Peloponessico de peste Attica dedit. Retinebimus igitur hanc morbi historiam, quam posteaquam dixisset ex Æthiopia in Ægyptum & inde Athenas pervenisse, sic inquit: ego vero quod factum est narrabo; & quibus animadversis, si quando rursus incidat, possit aliquis provisum quippiam non ignorare, hæc monstrabo, qui tum ipse morbo laboravi, tum alios laborantes vidi. Itaque annus ille, ut in confesso est, inter omnes maxime aliorum morborum immunis fuit; quod si quis alio prius morbo laborasset,

in hunc omnes decumbebant. Alios vero ex nulla occasione, sed continuo, quum sani essent, primum capitis calores invadebant vehementes, & oculorum rubores, & inflammationes, atque interna paries, & fauces, & lingua sanguinolenta statim erant, spiritus difficilis & satiens exibat. Deinde ex his sterminatio & raucoedo succedebant, ac non multo post labor in petus descendebat cum iussi vehementi. Quod si quando ad cor inhasit, tum id subvertit, tum purgationes bilis, quacunque a Medicis recensentur, subierunt, atque hæc magna cum defatigatione. Plerisque singultus incidit inanis, convulsionem afferebat vehementem, quæ nonnullis sub hac cessabat, aliis vero multo post. Porro corpus extrinsecus tangenti non admodum erat calidum, neque pallidum, sed subrubrum, lividum, parvis pustulis & ulceribus scatens. Interna vero partes usque adeo flagrabant, ut ne tenuissimum quidem stragulum, aut linteam impositum, neque aliud quippiam, præter nuditatem, ferrent. Ac jucundissimum plane erat in aquam frigidam seipsos conjicere; quod multi fecerunt ex iis, in quibus cura non adhibita, qui in puteos se dederunt inexhausta siti vexati; & perinde erat plus ac minus bibere. Atque impotentia quedam, quæ iis quiescere non licebat, & vigiliæ perpetuo comitabantur. Corpus, quamdiu morbus vigeat, non contabescebat, sed præter spem labori obsistebat. Quam ob rem vel interierunt plurimi novem & septem diebus ex interno astu, cum aliquid roboris adhuc haberent; vel si effugissent, morbo in ventrem irruente, & exulceratione in eodem facta, & diarrhœa simul immodica subeunte; plerique mox præ imbecillitate perierunt. Etenim initio sursum facto malum, quod in capite primum confederat, universam corpus pervadebat. Quod si quis maxima hæc superasset, huic extremarum partium noxa superveniebat. Malum enim ad pudenda & ad summas manus & pedes decumbebat; & complures his amissis evaserunt, nonnulli & amissis oculis. Nonnullos etiam, quum primum exsurgerent, cepit oblitio rerum aque omnium, ac tum se ipsos, tum amicos ignorabant. Morbus igitur, concludit paucis inter-

terjestis, (ut alia multa pratermittamus insolita, quæ cuique seorsum evenerunt, aliis alia) talem in universum habuit ideam. Alius præterea nullus infestavit eo tempore ex iis, qui consueti habentur, si quis autem accidisset, in hunc desinebat. Ac perierunt nonnulli quidem ob negligentiam, alii vero diligenter etiam curati. Neque ullum, fere dixerim, compertum est remedium, cujus usu homines adjuutos esse constaret. Nam quod uni opem iulerat, id ipsum officiebat alteri. Jam vero nullum corpus visum est adversus morbum sufficere, quod ad robur & debilitatem attinet, sed sublata sunt omnia, quavis etiam vivendi ratione ad curationem uterentur. Res porro miserrima fuit in universo morbo tum animi dejectio, cum quis se agrotare intelligeret; nam mente protinus ad desperationem conversa, multo se ipsos magis consternebant, neque reluctabantur; tum vero quoniam alter ab altero, dum curationis officio fungerentur, instar ovium occidebant, atque hoc maximam cladis partem attulit.

## S. V.

Neque tamen in peste unius ejusdemque indolis semper *subjecta* sunt symptomata, sed multum utique secundum temperamēta & constitutiones corporum variant. Quam diversitatem probe cognoscere & scrutari oportet Medicum. Id vero omnes qui de pestilentiali morbo scripserunt unanimi suffragio confirmant, corpora quæ spongiosioris, rari & porosioris, nec non obesi sunt habitus, temperamento sanguineos & phlegmatico-sanguineos, sexu feminas, ætate juniores ac infantes, animo timidos & abjectos, vitæ genere pauperes, insalubrem diætam colentes, crapulis deditos & comestationibus in seram noctem indulgentes, longe celerius corripī & gravius decumbere hoc morbo, quam qui animo fortes ac intrepidi, corpore macilenti, nervosi & amplioribus vasīs dotati, viri, senes, fluxu hæmorrhoidali obnoxii, item qui fonticulos & ulcera gestant aperta. Neque minus per observationes compertum, nihil ad suscipiendum & deletē-  
rium



riam miasmatis virtutem intendendam aptius esse metu, timore mortis animique consternatione, adeo ut etiam quosdam solo terrore peste affectos & extinctos esse constet. Nam hi animi affectus sunt inter omnes præcipui, qui vitalem cordis arteriarum motum cum sanguinis circulo minuunt, destruunt & vires tam vitales, quam naturales & animales dejiciunt, quum tamen motuum beneficio venenum conceptum sit exterminandum.

## §. VI.

*Miasma-  
tis natu-  
ra.*

Cujus autem porro indolis ac specificæ naturæ sit venenum, quod pestem excitat, a priori accurate determinare admodum difficile, quia sensibus minus obvium. Quantum tamen ratione assequi & a posteriori judicare licet, duplicis esse videtur, partim sulphureæ putridæ multiplicativæ, instar fermenti, partim subtilis valde acris & causticæ, plus tamen alcalinæ, quam acidæ, naturæ. Putrida enim valde & peregrina sulphurea indoles ex eo patet, quod omnes maligni ejusmodi morbi præcipue suam originem ab exhalationibus putridis, quæ ex cadaveribus inhumatis, aquis stagnantibus putrescentibus & aliis foetidis excrementitiis sordibus, trahant, & quod ipsum hoc miasma illico contamine nervorum fluidorum, motum solidorum systalticum sistat & corruptionem sphacelofam succis inducat. Causticam autem subtilem acrimoniam inesse miasmati ex eo concludendum, tum quod contagiosorum morborum ingressum ut plurimum antecedit copia insectorum sale caustico præditorum & ex putredine genitorum, tum etiam, quod nerveas fibrillas vellicando & rodendo, dolorem, ardorem, tumorem & inflammationem causetur, conspicuum satis in bubonibus atque anthracibus.

## §. VII.

*Solvitur  
cirrice  
per tumo-  
res.*

Pestilentiale hoc intus susceptum venenum, illico, ut supra diximus, omnes omnino in corpore functiones turbat atque pervertit, ac nisi cito ab internis ad externas partes propellatur, certissime necem infert. Neque tamen hoc ut  
in

in aliis malignis fit per largos sudores, neque per alvi, aut urinæ fluxum, neque per hæmorrhoidum, aut mensium profluvium, neque etiam per narium stillicidium, spontaneum æque ac arte proritatum, ut potius, tales, præsertim effusiores excretiones, minentur exitium. Sed salutaris & critica, qua perfecte solvitur pestilentialis morbus, excretio, absolvitur per tumores in externo corporis ambitu prodeuntes; ita quidem, ut non secus ac in erysipellate, intra tertium & quartum diem eadem contingat, & quo citius ac melius, ea magis morbi inde mitescat atrocita. Formale enim venenum his tumoribus contineri atque excerni, vel ex eo patescit, quod si Chirurgus lancetta, qua aperti, venam sani hominis incidat, is illico etiam corripiatur peste.

§. IIX.

Duplicis autem generis sunt pestilentiales hi tumores. *Primum a Græcis vocatur communi omnium tumorum nomine bubo. Occupant hi bubones maxime glandulosa loca, frequentius inguinales & axillares, quandoque etiam parotides & mammarias glandulas, item maxillares inferiores sub mento, nec non asperæ arteriæ appositæ, ac sese manifestant tumore glandularum duro, dolente, tensivo, cum ardore, ac si boni moris sunt, intumescunt, molliores fiunt & suppurantur. Alterum vel an-genus, primo longe deterius, græco nomine audit anthrax, thraces propria significatione carbonem ignitum designans, unde Latino-  
rum diminutivum carbunculus. Celsus quidem lib. V. cap. XXIX. sic describit anthracem: rubor est superque eum non nimium pustula eminentes, maxime nigra, interdum sublivida, aut pallida. In his sanies esse videtur, infra color niger est. Ipsum corpus aridum & durius quam naturaliter oportet. Circa quod quasi crusta est, eaque inflammatione cingitur, neque in eo loco levare cutis potest, sed interiori carni affixa est. Et Mindererus, qui ipse pesti interfuit & de ea egregie scripsit ita de carbunculis habet: quando anthrax magnitudine grani sinapis, aut cannabis consedit, contrahit circum limbum & circulum, aut ardentem halonem, amplitudine orbis mensalis, prout carnem & locum attingit.*

*Caro quam tetigit a sana separatur ac uti eschara, seu caro purida, excidit, ut hiet cavum ac si lupi exedissent.* Ab his carbunculis nulla corporis pars immunis est, obsident tamen quam maxime membranas musculorum & substantiam cutis nervosam ac fibrosam, in dorso potissimum, brachiis ac femoribus. In loco quem afficiunt ægri primo pruritus sentiunt exquisitum, si scalpunt, pustulæ emergunt, coloris vel rubri, vel lividi, vel albo purpurei, vel nigri. Pustulæ compressæ sunt & pure plenæ videntur, ac sub una, vel pluribus ex iis, crusta cinerea, vel nigra concrevit, qua ablata, caro corrupta & spongiosa apparet, cum dolore intolerabili & ardore carnis circumjacentis, ac tandem insequitur totalis partis sphacellatio, sive mortificatio.

## §. IX.

*Sphacelo  
necat.*

Quibus autem lethalis est pestilentialis morbus, ex his nonnulli primo statim, vel secundo die syncope pereunt, procul dubio ex Panico, quo percussi terrore. Sed plurimi, quando venenum vel non expellitur, vel expulsum subito relabitur, & nervosis tunicis nobiliorum partium pleuræ, œsophagi, ventriculi & intestinorum, nec non meningibus inhærens, inducit sphacelum, qui ocyus ad omnia viscera ipsumque sanguinem serpit, quo fit, ut cadavera illico mire foeteant, intumescant & citissime putrescant. Quandoque etiam, quando nimia tumorum pestilentialium copia prodit, ob inflammationem, dolorem & ardorem intolerabilem, ex febre symptomata, non secus ac in variolis fieri solet, occumbunt.

## PRAESERVATIO ET CURATIO.

## §. I.

*Optimum  
preserva-  
tium su-  
ga & tem-  
perantia.*

Quum in comperto sit, nostris in regionibus pestilentiam non gigni, sed ex remotis locis advehi, non securius utiturque & certius datur consilium praeservatorium quam fuga contagii. Vetus enim jam *Celsi* est præceptum, ut adhuc inte-

ger,



ger, qui tamen securus esse non possit, naviget & peregrinetur, quod etiam in peste Italica anni MDLXXV. eximie profuisse, testis est *Natalis Comes hist. lib. XXVII.* Et *Sanctorius Med. stat. Secl. I. aph. 138.* libere profitetur: *qui aliud remedium pro vitanda peste instituunt, quam fugam, vel sunt homines ignorantes, vel volunt aruscare.* Eandem etiam ob causam optime saluti civium consulunt principes, qui tempore pestis advectionem & accessionem contagii modis arcent omnibus, si vero domus fuerit infecta, sanos illico segregare & omnem mortuorum supellestem comburere jubent, ne cum ea ad alios transferatur & morbus. Omnibus vero grassante pestilentia temperatissime vivendum, vitandus omnis excessus in rerum non naturalium usu, maximeque animi affectibus, & abstinendum a cunctis, quæ vires ullo modo deicere, perspirationis successum turbare & cruditates prima in regione gignere possunt. Inprimis animus firmandus, & terror, metus ac pusillanimitas discutienda, quum certum sit, timorem ac terrorem plures in peste necare ac ipsum miasma.

§. II.

Qui autem inter infectos versari necessum habent, *his in acidis.* videndum, ne miasma succos vitales subeat, nec salivales intra primas vias stagnantes humores in sui societatem, quod facile fit, pertrahat. Hunc in finem commendanda frequens expuitio & oris, cum aceto vini, vel vino colluitio, vel horum in nares attractio. Major efficacia adhuc, si scordio, ruta, vel corticibus citri fuerint imbuta. Acidum enim genuina miasmatis putridæ & sulphureæ indolis videtur esse antidotus, quippe quod teste Chymia mechanica sulphur & salia volatilia figit atque enervat. Quare longe tutius est acida degustare, vel in ore continere, quam radices alexipharmacas zedoariæ, angelicæ, ostrutii &c. masticare. Expediit hinc quoque tum vel vinum Rhenanum, vel aceti bezoardici aliquot cochlearia, cum aqua aut vino diluti, assumere.

Locuples certe hanc in rem testis est *Forestus*: ego, inquiens, cum grassante peste, nusquam trepide, plenus civium studio me ad agros conferrem, illis auxiliis ac potissimum mali citri putamine succulento, dentibus attrito, me munire suevi. Turcæ, memorante *Cole lib. de morb. acut. pag. 88.* regnante pestilentia, frequentius utuntur succo limonum, quem liberaliter omni jufculo instillant.

## §. III.

Et fonticulis.

Inter externa adversus contagionem præsidia plures commendant fonticulos; inducti forsan primum observatione, qua constat, eos, qui ulcera chronica & scorbutica in artibus gestarunt, a peste & aliis contagiosis morbis fuisse immunes. Multus inprimis in laudanda hac fonticulorum virtute est *Hildanus. Observ. chirurg. cent. IV. obs. XXIII.* sic habens: *Neminem autem, quod notandum, eorum, qui fonticulos in cruribus & brachiis habuerunt, præter unum aut alterum summe cacochymicum, peste obiisse memini, & proinde præsentaneum præservativum tempore pestis esse, cum in aliis multis, tum etiam in memetipso expertus sum.* Et idem mihi quoque a Medicis qui pesti Erfurtenfi interfuerant, relatum olim esse, memini. Ratio tam egregii effectus prophylactici videtur esse hæc, quod materia suscepti miasmatis, quæ firmiter adhære solet serosiori sanguinis parti, naturæ vigore ad partem cui fonticulus infidet, tanquam debiliorem, cum hac ceu vehiculo ablegetur & per hoc emissarium excernatur, unde tum sæpe circa fonticulum insolitus dolor ac tumor observatur. Forsan etiam confidentia quam gestantes de hoc, tanquam certissimo foveant præsidio, metum excutit & resuscitando animi vires juvat, eodem modo ac de amuletorum adversus pestem virtute censendum.

## §. IV.

Indicationes & curatio.

In curatione porro omnia a Medico perito hos in fines dirigenda: I. ut ope naturæ expulsiōem suscepti veneni per congruas vias maximeque tumores illos criticos promoveat horumque habeat rationem curate; II. ut virus, quæ cum  
vita

vita pari passu ambulant, suscitet & urgentibus symptomatibus occurrat. Sed quum quo pacto & quibus hæc rite sint perficienda, ego ex propria tradere nequeam experientia, aliorum utar, & methodum, quam in curanda peste summo cum fructu adhibuit doctissimus pariter & exercitatissimus Medicus, *Joannes Langius*, heic inferam, cui postea judicium meum & monita rationi & experientiæ congrua subjungam. Ita autem gravis hic auctor suam pestem curandi rationem lib. I. epist. XLIX. describit: *Jam tu probe nosti, me multos, de quibus etiam conclamatum erat, in hac pestifera lue hac methodo curasse. Primum, si alvus, aliquot dies ante morbi initium, parum, vel nihil excreverat, tum glande imposita, aut levi enemate eam exoneravi. Postea alexipharmacum sudoriferum exhibui, quod, pro ratione ætatis ac virium, sudorem duas, vel tres, aut plures horas, promoveret. Cordi epithema applicui. A sudore hora sexta, vel septima, relictis tamen aliquo jussulo viribus, venam opportunam secui, ac mox ab alexipharmaco aliis singulis diebus, mane & vespere, potagia alterantia, quæ sua qualitate & substantia veneno resisterent, exhibui, & cor quoque confortarent, qualia sunt, quæ ex succo citri, limonium, aurantiorum, acetosa & jugula, cum momento aceti & saccharo decocta conficiuntur. In morbi declinatione, si appetitus edendi languebat, ad reliquias morbi extirpandas, medicamentum ex rhabarbaro, agarico, cassia, aut rore Syriaco, sive manna & tamarindis Indorum exhibui. Postremo Chirurgis, ne ulceris aut carbunculi consolidationem precipitarent; coquis vero ut præscripto tempore commoda esculentia & potulentia agro suppeditarent, edixi. Quæ curationis ratione ingens agrorum numerus, Deo optimo auspice, convaleuit. Bubonibus, pergit paucis interjectis, vero & carbunculis, si circa emunctoria, juxta aures parotis, sub axillis abscessus, in inguinum adenibus bubo, virtute expulsa eruperit, aut interim carbunculus in brachiis aut cruribus effloruerit, tum festinaret, veluti in vulneribus virulentis, medicamenta quæ vene-*



num extrahunt ad locum applicato, vel cucurbitulas, aut emplastrum ex fermento, iheriaca, farina, sinapi & cepa sub cineribus cocta conficito, additis opoponacis & galbani gummis, acerrimo aceto solutis, imposito, & abscessum ante maturationem scarifica, aut aperi, vel cauterio adurito. Si vero patiens ignem veretur, cauterium potentiale ex cantharidibus & fermento confectum, aut contusam ex oleo flammula radicem applicato, quæ sua virtute calorifica & ardente non modo noxios humores attrahunt, sed & non raro factas ex his collectiones aperiunt.

## §. V.

Initiante  
& vigen-  
te.

Est utique hæc pestem curandi methodus rationi consentanea. Nam in omni morborum curatione sedulo tenendum hoc monitum, ut si alvus sub initium per aliquot dies, parum, vel nihil excreverit, leni enemate ducatur, quo ab excrementis liberentur intestina, ne inde tam symptomata exacerbentur, quam remediorum virtus obtundatur. Dein probandum merito auctoris institutum, quo commodo alexipharmaco sudorem per aliquot horas movit, ut halituosum illud venenum cito exhalaret & per cutem diffilaretur. Neque etiam de nihilo putandum, quod cordi applicuerit epithema. Quamvis enim non proxime tangat & afficiat cor, sed potius dextrum orificium ventriculi ejusque tunicas nervosas & musculosas; multum tamen interest, ut ventriculus, ceu pars maxime nervosa, & exquisiti sensus & quæ cum nervosis universi corporis partibus consensum alit intimum, ac ubi venenum primo omnium perniciosam suam viam exserit, probe defendatur, quod fit per topica, quæ antispasmodica simulque roborante balsamica virtute pollent; quem in finem ego commendare soleo, quæ ex theriaca, oleo nusticæ expresso, camphora, croco, castoreo ac balsamo Peruviano concinnantur. Porro post usum alexipharmacorum venam secare jussit, quod omnino proficuum. Initium enim curationis a sanguinis missione facere periculosum, eo quod primo

vel

vel secundo post eam die, motus sanguinis ad peripheriam, adeoque etiam perspiratio, semper quodammodo imminuitur, ut venenum intus maneat. Ne dicam, metum & terrorem in peste correptis, protinus motum sanguinis ad corporis ambitum revocare, ut hinc venæsectio, quæ idem efficit, non possit non nocere. Sed admitti utique hæc potest si consuetudo, sanguinis abundantia & victus lautus atque vinosus urget, post ulum medicamenti sudoriferi, eo quod cuncta sanguinis copia, propulsio materiæ virulentæ ad glandulas facilitatur & promovetur, tanto certius, quando postea lenioribus sanguinis ad exteriora fluxus subinde adjuvatur. Recte etiam laudantur acida, uti succus citri, limonum, acetum &c. quod tota substantia veneno resistent, quippe quæ putredinem humorum & dissolutionem sanguinis valide obtundunt & ob id merito omnibus alexipharmacis & antiloimicis anteponuntur.

§. VI.

Fractio præterea morbi vigore, sub declinatione alvum *Nec non* expurgat lenioribus. Quod quidem sicuti in principio pestis *declinan-* aliorumque contagiosorum morborum, ob effectum motum *te morbo.* humorum ad externa retardantem, admodum nocivum; ita vicissim quam maxime conducibile, in declinatione. Sic enim educuntur fordes sub morbo genitæ perniciosæ, quibus retentis appetitus prostermitur, lentæ, immo purpuraceæ febres de novo inducuntur, vires languent, calor fit lentus, novusque ac capitalis haud raro repullulascit morbus. Ad virus tum extrahendum in tumoribus pestilentialibus suadet cucurbitulas, scarificationem & vesicatoriam, ac in eo pariter consentientes habet loimiatros. Inprimis elegans *Riverii* est observatio *Cent. II. obs. XIX.* qua ceu expertæ virtutis præsidium laudatur, ut, statim ac quis peste correptus, cantharides cum fermento & aceto pone aures ac in aliis suetis emunctoriis applicentur, ac in lecto postea quieti decumbere jubeantur ægri, eoque facto, post XXIV. horas effluere humorem atrum ferosum & pestilentem morbum post aliquot dies plane discedere.

dere. Neque minus probe etiam monet *Langius*, ne præmature ac cito ulcera consolidentur. Evocata potius ad partes externas materia & suppuratione facta, tumor aperiendus, ulcus suctis digestivis mundandum, sed diu apertum servandum admota turunda, quo virus omne per illud sufficienter expurgetur & tandem ad cicatricem perducendum.

### CAUTELAE ET OBSERVATIONES PRACTICAE.

#### §. I.

*Pauca  
remedia  
optima.*

Perquam attentione dignum est *Sanctorii* in *Medic. stat. aph.* 139. effatum: *nobilium fere nemo cum remediis, plebeji vero sine iis plures, sanantur.* Nam experientia uberius docet, plebejos, modo non omnibus subsidiis destituantur, sed temperato regimine & ad satietatem levi potu utantur, citius & rectius tam in pestilentialibus, quam aliis contagiosis malignis febribus convalescere, quam opulentos, qui Medicorum & medicamentorum copia obruuntur plane. In illis quippe valens & robusta est natura, cui si negotium committitur curationis, longe felicius utique succedit, quam si artificiosa medicatione, nonnunquam plane perversa, impeditur ac turbatur. In nobilibus autem, quum per se ob inordinatam vitæ victusque rationem jam tum debiliior natura, longe magis utique medicamentorum multorum, variorum, quin sæpe minus congruorum usu, in opere suo turbatur & morbus ad infelicem eventum promovetur.

#### §. II.

*Alexi-  
pharma-  
ca sola  
nacent.*

Inprimis nihil perniciosius est, quam radices sic dictas alexipharmacas, oleo volatili calido turgidas, carlinæ, angelicæ, petasitidis, zedoariæ, serpentariæ Virginianæ, imperatoriæ, vincetoxici, pimpinellæ, ostrutii & ex his præparatas essentias, elixiria, theriacam quoque & mithridatium, ceu genuinam antidotum, liberaliter offerre. Multo vero magis detestandi adhuc illi tantopere laudati spiritus volatiles, urinosi & oleosi,  
ut cor-



ut cornu cervi, viperarum, fuliginis, item salia volatilia, nec non balsamum sulphuris. Tantum enim abest, ut iisdem noxium expellatur, ut potius intus detineatur & partibus nervosis altius infigatur. Perpetua quippe hæc lex est, secretiones, quæ antecedunt excretionem recrementorum in corpore, melius sub liberiori & moderatiori ad emunctoria appulsu succedere, quam ubi humores impetuose ac celeriter commoventur. Augent potius calidiora pharmaca anxietates præcordiorum, calorem intendunt, dissolutionem humorum promonent & miasma quoque malignum facile & cum impetu ex ventriculo in sanguinem ac nervosas partes agunt, ut sic multiplici ratione sint detrimentosa. Et hæc omnino ita esse, loquuntur passim Medicorum qui pestilentia interfuerunt scripta, e quibus nominasse sufficit *Hildanum*, *Chald. de Heredia*, nec non *Thonerum*, qui pluribus observationibus confirmat, alexipharmacis calidioribus usos, peste absultos esse omnes.

## §. III.

Neque tamen penitus radicum & herbarum sic dictarum *Sedatidis* alexipharmacarum usus in peste damnandus. Tum enim non *nupta* nocent, quando miscentur cum iis, quæ vim earum commo-*profunt.* ventem nimis & calefacientem cicurant & quasi ad temperamentum reducunt, uti sunt maxime acida, cum nitro. Sic relatum mihi est, in peste illa, quæ anno MDCLXXXII. nostram hanc urbem infestavit, eximie profuisse mixturam ex aquæ cardui benedicti & aceti vini quatuor cochlearibus, lapidum cancrorum & theriacæ drachma, concinnatam & iterato datam. In peste quoque, quæ anno MDLXXVI. totam fere Lombardiam pervagata, multi passim & præcipue Mediolani convaluisse dicuntur, succo ex ruta capraria, cum aceto, aqua cardui benedicti & modico theriacæ hausto, corpore postea ad sudorem contexto. Ipse *Thonerus observ. pag. 21.* testis est; nil profuisse in peste, præter acetum theriacale, inter initia ad eliciendos sudores exhibitum, eodemque hoc remedio anno MDLXLIII. grassante inter milites febre maligna,

gna, integram gregariorum cohortem fuisse servatam, convalescentibus omnibus, quibus tempestive hoc acetum oblatum, exceptis paucis, qui serius a Chirurgo acceperant. In peste quoque Romana tam egregia præstitisse acetum cum ruta, radice pimpinellæ, betonica, allio & baccis juniperi, addito camphoræ momento infusum, ut quotquot illo usi fuerunt, quamvis inter infectos degerint, pestem evaserint, fidem facit *Kircherus de peste pag. 375*. Quin propter acetum, ceu præcipuum ingrediens, aqua prophylactica *Sylvii*, in malignis morbis & ipsa peste, magni semper æstimata. Et *Gesnerus* ob id *lib. III. epist. 27.* auctor est, ut omnia alexipharmaca ex vino, cui acetum admixtum, præbeantur. Conveniunt autem hæc alexipharmaca acidis nupta primo maxime die, ubi resolutione ac sudore opus est. Nisi enim, ex vero asserit *Mindererus*, intra viginti quatuor horas ab invasione alexiteria exhibeantur, omnia medica præsidia fore irriata.

## §. IV.

Optima  
in peste  
acida &  
bezoardi-  
ca fixa.

Inter ea vero quæ præsentissimæ in pestilentiali morbo efficacix, communi omnium qui de peste scripserunt suffragio, sunt maxime acida & terrea. *Fracastorius lib. III. pag. 246. de morb. contag.* tam ad præservationem, quam curationem commendat hoc: recipe succi acetosellæ uncias duas, citri unciam, diafscordii Fracastorii drachmam, specierum cordialium scrupulos duos, aceti unciam. *Mindererus de pest. cap. XV.* disertis scribit verbis: *nulla est putredo, nulla infectio, nulla humorum depravatio, quæ per acida non superetur. Sane, ut liberime loquar, si mihi vitriolicorum remediorum usus, vel interdiceretur, ego ad curationem pestis nunquam, vel certe inermis, accederem.* Idem testatur *Fonsæ de ver. rat. curand. pest. Johannes Crato*, inquit, *Augenius de Monte Sancto, Martinus Rulandus & alii in febribus pestilentialibus spiritum vitrioli summopere prodesse testantur.* Et ego id testari ingenue possum, me non modo cum sirupis, sed & cum conserva rosarum mixtum, felici cum successu eum exhibuisse. Ex terreis vero & bezoardicis fixioribus singulari virtute pollent antimonium dia-

diaphoreticum, bezoardicum minerale, lapides cancrorum, cornu cervi ustum & philosophice præparatum, succinum, terra sigillata, bolus Armena & cinnabaris. Ex quibus variæ concinnari, eademque vel sola, vel acidis nupta, in usum vocari possunt. De quibus tamen omnibus pluribus legendi *Antonius Schneeberg in catal. med. simpl. adv. pest. opera Henrici a Bra. edit. Vnzerus lib. H. amid. pestil. nec non Mindererus de pest. cap. XV.*

§. V.

Deinde inter remedia in pestilentia conducibilia præcipuum fere locum tenentur analeptica. Vires enim in atroci <sup>Nec non</sup> hoc morbo, tam propter gravem animi metum & consternationem, quam ob ingentem malignitatem, summopere sunt prostratæ. Hinc Medico quam maxime enitendum, ut removeat ex rebus moralibus & non naturalibus omnia, quæ eadem offendere possunt & in medicatione fugiat anodyna & valde vaporosa, graveolentia. Ad reficiendas autem vires præstabilis aqua confortans, nostra methodo sic paranda: recipe melissæ Turcicæ manipulos quatuor, rosarum cum sale contusarum, florum liliorum convallium ana manipulum, corticum citri recentium unciam unam semis, cinnamomi acuti unciam, macis unciam dimidiam, affunde vini Rhenani mensuram, aquæ communis mensuras tres & leni igne abstrahere duas cum dimidia mensuras. Potest hæc aqua vel cum tantumdem aquæ cardui benedicti remixta, vehiculum præbere sumendis reliquis medicamentis omnibus, vel sola dari, cum sirupo acetositis citri & spiritu salis acidulata.

§. VI.

Neque minus apprimè in pestilentia proficua sunt emetica. Nam prima & præcipua in medicatione indicatio est, <sup>Item e-</sup> ut venenum susceptum ocyus citius e corpore pellatur. <sup>metica</sup> Jam vero miasma contagiosum primo omnium salivali sese immiscet latici, cum hoc ad ventriculum descendit & inde ad sanguinem transfertur. Hinc optimum utique consilium, ut venenum brevissima, qua subiit via, iterum exturbetur simul-



atque cruditates primæ regionis, quæ deleteriam ejus virtutem mirifice intendunt, per stomachi os everrantur. Sed opus est, ut cito id fiat, simulac quis se infectum & languorem cum cardialgia sentit. Sic subjuncto congruo sudorifero, prima quasi in herba jugulari posse morbum multiplici constat experientia, eodem modo ac *cap. X. & XI.* in aliis malignis morbis id succedere pluribus docuimus. Curiosa non minus quam notabilis hanc in rem observatio *Riverii*, de quodam, qui simulac ex symptomatibus, dolore capitis & nausea, se peste laborare conjecit, illico pennam oleo illitam in fauces immisit, qua educta per vomitum materia, primum serosa, dein flava, tandem porracea, in lectum se contulit, jusculum sumsit, sudavit & illico convaluit.

## §. VII.

Sub certa  
conditio-  
ne admit-  
tenda ve-  
næsectio.

De venæsectionis utilitate non æque inter omnes convenit, sed sunt qui laudant, sunt qui damnant. Optime præcipit *Celsus lib. III. cap. IV. desiderat*, inquiens, *propriam animadversionem in febribus pestilentialibus casus. In hac minime utilis est, fame aut medicamentis uri, aut alvum ducere. Si vero vires sinunt, sanguinem mittere optimum, præcipue si cum dolore febris est.* Neque minus fidem facit *Riverius in opp. tit. pest.* se in pestilentiali parotide, quæ plures necavit, venæsectione, moderata tamen, ad uncias aliquot, & repetita, plures servasse. Nos quid de ea censeamus, supra jam in epicrisi ad *Langii* methodum exposuimus. Omnia autem huc redeunt: nunquam in principio post invasionem statim, ubi terrore & metu æger jactatur, habet locum, sed secundo vel tertio die, si urget plethora & vires sinunt, admittenda moderata.

## §. IIX.

Ac ni-  
troso.

Sic etiam de nitri usu ambigunt medentes. Qui rejiciunt, putant illud nimium refrigerare & expulsionem veneni ob id resistere, pestis etiam venenum jam tum esse stupefactivum, putredinosum ac diarrhoeas inde metuendas fere lethales. Qui probant, illud non secus ac in aliis exanthematicis inflammatoriis & malignis febribus, diaphoreticis nuptum, egregie prod-

prodesse contendunt. Sed lis facile dirimenda. Spectanda sunt individua eorumque natura & temperamenta & expendenda morbi symptomata. Si corpus est plethoricum, temperamentum cholericum, vel sanguineo-cholericum, æstus acris, febris intensa cum siti & dolore capitis; nitrosa, refracta dosi cum bezoardicis pulveribus data, commodum locum habent omnino. At ubi torpor & somnolentia, pulsus debilis, extrema frigida & timor præcessit ingens, abstinendum a nitrosis esse docet ratio. Semper tamen tutius est, si nitrum sociatur camphoræ, quo connubio camphoræ vaporosa & nitri refrigerans indoles optime cicuratur & medicina emergit, non modo alexipharmaca, sed & inflammationi efficaciter resistens. Memini ego, me olim quum Londini versarer, a peritissimo Chirurgo sene, qui pesti Viennensi interfuerat audivisse, se summo cum fructu usum esse electuario, quod vocabat nigro, composito ex rob sambuci & mellis ana libra dimidia, pulveris pyrii uncia & camphoræ drachma, ad unam vel duas drachmas dato. Et *Giselerus* quoque se in peste Brunsvicensi summo cum fructu adhibuisse pulverem pyrium affirmat.

## §. IX.

Perite præterea tractandi critici illi tumores pestilentem *Bubonum* morbum solventes. Bubones quidem, si cito prorumpunt & cito maturant, boni, si autem statim redeunt, metuerenda aut mors ipsa, aut minimum gravia symptomata, ex inguinalibus paralyfis & gangræna ipsius lateris, ex mento relapsis deglutitio solidorum & liquidorum intercepta, cum angina ut plurimum lethali. Periculosiores etiam qui pone aures, pessimi quibus carbunculus insidet & lethales circulo livido septi. Carbunculi deteriores semper quidem bubonibus, sed quo majores, quo nigriores & quo propriores cordi, eo magis periculosi. In utrisque ex internis optima sudorifera & quæ succos ad ambitum corporis agunt. Exteriorius in bubonibus, si tardius prodeunt, attrahentia imponere jubent, cucurbitulas, quin

vesicatoria. Si protuberant suppuratio promovenda cataplasmate ex ficibus, radice liliorum alborum, cepis sub cineribus tostis, cum farina lini, melle & croco. Vel imponenda suppurantia simulatque discutientia, emplastrum diachylon tam simplex, quam cum gummatibus, de mucilaginibus, nec non de meliloto. Ubi suppurarunt, aperiendi & balsamo *Arcaei*, nonnunquam unguento basiliconis remixto, mundandi & consolidandi, ita tamen, ut non nimis cito coeant, sed aliquandiu materiae saniosae concedatur effluxus. Anthracibus, quia humor jam corruptioni obnoxius, non admovenda suppurantia, sed curandum, ut crusta decidat, quem in finem Loimiatri confinia digestivo inungere & acre emplastrum superponere jubent. Crusta delapsa unguento *Aegyptiaco*, vel fusco *Virgii* cum melle rosato tractandi. Quod si autem corruptio sphacelosa adest & latius serpere videtur, prohibendum hoc scarificatione sufficienti & applicatione liquoris, qui potenter inflammationi ac putredini resistit, expertae saepius a me virtutis, parandi, ex uncis quatuor spiritus vini rectificati, drachmis duabus camphorae, drachma croci & tantundem nitri artificialis, quod ex spiritu salis ammoniaci urinoso & spiritu nitri confit, ac a vini spiritu perfecte solvitur.

## Regimen.

## S. XL

Demum quoad regimen in genere adhuc tenendum, quod, sicuti in omnibus acutis exanthematicis morbis, nini-  
us lecti & conclavis calor omni studio, ceu summopere noxi-  
us, vitandus, ita multo magis ipsa in pestilentia. Vicissim  
vero arcendum etiam frigus, ne tumorum eruptio & diffusio  
subtilioris venenosae materiae per cutis poros ullo modo inter-  
cipiatur. Temperata potius sint omnia, uti jam in antece-  
dentibus passim monuimus iterumque monemus.



CAPVT XIII.

DE

FEBRE ERYSIPELACEA.

THESES PATHOLOGICAE.

§. I.

**A**D exanthematicas febres merito etiam refertur erysipela-*Descri-*  
cea, in qua sub intensiori sanguinis & humorum motu,*ptio mor-*  
ferum acre, sulphureæ, causticæ naturæ, ad partes extremas,*bi.*  
cum tumore, rubore, ardore & dolore propellitur.

§. II.

Certe non tam levis, innocens & simplex est erysipela-*Multum*  
cea febris ac vulgo putatur, sed gravis sæpe, periculosa & *convenit*  
non raro lethalis; quin multum affinitatis alit cum morbo *cum*  
omnium acrocissimo, ipsa febre pestilentiali. Nam sicuti hæc *peste.*  
subito cum intenso horrore, æstu, virium prostratione, vehemen-  
ti dorsi capitisque dolore, vomitu quoque & delirio accedit;  
ita & sæpissime erysipelas statim in principio iisdem sympto-  
matibus stipatum adoritur. Sicut deinceps in pestilenti morbo  
inter tertium & quartum diem materia maligna ad corporis  
ambitum propellitur, remittente postea paululum symptoma-  
tum atrociam; ita similem successum servat erysipelacea febris.  
Quemadmodum porro pestilentialis venenata materia maxi-  
me glandulas, & quidem inguinales, invadit ibique dolorem  
primum ac tensionem efficit; sic etiam gravi erysipelate affe-  
cti, primo tumorem, ruborem ac dolorem sentiunt in inguinem  
adenibus, unde postea materia ferventissimæ & adurentis qua-  
si naturæ descendit ad pedes. Uti quoque materia pestilen-  
tialis sedem sæpius figit in glandulis mammariis, axillaribus &  
parotidibus; ita eadem observantur in erysipelate, quod ubi  
capiti imminet, patiuntur primum parotides, si mammis, axil-  
lares. Pestifera præterea materia in glandulis abscessus for-  
mat

mat ac partibus extremis facile gangrænam & sphacelum inducit; sacrum autem ignem axillares præsertim & mammarias glandulas sic sæpe adurere, ut pus contrahant & artus foeda corruptione afficere, omnes qui medicinam faciunt uberius norunt. Demum sicuti in peste nil periculosius, quam si materia expulsa ab externis ad interiora relabitur; sic eadem noxa idemque periculum a retrocessione erysipelatis metuendum.

## §. III.

*Differt a  
peste in-  
flamma-  
tione &  
phlegmo-  
ne.*

In eo tamen erysipelacea a pestilentiali febre differt, quod non ex contagio, five causa externa, sed interna oriatur, nec contagiosa fit & alios sola exhalatione inficiat, nec tam virulenta fit & cum mortis periculo juncta. Inflammatio autem erysipelacea ab aliis his distinguitur, quod tumor in illa depressior, dolor non tam tensivus, color quoque roseus & floridus, qui in his magis fuscus. Neque minus a phlegmone discernendum erysipelas. Nam in hoc inflammatio magis superficialis, in latum diffusa & pressa colorem exiit, materia quoque pauca & tenuis, in illo autem profundior inflammatio, subjectam non modo cutem, sed & pinguedinem & musculos tangens, attactu ob duritiem colorem non deponens, ac fit a stagnante impuro sanguine, propterea facilis in gangrænam est transitus.

## §. IV.

*Est verum  
vel no-  
thum.*

Ipsum autem erysipelas a Practicis vulgo distinguitur in verum, quod & simplex, ac in nothum, quod & scorbuticum vocant. Simplex facilius obsecundat commodis remediis internis & externis ac tantum in superficie cutis hæret, nothum autem magis est chronicum, ob succorum impuritatem altius radices agit, difficile curatu & facile abit in ulcera mali moris. Subdividunt igitur hoc iterum in illud, quod cum, & quod sine exulceratione est, in exulcerato plus utique periculi metuendum, & ægris, & medicis, & per longum sæpe tempus detinet ægre consolidandum. Porro erysipelacea febris quam

quandoque idiopathica, sive morbus primarius, quandoque <sup>Idiopa-</sup> symptomatica & morbus secundarius. In anasacra quippe, <sup>thicum</sup> ascite, item diuturno ictero, flavo & nigro, accedit haud <sup>vel sym-</sup> raro symptomatice erysipelas & cito agrum jugulat. Sæpe <sup>ptomati-</sup> etiam complicatur vulneribus partium nervosarum, præter-<sup>cum.</sup> tum cranii ejusque membranarum, item fracturis ossium, ac tum quoque in ancipiti versatur æger.

## §. V.

Deinceps non in omnibus unius semper ejusdemque in-<sup>Differt</sup> dolis est erysipelas, ac vehementiæ. Etenim in quibusdam, ju-<sup>ratione</sup> venibus maxime, materia nec adeo virulenta, nec adeo mul-<sup>corporum</sup> ta, levius facit atque benignius, quod neque glandulas occupat, neque febrem intensam movet, sed secundo mox die prodit, cum rubore, tumore ac dolore in pedibus, & sub perspiratione debita, vel leni remedio domestico, promte discutitur. Contra ea in cacochymicis, senibus & impuris corporibus, ubi materia, & copiosior, & deterior, systema nervorum & vasorum gravius exagitur, febris est acrior, dolores & inquietudines acerbiores, ac nisi exquisita medicatione excipiantur, diu affligit & ægrius cedit. Differt quoque erysi-<sup>et par-</sup> las ratione partium quibus incumbit & variis distinctis stipatur <sup>tium.</sup> symptomatibus. In pedibus nitorem inducit tibiis, quin, si gravius, cum dolore ad crura usque propagatur & levi tactu exacerbatur. Faciem si occupat, intumescit hæc successive, rufescit, interspersis copiosis aqueis vesiculis, oculi a tumore clauduntur, spiritus difficulter trahitur, nares & fauces aridæ valde sunt & siccæ & torpor plerumque ac sopor conjunctus est, quin ob propinquitatem cerebri metuendum, ne in phrenitidem, vel lethargum degeneret lethalem. Mammas ubi erysipelas tangit, intumescunt, indurescunt, sæpe lapidis instar, cum exquisito dolore & facile sequitur suppuratio. Sub axillis ibique positis glandulis, acerbissimo stipatur dolore & plerumque in abscessum desinit. Umbilicalem regionem in infantibus frequentius infestat ac inde per abdomen

(IV.) Qq spar-



spargitur, cum gravibus pathematibus, funesto ut plurimum eventu.

## §. VI.

*Zoster*

Ex peculiaribus erysipelatis generibus est illud nostro tempore paucis cognitum & a Veteribus quoque parum notatum, quod *Plinius* vocat *zoster*, nostri *zonam*. Gravioribus hoc prodit symptomatibus & supra umbilicum medium corpus ambit instar cinguli, ex præcordiali regione per dorsi tractum, latitudine ut plurimum aliquot digitorum transversorum, cum intensissimo ardore, insidentibus pustulis acribus, instar ignis urentibus. Sed perniciosum est ac interdum ne-

*Et macula lata.*

cat. Omnium vero, ut ita dicam, malignissimum est, quod post magnum virium languorem in corporibus senilibus, eminentius cacochymicis, nonnunquam etiam in febribus malignis & pestilentialibus, sub papilla & in cordis regione, vel etiam manibus aliisque exquisitoris sensus partibus, prodit, lividum mox fit, demum atrum, morte cito subsequente, quod *Platerus* inprimis *opp. tom. II. pag. 23.* sub nomine maculæ latæ describit.

## §. VII.

*Causa materialis.*

Ad causas hujus febris quod attinet, materialis neutiquam simplicis, biliosæ, vel falsæ, sed potius causticæ, acris & putrefacientis indolis esse videtur. Vehemens enim ipsius in partes nervosas operatio, totius corporis œconomiam functionum illico graviter turbans & vigiliam, delirium, inquietudinem, anxietatem, corporis jectigationem, vomitum & sensuumurbationem inducens. Longe gravior adhuc, quando expulsa materia retrocedit, quippe quæ tum haud secus ac venenum, cito deliria, inflammationem internam, asthma convulsivum & spasticas strictureas ciet sæpe lethales. Ne dicam gangrænam & sphacelum, quæ erysipelas inprimis male tractatum facile excipiunt, virulentiam materiæ luculenter satis prodere ac indicare. Unde vero hæc materia trahat ortum, non adeo quidem in expedito; ego tamen crediderim, ex bile variis ex causis vitiata & corrupta reddita, in duodeni flexura stagnante diutius, ibi cum succo

succo pancreatico confermentata quasi & caustica acri facta, eandem conflare, inde successive ad sanguinem & cerebri spinalisque medullæ membranas ferri, universum nervosarum & vasculosarum partium systema male afficere, febrem efficere, donec demum ad externum corporis ambitum pellatur.

§. IIX.

Ad concipiendam hanc erysipelatis materiam, dispositi *subjecta*. præ reliquis temperamento sanguinei & sanguineo-cholericæ, plethorici, juvenes, viri, nec non feminae gravidæ, in quibus tamen benignioris esse solet naturæ. Sed in scorbuticis, senibus & cacochymicis, item feminis, suppressione, vel emanatione, aut retentione mensium laborantibus, deteriore obtinet genium. Crebrius etiam & facili ex causa eidem obnoxii, qui a parentibus eodem affectis prognati, & qui semel passi, sæpius postea ipsius experiuntur insultum, præsertim si senes & scorbutici. Ego quidem anniversaria, æquinoctialia, quin singulis mensibus redeuntia erysipelata notavi. Sed de his, in senibus maxime & cacochymicis, verum etiam deprehendi *Hippocrates in aphor.* effatum: quod qui sæpe erysipelate corripiuntur, tandem eo moriantur.

§. IX.

Quæ autem hanc intus delitescentem erysipelatis materiam *Cause* ralem causam evolvere & in actum deducere possunt, ex re-*procatar-*bus non naturalibus sunt multa. Inter hæc primum ac præ-*dicta*.cipuum locum sibi vindicant animi affectus vehementes, ira præsertim ac terror, & consignavit inter alia *Fallopins* exemplum feminae, quæ, quotiescunque irata, erysipelas nasi incurrit, potu aquæ hordei facile discutiendum. Excludit dein erysipelas aer nimis calidus & intensior solis ardor, nec non vicissim subita & vehemens corporis, vel pedum refrigeratio. Idem facit cibus calidus, potus exæstuans, crebra ebrietas, nec non balneum fervidius. Inprimis vero ad exclusionem hujus mali faciunt evacuationes sanguinis tam artificiales, per scarificationes & venæsectiones, omissæ, quam spontaneæ per nares,

nares, uterum & sedis venas, interceptæ. Speciatim capitis erysipelas frequentius accidit his, qui diu noctuque in aëre humido & pluvioso degunt, item senibus. In mammarum solenne est puerperis, præsertim lactantibus, post gravem terrorem, tumque illico sistitur lactis effluxus, mammae duræ fiunt & a lacte coagulato tumescunt.

## §. X.

*Eventus  
bonus.*

Interim erysipelas, si cito & sine adeo vehementi commotione erumpit, nec corpus sordidum, nec locus nobilior, aut cum nervosis partibus communicans, non tantopere periculosum, sed sub auctiori perspiratione, adhibitis congruis remediis, post unum aut alterum diem, tumor sensim sublidet, ardor ac dolor evanescit, color roseus mutatur in flavum, cuticula finditur, in squamas fatiscens secedit & morbus ex voto solvitur. Quin salubritatis plane notam quandoque fert, ac novi, alios morbos, præsertim asthma convulsivum, nec non colicam convulsivam, erysipelate superveniente, fuisse feliciter sublato.

## §. XI.

*Malus.*

Sed ubi erysipelas magnum, profundum, succi corporis eminentius impuri, pars exquisitoris sensus, periculo, uti supra passim dictum, non vacat. Aut enim rubor livorem & nigredinem induit ac brevi in sphacelum transit funestum, aut inflammatio discuti renuit, suppuratur ac ulcera mali moris, fistulas & gangrænam inducit. Minimum in sanguineo-phlegmaticis & cacochymicis post erysipelas remanet ingens tumor pedis, ut tibia magnitudine tripla naturalem statum excedat, isque tumor difficulter admodum abigitur. Qui autem hoc morbo moriuntur, febre pereunt, quæ ut plurimum juncta est cum difficillima respiratione, interdum cum delirio, aliquando cum sopore & intra septimum plerumque diem catastrophe accidit lethalis.

## §. XII.

*Ex per-  
versa me-  
dicatione.*

Male etiam cedit, quod perversa medicatione excipitur. Nam priscum & verum Hippocratis aph. 25. Sect. VI. est di-  
ctum,



Etum, quod si retropellatur, sit perniciosum, quin funestum; id quod sæpius incidit. Novi ego post vomitorium & validum purgans recessisse erysipelas, insequutam ventriculi inflammationem & mortem. A venæsectione etiam ad interiora revocatum esse & vagum postea cum longe majori incommodo factum fuisse, vidi. Observavi quoque, repulso ab ipsa camphora cum minio & bolo cruris erysipelate, excepisse febrem intensam, stomachi dolorem intolerandum, respirationem mire laboriosam, vomitum biliosum, virium languorem appetitusque prostrationem, nec prius conquievissæ hæc pathemata, quam datis antispasmodicis leniterque diaphoreticis & revocato ad pristinam sedem per vesicatorium erysipelate. De capitis erysipelate repellentibus, frigidis, adstringentibus, vel etiam nimis spirituosis, nec non camphoratis linimentis tractato; compertum habeo, quod induxerit vertiginem, affectus soporosos, anginam, phrenitidem, linguæ paralytin, quæ mala senioribus & scorbuticis haud raro fuerunt funesta. Neque minus frigida, saturnina, oleosa, linimenta spirituosa, largiter camphorata, exterius admota, malum erysipelatis eventum procurant ac ut in ulcera mali moris, gangrænam & sphacelum degeneret faciunt, uti pluribus *Hildanus Cent. I. obs. 82. Moynichen obs. II. pag. 245. item Timæus a Guldenclee lib. VI. cas. XXXIII. testantur.*

## CURATIO.

## §. I.

Recta erysipelati medendi methodus tribus his absolvitur *Indicationibus*: I. ut motus iste febrilis naturæ nullo modo *indicationes* impediatur, sed potius si deficit, promoveatur, si excedit, *res.* ad temperamentum reducatur; II. ut materia subtilis caustica, nervosis partibus insidens, temperetur atque ad se & excretionem præparetur; III. ut stasis lymphæ putridæ & causticæ inflammatoria in partibus externis discutatur & ad perfectam expulsionem traducatur.

## §. II.

*Præsidia  
prima.*

Inter ea præsidia, quæ motum febrilem naturæ quodammodo languentem excitant & promovent, ex classicis remediis laudem omnino meretur mixtura simplex, quando cum spiritu nitri dulci, aut melius adhuc liquore nostro anodyno minerali, miscetur; vel si essentia scordii, aut pimpinellæ albæ, non adeo spirituosæ & concentrata, cum tantundem liquoris anodynî nostri confunditur & ad viginti, vel triginta guttas porrigitur. Juvat quoque expulsionem infusum theiforme ex herba scordii, floribus sambuci & semine fœniculi compositum, nec non ex temperatioribus pulvis bezoardicus noster, aut Ludovicianus. Motus spasmosque excedentes moderatur emulsio, ex aqua florum sambuci, tiliæ, acaciæ cum seminibus quatuor frigidis majoribus, nec non semine napi, præsertim si loco vehiculi usurpetur, cum quo pulvis noster bezoardicus, vel solus, vel cum aliquot nitri & cinnabaris granis, assumatur. Idem facit simulatque expulsionem sustinet mixtura ex una spiritus bezoardici Bussii & tribus liquoris nostri anodynî partibus. Ubi vero motus legitimi, nec nimii, nec deficientes præsto, utilissimum omnino domesticum illud remedium, ex rob sambuci uncia, cornu cervi usti drachma, ex aqua florum sambuci sumtum, cui ego in calidioribus cum fructu adjicere soleo decem, vel duodecim nitri puri grana.

## §. III.

*Secunda  
& tertia  
indica-  
tione.*

Ad demulcendam humorum acrimoniam materiamque recte præparandam, præter jam dicta, spectatæ sunt virtutis decocta loco potus ordinarii sumpta, ex rasura cornu cervi, radice scorzonerae, altheæ, liquiritiæ & chinæ cum semine fœniculi; item decoctum avenaceum. Discussio staseos inflammatoriæ, per externa perficienda. Sed nil fere ex his sine periculo adhiberi potest ac debet, quam pulvis ex floribus sambuci & radice liquiritiæ, rejectis omnibus unctuosis, spirituosis, terreis, adstringentibus, saturninis, sub temperato calore lecti & hypocausti, subinde inspersus.

CAUTELAE ET OBSERVATIONES  
PRACTICAE.

§. I.

Perpetua in practicis est regula: in acutis & exanthema-<sup>Regimen</sup>  
ticis febribus, corpus semper in blanda & continua diaphoresi <sup>fit tempe-</sup>  
esse servandum, quo sanguinis æqualis ad superficiem corpo-<sup>ratum</sup>  
ris fiat & maneat motus, ac cum hoc excrementitia materia <sup>diapnoi-</sup>  
jugiter advecta diffletur. Hinc merito etiam idem in erysi-<sup>cum.</sup>  
pelate tenendum, cum quoad totum corpus, tum maxime  
quoad partem affectam, quo & dolores mitigantur, & dis-  
cussio egregie promovetur.

§. II.

In externorum usu cautione opus est maxima, ne noce-<sup>In topicis</sup>  
ant & vel repellant, vel in ulcus convertant erysipelas. Quin <sup>idiosyn-</sup>  
quum cujusque fere corporis peculiaris sit idiosyncrasia, <sup>crasia spe-</sup>  
sive specifica quædam & individualis sensibilitas, quæ quam <sup>ctanda.</sup>  
maxime in cute, seu parte nervosa, viget; hanc etiam ob  
causam in vitiis cutis eo majori cum circumspeditione topica ad-  
movenda, quia non omnia fert omnis. Observavi enim sæ-  
pissime in mammarum erysipelate, admoto innoxio, & in  
aliis vel centies probato emplastro, brevi tempore auctam po-  
tius fuisse cum dolore inflammationem, quæ remoto empla-  
stro illico remisit. Hinc tutissimum nihil applicare, nisi for-  
san species paregoricas, ex floribus chamomillæ, sambuci,  
meliloti, radice liquiritiæ, farina fabarum, in forma sacculi,  
vel pulveris.

§. III.

Quod si adhibitis licet efficacibus internis & externis <sup>In suppu-</sup>  
discutientibus, erysipelaceus tumor tamen manet, rubor li-<sup>ratione</sup>  
vescere incipit, dolor profundius hæret & ad periostium <sup>agenda.</sup>  
pertingere videtur, ad ulcerationem tendit erysipelas.  
Tum igitur transeundum ad ea, quæ suppurationem promo-  
vent, ita tamen, ut simul corruptioni putredinosæ occurratur.  
Hunc in finem utilissimum emplastrum diachylon simplex, rite



confectum, adjecta sufficienti quantitate camphoræ & croci, vel etiam emplastrum Barbette saturninum saponatum, superpositis epithematibus balsamicis, quæ corruptionem arcent. Quando his pus contractum & profundius hæret, aperiendus tumor lancetta & pus successive, non simul & semel, evocandum. Ne autem in glandulosis maxime locis abscessus in fistulosa & mali moris ulcera transeat, post materiæ secessionem, injiciendus liquor balsamicus, ex tinctura florum hyperici, essentia balsami Peruviani, myrrha electa & aliquot guttulis spiritus terebinthinæ.

## §. IV.

*Sphacelus  
imminens  
arcedus.*

Quando erysipelas nimis profundum & magnum, sphacelum, ex colore in bruno rubicundum vergente & symptomatum post expulsionem perduratione, cognoscendum, minatur, præter interna inflammationi & putredini resistentia, nitrum maxime cum momento camphoræ, externe spirituiosa & roborantia, conficienda ex aqua calcis vivæ, spiritu vini camphorato, aceto vini cum lithargyrio, admixta quoque essentia scordii & myrrhæ, crebrius calide cum linteis duplicatis applicanda.

## §. V.

*Sanguinis  
missio  
conditio-  
nata.*

Sanguinis missio in erysipelate quandoque noxia, quandoque utilis. Ne igitur delinquat artifex, tenendum: si invadit erysipelacea febris plethoricos, potibus spirituosis assuetos, primis statim diebus vena in brachio pertundenda. Sic enim liberior fit sanguinis progressus & expulsio materiæ ad cutem promovetur. Tanto vero magis utile id est, si caput petit erysipelas, tumque gravia hoc auxilio præscinduntur symptomata. Consultum quoque est interdum loco venæsectionis, cucurbitulis cum scarificatione in cervice uti. Semper tamen post sanguinis subtractionem curandum, ut expeditus & æqualis maneat perspirationis successus.

*Scorbuti-  
cum in-  
ternis sa-  
nandum.*

## §. VI.

In erysipelate scorbutico, quod diu detinet, in usum vocanda sanguinem depurantia & leniter laxantia, cum diaphoreticis,

reticis, ita quidem, ut per aliquot dies alvina regio expurgetur, dein per aliquot tempus subjungantur diuretica ac diaphoretica, idque alternatim aliquoties repetatur, simulque pro potu ordinario decoctum temperans ex lignis & radicibus mucilaginosi, cum amaris, præsertim cum radice cichorei, taraxaci & passulis, bibatur.

## S. VII.

Quod sæpe recurrit erysipelas, non sine periculo est. *Recidit.* Hinc eo annitendum Medico, ut corpus ab hoc malo vindicans *qui-* cet. Ad quod obtinendum ego quidem nihil efficacius *de-* bus *ar-* prehendi, quam debitum, sub congruo regimine & victu, *cendum.* præparato prius, sive per laxantia, sive sanguinis missionem, corpore, institutum aquarum mineralium usum, eoque nomine præ reliquis laudem merentur, acidulæ Egranæ, thermæ Emsenses, nec non Carolinæ mitiores. His autem deficientibus, venæsectio, vere & autumnæ præsertim, purgationes per epicrasin & ea quæ sanguini repurgando serviunt, cum exacto in vita victuque moderamine, operam locant commo-  
dissimam.

## ENARRATIONES MORBORVM.

## OBSERVATIO I.

Vir triginta annorum, pallidus facie & vitæ sedentariæ *Erysipelas* additus, gravi terrore ex oborto improvise incendio fuerat *exulcera-* percussus ac per integrum postea diem sub cælo humido & *tum.* pluvioso degerat. Die post ingens horror per horæ spatium totum concussit corpus, sequutus calor intensus, cum dolore tensivo ac pungente in inguine, lassitudine, impotentia dextrum pedem movendi, conatu vomendi & somno inquieto. Tertio post invasionem die rubicundus & ardens tumor dextrum pedem occupavit. Adhibita hinc varia paregorica externa parabilia & domestica, interne vero nihil præter copiosum & frigidum sub calore potum, datum. Cessavit tandem tumor & dolor pedis, sed collectus alius ingens in malleolo tumor, cum ardore, tensione, rubore & pulsatione. Applica-

(IV.)

Rr

12

ta iterum externe varia emplastra & linimenta spirituosa, at incassum. Hinc in suppurationem tendit. Ad quam promovendam, admotum cataplasma emolliens. Successit etiam suppuration, sed stipata febre & atroci circa partem affectam dolore. Apertus demum abscessus & rite balsamicis mundatus fuit & tractatus, ut omnia bene cedere viderentur. At quum ex improvise ira corriperetur, die post denuo ipsum incescit horror, intensus per totum corpus ardor, ac obortus in genu sinistro infra flexuram tumor, nulla arte discutiendus. Adfuit simul febris, vigilia perpetua & inappetentia, æger ob tumoris molem ac dolorem nec pedem extendere, nec eo in latere decumbere poterat. Tandem successit suppuratio, sed generatus in femore abscessus, qui ingentem puris copiam ex cavo quod sibi in musculis suprapositis fecerat, fudit, ægro interim penitus contabescente. Nihilominus tamen injectionibus, variis emplastris, externe & interne congruis sanguinem depurantibus adhibitis, æger sanitati restitutus.

*Epicrisis.*

Cachecticus corporibus frequens malum est erysipelas, neque in his tam facile discutitur ac in sanguineis & cholericis. Ob profundiore enim & firmiore tubulorum obstructionem serique viscositatem, vel in abscessum, vel si incautius constringentibus, frigidis & quæ tonum partium destruunt tractatur, in sphacelum degenerat. Terror autem vehemens ad interiora, cor nempe & pulmones, pellit sanguinem, eodemque inde postea iterum repulso, febris suscitatur, viscerum humores cum impetu minimis tubulis impacti hærent & inflammationem faciunt, idque facile accidit in pedibus, per quos sanguinis circulus jam tum difficillimus. In hoc quidem erysipelas gravioribus stipatum fuit symptomatibus, ob partes quas occupavit valde nervosas ac tendinosas, quarum irritatio & molesta affectio, ut semper cum exquisitiori doloris sensu juncta, ita febrem, anxietatem, inquietudinem aliaque peperit utique. In his igitur partibus summa semper in usu topicorum cautione opus est, nec nimis calida, nec acriora, nec spirituosa aut

empla-



emplastra admovenda; sed potius demulcentia cum diaphoreticis ac nervinis, quo impediatur suppuratio, ex qua ulcera difficulter sanabilia emergunt.

## OBSERVATIO II.

Vir sexaginta & octo annorum, carnosus & habitior, *flu-Erysipelas xui hæmorrhoidali ante obnoxius, jam a biennio carens, cibo-funestum* rum tamen appetens, tempestate humida & calida fecerat iter *in sone.* & ira commotus largum spiritus vini haustum ingurgitarat. Vesperi domum redux correptus est horrore cum vomitu, quem excepit intensissimus calor, caput occupans, somnum turbans mentisque alienationem inducens. Die post insignem in inguine tumorem & ardorem sensit, ac tertio die dolor, rubor & ardor totum femur cum tibia occupavit. Inde remiserunt quidem priora symptomata, pulsus tamen mansit celer & æger insuperabili sopore oppressus jacuit. Medicus accitus interius porrexit tincturam volatilem bezoardicam, naribus admovit spiritum salis ammoniaci & loco affecto applicuit cataplasma ex aqua florum sambuci, aceto, lithargyrio, myrrha & bolo. Sed sopor discuti renuit, quin adauctus potius, ut plane non excitari posset æger. Sexto quoque die color pedis rubens in brunum & nigrum conversus, facies cum rubore intumuit, venter a prima statim invasione occlusus, injectos quinque clysteres sine operatione reddidit, die octavo accessit difficilis respiratio & post hanc lethum.

### *Epicrisis.*

In senibus & plethoricis erysipelacea febris multum alit periculi. In nostro delirium secundo statim die indicavit congestionem sanguinis & quidem impuri ad caput, quæ postea etiam gravis soporis exstitit causa. Medicus vero perperam egit, quod nec primo statim die venam secare, nec alvum subducere jussit, sed potius interne & externe volatilia sanguinem magis exæstuantia adhibuit. Male etiam parti affectæ imposuit adstringentia, quibus discussio & exhalatio non modo impedita, sed etiam stasis obfirmata & sanguis repressus ad caput vergit, præsertim quum intestinorum tunicæ etiam essent

strictæ & alvus obserata, postea tamen decubuit quoque sanguis ad pectus, & ob difficilem per pulmones cursum, anhelosum spiritum & mortem demum induxit.

## OBSERVATIO III.

*Erysipelas* Feminam novi triginta annorum, proceram, teneram ac bilio-  
*topici* sam, quæ per aliquot annos alvum segniorem & crebriorem iram  
*corrupta* fuerat experta. Hanc initiante autumnò, sub aquilonia tempe-  
*internis* stateprehendit erysipelas in manu sinistra, cum digitorum tumo-  
*sanatum.* re ac rubore. Applicata topica varia & inter alia albumen ovi cum alumine conquassatum. Depulsum etiam malum, sed brevi post rediit idem, non vero pristinis cedere voluit remediis. Tumor quidem cum rubore discussus, dolor autem lancinatus, cum fornicationis sensu in digitis eorumque articulis diu perstitit, quin sub victu minus laudabili crebrioriq; animi commotione increvit quotidie. Ruptus tandem tumor ploravit materiam ichorosam acrem, cutem passim erodentem & ulcus enatum dolens & pruriens, noctu præsertim. Licet etiam varia externa & interna sanguinem depurantia adhiberentur, succrevit tamen alius dolorificus glandulosus in junctura brachii tumor, qui ad digitorum apices radium quasi vibrabat, sive lineam rubicundam, cum intensissimo cruciatu. Sumisit postea malum magis vires, digiti intumuerunt, aperti tandem, excrevit caro copiose spongiosa & ichor foetidus rodens exstillavit, appetitu & viribus simul prostratis somnoq; deficiente. Admoverant chirurgi imperiti, affectæ parti valde acria, calida, decoctum ex vino, cum spiritu vini camphorato, balsamo sulphuris & oleo tartari foetido; simulque interius decocta lignorum & pilulas purgantes mercuriales liberali manu dederant, sed frustra. Applicarant postea linimentum ex vino, myrrha, thure, cerussa, herba chelidonii, floribusque sambuci, cui aliquid mercurii præcipitati admixtum, quo acris defluxio intra binas hebdomades subsistit. Tumor quoque in junctura litu cum spiritu vini camphorato, cui balsamum sulphuris admixtum, discussus. Sed non ita multo post femina insignem virium incurrit languorem, plenariam appetitus defectionem, facile animo defecit & ob  
 id

id supina in lecto jacuit, crebrius præterea doloribus in manu, dorso ac pedibus, nec non ventris torminibus afflicta, pulsus quoque iusto fuit languidior, cutisque mox frigore, mox volatico æstu persusa. Ego in consilium vocatus, pulverem ex lapidum cancrorum, antimonii diaphoretici ana drachma, nitri depurati, arcani duplicati ana drachma dimidia, cinna-  
baris nativæ granis XV. in octo doses divisum, bis quotidie dedi. Pro potu ordinario suasi decoctum ex radicibus temperantibus, & iussi, ut mane in theiformi infuso sumeret quinquaginta guttas mixturæ ex liquoris nostri balsamici uncia dimidia, essentiae croci, liquoris nostri anodynæ ana drachma. Consilium quoque de li ut subinde pilulis nostris uteretur, & affecto brachio inuri permetteret fonticulum. Quibus per tres hebdomades usurpatis, expirarunt sensim atrocia pathemata, appetitus rediit, somnus factus quietior, dolor remisit & vires cum sanitate restitutæ.

*Epicrisis.*

Gravia varia & insolita pathemata ex impuritate scorbutica, sive feri acris biliosi redundantia, si in partes extremas tendinosas & nerveas critico quasi motu amandatur, pullulare, uberius certe hæc docet historia. Periculosum etiam in ejusmodi casibus topicorum usu insistere, quorum non alia vis, quam ut tonum partis affectæ variis modis destruant, materiam a sanguine separatam vel ad interiora pellant, vel ejus discussionem impediant & ita firmiorem faciant; ut symptomata non possint non aut magis increfcere, aut diutius affligere. Longe tutior & facilior hisce malis medendi ratio est, si internis dyscrasia humorum emendatur, materiæ acris affluxus divertitur eademque per alia emunctoria, cutem, urinam, aut alvum, excluditur.

OBSERVATIO IV.

Femina generosa, triginta aliquot annorum, sanguinea, spongiosa & carnosa, postquam valens antea & menstruam purgationem etiam recte experta, venationi interfuis-  
set ante & post solis occasum, sub cœlo, nubilo, autumnali, pluviioso & corpus ob id non leviter perfrigerasset, brevi post  
*Erysipelatis creber incursus non V. S. sed Carolinis de-*  
*subi-*



subito correpta est ingenti horrore, quem excepit æstus mordax cum inquietudine & tertio die erysipeas in crure. Brevi hoc depulsum, ne autem rediret, Medicus ortum ejus ex sanguinis plenitudine arcessens, suavit, ut e pedis vena emitteretur sanguis largiter. Sed quum ægra Octobre peregrinationem institueret, rediit idem malum, & longius quam prius perstitit. Medicus igitur vulgari jam hypothese, omnium morborum causam plethoram esse, additus, eandem heic etiam subesse opinatus est, eaque propter rursus venam secari jussit largiterque extraxit sanguinem; nihilo tamen secius post binas hebdomades denuo infestavit erysipelas eundem locum. Licet etiam postea pulveres absorbentes cum nitro, scarificationes & infusum laxans in usum vocaret, aliud tamen effecit nihil, quam ut binis quibusvis mensibus erysipelas recrudesceret, pedis autem affecti tumor & imbecillitas persisteret semper. Deum ego in consilium vocatus, commendavi Carolinarum internum & externum usum, cum exacto in vita victuque moderamine & abstinencia ab acidis, dulcibus, fructibusque horæis, quibus mire antea ægra delectata, injunxi quoque frequentem usum elixirii nostri balsamici, ex amaris extractis, corticibus citri & sale tartari cum vino Hispanico confecti, sanguinis autem missione interdixi. Inde erysipelas primum depulsum, subsequuti vero dolores rheumatici, per aliquot hebdomades affligentes, qui tamen repetito insequenti anno Carolinarum usu, etiam prorsus abacti & ægra perfectam recuperavit sanitatem.

*Epicrisis.*

Perperam omnino heic a Medico ad recidivam arcendam commendata sanguinis missio eaque repetita. In nostra enim natales erysipelatis ex perspiratione suppressa, eaque propter hac magis adhuc sanguinis missione imminuta, non potuit non impurorum succorum copia crescere, quæ per erysipelas singulari naturæ vigore expulsa. Recidivæ autem frequentiores, quum de sanguinis impuritate testentur, hæc vero de viscerum maximeque hepatis vitio; ego certe acidularum, vel thermarum, ad sanguinem purificandum & viscera expedienda, & elixiorum

balsa-

balsamicorum, quæ visceribus & succis spirituaſcentiam reddunt usu, præstantius novi nihil. Quam in rem pluribus legenda *Medicina consultiatoria Tom. V. Dec. V. cas. IX. p. 370.* & passim alibi.

## OBSERVATIO V.

Novi in Westphalia virum sexagenarium generosum, maci- *Erysipelas*  
lentum, sanguineo-melancholicum, qui delectatus carnibus & *scorbuti-*  
piscibus salitis ac infumatis, ab aliquot jam annis, ter vel qua- *cum sepe*  
ter quotannis, in pede sinistro, circa malleolum, passus fuerat e- *recidi-*  
rysipelas, quandoque exulceratum. Hic meum petiit adversus *vans.*  
hoc malum auxilium. Suasi igitur, ut inter malleolum & genu  
inureretur fonticulus, qui materiam a malleolo exquisitoris  
sensu parte ad tibiam traxit, immuni ab erysipelate & fonticuli  
& malleoli regione. Tum consilium dedi, ut loco potus or-  
dinarii acidulas Antonianas cum tertia vini parte biberet, a vi-  
ctu duriori abstinere & mane juscula cum radice cichorei, apii  
& scorzonerae sorbillaret, & pedem debilem & tumidum fascia  
spiritu vini camphorato madida ligaret arctius. His aliquan-  
diu usurpatis, liber postea diu mansit ab erysipelatis incurſu.

*Epicrisis.*

Westphalis ob victum durum & crassum semper sanguis spis-  
sus lentescens, qui e vena missus, eandem ac apud nos pleuritico-  
rum, exhibet faciem, cum cuticula glutinosa. Hinc etiam ipsi  
admodum familiares inflammationes maximeq; erysipelas scor-  
buticum. Adversus quod vero optime sese muniunt tempeſtiva  
sanguinis missione, potu ipsis frequentissimo seri lactis & vere usu  
infusi laxantis & resolventis ex vino. Pedes autem, quia lentior  
in ipsis sanguinis ascensus, perspiratio quoque languidior, ob id  
maxime & oedematosis & erysipelaceis tumoribus sunt obnoxii.

## OBSERVATIO VI.

Professor celeberrimus, quinquaginta aliquot annorum, *Zona ex*  
purpura scorbutica crebrius afflictus, post corporis intensam re- *purpura*  
frigerationem, corripiebatur subito languore virium, inquietu- *retentio-*  
dine, somni appetitusq; defectu, horripilatione, æstu, cui jun- *no.*  
cta quædam mentis turbatio. Durabant hæc per tres fere dies,  
quibus elapsis, nocte antecedenti sensit intolerandum plane ar-  
dorem in præcordiali regione, ad dorsum usque excurrentem,  
mane



mane autem inspecto loco dolente, insolitum comparuit exanthema, rubicunda nempe area, ex præcordiis ad dorsum cinguli instar extensa, cui insidebant confertim pustulæ partim albæ, partim rubræ nigrescentes. Inde quidem symptomata remiserunt, excepto exquisito ardente dolore, qui tantus erat, ut nec somnum capere, nec locum affectum contingere posset. Medici quorum consilio utebatur, quid hoc rei, nesciebant, & purpuræ peculiare genus, aut scorbuticum quoddam exanthema esse volebant, ego vero illico cognovi peiorem erysipelatis speciem, & interne diaphoretica temperata & externe in fine oleum ovorum adhibui, quibus aliquandiu usurpatis, intra quatuordecim dies, dolor conquievit, pustulæ aruerunt, cuticula aspera facta, fissa & desquamata.

*Epicrisis.*

Est hic affectus ex rarioribus, paucis visus, plurimis incognitus. Solus fere ex veteribus est *Plinius*, qui ejusdem sub nomine zoster meminit. Quam periculosus autem sit binis exemplis confirmat *Joannes Langius epist. pag. 110.* uno Marchionis Georgii in Onelspachio, qui eodem ex ulcere cruris a Chirurgo intempestive consolidato interiit, altero Comitum Palatini Otthenrici, qui a lumbis ad genua usque hoc exanthemate circumdatus, febre simul ad delirium usque æstuans, incisa tamen utriusque pedis vena adhibitisque quæ febrem restinguerunt, a morte adhuc vindicatus. Idem etiam cum hoc esse videtur affectus, quem *Tulpius lib. III. cap. XLIV. observ. mednal.* sub nomine exedentis præcordiorum herpetis describit, in viro pleni habitus & calidi jecinoris, qui vehementer circa præcordia doluit, cum acri pruritu, insigni dolore & frequentibus pustularum conglomeratarum circulis, primum rubris, mox albicantibus & comparente in qualibet earum crusta nigra, qua convenienti litu separata, quælibet degeneravit in humidum ulcusculum, cum acri dolore, sudore effuso & interdum tam impetuoso virulentæ materiæ raptu ad interiora, ut animus non secus aliquoties deficeret, ac si ipsum occupasset contagiosa aliqua pestilentia.



SECTIO II.  
DE  
**FEBRIBVS ACVTIS**  
**INFLAMMATORIIS**  
ITEM  
**LENTIS PVTRIDIS HECTICIS**  
NEC NON  
**SYMPTOMATICIS.**



DE

FEBRIBVS INFLAM-  
MATORIIS IN GENERE  
SPECIATIM.

DE

FEBRE ACUTA SANGVINEA.

GRÆCIS SYNOCHA.

THESES PATHOLOGICAE.

§. I.

**V**ut irritatio generis nervosi spastica per omnes so- *Inflam-*  
lidas nerveas corporis partes, proximam causam *matovio*  
constituat omnis motus febrilis, qui horrore *febres*  
& velociore contractione cordis & arteriarum absolvitur; *unde.*  
pro diversa tamen indole & actione materiae genus nervo-  
sum præter naturam afficientis, diversa emergit febris species,  
distinctis phænomenis, effectibus & symptomatibus sese pro-  
dens, ita quidem, ut si stimulus sit ab humore acri, putrido,  
seu corrupto, quem Veteres vocant ichorem, exanthemati-  
cæ plus minus malignæ excludantur, ubi vero sanguis, vel  
alius humor præter naturæ consuetudinem alicubi congestus

(IV.)

Sf. 2

**ACE-**



nervosæque membranas tendit impensius cum dolore ac premit, inflammatoriæ acutæ, sine exanthematibus, suboriuntur.

## §. II.

*Differunt  
quoad loca,*

Iam quidem omnis continua febris inflammatorii quid, sive a qualitate prava acri caustica, sive a quantitate nimia molesta, humoris cujusdam, alit: attamen proprie inflammatoria febris dicitur illa, cujus causa est eminens vasculorum, secundum naturam non sanguinem, sed tenueliquidum vehentium, a sanguine oppletio atque distensio. Hoc autem evenit vel in pluribus partibus simul, vel in una tantum. Hinc febres inflammatoriæ vel universales, vel particulares. Ex illis sunt, quando omnes fere sensu & motu instructæ corporis partes, maximeque nervoso-membranaceæ, leviori inflammatione affectæ, quod accidit in synochis. Hæ vero sunt, quando unitantum certæ parti insident, a qua etiam in scholis Medicorum variam sortiuntur denominationem, adeo, ut si meninges tangat inflammatio, febris audiat phrenetica; si fauces, anginodes; si pleuram, pleuritica; si pulmones, peripneumonica; si ventriculum, stomachica; si duodenum & biliarios ductus, ardens & biliosa; si ileon, iliaca; si renes, nephritica; si mesenterium, mesenterica; si vesicam, vesicalis; si uterum, uterina; si intestinum rectum, hæmorrhoidaria. Deinceps inter febres inflammatorias aliæ sunt idiopathica primarium morbum efficientes, aliæ symptomaticæ, sive secundariæ, quæ sequuntur alium morbum, sed pessimo plerumque & lethali eventu, uti maxime de febribus continuis constat, qui ut plurimum inflammatione in sphacelum abeunte necant. Iam de singulis seorsim.

## §. III.

*Synocha  
descriptio*

Synocha igitur, sive sanguinea febris, est acuta, continua, suscitata a sanguine in partibus maxime nervoso-membranosis nimium congesto, qui, nisi opportune naturæ & artis beneficio discutiat, inflammationem inducit lethalem.

## §. IV.

## §. IV.

*Subiecta  
& differe-  
rentia.*

Corripit hæc frequentius plethoricos & succulentos, temperamento sanguineos & sanguineo-cholericos, ætate juvenes ac viros, sanguinis evacuationibus assuetos, idque quovis anni tempore, potissimum tamen vere & æstate. Indicia autem ipsius & signa, quibus ab aliis acutis & inflammatoriis febribus discernitur, huc redeunt. Invadit hæc cum vix notabili horripilatione & leni admodum frigoris sensu, in aliis autem gravis est horror & longius extrahitur frigus. Aliæ mitius primum accedunt sensimque increbescunt, donec ad statum & vigorem perveniant, sed hæc cum gravissimis statim adoritur pathematibus. In aliis certis temporibus notabilis observatur symptomatum remissio, quæ in synochis rara, vel nulla, ut potius eadem quam sub accessione vehementia usque ad criticum tempus insistant, eaque propter haud incongrue a quibusdam non continuæ, sed continentes, vocentur. In malignis ab initio pulsus parvus, debilis & contractus, in hac magnus & plenus. In synocha hinc in principio absolute necessaria sanguinis missio, quam aliæ continuæ sæpe non ferunt.

## §. V.

*Causa &  
independen-  
tia  
sympto-  
mata.*

Causam hujus febris proximam præbet diffusior sanguinis in partibus ac visceribus internis congestio atque stagnatio. Quam in corporibus, calido sanguine, expotuum spirituosorum largo usu, corporis exæstuatione, animique excandescencia, plenis, ex facili inducit potus ingurgitatus frigidior, corporis extremorumque refrigeratio & perspiratio quacunque ex causa prohibita. Sic enim tubulis & poris in externa superficie constrictis, sanguis cum impetu plus justo urgetur ad interiora, ibique congestus, moleste afficit nervosarum & fibrosarum partium systema, ex quo symptomatum origo omnium. Nimirum si ad caput vergit impetus ibique colligitur sanguis, facies turgescit, oculi rubent & lacrymas plorant, caput dolet, arteriæ pulsant temporales, vertigo adest, sopor, torpor, vel plane mentis alienatio. Quando

cordis ventriculi & vasa pulmonalia a sanguine impetuosius irruente nimium distenduntur, essentielle illud omnium febrium symptoma, respiratio difficilis & crebra, pectoris angustia & anxietas cordisque palpitatio accidunt, juncta simul sæpe virium corporis animique dejectione. In œsophago levior inflammatio & spastica glandularum fauciumque strictura facit sitim, ariditatem & linguæ nigritiem, præsertim si in corpus biliosum, calidum, post iram incidit, tumque vulgo vocatur febris ardens, *das hirtige Fieber*. In ventriculo inflammatoria congestio gignit nauseam, vomendi conatum, quandoque singultum; in intestinorum volumine, inflationes malum graviter exacerbantes, alvi adstrictionem, vel excrementorum foetidorum ejectionem; in meseraica arteria & venæ portæ vasis, dolorem fixum circa primam lumborum vertebra; in membranis spinalis medullæ, decubitus insuetum, membrorum jamctationem, torporem & languorem artuum, quandoque etiam convulsiones.

## §. VI.

*Simplex  
vel putrida est.*

Neque tamen hæc symptomata adsunt in omnibus omnia, neque vehementia ubique infestant eadem. Hinc in simplici a Medicis distinguitur synocha, & putridam, seu malignam. Illa sæpe a sola sanguinis boni extra locum & vias suctas congestionem suscitatur, mitior, hinc brevi discutitur, nec adeo periculosa. Vbi vero cadit in corpora impuris succis plena; viribus a morbo præcedenti, diuturno animi angore, nimia venere & inordinata victus ratione exhausta graviora longe præsto sunt pathemata, cum virium prostratione, morbus ipse diutius, ad decimum quartum, vel vigesimum prorsus primum trahitur, & quandoque exanthemata, maculæ fuscae vel nigrae, excluduntur, non sine præsentis periculo. Datur præterea synocha epidemica; sed quæ plerumque cum febre catarrhali jungitur & autumnis maxime ac hieme infestat. Hæc in principio non aliis, quam synochæ suctis symptomatibus adoritur, maxime homines sanguine & humoribus plenos, postea



postea vero, si bene tractatur, post diem quartum prodit se manifestis signis catarrhalis, per longum adhuc durans tempus & quæ per noctem usque ad diluculum calore præternaturali, nec non catarrhosis a capite defluxionibus, coryza, tussis sicca & humida infestat, donec tandem discedat.

§. VII.

Solvitur morbus, si causa non adeo vehemens, solius *Eventus* sæpe bene valentis naturæ beneficio, sua sponte, die quarto, *se- bonus.* ptimo, vel undecimo, ordinarie largo sudore, vel secus ac in aliis acutis, optime per liberale narium stillicidium, vel etiam, rariustamen, ac non nisi ubi maligni quippiam complicatum, per alvi fluxum. Quando etiam hæc febris in principio statim, primo, secundo & tertio die, recte tractatur, sanguinis missione & subjunctis refrigerantibus, blandisque diaphoreticis, quarto sæpe die exoptata fit solutio. Si vero omititur, vel detrectatur venæsectio, febrem ad decimum quartum, quin decimum septimum diem protractam vidi, persistentibus gravioribus symptomatibus ipsoque delirio, tandem vero naturæ beneficio, vel per sudorem, vel per alvum fuisse solutam. *Malus.* Sed quibus lethalis est, ii pereunt plerumque inflammatione meningum, vel etiam aliarum partium, ut ventriculi & intestinorum sphacelosa, quam uberius testatam facit cadaverum inspectio, in quibus præterea ob sanguinem copiosum cito in foetidam putrilaginem abeuntem, illico adest insolitus tumor & foetor intolerandus.

CURATIO.

§. I.

In medicatione febris synochæ perito artifici agenda hæc: *Indicationes curatorie.*  
I. ut partes vitales a nimium congesto sanguine liberentur, sicque vel levior in iis inflammatio dispellatur, vel gravior impediatur; II. ut sanguinis exæstuatio simulatque systematis nervorum spastica affectio componatur; III. ut illud quod stagna

stagnat & corruptum est, discutiatur & liber sanguinis circuitus, maxime ad corporis superficiem, restituatur.

§. II.

*Sanguis  
mitten-  
dus & or-  
gasinus  
tempe-  
randus.*

Quo igitur vasa interiora in visceribus, corde maxime pulmonibus, a nimium congesto & stagnante sanguine liberentur, vena tempestive pertundenda & sanguis emittendus sufficienti quantitate. Quod quo pacto sit faciendum dicitur in cautelis. Deinceps ut impetuosus ille sanguinis succorumque orgasmus, vasorum, quam facit, distensione nervosas partes irritans ad contractionem, sedetur, ex usu sunt aquea, diluentia, acida, item nitrosa. Et certe si in ullo morbo, sane synocha, quam maxime conducit frigida potus aliaque refrigerantia, ex aceto succisque fructuum acidulorum, citri, limonum, ribium. Commendarunt hæc communi suffragio veteres, cui accedunt recentiores omnes. Ego quidem expertæ virtutis hanc habeo potionem: recipe aquæ fontanæ mensuram, aquæ rosarum, sacchari albi unciam, succi citri tantundem, vel loco hujus spiritus vitrioli guttas XX. *Riverius in prax. cap. de Synoch. pag. 37.* laudat pulverem; ex sacchari uncis quatuor, salis prunellæ uncia, eundemque in sufficienti quantitate aquæ assumere, cui, si sitis impensius urget, spiritum vitrioli instillare, suadet. Nobilis etiam demulcente & refrigerante virtute gelatina liquidior cornu cervi, cum saccharo, succo citri & aqua rosarum confecta. Potissimum tamen profunt loco potus ordinarii usurpanda, scilicet ferum lactis ex lacte cocto cum succo citri coactum, vel nostra methodo dulce, & cum succo citri, aut spiritu vitrioli acidulatum, item ptisanæ ex hordeo, rasura cornu cervi, scorzonera cum succo & corticibus citri, nec non cerevisiæ leviores, imbutæ tinctura violarum, rosarum, papaveris rhœados, parata cum aqua acetosellæ, spiritu vitrioli acuata, vel instar omnium clysto antimonii sulphurato, de cujus præstabili virtute ita sentit *Baglivus opp. lib. I. pag. 50. non possum non*, inquit, *laudare eximias vires clysti antimonii, cujus*  
*sub*

*Subacida virtute febres multe ex aeris mutatione productæ alieque ardentiores, tanquam in ovo suffocantur.* Hæc acida quoque magnopere conducunt in synocha sic dicta putrida, seu maligna, quia omnium efficacissime putredini resistunt, quæ non ab acido, sed alcalico volatili fovetur, quod acida destruunt.

## §. III.

Quæ liberiores sanguinis ad superficiem corporis mo-  
tum procurant, sunt utique blanda diaphoretica, pul-  
veres sci-  
licet vel bezoardici temperati, vel absorbentes, nonnunquam  
foli, nonnunquam cum nitro, aut succo citri, assumendi. Idem  
faciunt infusa theiformia, ex herba veronicæ, scordii, aut cardui  
benedicti, cum semine fœniculi, quæ in primis quando quarto  
die morbus critico sudore solvitur, pulsusque quietior  
cum somno redit, ad secundandam hanc salutarem excretio-  
nem, proficiunt.

## CAUTELAE ET OBSERVATIONES

## CLINICAE.

## §. I.

In nulla febre, & veterum, & recentiorum omnium  
consensu, tam necessaria est sanguinis missio, quam synocha,  
& quidem sufficiens atque matura. Recte enim monet *Tral-*  
*lianus Lib. XII. pag. 688.* continentes solerti tractari debere  
diligentia, præsertim quod sanguinis missionem spectat. Ma-  
ximè enim incommodum esse, cum in omnibus morbis, tum  
in his dilationem. Nam febres, pergit, vehementiores reddun-  
tur & vires imbecilliores, ut non amplius magna præsidia ad cura-  
tionem admitti possint. Hi vero indigent maxime sanguinis  
missione, qui urinas habent rubras & turbatas, oculos rubros,  
totum corpus grave, venas latiores & earum torulos apertio-  
res, calidioribus magna parte cibis, potibus, vino liberaliore &  
vetusto carnibusque pinguibus usi. Sed non imitandi Veteres,  
præsertim Galenus, & qui præse hunc sectatur Zacutus Lusit-  
anus, qui sanguinem ad animi usque deliquium mittere sua-

(IV.)

Tc

dent,



dent. Mensuram potius sanguinis extrahendū Medicus prudens ex ratione virium, ætatis, sexus & temperamenti, nec non pulsuum magnitudine venarumque amplitudine, dijudicare debet, ac ubi corpus firmum succisque plenum, præstat iterare altero die venæsectionem, quam simul & semel nimium evocare, quo successive demta copia, perspiratio servetur & distatio sordium liberior reddatur. Neque pueri & adolescentes pleni sanguine hoc remedii genus detrectare debent. Qui autem penitus averfantur, his hirudines collo & medianæ ipsi aliquando cum fructu admoveere jussi. Quando etiam sanguis cum impetu ad caput fertur & arteriæ intus fortiter pulsant, facies simul tumida est cum oculis & rubicunda ac nares aliquot tantum guttas stillant, provocandum stillicidium, vel veteri Ægyptiorum more sacificatione narium, vel valida intrusione culmi straminei, quo delirium arceatur. Sed qui tali in casu venas sublinguales incidere jubent, minus securum consilium interponunt; eo quod inde aliquoties incompeabilem hæmorrhagiam abortam vidi.

## §. II.

*Refrigerantia utilissima.*

Deinceps ex præstantissimis in synocha remediis sunt acida, refrigerantia & nitrosa. Et certe in hisce auxiliis, prudenter ac circumspecte, ratione temporis ac mensuræ, pro diversa conditione corporis ægrotantis, usurpatis, præcipuum curationis momentum in synocha æque ac ardente consistit. De quo tamen infra plura dicemus. Id autem singularis plane medico-practicæ observationis est, quod hæc, quin sola aqua temperate frigida, sufficienti quantitate pota, sudorem moveant & somnum procurent.

## §. III.

*Laxantia conduunt.*

Præstat porro in hac febre, simplex sive sit, sive putrida, alvum servare apertam. Sub febre quidem, non tam internis, quam potius externis, glande, aut clystere molli, ex sero lactis, melle, oleo amygdalarum dulcium, pauxillo nitri & salis id perficiendum, quo leniatur fibrarum intestinalium strictura & status

flatus evocentur, qui intestini coli partem distendendo, anxietates faciunt & perspirationis successum pervertunt. Declinante autem morbo & apparentibus coctionis signis in urina, ad exturbandas materiæ febrilis reliquias, apprime inter nares usu sunt, inter quæ ego in primis utile deprehendi laxans ex manna, cremore tartari, vel etiam cassia & rhabarbaro. Sed absint <sup>non dra-</sup> valida omnia purgantia, multo magis emetica. His enim, <sup>stica.</sup> tactis jam levi inflammatione visceribus, ex facili inflammatio inducitur funesta. Quin observavi, febre hac sanguinea laborantes, neque ferre posse pilulas alias benignas, quas aloë, vel extractum ellebori ingreditur, uti sunt Becherianæ, aloëphanginæ, marocostinæ & id genus plures.

## §. IV.

Ex iis quæ vitanda, sunt maxime omnia calida & spiritu- <sup>Vitanda</sup> osa, vinum, potus etiam nimis calidi, ut infusum thee <sup>calida &</sup> nec non regimen æstuosum, ratione lecti & conclavis, <sup>animi af-</sup> quæ omnia sanguinem magis exæstuant, acerbiora sympto- <sup>fectus.</sup> mata febremque diuturniorem reddunt. Neque etiam synocha putrida, sive maligna ferre potest essentias alexipharmacas, aut tincturam bezoardicam. Cavendum quoque a multitudine & varietate remediorum, quæ nunquam utilis, sed semper damnosa est, tanto magis, ubi partes nervosæ sensus exquisitioris, leviter inflammatæ. Inprimis autem fugiendi sedulo omnes animi affectus, ira præsertim ac terror, quibus inflammatoria jam in intestinis præsens congestio, ingravescit & inflammatio perfecta, quin sphacelatio, experientia teste inducitur.

## §. V.

Ceterum de morbi decursu atque eventu hæc adhuc <sup>Somno-</sup> monenda. Vidi ego in hac febre sæpius in juvenili ætate ac <sup>lenticia &</sup> temperamento sanguineo perpetuam somnolentiam, quæ ta- <sup>delirium</sup> men sine periculo fuit, admoto plantis pedum aceto, cum sale <sup>non</sup> ammoniaco & baccis juniperi, discussa. Delirium etiam frequenter vidi diuturnum, post neglectam in principio venæse-

*sed pur-  
pura &  
delectio  
impetu-  
sa pericu-  
losa.*

tionem, sed quando decimo quarto die sedimentum posuit  
urina, discessit demum & hoc sine damno. Neque enim un-  
quam firma salutis spes, nisi coctio in urina compareat. Sed  
quando ex præpostera medicatione, sanguinis missione ne-  
glecta, datis calidioribus & alvo diutius occlusa, feбри huic san-  
guineæ, ille acutorum frequens nostro tempore socius, pur-  
pura, præsertim alba, accessit, pessimo id accidit omine. Ne-  
que minus pessimum & plerumque mortiferum est indicium;  
quando alvus diu cohibita, sponte miram quantitatem, fæ-  
cum biliosarum & corruptarum, simul & semel, junctis tormi-  
nibus, profundit. Hoc enim sphaceli intestinorum signum  
esse, ex defunctorum cadaveribus habeo compertum.

#### ENARRATIONES MORBORUM.

#### OBSERVATIO. I.

*Synocha  
recidi-  
rans le-  
thalis.*

Adolescens annos habens octodecim, constitutione te-  
ner ac sanguineus, vultu floridus, laute vivens, delectatus  
maxime dulcibus, farinaceis, de cocto chocolade cum lacte  
& in prandio vinum Hungaricum liberaliter bibens, verno  
tempore, post intensam, ex ambulatione per acclivia & de-  
clivia in seram noctem, corporis exæstuationem, postera die  
corripiebatur horripilatione, ingenti æstu, inquietudine cor-  
porisque totius languore. Datum ipsi de venæsectione con-  
siliū, sed noluit admittere. Hinc dati tantum pulveres ex  
matris perlarum, lapidum cancrorum, ana drachma, nitri  
puri drachma dimidia, cum succo citri ex aqua frigida sumen-  
di. Loco potus exhibita ptisana ex hordeo, scorzonera &  
sirupo acetositis citri, alvus quoque clystere emolliente so-  
luta. Quibus factum, ut quarto liberalis prodiret sudor, pul-  
sus quoad vehementiam & celeritatem sedatior micaret, uri-  
na sedimentum poneret & somnus rediret. Morbus igitur ex  
voto solutus visus. Quum vero æger viribus nimium credens,  
dulcibus & lacticiniis indulgeret, potens etiam Hungaricum  
vinum biberet, post septimum diem eandem rursus incurrit  
febrem



febrem. Sed gravioribus longe stipata erat symptomatibus, insomnia maxime atque delirio. Seçta quidem die post vena, sed sine emolumento. Aderant simul tormina ventris & paucæ biliosa secesserunt. Clyster quoque infusus animi fere deliquium adduxit. Quarto die accessit forte ex amicis non nemo, qui ægro imprudenter dixit : apparere ex omnibus ipsum moriturum, præparet igitur se ad discessum. His adolefcens vitæ amantissimus, mirum exterritus, virium illico animi & corporis ingentem expertus est lapsum, & frustra usurpatis omnibus, quæ in priori morbo fuerant utilissima, septimo die vitam posuit.

*Epicrisis.*

Nihil ad ingenerandam exuberantem sanguinis copiam valentius dulcibus, bellariis, cum saccharo & ovis frixis, vinoque Hungarico dulci spirituoso. Atque adeo his etiam nihil aptius ad inducendas febres, quæ sanguinis plenitudini debent natales. Ego certe plures novi juvenes literarum studiosos, qui delectati his dapibus & potibus spirituosiss, accedente corporis refrigeratione, hanc incurrerunt febrem. Omnes autem recidivæ febrium, quarum fundamentum inflammatio, admodum periculosa, quin plerumque capitales. Quia enim corpus a priori morbo viribus exhaustum, maximeque partes quæ passæ tono adhuc privatae, ex facili iterum concipiunt inflammationem, quæ primis non amplius obsecundat remediis. Accedit quod ipsi ægrotantes recidivam ut plurimum parvi faciant & ob id Medicum serius in auxilium vocent, pharmacorum pertæsi sint, quorum operatio languente naturæ vigore minus præterea est efficax. Quare declinandæ summo studio recidivæ, temperanter vivendum, corpus non nimis cibis, multo minus spirituosorum potu aggravandum, nec motu aut animi affectibus exæstundum, ne sanguis urgeatur in vasa ipsius transire non dicata, ibique subsistat. Vitanda quoque refrigeratio & potius exquisitum servandû regimen, Quam facile enim hæc febris repetat cum

vita periculo, confirmatum habeo casu, qui novissime evenit. Inciderat scilicet in synocham artifex ingeniosus ferrarius eademque graviter decubuerat, post quatuordecim tamen dies præter expectationem ad se redire videbatur, dormiebat & appetebat. Sed quum uxor, quo maritus cito vires reciperet & ad labores redire posset, ipsi apponeret carnem suillam assatam cum placentis, ipsumque ut ederet tantum non cogeret, illico excepit anxietas præcordiorum summa, difficilis spiratio & inquietudo cum plenario virium lapsu, ac post viginti quatuor horas interiit. Et certe vix dici potest, quantum noceant cibi copiosi, viribus a morbo adhuc imbecillis. Quia enim ciborum moles in ventriculo languente digeri nequit, resolvitur in flatum, qui expandendo ventriculum & tendendo diaphragmatis velum, miras anxietates cum spiritu difficili faciunt. Hinc porro sanguis urgetur ad dextrum cordis ventriculum, ibi congestus systolem sufficientem ac in pulmones pulsus sufflammat, unde tam ipse cordis ventriculus, quam ob allatum per cavam semper sanguinem auricula dextra, plus justo extenduntur, systole penitus intercipitur & lethalis obrepit syncope. Etenim subita mortis, siue synopis lethalis causam esse coagulatum & congrumatum in dextra cordis ejusque auriculæ camera, ob deficiens robur ad contractionem, sanguinem, testantur utique uberius anatomico-practicæ defunctorum sectiones.

## OBSERVATIO. II.

*synocha  
usu pur-  
gantis &  
omissa V.  
S. lethali*

Virgo honoratissima viginti aliquot annorum, sanguinea, facie florida, laute vivens & liberalius paullo Rhenum vinum bibens, solita semper erat ante æquinoctium vernale & autumnale sanguinis missionem admittere. Eo autem qui ipsi emortalis anno præter morem calidum erat veris initium, ipsa tamen noluit discedere a consueto venæsectionis termino, sed tempus expectavit æquinoctiale & lunæ decrementum. Accidit vero interea, ut ira commoveretur venusta hæc

hæc & sanguine plena virgo, eaque propter absente matre & Medico ordinario, post levem cutis inhorrescentiam, dorsi dolorem, æstum, anxietatem, inquietudinem, somnique defectum incurreret. Ipsa consilii inops, suasu cognatæ ad bilem commotam evacuandam, sumsit pilulas, nostris *die gescharfften Haupt-Pillen*, quarum basis trochisci alhandal. Inde quater quidem deiecit, sed conquesta postea de dolore pressorio & ardente sinistri hypochondrii. Quarto die accessit Medicus, qui venam secare iussit, sed sine levamine. Dedit quoque probatissima remedia, quo inflammationi ventriculi, quum singultus arguebat, occurreret, sed ineassum. Accessit potius extremorum refrigeratio, mens turbata & septimo die placida mors. Post mortem mirum intumuit corpus efflorueruntque papulæ amplæ in pedibus atque abdomine, e naribus fluxit serum putredum sanguinolentum & totum corpus mox in foetidam putredinem ruit.

#### *Epicrisis.*

Communis quidem sed valde damnosa passim regnat opinio, sanguinis missionem certis temporibus & sub certa astringorum conjunctione esse instituendam. Videas inprimis plurimos adeo superstitiosos, ut credant, non feliciter cessuram venæsectionem, nisi aliquot ante æquinoctium diebus & decrescente luna admittatur. Ego vero novi, plures & apoplexia, & febre sanguinea interiisse, antequam præstitutum hoc tempus attingerent. Nam necessitatis nulla lex, sed si sanguis redundans minatur periculum, mittendus, quicumque sit dies, quodcunque tempus. Nostra formosa virgo periit inflammatione ventriculi & intestinorum gravi, quæ utique opportuna sufficienti sanguinis subtractione datisque congruis refrigerantibus, potuisset averti, assumpto vero acri purgante adaucta potius. Ut adeo pateat, morbum, alias non adeo periculosum, neglecto tempestivo commodorum remediorum usu & mala tractatione, brevi malignum fieri posse atque funestum.



nestum. Illa vero corporis post mortem cito intumescencia, deformis color, putredo subito succedens & teri sanguinolenti effluxus, luculenter utique testatum faciunt. a succorum plenitudine morbum, & ab eorum putrefactione mortem, fuisse inductam.

## OBSERVATIO. III.

*Synocha  
septimo  
die soluta*

Degebat heic juvenis literarum studiosus, viginti quatuor annorum, sanguineus, succi plenus, vultu floridus, qui hæmorrhagiis narium antehac obnoxius & postea venæsectioni assuetus, utramque vero evacuationem ab anno non erat expertus. Hic verno tempore in palæstra gladiatoria vehementer incaluerat & postea in cellam concesserat, vinum potaturus. Postridie lassitudinem sensit in corpore toto, quam excepit extremorum levior refrigeratio, æstus vero intensius, pulsus celer, præcordiorum anxietas, angustia spirandi & pectoris oppressio. Tertio die temporum arteriæ valide pulsarunt, caput intumuit, doluit, oculi protuberarunt, nox inordinis fuit, urina rufa, sine sedimento & delirare cœpit. Hinc vena secta & minimum septem sanguinis uncia subtracta & data mixtura ex aquæ florum sambuci, acaciæ, ceraforum nigrorum ana uncis duabus, aceti destillati uncia dimidia, lapidum cancrorum drachma, nitri puri granis XV, sirupi papaveris erratici drachmis duab<sup>9</sup>, de qua singulis binis horis quatuor sumsit cochlearia. Quum etiam quarto die sanguis impetuosiùs ad caput ferretur, nec tamen hæmorrhagia erumperet, ad discussionem fronti & temporibus sæpius tepide admotum epithema hoc, recipe aceti rosacei uncias duas, spiritus rosarum drachmas duas, camphoræ drachmam, olei ligni rhodii guttas XXIV. Ad sitim fallendam æstumque extinguendum tinctura florum cordialium cum spiritu nitri dulci parata, cerevisiæ tenui pro potu instillata; alvus præterea per aliquot dies clausa, & clystere emolliente, & laxante, ex manna, cremore tartari & rhabbarbo soluta quater, eoque facto, urina apparuit cocta & sedimentum incarnati coloris dimisit

dimisit. Datis demum ulterius bezoardicis temperatis, cum tinctura modo dicta, sensim conquieverunt symptomata & die septimo pulsum celeritas remisit, sudor largus prodit, ægerque postea ad sanitatem rediit.

*Epicrisis.*

Ad præcavendum delirium, longe præstantius epithema discutiens, quam laudata a multis venarum sublingualium sectio, quam incompeficibilem hæmorrhagiam induxisse vidi aliquoties. Utillissimum quoque ad sanguinis a capite derivationem alvum strictam mollire atque subducere, non quidem purgantibus; sed clysteribus & blandis laxantibus, modo id fiat, quando levamen & aliqualis remissio percipitur, quod secundum nostram observationem, certis diebus, secundo præsertim & quarto, accidere solet.

OBSERVATIO. IV.

Monachus viginti quinque annorum, quadratus & carno-*V.S. quar-*  
sus, vitam colens otiosam, potui cerevisiæ crassioris assue-*to die in*  
tus nunquam tamen venæsectionem passus, verno tempore *synochis*  
corpus succis plenum validius paulo in horto ad seram usque *utilis.*  
noctem exercuerat. Inde illico conquestus est de corporis lassitudine, inappetentia, somno turbulento ac inquieto, alvo simul clausa. Incessit ipsum dein levis horripilatio, æstus magnus, præcordiorum anxietas, pulsus quoque vehementer salit, facies rubicunda fuit & urina pellucida, sed rufa. Medicus in consilium vocatus, exhibuit tincturam bezoardicam volatilem cum regimine sudorifero. Sed nullus successit sudor, anxietas potius adaucta, spiritus factus difficilior, somno caruit, multa absone est loquutus & tertio die accessit præterea acerbus & ardens dolor in faucibus cum deglutitione difficili. Accitus igitur Medicus alius, qui venæsectionem administrare, clysterem injicere, gargarisma usurpare & exterius epithema discutiens gutturi applicare iussit, ac interius pulveres temperantes nitrosos leniter diaphoreticos dedit. His discussus primo tumor faucium & dolor sedatus. Septimo die post levem horrore largius sanguinem stillarunt nares,

res, quod, ne cum damno effusius fieret, cautum est mixturis diaphoreticis & pulveribus nitrosis, nec non epithemate frontali *Observatione III.* descripto. Sic octavo die æstus deferbuit & sudor erupit copiosus, pulsus sedatior factus, urina sedimentum posuit & æger successive convaluit.

*Epicrisis.*

Male hoc in casu omissa in principio venæsectio & pessime in corpore plethorico data volatilia cum regimine æstuofo, quibus facillime inflammatio in cerebro & faucibus conciliata. Neque ea propter quarto etiam die nociva fuit venæsectio, sed ad avertendam inflammationem admodum proficua. Ad angustiam vero vasculorum laxandam & stagnationem sanguinis in faucibus discutiendam, epithema mature applicatum, cum internis diaphoreticis, utique egregium.

OBSERVATIO V.

*Synocha  
catarrha-  
lis epide-  
mica  
anni  
1729.*

Quam varia & insolita plane elapso anno MDCCXXIIX. aëris tempestatumque fuerit constitutio & quam varii quamque graves inde succreverint morbi, inprimis febriles, supra *Sect. I. cap. X. obs. II. pag. 250.* pluribus jam dictum. Perstitit autem eadem hæc extraordinaria temporum anni habitudo & atmosphæræ inæqualitas, insequenti adhuc MDCCXXIX. anno, subitamque frigoris in teporem & vice versa teporis in frigus mutationem fecit. Scilicet attulit novi anni exordium acerrimum gelu, æquale omnino illi intensissimo, quod anno MDCCIX. regnavit. Id perstitit ad duodecimum usque Januarii diem, mercurio interim, quod mirandum, in barometro demissio rem stationem ad gradum tantum VII. servante, quum alias ascendere tum & gradum XXX. tangere soleat. Decimo tertio & quarto die lenior spiravit aura & regelatum. A decimo sexto ad vigesimum usque, argentum vivum altius iterum, ad vigesimum septimum gradum, elatum & frigus fuit acre. Vigesimo quarto subsedit mercurius ad duodecimum, nonum & octavum gradum, & sequentibus diebus successive remisit gelu, mercurio interim modo sublato, modo delapso. Nix præterea cecidit copiosa & diu solum obruit, do-  
nec



nec medio Februarii discuteretur iterum, ex quo magnæ aquarum inundationes. Post has vicissitudines, remittente hiemis asperitate, Februario mense, coepit passim circumire synocha febris, non simplex, sed complicata, quæ recte dici potest synocha catarrhalis, ita, ut intra mensis spatium, vel mille, ex divitibus æque ac pauperibus, eadem heic decumberent. Incessit quippe hæc febris homines mediæ potissimum ætatis, juvenes & viros, sanguine & succis plenos, minus infantes, omnesque quotquot corripuit: sine præcedenti notabili frigore vel horrore, affecit totius corporis & capitis gravitate, inappetentia, somni defectu, virium languore & æstu intenso, cum pulsu magno, celeri, quandoque inæquali. Quibusdam variæ statim in mente obversatæ ideæ atque imagines & artus tremuerunt, aliis perpetua accidit somnolentia cum animi dejectione, & omnes situm erectum ferre non potuerunt, sed mox syncopiticam quandam debilitatem perceperunt. Quibus vena statim in initio pertusa & sufficiens sanguinis copia, pro ratione corporis & virium, subtracta, subjunctis postea blandis diaphoreticis, diluentibus & orgasmum sanguinis compescentibus, sub æquali & moderato regimine, cito & optime convaluerunt. Sic enim quarto statim die deferbuit febris, symptomata remiserunt, æstus restinctus, pulsus sedatior & corpus quietum factum, ac urina, comite sudore plerumque largo, posuit sedimentum. Restiterunt tamen postea copiosæ defluxiones, a capite ad nares, fauces & pectus, coryzam & tussim humidam, vel siccam, inducentes, stipatæ quandoque artuum pedumque rhevmatismo, quæ circa vesperam exacerbata, caloris fecerunt incrementum noctemque inquietam, donec decimo quarto ut plurimum die discederent penitus. Sed in quibus, aut ægri, aut Medici culpa, sanguinis missio neglecta, & usurpata calida bezoardica, hi longe gravius & diutius decubuerunt, delirio & assidua vigilia affecti sunt, catarrhos acres & rebelles experti, quandoque exanthema purpuraceum & febris sæpe ad decimum quartum diem, nonnumquam longius, magna institit vehementia.

Quin fuerunt, qui accedente purpuræ albæ, aut petechiali exanthemate, interierunt plane.

*Epicrisis.*

Recte omnino complicata hæc febris dicenda synocha catarrhalis. Nam ipse incurfus vehemens statim, sine rigore, ipse decursus sine remissione, ipse eventus sudore, ipse medicatio per sanguinis missionem & temperantia cum nitrosis; luculenter testantur, ad synochæ familiam ipsam esse referendam. Catarrhalis autem connubium produnt subsequentes copiosæ muci & seri falsi, ex naribus, faucibus & bronchiis, cum tussi ac sterminatione ejectiones, nec non febricula vesperi cum calore ingravescens. Natales epidemicæ hujus febris non aliunde, quam ex mira, diuturna aëris inæqualitate ac crebra mutatione, ex calido in frigidum & frigido in calidum, nec non atmosphæræ mox gravis & prementis, mox levis & raræ habitu vario, ducendi. Sub his enim vicissitudinibus, non modo universale illud pessimarum sordium emunctorium, cutis, diversimode afficitur ejusque canaliculosa atque porosa compages a naturali tono deicitur, sed & motus illi cordis & arteriarum systaltici, qui vitam sustinent & ab aëris puriori elastica substantia pendent, vitiantur ac mutantur. Ex quo porro fit, ut labefactatis sic & sufflaminatis saluberrimis se & excretionibus, multæ impuræ & viscidæ in succis sordes maneant, quæ dein vascula obstruunt ac fomitem febribus populariter circum-euntibus præbent. Neque nos nunc primum observavimus hanc febrem, sed eandem jam anno MDLXXX. visam esse, *Georgius Henischius, Comment. in Aretaum pag. 315.* testis est, sic habens: *anno MCIDLXXX. grassabatur synochus epidemica, non simplex, sed composita, eo quod & catarrhum, & alia symptomata conjuncta habuit, unde & catarrhus cum febre epidemicus fuit appellatus.* Eundem etiam ipse ortum ac decursum fuisse, quam nostræ, idem auctor *l. c. pag. 396* subnectit: *febris, inquam, hujus catarrhalis epidemica, quæ spatio sex septimanarum, omnes fere Europæ gentes affligebat, ex quibus vix vigesimus hujus morbi expers erat, præsertim in Saxonia, cau-*

sa, non erat ab alimentis, terra, aut aqua putrida, sed ab aere, vel celo potius, nempe a magna illius & anni praecedentis aeris inequalitate, unde copiosa humorum heterogeneorum & ichorum soboles succrevit, quae facta meatuum constipatione & prohibita evacuatione, primum ebulluit, & postea putrescens, hanc febrem excitavit. Quamprimum haec invadebat, omnes vires languebant, praecordia gravitatem, compressionem sentiebant & palpitabat, pulsus parvi, celeres & inaequales erant, anhelitus difficilis; caput erat grave, & ingravescente morbo ita aegroti languebant, ut tremere & conciderent. Quidam vigilabant, alii profundiores somnum habebant. Ex capite fluxit acrior & subsalsus humor ad thoracem, qui rursim movebat, in extremis partibus dolores vagos & fugitivos excitabat. Initio horror & calor totum corpus & caput occupabat, & ad tactum non erat mordax, continuus tamen, cum rubore oculorum & tumore. Urina primum tenuis, mox crassa; aliis sanguis e naribus fluebat; plerisque sudor copiosus prorumpebat, quo & febris finiebatur, quarto usque plurimum die, interdum, sed raro, longius, protrahabatur ad septimum, vel nonum diem. Ceterum illud quam maxime notatu dignum, quod synocha haec epidemice grassantes & cum magna vehementia invadentes, administrata statim sub initium convenienti sanguinis per venam sectam missione, & adhibitis postea temperantibus & viscidum obstruens colliquantibus tertio mox & quarto die fuerint solutae, nec in putridas, aut diuturnas transierint febres, quae non sine periculo. Et certe dici vix potest, quam insigniter febrium, synocharum aequae ac ardentium, vehementia in principio illico his praesidiis obtundi queat ac frangi. Testis est jam ipse Galenus, meth. med. IX. perite non minus, quam vere scribens: nemo ex synocha in putredinis febrem incidit, qui sanguinem primum detraxit. Quo quidem praesidio neglecto, in summum agri discrimen perveniunt, nisi eos, vel virium robur, vel longum alvi profluvium, vel sudor ex manifesta phrenitide eripiat copiosus. Ego quoque



que observavi frequentius, synocham simplicem, juvenes sanguine & succis plenos, cum magno æstu & capitis dolore, nec non anxietate, sub pulsu pleno & crebro, prehendentem, post incisam medianam & dato ptisanæ largo potu, intra quatrimum, sudore per totum corpus manante, fuisse solutam, remittente mox inquietudine cum æstu ac siti, & somno redeunte. Opus tamen est, ut salutaris hæc diaphoresis per aliquot dies adhuc congruis remediis servetur, & postea solutivo remedio, ex clementioribus, manna tamarindis, rhabarbaro & tartaro, alvus ducatur. Neque etiam omit-tenda venæsectio in initio hujus febris, si corpus sanguine redundat ac pulsum adest magnitudo, licet haud ita pridem sit admissa. Aliquot enim exinde mortuos, vel in summum vitæ discrimen adductos novi, quibus Medici ob id sanguinem subtrahere renuerunt, quia ante unum vel binos menses modo factum; quum tamen ex longo usu atque experientia in comperto sit, hac in febre, non semel, sed bis interdum, pro virium robore & sanguinis abundantia, venæsectionem esse administrandam.

CAPVT II.  
DE  
FEBRE ARDENTE  
NEC NON  
CHOLERICA.

THESES PATHOLOGICAE.

§. I.

*Ardentes & continua ple-rumque* **N**ostra quidem ætate, omnes acutæ & continuæ febres, quæ præcedente rigore, cum ingenti æstu, siti, anxietate & pulsum celeritate junctæ sunt, vulgo vocari solent ardentes, Germanis *hitzige Fieber*. Quin ipse artis parens, *Hippocrates*, omnium

omnium febrium originem, ex bile plus, minus, vitiosa & in-<sup>confun-</sup>  
raci deducit, nec sanguinearum, nec synocharum facit men-<sup>duntur.</sup>  
tionem, sed in scriptis suis, febres fere omnes continuas, in-  
flammatorias, item synochas, tam simplices, quam compo-  
sitas, putridas quoque & malignas, appellat ardentes. Ni-  
hilominus tamen insignem inter has febres esse differentiam,  
luculenter omnino attenta observatio incurfus, symptoma-  
tum & decursus singularum, nec non curandi ratio diversa,  
docent.

## §. II.

Ardens itaque febris, Græco nomine causus, stricte <sup>Ardens</sup>  
proprie dicitur illa: quæ cum ardente & igneo quasi calore <sup>febris</sup>  
totius corporis atque siti inextinguibili, lingua simul arida, <sup>quid pro-</sup>  
fissa & nigra, juncta. Binos hos enim pathognomicos causi <sup>prie.</sup>  
esse characteres, veteres volunt omnes, & ob id torridam  
etiam hanc febrem apellant atque urentem. Hippocrates  
*lib. de affection. p. m. 167.* ita succincte describit ardentem:  
calor fervidus, sitis fortis, lingua aspera ac nigra, color sub-  
biliosus, & sputum biliosum. Sed Aretæus exactius historia-  
rum morborum scriptor, *Lib. II. cap. IV.* hanc sistit plenio-  
rem descriptionem: ignis passim acer & tenuis est, sed intus  
maxime spiritus tanquam ab igne calidus; aeris vehemens at-  
tractio, frigidi cupiditas, lingua arida, in labiis & cute squa-  
lor, argenti extrema, lotium quam biliosissimum, insomnietas,  
arteriarum motus crebri, parvi, imbecilli, oculi puri, lucu-  
lenti, subrubri, facies colorata. Quod si morbus ulterius cre-  
scit, omnia majora & seviore fiunt. Arteria minimis motibus  
& creberrimis agitantur, ignis aridissimus & acerrimus, mens  
delirat, neminem agnoscit, siticulosi fiunt, omnia frigida attre-  
clare cupiunt, parietem, vestem, pavimentum, humorem.  
Manus frigent, sed palma perquam calide, unguens livide, spi-  
ratio crebra est & roscidus humor circa frontem & jugula.

## §. III.

Hæ ardentes proprie sic dictæ febres, multum differunt <sup>Differt</sup>  
ab aliis continuis. Nam in synocha, tam simplici, quam com-<sup>ab aliis</sup>  
<sup>posita conti.</sup>

*nuis & inflammatorii.* posita & cacochymia, non tam acris & ingens calor est, neque tam inexhausta fitis, sed æstus mitior cum madore quodam. Synocha magis invadunt sanguine plenos, habitus laxioris, laute viventes, idque potissimum tempore verno ac in regionibus temperatis; sed causi adoriuntur macilentos, biliosos, sensibiliores, generantur sub tempestate calida, sicca diuturna & regnant maxime in locis calidioribus. In ardente porro, secus ac in aliis continuis, facies flavescit, vomitio, vel conatus vomendi cum fastidio ciborum adest, urina flammea, intensius bile tincta mingitur, & per alvum biliosa foetida multa exturbantur. Tum id quoque peculiare habent febres ardentes & quæ a copia & acrimonia bilis subnascuntur, præ aliis continuis inflammatoriis, item sanguineis & malignis, ut diebus imparibus & circa tertium exacerbentur, paribus autem remissiores sint; id quod etiam observatur in tertianis continuis, cholericis, nec non in illis quas Veteres tritaephyas dixere, quæ tertio die sine horrore & rigore periodico exasperantur, qualis observatur in hemitritæis, sive semitertianis. Accedit, quod febres, quibus sanguinis puri, sive impuri copia, complicatur, sæpius quarto statim die solvantur, sudore, vel hæmorrhagia larga, sub facie rubicunda, quum ardentes demum circa leptimum diem post rigorem, vel criticum, sudore, vel symptomaticum, inflammatione ventriculi, duodeni & partium, ad quas biliarii ductus pertinent, funesta, terminentur. Demum ratione curationis ad est discrimen. Ardentes quippe potum frigidum, cæu præstantissimum auxilium ferunt, sed non ita aliæ continuæ & inflammatoriæ, multo minus malignæ & putridæ. Sanguinis missio in febribus a sanguine in non minimis vasis stagnante oriundis item inflammatoriis, præsertim quæ occupant partes & viscera sanguinea, summopere est necessaria; in ardentibus autem veris & exquisitis, eadem non opus, ut potius noceat.

*Rariore est  
apud nos  
simplex  
& vera.*

## S. IV.

Sed simplices ejusmodi & exquisitæ ardentes febres, frequentissimæ quidem fuerunt & sunt in Asia, Græcia, Ægypto

ac



ac Italia & ob id a priscis Medicinæ parentibus, Hippocrate, Galeno, Aretæo, fuse & accurate quoad prognosin & medicationem descriptæ. In temperato autem nostro climate oppido sunt ratæ, ac nonnisi a liberaliori potu vini spirituosius valde, æstate ardente, motu & exæstuatione impensiori animi corporisque & cohibita perspiratione, suscitantur. Nostro potius sub coelo & inter nostrates familiares magis ardentest sanguinæ, sive synochæ biliosæ, item cholericæ febres.

§. V.

Synochæ autem biliosæ nobis dicuntur illæ, quæ sine præcedente singulari horrore ac rigore, cum magno ardore, siti, vigilia, anxietate & inquietudine, in corporibus sanguineo-cholericis, copia sanguinis calidi & biliosi refertis, oriuntur & diebus imparibus, seu criticis, antecedente rigore quodam, terminantur in salutem, vel mortem. In salutem quidem solvuntur sudore, vel ut plurimum hæmorrhagia narium. Hæ enim sunt ardentes illæ, de quibus Hippocrates lib. I. epid. com. 2. notavit: omnes exiis evalisse, quibus sanguis e naribus aut aliis viis effluxisset, reliquis, quibus id non accidisset, pereuntibus. Quando vero funestus eventus, desinunt vel in partium nobiliorum, meningum maxime, pulmonum, ventriculi & intestinorum inflammationem lethalem, vel in lethalem syncopen, ob sanguinem in dextro cordis ventriculo collectum, stagnantem & demum congrumatum.

§. VI.

Alterum nostris familiare ardentis complicatæ genus cholerica febris. Hæc etiam intenso æstu, siti, angore & inquietudine aggreditur, sed cum vomitu, seu perpetuo conatu vomendi, dejectione biliosa & copiosa, extremorum frigore, ardore interno, & anxietate cardialgica jungitur. Sed merito etiam cholerica hæc febris distinguenda in acutissimam & minus acutam. In illa longe major est symptomatum vehementia, dejectiones biliosæ, per superiora & inferiora copiosissimæ, junctæ cum cardialgia etiam syncoptica, & plerumque ante septimum diem necant vehementi ventriculi & intestini duodeni inflammatione.

flammatione , cujus indicia vehemens circa præcordia & fixus igneus ardor , cum extremorum refrigerio , summa inquietudo & anxietas , singultus & eructatio bilis & salivalis liquoris copiosa , icteritius faciei color , nec non facies cadaverosa , sic dicta Hippocratica. Nonnullæ non adeo acutæ , sed *Et minus acuta.* longius extrahuntur , ita tamen , ut subinde remissione , vel plane intermissione quadam interpolentur , & vel quotidie , vel tertio quovis die , cum vomitibus , anxietatibus & refrigeratione iterum exacerbentur , merito ob id quotidianæ , seu tertianæ continuæ vocandæ. Sed hæ ipsæ , nisi congruis cito succurratur auxiliis , in lentas febres perquam facile degenerant , & stomachi diuturna vitia , dolores pressorios , ructus , inflationes , ob erosionem ventriculi , aut duodeni , a mordaci bilioso succo , vel superficietenus , vel profundius factam , inferunt.

## §, VII.

*Causa proxima ardentis.*

Ad causas & generationem harum febrium quod attinet , illa quidem exquisita ardens , quæ summo fervore & incendio , cum linguæ siccitate & siti clamosa , tam partes internæ , quam externæ , uruntur & exsiccantur , causam non habet aliam , quam celerrimam sanguinis & humorum agitationem , per fibroso vasculosam totius corporis compagem , partim quoad minimâ vascula obstructam , partim spasmo tensam atque constrictam , sub quo motu attritivo solidorum ad fluida & fluidorum ad solida , intestinus partium sulphurearum quoque augefcit , unde inflammatorius calor , fluidas difflans atque consumens & solidas siccans & adurens , enascitur. Hic vero æstus in corporibus sanguine & succis plenis , ob fibrarum mollietatem & laxitatem , lenior est atque remissior , ac febris emergit mitior ardens , minus exquisita , in qua non tam impenfa cutis & faucium siccitas , neque etiam sitis adeo urgens. Et in illa ardentis specie , quam cholericam diximus , non tantum , ob partium salino-sulphurearum in succis redundantiam , & minima nonnulla vascula angustata & obstructa , celerior est motio , verum etiam succus biliosus copiosius in hepa-

hepate secretus ac in duodenum & ventriculum effusus, acrimonia & mordacitate sua, nerveas tunicas acrius sollicitat, lancinat, arrodit & inflammat, ex quo symptomata huic feбри propria, ardor, anxietas cardialgica, nausea, vomendi conatus, impetuosæ per superiora & inferiora biliosæ dejectiones.

§. IIX.

Omnia igitur, quæ sanguinem exæstuant & uberi parti-  
cularum sulphurearum in sanguine proventui favent, liberum  
quoque ejusdem per minima partium vascula transitum retar-  
dant atque impediunt, ad generationem ardentium febrium  
faciunt. Hinc est, quod iisdem præ reliquis imprimis pateant,  
qui biliosæ constitutionis, strictioris habitus, potibus spiri-  
tuosis indulgent, crebrius animo, præsertim ad iram moven-  
tur corpusque vehementiori motu exagitant. Neque minus  
inde ducenda ratio, quod sub cælo calido & in locis meridio-  
nalibus frequentissima sit ardens exquisita, nec non quod apud  
nos, post diuturnum solis æstate sicca fervorem, succedente  
autumno frigidiore aura, crebrius incidunt, quin epidemi-  
ce quandoque cum diarrhœis biliosis, dysenteriis, tertianis du-  
plicibus & continuis grassentur cholericæ febres. Quæ au-  
tem ingenitam his ad concipiendum hunc morbum disposi-  
tionem effectui dant, sunt maxime perspiratio cohibita & ve-  
hemens ira. Nimirum quando succi calidis sulphureis particu-  
lis scatent, harum vero per vascula minima exhalantia diffu-  
sio, sive per aërem crassiorem frigidum, sive improvidam re-  
frigerationem, intercipitur, manent intus, intestinum motum  
fuleant & febrem accendunt. Vehementis autem iracun-  
diæ is in corpore effectus, ut non tantum in universo syste-  
mate nervorum ac vasorum motus intensiorem & rigidam  
spasticam stricturam inducat, sed & præ ceteris in ductus ner-  
voso-musculosos biliarios agat eorumque motum peristalti-  
cum fortiter augendo, ex toto systemate horum canalium ex-  
primat biliosum succum eundemque in duodeni cavum truat



copiose & impetuose. In quo flexuoso sinu dum stagnat, cum salivalibus succis & acidis cruditatibus mixtus fermentescit, eo-  
que mordacem & tantum non causticam indolem, acquirit, cujus index est color viridis æruginosus, qualis a commixtione bilis cum spiritu acido corrosivo, ut oleo vitrioli & aqua forti, emergere solet.

## CYRATIO.

## §. I.

*Sanguis  
non indi-  
cretim  
mitten-  
dus.*

In medicatione probe distinguendæ diversæ ardentis species & corporum ratio habenda. Nimirum quando ardentissima est febris in corpore bilioso, macilento, sanguine & succis minus pleno, non habet locum sanguinis missio. Neque etiam eadem admittenda in febribus cholericis, tam acutis, quam intermittentis typum servantibus, & cum numerosis dejectionibus per os & alvum, summa præcordiorum anxietate & extremorum frigore stipatis. Sed ubi juncta ardens sanguinis plenitudo & febris est nostris frequentissima, quæ ex veterum denominatione synochus biliosa, sive putrida, recte dicitur, nunquam non pernecessaria est ac utilissima sanguinis conveniens, sufficiens & pro ratione virium & vasorum amplitudinis, proportionata missio. Hac enim facta, non modo vehementia febris & symptomatum multum frangitur, sed brevis etiam & felix eventus, ceteris paribus, sperandus. Contra ea experientia docet, gravius semper & periculosius decumbere hac febre, feminas imprimis & sanguine abundantes, si in principio omissa sanguinis subtractio. Tum enim natura ipsa superflui sanguinis excretionem, per nares potissimum, molitur, quod si non critico & convenienti tempore fit, nec sufficienter succedit, sanguinis in vasis cerebri subsequitur stasis, phrenitidem valde periculosam membranarum cerebri inducens.

## §. II.

*Aestus ac-  
sitis tem-  
peranda  
frigida  
potu.*

Post sanguinis missionem omni studio eo annitendum, ut igneus

igneus iste totius corporis æstus cum immodica siti & faucium ariditate, removeatur iis, quæ æstuosam illam partium sulphurearum agitationem figunt & temperant ac præterea fibrarum rigidum spasimum laxant & humores in vasculis minimis stagnantes diluunt, fluxiles reddunt & obstructa referant, ut æquabilis & liberior fiat per loca convenientia & vasa transitus. Hunc in finem veteres omnes dilaudant potum frigida aquæ. Hippocrates de affect. §. 2. in ardente febre dandas præcipit potiones frequentes & paullatim quam frigidissimas. Aretæus lib. II. cap. IV. si biliosus, ait, vomitus & distensio, adest fastidium, anxietas, virium labefactorio, tunc frigida aquæ cyathi duæ vel tres propinandi sunt ad ventris adstrictionem; facile enim frigida in ventre incalescit. Neque minus Galenus meth. med. lib. IX. cap. V. præter venæsectionem, potionem frigidam impense laudat, adjecta ratione, quia extinguit febrem & naturam robustam reddit, ut deinceps per album & sudorem expellat, quæ noxia sunt. Idem sentit Celsus lib. III. c. XIII. si, inquiens, in summo incremento est morbus ardens, utique non ante diem quartum, magna siti accedente, frigida aqua copiose præstanda est, & ad satietatem danda, qua pro medicamento utuntur. Vbi factum est, multa veste operiendus, & collocandus, ut dormiat. Fereque post longam sitim & vigiliam, post multam satietatem, post infractum calorem, plenus somnus venit, per quem ingens sudor effunditur idque præsentissimum auxilium est. Has tamen subnectit cautiones: sed in his tantum, in quibus præter ardorem nulli dolores, nullus præcordiorum tumor, nihil prohibens, vel in pulmone, vel in faucibus, non ulcus, non defectio, non profluvium alvi fuit. Si quis vero in hujusmodi febre leniter ruf sit, is neque vehementer sitire debet, neque aquam frigidam bibere. Accedit Alpinus med. meth. lib. II. ita habens: in continentibus febribus vehementer æstuosis, Medici omnes largum potum algida aquæ exhibere suescunt, quia calorem nativum concentrat, ut statim inde sitis & calor cesset: roboratur inde

totum corpus & aqua epota digeritur & plerumque largissimos sudores frigida aqua potus suscitatur, nonnunquam vomitus biliosi fiunt & aliquando per alvum copiosi humores profluunt & urinam copiosam excitat. Mirabile est, concludit, quomodo tale presidium has febres expugnet; nam excretionibus, quas aqua suscitatur, hec febres finiumur. Idem auctor Ægyptiis hoc in usu, quin inter secreta fuisse de Med. Ægypt. lib. IV. c. XV. tradit, aliqui, scribens, pro secreto habent synochas & ardentes febres, multam aquam angaria (quæ cucumeris species) agrotis propinantes, sanare, si modo febricitantes ea multis diebus in cibo ac potu sola utantur. Alii tempore vehementioris astus, largius frigidam potandam concedunt, qua epota, agros multis pannis contegentes, sudorem procurant, qua non paucos audio ibi sanatos fuisse.

## §. III.

Vel potius  
alio  
refrige-  
rantibus.

Nec immerito tam magnifice de frigida potu in ardentibus sensisse Veteres, uberius testatur & ratio & experientia. Nisi enim ventriculus, vel aliæ internæ partes jam vera inflammatione affectæ, nec summa cum extremorum frigore anxietas, neque etiam pulsuum contractio & sanguis deficiens adsit, utique, aqua bonæ notæ, subfrigida, non prorsus gelida, haustu, non simul & semel, largiter tamen pota, egregie prodest. Nam frigus in humido æstuosum nimis paritium sulphurearum & ætherearum in sanguine motum obtundit, fibrasque remissiores adducit nimiumque distentis contractilitatem & elasticitatem justam reddit. Neque etiam a frigore noxa timenda, quia frigidum, successivis haustibus corpus subiens, a calore interno tepescit, qui humidus tepor ad relaxandas spasmo contractas fibras & succos in minimis stagnantes expediendos & fluxiles reddendos, apprime proficiuus, ut hinc sudor & urina copiosius fluant & alvus moveatur. Sed quum in septentrionalibus nostris regionibus admodum raræ leves ejusmodi, puræ & subtiles aquæ, reperiantur, coctione & admixtione congruorum corrigendæ utique. Ipse Hippo-



*crates* aquam cum hordeo coctam jam in ardentibus laudat. Et *Aretæus* aquam cum lacte mixtam in cholera commendat. Qui nostratibus solennes & proficui deprehenſi frigidi potus, sunt maxime, julapia, ex aqua fontana cum succo citri & saccharo nec non ptisanæ ex rasura cornu cervi, radice scorzonera, cum sirupo acetositis citri, vel julepo rosarum & spiritu vitrioli, conditæ, item aqua cum frusto panis cocta. Huc quoque referendum serum lactis dulce, vel acidulum, cum succo citri coactum, item aquæ minerales temperatæ, quo nomine celebres acidulæ Selteranæ, Antonianæ & Wildungenſes.

## §. IV.

Ad obtundendam tandem & contemperandam, in chole- <sup>Acrimo-</sup>  
ricis potissimum febribus, acrimoniā acidam causticā suc- <sup>nia ob-</sup>  
corum biliosorum in ventriculo & duodeno stagnantium, spe- <sup>tundenda</sup>  
ctatæ virtutis ex compositis pulvis Marchionis maximeque  
pulveres absorbentes, quæ commodissime ingrediuntur ter-  
reateneriora, lapides cancrorum, mater perlarum, conchæ  
præparatæ, cornua & ossa philosophice præparata, nec non  
ex commendatione *Langii* atque *Cratonis* crystallus montana.  
Nobilis quoque ad æstum extinguendum & intestinum mo-  
tum componendum nitri virtus quod his pulveribus cum fructu  
ob id subinde admiscendū. Sed necesse est, ut pulveres ejusmo-  
di temperantes in sufficienti quantitate diluti vehiculi assu-  
mantur, crebrius etiam & convenienti tempore. Neque mi-  
nus ex usu sunt diluentia ac demulcentia, emulsiones scilicet,  
ex amygdalis, seminibus quatuor frigidis, præsertim cucur-  
bitæ, cum aquis florum, quæ paregorica simul virtute pol-  
lent, sambuci, rosarum, buglossæ, primulæ veris, tilia, li-  
liorum convallium, nec non aqua cerasorum nigrorum. Con-  
ducunt quoque hoc nomine gelatinæ ex rasura cornu cervi,  
lacipsum cum aqua mixtum, oleum amygdalarum dulcium,  
serum lactis dulce, item juscula ex pullis gallinaceis contusis  
& in vase clauso cocta. Et hæc utique remedia apprime  
proficua sunt ad arcendam inflammationem partium nervo-  
fo-

fo membranacearum, quæ his morbis eventu demum accedit funesto, modo exhibeantur debito ordine, tempore ac dosi, cum iudicio & observatis quibusdam cautionibus, jam subnectendis.

CAUTELAE ET OBSERVATIONES  
PRACTICAE.

§. I.

Temperies utilis.

Sicut in curatione omnium acutarum febrium; ita maxime ardentium & quæ ex inflammatione sunt, tutissima & optima methodus est, per totius morbi decursum, placide & moderate procedere, omniaque quæ a temperie & moderamine, quoad pharmaciam æque ac diætam & regimen, recedunt, evitare solite. Egregium inprimis hanc in rem est *Celsi lib. III. c. VII.* monitum, ita habens: *etiam amplo conclavi æger tenendus est, quo multum & purum aerem trahere possit, neque multis vestimentis strangulandus, sed admodum levibus tantum velandus est. Possunt etiam super stomachum poni folia vitis in aquam frigidam vineta, ac ne nimia siti vexandus est.* Moderatus quippe & æqualis calor, in febribus hisce, ad materiæ morbificæ correctionem, resolutionem & ex corpore diffusionem, plus præstat, quam omnis, quantumvis pretiosa, medicina. Sed nihil vicissim perniciosius, quam fervido conclavi accendere, vel etiam abstinentia potus intendere, calorem immodicum, qui vires exsolvit, debitam vitiosi humoris a succis vitalibus se & excretionem impedit, & humidum ad expeditum sanguinis & humorum progressum & ad coarctata & repleta minima vasorum aperienda & relaxanda necessarium, absumit. Neque ea propter semper utilis, sed sæpius nocivus, in æstuosis hisce febribus, frequens potuum calidorum & infusorum theiformium usus. Multo vero magis detrimentum procurant ea, quæ calefaciunt, massam sanguinis commovent & positive sudorem movent.

Et aer purus.

con-

conclave & aeris puri usuram. Nam sicuti subtilior & æthere elastica in aere substantia, genuinum illud pabulum & fomentum est, quod virtutem vasorum elasticam vitalem systalticam & robur partium sustinet: ita aer multis humidis & pravis effluviis inquinatus & ob id vi elastica spoliatus, velsanis, tanto vero magis infirmis corporibus, adversus est atque damnosus. Neque aliam subesse causam arbitror, quod plurimi ex plebejis, quorum natura ad vincendum morbum alias satis valens, in febribus acutis pereant, quam conclavia angusta, humilia, & haud raro nimis calefacta, in quibus, præsertim quando plures decumbunt, aer morbidus & tetrus halitibus gravis est, quem continuo hauriunt.

## S. II.

Natura etiam febrium continuarum medicatrix optima. *Natura*  
 Igitur hujus motus cum cura attendendi ab artifice. *Exse-*  
 runt autem hi sese maxime per rigorem, qui ex medulla spi- *motus at-*  
 nali, cum horroris & frigoris sensu, venit, & certis temporibus, *tendendi.*  
 diebus maxime imparibus, dimidio quarti, septimo, undecimo  
 & decimo quarto, accidit. Est quippe hic rigor non nisi affectio  
 generis nervosi universi corporis spasmodica, qua sanguis & hu-  
 mores, ab exteriori corporis peripheria, versus interiora,  
 cor, cerebrum & vasa majora, cum quadam vehementia pel-  
 luntur, eaque propter extrema refrigescunt, interiora vero san-  
 guine nimis replentur & distenduntur, unde pulsus contractus  
 est, pectus angitur faciesque cum vasis capitis turgescit. Quod  
 si igitur post hunc rigorem, succi intus acti æquali renisu &  
 auctiori cordis & arteriarum systole ad corporis superficiem  
 repelluntur, sæpius tota morbi & causæ morbificæ vis, uno  
 impetu, per largum universi corporis sudorem, aut narium  
 stillicidium, frangitur penitusque eliditur. Sic procedens rigor  
 salutaris est, criticus ob id recte vocatus, post quem arteria-  
 rum ictus æquabiles fiunt & molles, circulus sanguinis debi-  
 tus & vires cum somno redeunt. Sed ubi cordis & vasorum  
 systaltica vis non tam valida est, ut appulsum sanguinem ite-

(IV.)

Y y

rum



rum extus agere possit, symptomaticus est rigor & malus. Tum enim nec corpus incalescit rursus, nec pulsus æqualis fit, nec sanguis per nares, nec sudor calidus universalis per poros, sed particularis & frigidus circa caput & collum, effertur, nec corpus cum animo reficitur, nec somnus redit. Sanguis potius intus in minimis vasis impactus subsistit, ac in cerebro phrenitidem & convulsiones, circa cor & pulmones, summam præcordiorum anxietatem, spirationem anhelosam, difficilem, viriumque ad animi usque deliquium dejectionem, facit, ut postea nono plerumque die, mors excipiat. Quandoque etiam extra criticos dies accidunt ejusmodi rigores, sed hi pariter sunt symptomatici malumque præsagiunt eventum. Hi itaque naturæ motus, mortem, vel salutem, adducentes, probe a medente attendendi. In hoc enim præcipuum ad prognosin & tempestivum remediorum usum versatur momentum, quia totius doctrinæ practicæ fundamentum, quod optime tenuit primus artis parens *Hippocrates*, quod serio inculcarunt optimi & fidissimi hujus interpretes, *Mercurialis* atque *Duretus*, sed ex nostris norunt paucissimi.

## §. III.

Non tur-  
bunda  
natura  
sed ju-  
vanda.

Quando sic natura motus instituit extraordinarios, quiescendum Medico nihilque movendum. Abstinendum quoque plane a cibo. Et corpus tantum in moderato & æquali calore conservandum. Si autem naturæ facultas ad expellendum sanguinem & excretionem efficiendas, sola non sufficit, juvanda congruis auxiliis perite, sive interius analeptici & diaphoretici temperatis, sive exterius derivantibus & discutientibus. Nam profecto nunquam magis, quam in periculosis & acutis morbis, summopere necessaria maximeque momenti est, temporis in agendo opportunitas.

## §. IV.

Caput de-  
fenden-  
dum.

Vbi igitur post rigorem incidit cephalalgia plethorica, cum incipiente mentis emotione & nares parum sanguinis stillant, epithema nobis usitatum, ex aceto rosarum, aqua rosarum, camphora in spiritu rosarum soluta, nitro & oleo ligni Rhodii, sub-

subfrigide, non modo temporibus, sed & melius raso toti capiti, admotum, egregie se gerit refrigerando, discutiendo & inflammationi resistendo. Idem hoc epithema, lintheo triplicato lato, præcordiis impositum, ad levandam anxietatem, inquietudinem depellendam & spirationem facilitandam eximii usus. Optimum tamen etiam auxilium ad arcendam phrenitidem expectandum a venarum in naribus, sive id fiat per instrumentum scarificatorium, sive intrusum culmum straminis, apertione, tepesactis simul & frictis pedibus atque femoribus & data interius mixtura discutiente, diaphoretica & analeptica cum aceto stillatitio, aqua cinnamomi, rosarum, cardui benedicti, mixtura simplici, cinnabari, lapidibus cancrorum & bezoardico minerali.

## §. V.

Ad sedandam sitim & humectandas fauces aridas cum *sitis se-*  
lingua, ego non præsentius vidi remedium, quam serum lactis *danda.*  
dulce, in cuius mensura nitri puri drachma dimidia soluta, quippe quod crebrius, sed parvis haustibus subfrigide potum, æstum præternaturalem simul extinguit. Os quoque & fauces subinde eluendæ aqua in qua rob diamoron & nitri sufficiens quantitas soluta. Præbere hæc etiam potest gargarisma. Injectiones vero per syphonem nunquam probo, quia valido attritu augent dolorem & inflammationem. Præterea ad præsciendendam anginosam inflammationem, insigniter prodest linctus lente deglutiendus, ex julepi rosarum uncia, nitri puri granis quindecim & camphoræ granis tribus, in drachma una olei amygdalarum dulcium solutis.

## §. VI.

Vt ut alvum purgantia, ratione docente & experientia *Alvus pe-*  
monstrante, in febribus ardentibus, non sine periculo præ-  
beantur; e re tamen est, ut alvus semper sit libera. Sub *rite mo-*  
morbo igitur hoc optime præstant glandes & clysteres, ex so-  
lo lacte, melle & pauxillo nitri. Facta vero crisi & coctio-  
ne, ex urinæ sedimento cognoscenda, alvum utique clemen-  
*tiori-*

tioribus laxantibus ducere, tamarindinatis, mannatis, rhabbarinis, passulatis & tartareis, expeditissimum, quo vitiosi succi, in primis viis per ipsum etiam morbum geniti, exturbentur, ne novo morbo ansam & causam præbeant.

## §. VII.

*Frigida  
potus uti  
liis.*

Aquæ frigida potio, a veteribus eximie collaudata, heroicum cum hoc in morbo & magnæ efficaciam est remedium, eaque propter attentionem & circumspectionem Medici poscit. Supra tamen satis fusè jam expositum, cur & quando ex usu sit. Heic igitur monuisse sufficiat: nunquam simul & semel magis haustibus præbendum esse frigidum potum, sed successive & crebro; nunquam in principio morbi, sed elapsis jam aliquot diebus; nunquam tempore accessionis, vel exacerbationis, vel etiam sub rigore & pulsu parvo, aut intermittente; nunquam nisi plethora prius soluta. Sed quando extrema calida, pulsus æqualis, celer & magnus.

## §. IIX.

*Acrimonia rem-  
peranda.*

Si febris est cholericæ, acuta, admodum periculosa, ob succos biliosos mordaces nimium & corrosivos, nerveas ventriculi & intestinorum tunicas arrodentes, celeri & efficaci auxilio est opus. Tum igitur consultum est, pulveres absorbentes ac temperantes, crebro & majori, quam alias moris est, quantitate, propinare cum diluentibus ac demulcentibus. Quo nomine ego nunquam non expertæ virtutis comendo pulverem ex lapidum cancrorum, matris perlarum, cornu cervi sine igne, crysalli montanæ, sive lapidistalci calcinati, ana drachma, nitri scrupulo, de quo singulis horis sumenda drachma una, cum emulsionis amygdalatæ uncii binis, cui drachmæ duæ olei amygdalarum dulcium commixtæ. Ad impetuosas autem biliosas excretiones compescendas, præstabilis virtus est liquoris nostri anodynæ mineralis, præsertim si cum aliquot guttis olei macis essentificetur & cum diluto vehiculo, vel aqua tantum frigida, propinetur. Quia enim nimis celerem systalticum, vel peristalticum motum in ductibus biliariis sistit,

*Impetuo-  
se excre-  
tiones  
compe-  
scenda.*



stit, efficit, ut minor copia succi biliosi ad duodenum truda-  
tur & ob id copiosior excretio sistatur. - Et certe his præsidis,  
debito tempore, congrua dosi & mature usurpatis, & cho-  
lericam, & dysentericam passionem, brevi fuisse sublatam,  
multis exemplis edoctus novi.

ENARRATIONES MORBORVM.

OBSERVATIO I.

Summus quidam militum præfectus, quem vocant *Ge-Ardens*  
neralem, quadragenario major, sanguineus & vividus, laute *copioso*  
vivens vinique potissimum potui indulgens, ceterum bene *potu jula-*  
valens, nisi quod vere & autumno, rheumaticis & catarrho-*pii sana-*  
sis defluxionibus affligeretur, potarat in convivio liberaliter *ta.*  
vinum potens Hungaricum Tockaviense, ad mensuras mini-  
mum quatuor, eodemque plenus, vesperi sub coelo nubilo &  
frigido in villam suam vicinam redierat. Redux factus, noctem  
insomnem & mire æstuans exegit, mane expertus calorem  
intensissimum, cum pulso magno & celeri, cephalalgia, vi-  
rium prostratione, faucium ardore ac siti. Bibit quidem in-  
fusedum theæ, sed inde anxietas increvit & vomendi conatus  
accessit. Sumisit pulverem absorbentem & nitrosum sed sym-  
ptomata perstiterunt. Admisit quoque venæsectionem in bra-  
chio, sed sine levamine. Hinc vocatus ego quarto die, offen-  
di ipsum ingenti æstu affectum & summopere conquerentem  
de ardore ventriculi ac siti. Illico igitur removi cerevisiam  
lupulatam valde & spirituosam, male eo usque ad sitim extin-  
guendam liberaliter datam. Annuit æger ac enixe petiit  
haustum frigida. Ego vero sic condere nolui, sed paravi ju-  
lapium, ex aquæ fontanæ mensuris duabus, succi citri uncia, cum  
tantundem julepi rosarum, de quo successive biberet & cum  
quo sumeret, binis quibusvis horis, pulverem ex matre perla-  
rum, conchis, nitro & lapidibus cancrorum. Æger impa-  
tiens quatuor haustibus julapium ingurgitavit omne, tres etiam  
assumisit pulveres ac inde refrigerium sensit internum, melius  
Yy 3 quie-

quievit & parum sudavit. Iussit itaque ut demuo conficere-  
tur julapium, ejusdemque mensuras duas intra aliquot horas  
me inscio ingessit. Inde vero incidit in effusissimum sudorem,  
seque alvi dejectiones crebriores, somnus rediit, symptomata  
discussa & convaluit.

*Epicrisis.*

Veteres, & inter hos maxime *Galenus*, *Areteus* ac *Cel-  
sus*, aquæ frigidæ potum in synocha & ardentissima febre  
mirifice commendarunt, quin in hujus usu omnem fere salutis  
spem reposuerunt; hac tamen cum cautela, ne detur ubi in-  
terna jam inflammatio, scirrhus, aut tumor oedematosus est.  
Ego quoque præstabilem simplicis hujus virtutem multoties  
expertus sum in cholericis passionibus, ad contemperandum  
bilis ardorem & acrimoniam, viresque languentes suscitanda-  
das. In nostro egregia pariter ipsius fuit facultas, maxime  
quod sudorem movit. Neque vero etiam nocere hoc in ca-  
su magna julapii quantitas potuit, quum sanguis a copia Hun-  
garici vini vehementer exagitatus esset & quasi incensus. Et-  
enim debet esse proportio quædam inter vim morbi & vires  
remedii, maximeque huic febri, perite monente *Areteo*, ma-  
gnum ac celer remedium opponi. De singulari autem aquæ  
effectu sudorifero notari inprimis meretur *Riverii* testimo-  
nium *Cent. I. obs. XIX.* ita habens: *observandum, a spiritu sub-  
phuris, vel ejus loco spiritu vitrioli, cum aqua exhibito, sudo-  
res copiosos fuisse provocatos; quod multis experimentis nobis  
innotuit, qui plures tertianas curatas vidimus eodem remedio,  
in summo accessionis aestu & urgente siti exhibito; unde copiosi  
sudores provocabantur, a quibus non solum paroxysmus, sed  
etiam totus morbus integre solvebatur. Minuenda tamen est  
in minori aquæ quantitate spiritus quantitas, ne nimium ace-  
scat.* Ceterum sicuti aquæ frigidæ potus & refrigerantia ef-  
ficacissima in febre, quæ a sanguine propter spirituosorum ab-  
usum nimium exæstuato accenditur; ita vicissim aquæ cali-  
dæ potus, in febre, quæ in sanguineo, pituitosis, ex obstipatis

per

aërem frigidum & humidum cutis potis inducitur, virtutis est longe saluberrimæ. Vidi ego sæpe plebejos, sub coelo pluvioso, nebuloso & humido inter labores versantes diu & inde febre correptos, solo potu calido, ex aqua, cum carduo benedicto & scabiosa decocta, adjecto æquali mensura vino, & calide pota hac mixtura, sudore inde oborto, cito ac tuto morbum discussisse. Quod autem frigida etiam sudorem movere possit, ratione non caret. Nam expansum nimis vasorum elaterem adducendo, tonum & robur ipsis restituit. Calorem fervidum restinguendo, impedit feri & lymphæ coagulum, quod ipsis a forti calore induci albuminis ovi exemplo constat. Tenaces autem succi, minima vasculorum excretoriorum obstruentes, liberam evacuationem impediunt. Frigidum quoque æstuanti corpori immissum tepescit, tepidumque factum fluxilitatem humoribus conciliat & aridas exsuccas partes mollit.

## OBSERVATIO II.

Generosissima femina, triginta sex annorum, sanguineo-Synocha cholericæ, natura sensibilibior, animo in affectus prona, inge-cacochy-nio alacris & sagax, ceterum corpore nervosa & robusta, ci-mica cum borum appetens & liberaliter coenans, ob alvum adstrictio-purpura rem & collectas inde cruditates diu conquesta est de doloribus funesta. pressoriis & inflatione ventriculi ac hypochondrii sinistri, mensium quoque, ob uterum ex crebra & annua fere imprægnatione debilem, fluxum, ratione copię & temporis, non experta est legitimum. Ad tollenda hæc vitia multis quidem usa est medicamentis & Medicis, sed sine levamine. Aquarum autem medicatarum potum, ob ventriculi inbecillitatem & atoniam, ferre potuit nunquam, melius tamen balneum ex aquis Toeplicensibus. Accidit interea, ut medio vere, post gravem terrorem & excandescuntiam, præcedente levi horripilatione, incideret in febrem valde ætuosam, quæ sitim cum calore accendit intensissimam, somnum excussit omnem viresque mirifice prostravit. Accitus primum Medicus loci, qui venæsectionem, ante sex hebdomades vix admis-



missam, reiterare renuit. Quinto die vocatus ego, pulsum fortem & magnum deprehendi, cum æstu intolerando, anxietate circa præcordia, inquietudine, insomnia & dolore dorsi. Pugnavi igitur adversus hæc symptomata diluentibus & refrigerantibus potionibus, pulveribus absorbentibus, nitroso-diaphoreticis, cum succo citri permixtis. Fluxit inter hæc ex utero ichor cum sanguine, ad viginti quinque horas. Sed septimo die incurrit horripilatio, extrema refrigerata, pulsus celer & contractus factus, facies turgida, oculi rutilantes & levis cogitationum aberratio visa. Exactis tamen duabus horis & data mixtura discutiente diaphoretica, ex aqua cardui benedicti, cerasorum nigrorum, theriacali, aceto destillato, antimonio diaphoretico, lapidibus cancrorum, cinabari & sirupo acetositis citri, rediit calor per totum corpus ad pedes usque, pulsus increbuit, oculi splendorem rutilantem posuerunt & per universum corpus fausto prodiit omine sudor, quem temperatis diaphoreticis & infuso theiformi secundare jussi. Inde magna sequuta symptomatum remissio & ægram in vado constitutam esse, visum quidem, sed quia somnus redire noluit, neque æstus penitus remisit, neque etiam vires restitutæ, non sufficientis & omnibus numeris absolutæ criseos fuit indicium. Nec vanus fuit metus. Nono enim die, post lenem rigorem ex dorso, novus paroxysmus febrilis incescit, cum magna præcordiorum anxietate, intensiori æstu, inquietudine, spirandi difficultate, ita ut ægra corpus mirum jectigaret & lectum subinde mutaret. Postero die purpura rubra cum alba comparuit & collum totumque pectus obsedit, quæ congruis præfidiis excepta. Decimodie sanguis rursus profluxit aquosus ex utero, in abdomine oborta tormina & per alvum feces liquidæ & biliosæ, postea etiam sine sensu, secesserunt, & luculenter prodiderunt gravem in intestinis inflammationem eamque sphacellosam, quam præterea borborygmi in ventre post assumptum potum arguebant. Undecimo die, post perpetuas tandem vigi-

hæc mens alienari coepit, pulsus reddi convulsivus, spiratio fieri anhelosa, subsequente paullo post morte, ob vim cordis & vasorum vitalem elasticam per morbum diuturnum & vigiliis continuas fractam, nunc deficientem adeoque naturam penitus succumbentem.

### *Epicrisis.*

Febris hæc merito vocanda synocha cacochymica, sive putrida universi corporis inflammatoria, ex abundantia impuri sanguinis progenita, quæ, si viscera offendit minus integra, ut hic ventriculum & uterum, raro ex voto, sed plerumque funestum, sortitur eventum. Ego vero etiam summo opere improbavi, sed tacitus, ne Medicus primus malum nomen incurreret, ob factum, quod infectum fieri non poterat, quod neglecta in principio sanguinis missio in corpore plethorico & cacochymico, sub pulsu vehementi, duro & magno, unde etiam ipsa natura a copia sese per uterum liberare molita. Licet etiam septimo die criseos indicia compa-ruerint, somni tamen & virium defectus, cum restitante calore, imperfectam eam fuisse, prodidit, & latitare adhuc intrus materiam perniciosam. Fuit hæc purpuracea, quæ teste experientia, in corporibus impuris cacochymicis, præsertim feminarum, sub declinatione febris continuæ succedere solet, criticis diebus. Sed funesto plerumque eventu. Natura enim, sive potentia elastica cordis & vasorum, morbi vehementia jam debilis nimium, eandem minus vincere & expellere potest, unde de novo in minimis vasculis fiunt stases inflammatoriæ; tandemque mors excipit. Nostra in ægra insanas inflammationes circa uterum & maxime intestinalia confederunt, easdemque dejectiones aquosæ cum torminibus, præsertim involuntariæ, ob secessum partium serosarum a sanguine coagulato stagnante, abunde satis indicarunt.

### OBSERVATIO. III.

Dux militaris quinquagenario major, sanguineo-cholericus, robustus, sanguine plenus, laute vivens, plus vini quam  
(IV.)

Zz

*Febris ar-  
dens san-  
guinea co-  
cere-pio potu  
sanata.*

cerevisiæ bibens, in iram & vehementes animi affectus pronus, coelebs, sed veneri vagæ admodum indulgens, postquam ebrius vehementer excanduisset & postea cum concubina habuisset rem, incidit illico in febrem vehementissimam ardentem. Invasit hæc cum artuum tremore, juncta fuit summa præcordiorum anxietas, æstus in pectore ingens, capitis dolor, somnolentia, nec non mentis emotio. Conquestus simul est de dolore lateris dextri & quarto die exspuit tussi sanguinem cum pituita mixtum. Secta quidem fuit in principio vena, sed quia inde nullum levamen, vocarunt me. Erat autem æger, quum advenirem, impatiens quandoque & irrequietus, quandoque somnolentia & torpore obrutus, sitis ingens, alvus adstricta, calor vehemens, urina tenuis flammea. Expensis cunctis, inflammationem ventriculi & pulmonum ac minus faustum eventum sum suspicatus; ideoque ad contemperandum iterum illum inflammatorium æstum pro viribus adhibui præsidia. Clystina scilicet emolliens & relaxans, ex sero lactis, melle ac oleo amygdalarum dulcium, cum momento nitri alvo injicere jussi ad uncias duodecimaliquoties, non tam ad purgandum, quam potius ad humectandas & relaxandas intestinorum tunicas, siquidem clysteres stimulo carentes, aliquoties injecti & diutius retenti, balneum quasi præbent internum. Dein quum pulverulenta averfaretur omnia, emulsionem conficiendam scripsi, ex decocto cornu cervi mensura, amygdalarum dulcium uncia una cum dimidia & seminum quatuor frigidorum majorum ana drachmis duabus, additis aquæ ceraforum nigrorum unciis binis, totidemque rosarum, matris perlarum, nitri depurati ana drachma, julepi rosarum uncia una. Hanc intra aliquot horas ebibit ac præterea ptilisanam ex hordeo, rasura cornu cervi & scorzonera, tam avide oburentem sitim ingurgitavit, ut viginti quatuor horarum spatio, vel septem ejus mensuras epotaret, idque per aliquot dies. Dedi etiam quandoque jusculum avenaceum cum aliquot cochlearibus olei amygdalarum dulcium. Et exterius:

thorax



thoracem dolentem atque præcordia inungere iussi linimento ex olei amygdalarum dulcium uncia, camphoræ drachma & extracti castorei liquidi drachma dimidia. His æstus restin-  
ctus septimoque die urina turbata ac nonnihil ad fundum di-  
misit. Accessit nono die diarrhoea, ut plus quam decies intra  
diem & noctem deiceret, cum levibus torminibus in ventre.  
Successit hic fluxus alvi per quatrimum, ac interea nihil sum-  
sit, quam juscula confortantia carniū cum tantillo vini &  
macis. Sic felicissime febris soluta, coquefacto, vires redie-  
runt cum sanitate.

*Epicrisis.*

Natura valens & robusta, congruis auxiliis adjuncta, uti-  
que sæpe miracula præstat, seu effectus extraordinarios plane.  
Quare ego non facile spem abjicere soleo, in perniciosis et-  
iam & inflammatoriis febribus, quando ægri multum sitiunt  
& copiose ingerunt liquida, sed commoda. In his enim ma-  
gna vis, febres cum magno ardore junctas, sanandi. Nam  
fluxiles & dilutos reddunt spissos humores, qui obstructions  
vasorum efficiendo, æstum augment liberamque exhalationem,  
tam in, quam extra corpus, intercipiunt. Aridas quoque &  
nimis rigidas fibras molliendo, febrem efficiunt mitiorem &  
corpus disponunt ad excretionem. Nihilominus tamen pru-  
denter etiam se gerat artifex in horum benignorum & inno-  
centium remediorum usu, & caveat, ne febrem, quæ naturæ  
medicatricis opus, quo auctiori sanguinis motu obstructions  
& stases viscidorum succorum dissolvit, intempestivo refrige-  
rantium potu, nimium deprimat. Nam in febribus minus  
æstuosis & corporibus phlegmaticis, diluentia liberalius data  
plus nocent, quam profunt. Vbi vero æstus fervidus in san-  
guineo-cholericis, & massa sanguinis copia partium sulphu-  
rearum referta, largior liquidorum potus, modo ventriculus  
eum subigere possit, non nocet, sed præstans est medicina.  
Nisi enim in his nimius calor sistatur, vires brevi exsolvi &  
lymphaticos humores incrassando ac coagulando, ipsam gan-  
grænam partibus internis inducit.

## OBSERVATIO. IV.

*Cholerica  
passio cito  
sanata.*

Illustrissima femina tenera & exquisiti sensus, vigesimum quartum annum haud ita pridem egressa, appulerat in Carolinis, potatura thermales aquas. Sed quum tertio die ira percita esset & cerasa cum fragis avidius ingessisset, in prandio incidit in passionem cholicam. Vomuit nempe & dejecit copiose, intra diem & noctem plus quam vigesies, cum anxio æstu & dolore circa præcordia, extremorum refrigerio, magna inquietudine corporisque jectigatione. Accersitus ego lac cum tantundem juris pullorum tepide bibere, binis quibusvis horis pulverem ex cornu cervi sine igne parato, lapidibus cancrorum & pulvere Marchionis, æquali pondere mixtis, ad drachmam unam sumere & exterius abdomen inungere jussi totum linimento, ex tribus olei amygdalarum dulcium partibus, una olei menthæ & dimidia olei macis destillati confecto, positis supra linteis complicatis calidis. His anxietates & tormina sublata, evacuatio per superius & inferius os imminuta & intra triduum, addito pulveribus cortice chaccarillæ, morbus facili & explicata curatione discussus.

*Epicrisis.*

Nil perniciosius est ira, si stomachus fermentescibilibus cibis fartus. His enim animi motus mox spasmo stringit stomachi & intestinorum tunicas, & facit, ut humores in hoc cavo hærentes, diutius detineantur ac ipsa hac mora mutua quasi confermentatione, indolem contrahant sæpe tantum non venenatam. Tanto vero magis omnia hæc nocent, sub aquarum mineralium potu, quippe quo semper ventriculus ipsiusque systaltica vis infirmatur, ut dein eo facilius in ipso hærare & colligi possint incongrui succi & cruditates. Hæc autem vehemens passio, a summa humorum acrimonia, ex viridescente vomitu ejectorum colore cognoscenda, fuscitata, celerem opem & efficacem medicinam postulavit. Quare pleniori dosi & crebro data corrigentia & demulcentia. Et

licet

licet in principio ingesto largiter lacte subsequerentur vomitus caseosi, acidum in primis viis arguentes, instituti tamen hoc remedio, quo etiam effectum, ut vomitu exturbata, postea nec virescerent, nec coagulata essent, sed liquida, mucosae & bile imbuta.

## OBSERVATIO V.

Quum anno MDCLXXXIV. Mindæ Westphalorum *Me-Cholericæ* medicinam facitarem, æstate sicca & præcalida regnante, *Chi-febris* poliarcha generosissimus incidit in febrem cholericam. In hac *tu frigido curata.* miris torquebatur anxietatibus, inquietudine, interno æstu ac crebris dejectionibus, quæ ita vires prosternebant, ut aliquoties animi plane deliquium incurreret. Nil proficiebant pulveres terrei absorbentes, cum momento theriacæ coelestis, nil diascordium *Fracastorii*, nil emulsiones ex decocto avenaceo cum amygdalis, nihil etiam exterius linimenta spirituosae. Tertio potius die excretionum vehementia & virium lapsu ad ultima ventum esse videbatur. Tum æger ob ardentem internum æstum enixe petiit haustum frigidæ. Ego vero propinare renui, & suasi, ut decoctum hordei cum rasura cornu cervi tepide biberet. Discedebam a summe debili & omnem fere salutis spem, irritis huc usque cunctis, abjiciebam. Sed quum post aliquot horas redirem, incredibilem & repentinam interea accidisse mutationem deprehendi. Neque enim amplius de anxietatibus, neque de tam magno virium lapsu, neque etiam de tanto interno æstu conquerebatur & pulsus quoque plenior & quietior micabat. Æger autem me magnopere hæc omnia admirantem alloquebatur & confitebatur: se ob sitim intolerandam sibi amplius temperare non potuisse, sed, sive mortem, sive salutem procuret, ebuisse primum vitrum majus unum frigida plenum a ministro porrectum & post dimidiam horam alterum, sicque mensuram aquæ ingurgitasse. Inde se mox sensisse virium quandam refectionem, adstrictionis quasi sensum in ventriculo, æstus mitigationem & quietem, dejectiones moderatiores cutimque antea aridam & siccam nunc etiam madescere. Nec male



cessit postea experimentum, sed æger assumtis iusculis contortantibus, ex carnibus cum macere, vires mox iterum recepit & sic præter omnium opinionem cito convaluit.

*Epicrisis.*

Notabile hac in observatione, nil profecisse præsidia, quæ corrosivam humorum acrimoniam, potissimam passionis cholericæ causam, obtundunt, sed frigidum potum ægrum levassè. Ego quidem frigidam potionem roborantibus accenseo, quæ non tam materiæ, sed potius motuum vitio tollendo apta. Frigus nimirum tonum & elatere partium vehementi æstu & dejectionum copia valde resolutum, fibras leniter stringendo, & adducendo, reparat & hac ratione facultatem motricem tonicam, in qua virium robur consistit, restituit. Eum enim frigoris esse effectum, ut fibrarum elasticitatem intendat, patet experimento, quo exciso carpionis corde adhuc pulsante, systole illico cessat, si immittitur in aquam calidam, si vero iterum frigida injicitur, moveri rursus incipit. Notum quoque est, corpora humana, sub diuturna aëris austrina & humida constitutione, virium experiri resolutionem atque languorem, accedente autem sub frigido & sereno a ventis ex oriente spirantibus aëris habitu, illico in omnibus functionibus robur pristinum recipere. Sed uti cuncta roborantia, exemplo martialium & famosi corticis chinæ, cum magna prudentia usurpanda sunt, & nonnisi correcto prius, tam quoad qualitatem, quam quantitatem, materiæ vitio, & meatibus satis patulis, neque etiam primis, sed posterioribus diebus: ita etiam id ipsum circa frigidorum potum merito tenendum. Heroicum potius hoc manet auxilium, nec credendum, quod uni, id alteri etiam prodesse. Omnis enim medendi methodus, nititur exacta discretionem, non modo morbi ejusque causarum, sed & individuorum, circumstantiarum & quoque temporum. Et quando his minus observatis salutaris subsequitur effectus, ad fortunam potius, quam artem referendus.

OBSER-

## OBSERVATIO. VI.

Femina honesta aliquot supra triginta annos nata, cor- *Ardens*  
 pore robusta, biliosa & animo impatiens, plus inter cibos vi- *continua*  
 ni quam cerevisiæ bibens, medio Maio incidit in febrem ar- *in inter-*  
 dentem exquisitam. Medicus ordinarius præbuit bezoardi- *mitten-*  
 cam tincturam aliquoties intra aliquot horas. Inde pathe- *tem ter-*  
 mata exacerbata, anxietas scilicet, inquietudo, æstus, vigilia, *tianam*  
 loquacitas nimia, cum alvi strictura, accesserunt etiam tormi- *mutata.*  
 na in ventre & deglutitio facta admodum difficilis. Die quar-  
 to sanguis quidem ex utero fluxit, symptomata tamen non re-  
 miserunt, sed accessit potius, quum infans Medico largum  
 vini haustum assumsisset, leve delirium. Semper autem  
 major mane, quam vesperi symptomatum fuit vehementia.  
 Septimo die, præcedente horrore & rigore, animam agere  
 videbatur, sub mente emota & respiratione cita anhelosa.  
 Elapsis tamen aliquot horis, ad se rediit, corpus sudore dif-  
 fluere coepit, & in cute, præsertim dorsi, comparuerunt ma-  
 culæ rubræ, quas petechias esse crediderunt. Ego nunc in  
 auxilium vocatus, suasi, ut alvus per sex dies clausa duceret-  
 ur clystere & mixturam ex aquis destillatis, cum aceto la-  
 pidibus canerorum, mixturâ simplici, mihi usitatam, propi-  
 navi. Hinc circa decimum quartum diem sensim remiserunt  
 symptomata & ad naturalem statum visa redire omnia. Præ-  
 ter spem autem hæc valde acuta & continua febris, mutata  
 in tertianam intermittentem, quæ solito typo solitisque sym-  
 ptomatibus infestavit, post quatuor tamen accessiones, pur-  
 gatis decocto mannato & tamarindinato primis viis &  
 pulverum antifebrilium usu, mox discessit. Quum etiam in-  
 sequenti anno eadem hæc femina, eodem tempore, iisdem  
 symptomatibus iterum afficeretur, administrata sub initium  
 venæsectione, adhibitis diluentibus potionibus & pulveribus  
 salino-nitrosis cum clementer laxantibus, longe mitius decu-  
 buit, circa quartum diem febris in intermittentem concessit,  
 mox pariter congruorum usu discussam.

*Epicrisis.*

*Epicrisis.*

Taxandus merito venæsectionis in femina plethorica & vini potui assueta neglectus. Notandus etiam vulgaris, admodum tamen perniciosus error practicus, quo primis statim diebus, liberali manu essentias bezoardicas & alexipharmacas porrigere suefcunt morborum artifices, ad malignitatem, uti stolidè putant, a corde pellendam. Hæc enim, si sanguis redundat, æstum inflammatorium magis augment & febrem gravio-rem ac diuturniorem reddunt, quin, si alvus simul diutius clausa, sanguinem nimium resolvendo, exanthema pariunt. Ego quidem hanc febrem in principio fuisse tertianam arbitror, ob intermissam autem sanguinis missionem & data bezoardica, factam esse continuam ardentem, ac tandem decimo quarto die defervescentem, naturam & genium suum repetiisse. Nam alias continua prima periodo in intermittentem cedere solet, sed heic id tertia demum periodo factum, procul dubio & Medici & ægrotæ culpa, quæ in ipso etiam morbo vinum habuit in deliciis. Id vero etiam notatu dignum, quod tertianæ paroxysmi non diu durarint, siquidem per priorem morbum jam corpus a pravis succis satis liberatum.

## OBSERVATIO. VII.

*Febris ar-  
dens in  
senex  
mala cu-  
ratione  
funesta.*

Senex septuagenario major, macilentus, sanguinis missionem nunquam per omnem vitam passus, a morbis etiam gravioribus immunis, nisi quod interdum vere & autumnò com-ryzam & tussim humidam experiretur, Februario mense, quo frequentes erant synochæ catarrhales, febre correptus est vehementi, cum pulsu magno, subduro & veloci, adfuit sitis magna & somnus defuit. Medicus consultus marasimum fenilem esse putavit, ideoque sanguinem non misit, sed ad sudorem movendum dedit tincturam bezoardicam & mixturam simplicem, pro potu suasit decoctum ex farsaparillæ uncüs duabus, radicis chinæ, scorzonæræ, cichorii & liquiritiæ ac corticis cinnamomi uncia, corticum citri uncia dimidia, & ad fauces aridas mulcendas linctum præbuit ex mucilagine seminis cydoniorum cum sirupo violarum. Sed nihil his profecit ac

mor-



morbus indies potius exasperatus. Undecimo morbi die vocarunt me, qui ægrum offendi viribus penitus exhaustum, miro ardore æstuantem, cum lingua arida, fissa, nigra & facie fere Hippocratica, conquerentem præterea de ventris torminibus & alvo fluxa. Igitur candide adstantibus illico edixi, inextinguibile esse incendium internum, ægrum moriturum brevi, quod etiam decimo tertio die factum.

### *Epicrisis.*

Febris hæc fuit ardens, ex summo æstu, siti magna, lingua arida somnique defectu cognoscenda fatis. Est autem hæc senibus plerumque fatalis. Multum tamen differt ab ipso marasmo senili. Hic enim hecticæ species, mitiori æstu stipatur, diutius trahitur, nec intra quatuordecim dies necat. Censendus autem merito Medici error, qui præter sanguinis missionem, statim diluentia & humectantia cum leniter diaphoreticis & nitrosis exhibere debuisset. Sic enim intra paucos dies, vasculorum minimorum a lento in senili corpore sanguine, obstructions, quæ inflammationis causa, facili tolli potuissent ratione. Notandum præterea ex hoc casu, linguam nigram in ardente febre plerumque præsagire inflammationem in partibus internis, quæ heic fuit ipsis in intestinis. In senibus enim ardentes non facile transeunt in meningum, sed potius in intestinorum inflammationem. Linguae igitur inspectio his in febribus admodum necessaria, quam etiam Hippocrates, multum commendat, qui *Coac. cap. VII.* habet effatum, quod in nostrum apprime quadrat: *lingua, quæ initis morborum rigidiuscula est, sed in calore manet, labentibus inde diebus exasperatur, livescit & fit hiulca, mortifera. Ac certe calamitosissima est, nigra & virulenta.*

### OBSERVATIO IIX.

Femina generosa triginta circiter annorum, cholerica, *Febris cholerica tertiana typhabens* vegetæ ac sensibilis naturæ, facie florida, sanguine turgida, ruri degens, post ingesta incongrua multa, iram & nocturnam *sanata.*

(IV.)

A a a

nam refrigerationem, nanciſcebatur febrem cholicam. Erat quippe æſtus magnus, anxietas cardialgica, fitis vehemens, extremorum refrigeratio, corporis jaçtatio, per vomitum crebrius viridiſſima & per ani ſeceſſum etiam liquida biliola multa ejiciebantur. Remittebant quidem paullo poſt hæc pathemata quoad vehementiam, cutis incaleſcere & mædeſcere incipiebat, remanebat tamen magna debilitas, cum pulſu languidiori ac celeriori omniaque aſſumta vomitu reddebat. Tertio etiam die, poſt levem inhorreſcentiam, dicta ſymptomata redierunt eadem vehementia omnia. Acceperat a Medico pulveres ex lapidibus cancrorum, tartaro vitriolato & nitro, ſed ab eorum uſu majora in prima regione perſenſerat incommoda. Hinc poſt tertiam acceſſionem me vocare juſſit. Veni, ægram mire debilitatam & magnopere conquerentem offendi, quod nil neque ex medicamentis, neque alimentis retinere poſſit. Expensâ igitur morbi natura & cauſa, vomitum, qui ſemper virideſcens erat, a motu non tantum ventriculi, ſed etiam ductuum biliariorum inferiori & ſpaſmodico-convulſivo, componendum inſtitui, & ob id liquorem meum anodynum mineralem, ternis ſingulis horis, ad decem guttas in dimidia uncia aquæ ſorum tilia frigida exhibui. Sedata inde ventriculi ſubverſione, dedi emulſionem & ptiſanam, quam retinuit. Tertio die poſt redierunt quidem ſymptomata cum dejectionibus, ſed longe mitiora fuerunt. Inſtitui itaque diluentibus, emulſivis, liquoris anodynî & pulverum abſorbentium leniter nitroſorum uſu. Noluit tamen penitus diſcedere acceſſio febris. Hinc poſt nonum demum paroxyſmum, deſcendi ad uſum electuarii antifebrilis ex cortice china, floribus chamomilla, rob ſambuci & ſirupo acetofiſtatis citri. Quod quidem ne fieret, clam diſſuaſit primus Medicus, ex eorum cenſu, qui china corticem fruſtra perhorreſcunt, feliciter tamen ſublata febris & ægra perfecte convaluit.

*Epicrisis.*

Recte dicenda hæc febris cholericæ & quidem tertiana continua. In cujus curatione omnium maxime agendum id Medico, ut humores acres caustici, primis in viis hospitantes, cicurentur & obtundantur, simulatque ductuum biliariorum, nec non ventriculi motus spasmodico convulsivus, bilem continuo extundens, sistatur, quo vomitus & sedes compescantur. Sic tandem ad febrilem etiam motum coercendum, sine damno perquam commode dari possunt specifica.

CAPVT III.

DE

FEBRE STOMACHICA INFLAMMATORIA.

THESES PATHOLOGICAE.

§. I.

**D**antur febres ardentes & acutæ universales, ubi totum *Ex in-* corpus æqualiter magno æstu & ardore sicco afficitur, *flamma-* propter inflammatoriam, in minimis vasculis, vel obstructis, *toris* vel spasmo constrictis, ita, in, cujus generis sunt descriptæ *particu-* morbi synochæ & ardentes. Dantur vero etiam ardentes *laribus* particulares, quæ a certarum tantum partium, præsertim inter- *stomachi-* narum & sensibilibum, inflammatione oriuntur & magno cum *ca.* dolore, ardore interno, æstu, ac functionum vitalium læsione stipantur, neque minus periculi alunt, quam quæ universum corpus occupant. Has inter præcipua fere & frequens admodum, parum tamen a Medicis notata est illa, quæ in ventriculi & intestinorum substantiam cadit, Veteribus Epia- le & Lipeiria dicta.

§. II.

Est igitur stomachica febris, passio acuta, ardens & inflam- *Fjus de-* matoria, oriunda ab inflammatione nervosæ & membranaceæ *nitio.*



ventriculī substantiæ, universum nervosarum partium systema afficiens & ob id admodum periculosa.

§. III.

*Signa.*

Symptomata, individui ipsius comites, e quibus, ceu pathognomonicis signis, cognoscitur, sunt, vehemens internum incendium, summa anxietas, dolor gravis tensivus in præcordiis, maximeque scrobiculi cordis regione, sitis magna, vigilia, inquietudo, corporis jactatio, extremorum refrigeratio, pulsus subdurus, contractus & frequens, vel etiam inæqualis, spiratio difficilis, creber conatus vomendi & doloris ad omnia assumpta, maxime irritantia & medicamenta, exacerbatio.

§. IV.

*Differen-  
tia.*

His etiam distinguitur ab aliis, quæ in stomachum cadunt passionibus. In cardialgico quippe dolore, five cardiaca Venterum passione, pariter quidem magna circa præcordia anxietas, dolor pressorius & acutus, usque ad dorsum pertingens, extremorum refrigeratio, assiduus ad vomendum stimulus corporisque inquietudo, sed in ventriculi regione ardor non tam impensus, nec tanta sitis & linguæ ariditas, neque etiam pulsus tam celer & contractus, melius quoque ferre possunt ingesta tam alimenta, quam medicamenta, spasmus, quam inflammatione ventriculi affecti. Erosio dein stomachi, quæ sæpius biliosas febres, choleram morbum, item iracundiam, excipit, caret febre, non tam subito infestat, sed successive, per intervalla tantum ingravescit, neque dolore tam ardente stipatur & diutius trahitur. Quæ autem in intestinis consistit inflammatio, habet tormina circa umbilicalem magis regionem, cum crebris dejectionibus fecum spumosarum biliosarum, aut leviter cruentarum, æstus quoque totam corporis superficiem, cum pulsu celeritate & magnitudine occupans, major est, ac si ventriculus inflammatus, ubi extrema, manus, pedes & nasus, magis frigescunt.

§. V.

*Causa  
proxima.*

Causa inflammati ventriculi est sanguinis stasis, non tam  
in

in tubulis arteriosis & venosis, qui sanguinem ordinario vehunt, quam potius in lateralibus, qui ob angustiam diametri, non rubicundos sanguinis globulos, sed tantum tenuem lymphaticum humorem secundum naturam admittunt. Hinc etiam partis inflammatae rubedo derivanda. Ardor vero & flammæ quasi in ventriculo sensus fit, dum, partim affluens jugiter sanguis per canales semiobstructos, vel constrictos, majori celeritate fertur, partim etiam libero transitu exclusus, ad ramos ampliores regurgitat ibique crebriorem diastolen facit ac systolen; unde magna accidit partium sulphurearum attritio mutua & calor maximus, qui eo sensibilior, quo magis exquisiti sensus membranæ ventriculi nervosæ, in quibus consistit. Et dolor junctus tribuendus pressioni membranarum nervearum, a minimis æque ac majoribus vasis nimium distentis, quæ inter tunicas nervoso-membranaceas collocata.

## §. VI.

Quod autem liber & æquabilis sanguinis cursus, per minima arteriarum & venarum intercipiatur, isque in exiliora aquosi tenuis humoris receptacula præter naturam impingatur, duplici ex causa accidit. Una, quando extrema arteriolarum venis connexa, a lentis, crassis & glutinosis sanguinis particulis obstruuntur, altera, quando vehemens fibrillarum nervearum strictura & spastica crispatura, capillares subtilissimos canaliculos, potissimum arteriosos, plus justo angustat atque coarctat.

## §. VII.

Ob id in proclivi est judicare, ventriculum perquam facile posse inflammari, si sanguis, crassus præsertim & glutinosus, vehementiori corporis, aut animi, ab iracundia, commotione, balneis nimis calidis, potu spirituosorum & medicamentis sudoriferis exastuatur, in vascula minima & angustissima impetuose impellitur, a potu autem superingesto frigidus incarceratur & ad stasim cogitur. Neque minus facile patet ratio, quare venena corrosiva, infame potissimum ar-

fenicum, acriora item emetica stibiata, nec non cathartica valentiora, stomachi inflammatione cito interficiant, dum caustica sua virtute nerveas fibrillas stringunt, vascula coarctant sanguinisque progressum sistunt. Eandem ob rationem ventriculi inflammatione pereunt, qui peste, ardentibus, cholericis & dysentericis febribus, item ex vehementi ira, assumpto potu frigido, vel porrecto emetico, aut purgante, moriuntur. Idem accidit iis, qui variolis, morbillis, petechiis, purpura, podagra & scabie retropulsis decedunt, in quibus materia subtilis caustica ad nervosas ventriculi membranas relapsa, spasmus & constrictionem vehementem vasculorum inducit, sanguinis cursum sufflaminantem. Opiata autem & narcotica, non alio modo, infirmos praesertim & debiles, necant, quam quod motricibus nerveis fibris stuporem inferant sanguinisque progressum sic sistant.

## §. IIX.

*Differt  
gradu.*

Pro differente tamen harum causarum indole & agendi potentia, differt quodammodo inflammatio gradu. Nimium, quæ a potu frigido corpori æstuant ingesto, item a bile per iracundiam commota & copiosius in duodenum effusa fulcitatur, mitioribus stipatur symptomatibus, non tam facile necat, diutius trahitur & datis inter initia congruis remediis promptius obsecundat. Sæviora vero & periculosiora sunt pathemata, quæ a venenis causticis, ab emeticis acrioribusque drasticis inferuntur & celeriter jugulant, nisi cito efficacia opponantur præsidia. Et omnium deterrima illa est inflammatio, quæ senibus, infirmis, scorbuticis & diuturno moerore confectis, item in fine acutorum morborum accidit, ob succorum vitium inemendabile & magnam virium impotentiam, medicamentis non tam facile reparandam.

## §. IX.

*Eventus  
funestus.*

Sed quando irrequieta est corporis jactatio, potus ingestus eructatur, singultuosa ventriculi & diaphragmatis convulsio accidit, animus deficit, facies comparet Hippocratica, pul-



pulsus intermittens est, mens emovetur & artus convelluntur, funestum denunciant ex inflammatione sphacelosa facta eventum. Tum enim secto post mortem cadavere, non modo ventriculus admodum rubicundus & lumini obtentus copiosissimis ramusculis sanguine turgidis distinctus comparet, sed & interdum passim multis nigris maculis latis & parvis obfessus, interdum in fundo cum duodeno & annexis biliariis ductibus ac pancreate, niger, foetidus ac putris, interdum etiam flatibus mirum distentus atque oppletus conspicitur, fluctuantibus simul in ipsius cavo aliquot cochlearibus foetidi & nigricantis ichoris.

## CURATIO.

## §. I.

Genuinæ periculosam hanc passionem sanandi indicatio-  
nes eo tendunt: ut I. obstructions, a tenacibus succis, locis *Indica-  
tiones cu-  
ratoria.*  
ac tubulis minus congruis impactis, expellantur; & II. ut  
vascula a spasticis stricturis coarctata amplientur & ipsi spasti-  
ci motus componantur, quo liber, æquabilis & naturalis san-  
guinis progressus per ventriculi substantiam restituatur. Quæ  
ut ex voto obtineantur, commodissimam locant operam di-  
luentia, aquosa, humectantia, demulcentia, antispasmodica,  
æstum qui fluida incrassat restinguentia, nec non fibras strictas  
relaxantia. Quum vero non una, sed plures causæ ventricu-  
lo inflammationem inducere valeant, prudentiæ medicæ est,  
per diversitate causarum ad eas removendas medicationem di-  
rigere singulisque præsidia opponere congrua.

## §. II.

Igitur, quando ab assumpto veneno caustico, septico, arseni-  
cali, vel acerrimo purgante, emetico, mercuriali, aut metal-  
lico medicamento male præparato, inflammatio accidit, non  
certius, non tutius & celerioris efficaciam est auxilium, quam  
demulcentia, oleosa, pinguis, lac scilicet, cremor ipsius, ole-  
um amygdalarum dulce, nec non olivarum, crebro & in co-  
pia

pia hausta. Horum enim ea est virtus, ut tenuia causticorum intima fibrarum penetrantia spicula obtundant, involvant & quasi inviscent, simulatque fibras rigidas & vasa coarctata laxent, sicque spasmos horridos, inflammationis, symptomatum graviorum ipsiusque mortis causas, fistant. Insuper hæc ipsa, mole sua ventriculum ampliando, salutarem hunc simul exserunt effectum, ut motus peristalticus naturalis, a spasmodum rigore sufflaminatus, restituatur, stomachus ad vomitum permoveatur & cum hoc simul venenum dilutum iterum extundatur. Si a bile acri corrosiva, ut in cholera, metuenda est inflammatio, tunc terrea, absorbentia fixiora & inter hæc maxime ossa & cornua philosophice, uti dicunt, præparata, cum decoctis gelatinosis, uti pedum vituli & vervecis, gelatina cornu cervi, decoctum hordei, avenaceum, cum, vel sine lacte, item cum oleo amygdalarum dulcium, ex usu sunt. Quando porro ab iracundia vehementi obortus in ventriculo spasmus inflammationem minatur, nihil efficacius est pulvere absorbente nitroso, cum liquore anodyno alternatim dato, vel in aqua quadam antispasmodica, vel emulsione ex seminibus frigidis, aut papaveris albi. Postea composito spasma, ad educendas biliosas sordes, accomodatissima rhabarbarina & passulata.

### §. III.

*Materia  
exanthem  
atica  
contagio  
sa discu  
tienda.*

Quæ a retrocedente ex corporis superficie recrementitia acri materia, imminet, vel jam inducta ventriculi inflammatio, depellitur optime emulsionibus ex semine cardui Mariæ, cardui benedicti, napi, quatuor frigidis majoribus, cum pulveribus bezoardicis temperatis, quibus subinde nitrum cum momento camphoræ addendum. Incomparabilem etiam his in casibus ad arcendas inflammationes efficaciam exserit, liquor noster anodynus mineralis, spasticas stricuras remittendo, & dolores sine virium lapsu, vel torpore, quod aliis sedantibus opiatiss solenne, sed potius refectione, complacans. Inprimis egregie se gerit liquor hic, quatuor partibus, cum una parte spiritus bezoardici *Bussti* remix-

remixtus & parvis dosibus crebrius oblatus, ac dum stricturam solvit sudoremque placidum movet, efficaciter materiam virulentam exanthematicam ab internis ad corporis superficiem agit. Si etiam miasma pestilentielle, aut aliorum contagiosorum morborum corpus subiit, quod primario ac celeriter viam suam putredinosam & inflammatoriam ventriculo insinuat, illico lenissimum exhibendum emeticum, ac postea subjungendi pulveres blandi diaphoretici, cum nitro & pauxillo camphoræ, vel oleum bezoardicum *Vedelii*, ex uncia olei amygdalarum dulcium, in quo drachma camphoræ soluta, ad octo vel decem guttas dandum. Et iisdem his discutientibus quoque depellenda inflammatio stomachi, quæ aliis acutis morbis in statu supervenit.

## §. IV.

Præterea exterius diro huic malo omnibus modis obviam *Externis* eundum. Sed improbo, quæ vulgo stomacho admoventur *succur-* calidiora, ut spiritus vini camphoratus, olea destillata in spi-*rendum.* ritibus soluta, emplastra quoque stomachica. Hæc enim calore suo humores stagnantes magis coagulant & exsiccant, quam discutiunt & in motum cient, eodem modo ac notum est, albumen ovi a forti calore indurari, a leni autem liquefcere in tenuem humorem. Quare ego quidem magno cum fructu multoties tepide tantum applicare jussi vesicam lacte cum floribus emollientibus & croco decocto plenam. Neque minus admodum proficuum censeo linimentum ex olei amygdalarum unciis duabus & camphoræ drachma, cum quo præcordia frequentius inungenda & superius ponenda lintea calida. Egregium quoque ad discutiendum & sudorem movendum est epithema, ex aceti rosacei unciis binis, spiritus vini camphorati drachmis duabus, essentiæ croci, castorei ana drachma, nitri drachma dimidia, compositum & tepide præcordiis admotum.



## CAVELAE ET OBSERVATIONES

## CLINICAE.

## §. I.

*V. s. non  
juvat.*

Venæsectio certum quidem & efficax remedium in inflammationibus partium & vilcerum, quæ copioso sanguine referata; sed ubi partes nervæ ac fibrosæ valde sunt, secundum Veteres frigida dictæ, cujus generis intestina, vesica & viæ urinariæ, quæ vehementibus spasticis stricturis patent & uberiorem sanguinis affluxum non admittunt, vix usus ullus, sed potius damnum inde expectandum. Ad declinandam autem ejusmodi inflammationem, si a dolore gravi colico & cardi-algia, nec non post iram imminet, corpus valde est plethoricum, juvenile & vini potui assuetum, inter initia statim cum fructu admittenda sanguinis missio.

## §. II.

*Anodyna  
insecura.*

Sic etiam cavendum est in periculoso hoc affectu ab omnibus sistentibus, anodynis & præsertim quæ opium ingreditur. Nam hæc, cum sudoriferis mixta, in principio quidem arcere possunt inflammationem, quam minantur atroces dolores ac spasmi. Verum si adest inflammatio & paullo-diutius jam duravit, perniciosissima sunt & mortem, sphacelum inducendo, accelerant. Quin neque tunc liquor noster anody-nus mineralis, longe tamen tutior opiatis, ex usu est, neque etiam ipsa nitrosa, quæ alias in principio egregie resistunt inflammationi.

## §. III.

*Frigida  
& irri-  
tantia  
nocent.*

Quemadmodum porro nihil aptius ad inducendam inflammationem frigido potu; sic etiam ad augendam si jam ad-est eandem, hoc nihil efficacius. Ob id etiam nitrum, quod liberalius sumtum admodum refrigerantis est naturæ, refracta dosi tantum, cum demulcentibus, lacte, vel emulsionibus, repetita vice dare expedit. In gravi autem cardialgico dolore, quem perperam tractatum facile excipit inflammatio fune-

funesta, solicite cavendum ab omnibus irritantibus, maxime emeticis, purgantibus, immo salibus sic dictis digestivis majori copia oblatis, quippe quæ spasmus magis intendunt & malum exacerbant.

#### §. IV.

Ira quoque gravis sæpe funestæ inflammationis mater, *Post iram quando mox post eam cibus, præsertim minus salubris & difficilioris digestionis, ingeritur, aut frigidus potus ingurgitatur. Hoc vero ubi accidit, ad arcendum malum in principio nihil conducibilius, quam elicere vomitum, non tamen per valida emetica, sed aquam tantum tepidam, cum oleis ac pinguibus mixtam, & largius potam. Sic novi quosdam post vehementem iram pessime habuisse & in propinquo fuisse inflammationem, usu tamen liquoris nostri anodynæ, cum potu aquæ tepidæ, rejectos esse humores biliosos copiosissimos & morbum discussum. Sed de his aliisq; in fontico hoc morbo tenendis, pluribus evolvi poterit dissertatio nostra, de inflammatione ventriculi.*

### ENARRATIONES MORBORVM.

#### OBSERVATIO I.

Canonicum novi Halberstadii, robustæ constitutionis, *Ex vomitæ* ætate adhuc florentem, sub sanitate integerrima subito ac *torio post* cito lethali ventriculi inflammatione affectum. Quum enim *iram in-* inter rixas ac jurgia vehementissime excanduisset & paullo *flamma-* post vinum spirituosum, quod vocant Sect, bibisset, insequen- *tio ven-* ti statim die habuit pessime. Incredibiles quippe circa præ- *triculi* cordia dolores ipsum torserunt, cum mira angustia & vo- *lethalis.* mendi conatu. Ardor quoque ipsum excruciauit stomachi & in ipso sensus fuit perquam molestus ac si inhæreret quippiam, quod exitum moliretur. Rogatum igitur a Medico consilium, qui promte vomitorium ex sulphure antimonii aurato dedit. Inde æger ter vomuit valide quidem, sed sine levamine. Adaucta potius pathemata, pulsuum ictus parvi & fere imperceptibiles facti, frigidusque sudor malo omine erupit. Subsequuta mox mentis emotio, accesserunt con-

vulSIONES & intra decem horas excepit ipsa mors. Cadavere dissecto, in ventriculo visæ maculæ plures, nigræ partim, partim rubræ, quarum nonnullæ altius in ipsa substantia constiterunt.

*Epicrisis.*

Quantum valeat ira vehemens ad concitandos in ventriculi regione spasmos, hæc uberius docet historia. Inprimis hunc animi affectum excipit ut plurimum gravis in illa regione compressio, in qua pylorus ac duodenum situm habent. Quin ipse hic spasmus haud raro ad ductus usque biliarios propagatur, ac ut bilis effusio in duodenum impediatur & ipsa succis reaffundatur, facit. Hinc non infrequens observatio, iracundiæ succedere icterum, cui *Sylvius* jam recte non aperientia, sed anodyna & sopientia opponere suadet. Dum vero ira fursum etiam bilem trudit, os semper amaro sapore plenum, & constricto validius pyloro, vomendi fit conatus. Quum igitur tanta spasmodorum post iram vehementia; ipsa sana ratio dicat, vomitoria convenire plane non, eo quod teneras ventriculi fibrillas magis irritant & spasmos augendo ad inflammationem pandunt viam. Mors autem tam subita in nostro, non tam inflammationi, seu causæ proximæ, adscribenda videtur, quam potius spasmo violentiori, qui totum systema nervorum & vasorum convellens, liquidi nervi influxum in cordis musculos etiam sufflaminavit ita, ut quatuor mortem novissime antecedentibus horis, vix pulsationis vestigium fuerit observandum. Illa igitur intoleranda anxietas, quæ tam vehementem ventriculi spasmodum excipit, non tantum nervosarum partium præternaturali constrictioni, verum maxime nimie distensionis dextri cordis ventriculi & arteriæ pulmonalis a nimium congesto sanguine debetur. Quod enim dolor est, a male affectis & distentis nervosis membranis, id anxius etiam ille sensus, quando vasa sanguinea, præsertim circa cor & pulmones, valide diducuntur & præter naturam afficiuntur. Quum itaque nimia sanguinis copia, a spasmo & partibus inferioribus ad ipsum cor ejusque



cameram & auriculam dextram compellatur, ab ipso quoque hoc spasmo liquidi nervei sufficiens in machinam hanc motoriam, omnes vitales totius corporis humores circumagentem, influxus impediatur ac intercipiatur, quam facile intelligi potest mortis causa, quæ subinde tam subito, sine præcedente sphacelatione, venenum assumptum sequitur.

## OBSERVATIO II.

Balneator quidam ultra sortem, ut genius horum hominum, sciolus, feminæ tertianæ laboranti propinarat antimonii vitrum in substantia ad octo grana. Ægra assumpto hoc, accedente febre frequentissime vomuit, discedente tamen febre, vomitus etiam & dejectio iterum constitit, sed restitit virium lapsus ingens. Redeunte tertio die febre ejusque comite indivulso frigore, vomitus quoque & purgatio repetiit, summo cum dolore in scrobiculi cordis regione & anxietate tantum non intoleranda. Remiserunt hæc tamen iterum deservescente febre. Quum vero tertia fieret febris accessio, denuo etiam accessit vomitus & comitem habuit dolorem stomachi omnium acerbissimum & qui suprema instare non obscure significavit. Nec vana fuit suspicio. Paulo enim post summa inquietudo, extremorum frigus, animi defectio, artuum convulsio ac postremo mors ipsa miseram feminam occuparunt. Apertum cadaver, inflammata ostendit inferiorem ventriculi partem, maculis rubris & nigris passim, tam in duodeno, quam annexis intestinis, comparentibus. Et quod magis mirandum, virulentus vitri antimonii pulvis inhærebat adhuc tunicæ crustaceæ, ut vel manibus mortis causa posset tangi.

### *Epicrisis.*

Similis fere est observatio, quam consignavit Blasius, de puella quinque annorum, quæ assumpto croco metallorum, vehementissime vomuit & convulsionibus demum periit, in qua ventriculus angustus & contractus repertus, ut vix ovum magnitudine æquaret & vesicula fellea præter morem turgida.

da. In nostra vero observatione perquam dignum, quod vitri antimonii, virulenta spasticas stricturas excitans facultas conquieverit, accedente in paroxysmo æstu & febris fine, & quod vicissim frigore rursus ingruente recruduerit & effectum vehementer vomitorium exseruerit. Sed notum habetur, accessionem febrilem cum frigore & horrore spasmodis deberi, qui ex spinali medulla veniunt totumque genus nervosum, atque adeo etiam ventriculum, afficiunt. His contrarius est motus ad exteriora tendens sub æstu, qui ob id spasmodorum & convulsionum quasi antidotus. Quod autem post paroxysmum quieverit operatio veneni, in universali lege motus microcosmica rationem habet positam: Scilicet valde vehementem & diutius persistentem spasticam fibrarum stricturam excipere ejusdem partis affectæ resolutionem & atoniam, sub qua actio veneni est frustranea. Ut adeo pateat, ad actionem veneni, æque ac medicamenti activi, requiri partium vitalium ad motum dispositionem.

## OBSERVATIO III.

*Imminens  
ex arse-  
nico ven-  
triculi  
inflam-  
matio  
discussa.*

Hospes quidam admiscuerat jussulo ex errore loco sacchari arsenicum, idque apposuerat convictoribus suis, quorum plurimi generosa & nobili stirpe sati. Vix degustarant jus, quum omnes pectore angi inciperent, circa stomachum dolere, cum labiorum tremore & vomendi conatu. Advocarunt illico me, veni & cognita mali causa, copiose ingurgitare jussi lac cum oleo amygdalarum dulcium. Vomuerunt inde per dimidium diei strenue, quidam vel centies, semper tamen denuo ingerere jussi lac, donec nihil amplius veneni superesse videretur & vomitus quiesceret. Sic evaserunt plurimi brevi & explicita ratione præsentaneam mortem; nonnullis tamen, qui lac & oleosa justo parcius potarant, emollientes adhuc & oleosos clysteres adhibere fuit necessum.

*Epicrisis.*

*Epicrisis.*

Optima & præsentanea veneni antidotus heic ex simplici, vili & domestico deprompta. Certe vix cuiquam credibile foret, in lacte & oleo tam nobilem latitare virtutem, nisi experientia ita omnino esse demonstraret. Ea enim mentis humanæ indoles, ut exotica, pretiosa & ægrius obtinenda captet atque velit, domestica autem, parabilia, ubivis obvia & vilia negligat & contemptui habeat. Sed divina sapientia abjectis hiæce longe nobiliorem & fructuosiore indidit facultatem medicam, ac magno pretio, labore & artificio comparandis. Norunt sane in arte exercitati, simplicem aquam calidam, vel frigidam, lac, serum lactis, olea expressa, acetum, nitrum, terrea absorbentia, salia mineralia, ubivis reperiunda, optima adversus longos, graves atque rebelles morbos esse præsidia.

OBSERVATIO IV.

Serenissimus Princeps, ætate florens, sanguine & succis *Ex potu* plenus, vinum potens spirituosum liberaliter potarat, po-*frigido &* stera die corpus sub venatione ad sudorem usque largum ve-*vomitorio* hementer commoverat, sicque æstuans & sitiens magnum *inflam-* cerevisiæ hauustum ingurgitarat, frigida quoque auræ corpus *matio* exposuerat. Inde mox conquestus est de horrore, languore, *ventricu-* interno ardore, vigilia & inquietudine, cum vomendi conatu. Medicus accitus, tertianam intermittentem, tum popularem, subesse ratus, porrexit vomitorium, ex tribus tartari emetici granis. Hoc assumpto ter vomuit maxima cum anxietate, quæ certis intervallis ita increvit, ut nullibi subsistere ac detineri posset. Aderat præterea virium prostratio maxima, ut non sine animi defectione erectus esse posset, pulsus emicuit languidus, irregularis, interdum celer, ex ore spiravit halitus mirum foetidos, mens tamen exacte sibi consistit. Nocte mortem antecedente incescit ipsum horror ingens ac frigus, accesserunt convulsiones & septimo die syncope quasi correptus obiit. Sectum est post mortem cadaver, in quo



ventriculus ferme totus visus inflammatus, & in ipsius cavo, quod omnino rarum, aliquot cochlearia foetidi & corrupti sanguinis, ipse etiam stomachus expansus & corruptioni propinquus, ut ad levem attactum ipsa substantia dehisceret. In venis, & maxime separata ab hepate cava, nullus fere sanguis repertus. Lien & sinister ventriculi pars, cum pulmonum lobo sinistro, tota corrupta, nigricantia & foetida. Quumque spongia putridus ichor abstergeretur, is adeo infecit spongiam, ut tota atro & nigricante colore imbueretur, nec calida, nec frigida detergendo.

### *Epicrisis.*

Patet igitur, brevi tempore sphacelosa corruptione infici posse viscera, uti heic ventriculum, lienem & lobum pulmonum sinistrum, quæ atro colore & foetidissima corruptione nares inficere feriente infecta. Sine dubio tamen, ventriculus primum sphacelatus, viscera infecit reliqua. Ad generationem autem hujus morbi fecit non tantum haustus largus frigidus corpori calenti immissus, verum etiam improvida emetici assumptio. Nunquam enim certius & gravius damnum a vomitorio metuendum, quam si ventriculus & intestina graviori spasmo, vel inflammatione affecta. Mineralia quippe emetica virulenti quippiam alunt, quo in convulsionibus & spasmos ventriculum & totum nervosum genus abripiunt. Hinc pessime agunt Medici, qui tam temerarie ad ipsorum usum descendunt, antequam sedem, vel causam morbi exacte scrutati. Quod si enim post usum ejusmodi pharmaci symptomata ingravescent, & ventriculus deprehenditur inflammatus, justa omnino hæc conclusio: inflammatio aut jam ante emeticum fuit, aut non; si fuit, male datum emeticum, si non, subsequuta symptomata inductam eam esse testantur. Internas denum partes esse inflammatas recte conjiciendum, quando virium magna est prostratio, ut ægri facile animo deficiant, quando evanescente ardore exquisito, conqueruntur de sensu frigoris circa præcordia & saliva sub-

inde

inde eructat in os; quando borborygmi & meteorismi sensu percipiuntur ab assumtis liquidis in abdomine; quando demum oculos ob debilitatem claudunt subinde & dormire videntur, postea vero de majori debilitate & anxietate conqueruntur.

## OBSERVATIO V.

Femina quinquaginta & quod excurrit annorum, sanguineo-phlegmatica, corpore spongiosa & animi sic satis <sup>Inflam-</sup> <sup>matio</sup> dati, omiserat ab aliquot annis suetam alias sanguinis missionem, vitam quoque coluerat maxima ex parte sedentariam & <sup>li decimo</sup> tamen appetitui largius paullo indulserat. Hæc gravius irritata corripiebatur ira & post hanc languorem sentiebat <sup>die lethali.</sup> <sup>lis.</sup> irrium cum inappetentia. Post aliquot dies denuo iracundia commovebatur simulque assumebat intrita panis cum cerevisia frigida. Inde mox horror ipsam incessit, insequenti nocte ardor intensus, præcordiorum anxietas, inquietudo & punctorius in stomachi regione dolor, ad dorsum usque excurrens, ructibusque exitum præcludens. Medici morbum colicam esse autumantes, carminativa cum anodynis dederunt. Perseverarunt autem anxietates præcordiorum cum maxima inquietudine per totum morbi decursum, intervenerunt subinde convulsivi quidam motus, cum manuum tremore, aquosus humor in os eructatus, & pulsus antea celer ac fortis, in debilem & inæqualem mutatus. Quarto die neque de æstu, neque etiam de ardore, sed tantum de siti & maxime quod exquisitum frigoris sensum in cordis regione pateretur, conquesta est. Hinc frigidum non appetiit potum, sed calidum semper, maxime infusum thée sorbillavit, ex quo tamen pejus semper habuit. Quæta quidem semper jacuit dormire visa, non tamen dormivit, mens sibi constitit, debilitas autem magis magisque increvit, alvus sine clystere dimisit nihil, nec ulla medicamenta exseruerunt effectum. Septimo potius die accessit singultus, nono refrigeratis prius extremis, per aliquot horas sine sensu jacuit, ac demum placide expiravit.

*Epicrisis.*

Nullum omnino est dubium, quin morbus hic confederit in ventriculo. Hujus quippe nervoso membranacea substantia passa est inflammationem, ex præcedente repetita iracundia & superingesta frigida cerevisia. Et quoniam corpus fuit cacochymicum, succis crassis & impuris plenum, prompta in ipso fuit staseos sanguinis genesis. Factam autem esse inflammationem, horror, æstus, anxietas præcordiorum, dolor pungitivus in stomacho, ructus interclusi & accedens demum singultus luculenter arguunt. Lentius tamen processit & incrementum inflammatio, ac demum in sphacelum concessit, quem frigoris in præcordiis sensus, summa debilitas, pulsus languidus & singultus prodiderunt. Notandum enim inflammationem lentius, vel celerius progredi, pro corporis differentia & differente causarum vehementia. In sensibilibus quippe & post venenum citissime fit & citissime decurrit; in phlegmaticis autem, senibus, ex iracundia & refrigeratione lentius serpit & septimo demum, decimo & longius die necat. Nihilominus cita semper opus est ope, eodem modo ac in sphacelo exterius imminente. Neque ea propter dubitandum, quin in nostra etiã, adhibitis tempestive congruis præfidiis, funestus averti potuisset eventus.

## OBSERVATIO VI.

*Ex vomitorio & sale purgante post iram mors.*

Vir, circiter quinquagenarius, sanus, robustus & integer, post iram gravissimam, mox afficiebatur tremore, horrore ac refrigeratione extremorum, cum ingenti præcordiorum anxietate viriumque dejectione, noctem etiam sequentem iisdem symptomatibus adhuc persistentibus transigebat, nauseam percipiebat continuam & vomendi conatum, una cum labiorum tremore & oris amaritie. His jactatus ab advocato Medico importune flagitabat vomitorium, qui primum illud dare renuit, victus tamen continuis precibus, porrexit. Sed quia sumto hoc bis vel ter tantum cum summa anxietate & difficultate pauca biliosa & mucosa vomuerat, ad uberiores eva-



cuationem aliam postulavit dosin, quæ ipsi etiam concessa. Hinc autem non ita multo post in deterius versa omnia. Adfuerunt quidem singultuosi ructus continui, sed nihil rejiciebatur, afflixit præterea inquietudo summa, oppressio, spirandi difficultas, intolerabilis ardens & anxius dolor in epigastrio, cum extremorum refrigeratione, pulsu parvo & nonnihil intermittente. Petitum tandem a me auxilium, qui accedens, ægrum extrema fere agentem inveni, ob spasmodum vehementiam, quæ omnes fere corporis nervosas sensui & motui vacantes partes occuparat. Hæc videns, expendi mecum, & quum a sumto veneno arsenicali eadem symptomata oborta largiori lactis & olei cujusdam expressi potu felicissime sublata laborantesque tantum non e mortis faucibus ereptos, cognitum haberem, pariter lac bubulum tepidum, successive, at copiose, bibendum, suasi. Inde insigniter quidem atrocia hæc symptomata conquiescere & per noctem remittere visa, mane autem ipse æger, incio Medico, unciam unam salis Ebshamensis, ad aperiendam quæ firmiter clausa alvum statusque & anxietates discutiendas sumsit, pessimo vero successu. Symptomata quippe priora reversa omnia, atrocia longe majori, ut assumtis licet analeptics, antispasmodicis, animam, intra tertium a sumto primo emetico diem, efflaverit.

### *Epicrisis.*

Vel hanc ob causam commemorabilis hæc observatio, ut Medicorum quisque inde discat, innocens alias remedium emeticum stibiatum, moderatiori dosi, uti tartarus emeticus ad duo grana datus, pro certa dispositione spasmodica ventriculi & partium nervosarum, veri veneni vim habere & lethalem effectum exserere posse. Quamobrem circumspexit quilibet Medicus, non tam promptus sit ad dandum ejusmodi pharmacum, sed prius scrutetur cum cura corporis ægrotantis cum ventriculo dispositionem ipsamque morbi causam urgentem. Deinceps illa quoque utilissima cautio funesto ex hoc casu elicienda: salia neutra, eaque amaricantia, ut sal

Egranum, Ebshamense, Sedlicense, ad deducendos efficaciter & sine molestia per alvum vitiosos humores egregia, tali in casu, ubi primæ viæ spasticis stricturis tenentur, neutiquam esse proficua, ut potius noxam possint inferre & gravissimam & præsentissimam. Sed hanc in rem plura jam attuli in *Diss. de medicina emetica & purgante post iram veneno.*

## OBSERVATIO VII.

*Ventriculi, duodeni, pulmonis dextri, diaphragmatis inflammatio lethalis.*

Juvenis viginti annorum, Juris Studiosus, sanguineo-cholericus, macilentus & in iram levi ex causa proclivis, ebrius ex largo vini potu rixas habuerat cum nonnemine ac sub his excanduerat vehementissime, postea vero sub coelo algidissimo vesperi traha vectus fuerat. Domum delatus, prævio horrore, incidit in æstum gravem, inquietudinem, præcordiorum anxietatem, ardorem & pectoris in dextro latere dolorem, cum magna spirandi angustia & pervigilio. Irato usurpatis nonnullis, tertio die secta vena & sanguis extractus crassus ac niger. Nihilominus de internorum ardore perpetuas habuit querelas æger, ac simulac quicquam assumsit, illico gravem persensit dolorem, screatu materiam cruentam ejecit, pulsus fuit celer, debilis, quandoque plane intermittens, & incrementum indies virium lapsu, septimo die e vita discessit. Sub extispicio mox post mortem cadaver abominandum exspiravit foetorem, & scrutantibus mortis causam ventriculus sese obtulit mirum tumidus, inflammatus ac in fundo, cum ipso pyloro ac duodeno, niger, corruptus & putridus. Dexter quoque pulmonis lobus sphacelatus comparuit & foeda putrilagine affectus, unacum diaphragmatis portione gibbæ partis hepatis.

*Epicrisis.*

Quantum ebrietas, gravior ira & impensior corporis refrigeratio valeant, ad labefactandam sanitatem, sphacelum visceribus internis inducendum & brevi necandum, hic utique testatum facit casus funestus. Certe vix fortissimum venenum tam deleteriam obtinet facultatem, ut tam cito tantam corruptionem sphacelosam invehere queat. Sed adeo non-

nonnunquam in transversum aguntur mortales, ut cupiditatis pravis obsecundando vitiaque sectando, mortem sibi procurent ipsi, tanto certius, quando tria, uti heic, simul uno tempore concurrunt atque conspirant.

## CAPVT IV.

DE

## ANGINA.

## THESES PATHOLOGICAE.

## §. I.

**A** Ngina est inflammatio faucium, juncta cum ardente dolore, tumore, rubore, respirandi vel etiam deglutiendi difficultate & febre, orta a sanguinis, vel feri visceris acris, in sanguineis, vel lymphaticis tubulis stasi, periculi non expers. *Angina definitio.*

## §. II.

In dignotione hujus morbi, locus ubi consistit, inprimis notandus. Est autem sedes in faucibus maximeque in partibus quæ pharyngem & laryngem occupant & constituent. Heic occurrunt plures numero & maximi usus ac sensibilibioris indolis partes. Radix scilicet linguæ cum osse hyoides, narium foramina in os hiantia, œsophagi initium, musculi pharyngis, item laryngis interni & externi, quorum numerantur tredecim, glandulæ porro majores & minores, tonsillæ, musculi maxilla moventes, vasorum sanguineorum & lymphaticorum, nec non teneræ nervorum propages. *Sedes.*

## §. III.

Prout igitur inflammatio alias atque alias ex his partibus tangit & occupat, gravior, vel levior est, & varia etiam fortitur nomina. Nimirum vetustissima est distinctio anginae Eff vel interna, vel externa. *Eff vel interna, vel externa.*



generalis in interiorem & exteriorem, five manifestam & occultam. Illa in interioribus nerveis & musculosis faucium tunicis consistit & ob id neque in collo exterius, neque in ore, quantum visui patet, tumor & inflammatio conspicitur, sed ardor internus, febris acuta, in graviore casu non modo spirandi, sed & deglutiendi difficultas, multumque periculi subest. *Arctæus* ita eam describit, lib. I. cap. IX. *lingua extra dentes & labia prominens, saliva effunditur, pituita crassissima, facies rubicunda & inflata, oculi exserti, patentes, valde rubem, potus in nares refunditur, dolores acerbi sunt, sed strangulatione vexati, eos obscurius sentiunt, pectus & cor ardem, frigidi aëris desiderium adest & admodum exigue inspirant, eoque donec demum intercluso pectoris transitu strangulentur.* Externa autem magis in oculos incurrit & occupat potissimum musculosas & glandulosas externas partes, amygdalas, linguæ radicem & uvulam, facilius quoque discutitur.

## S. IV.

*Cynanche  
& synan-  
che.*

Specialius ratione partis affectæ considerata angina, gravissima & periculi plenissima esse solet ea, quæ internis laryngis musculis insidet, & in qua exterius non rubor, nil circa cervicem aut collum, observatur, sed internè ardens dolor urget, & ob angustatum asperæ arteriæ caput, vox non modo suppressitur, sed & spiritus difficilis redditur, quin quandoque plane præcluditur, & quidem tam celeriter, ut observatorum fide, haud raro intra viginti quatuor horas, vel tertio die necet. Græci hanc vocant cynanchen. Quæ autem ipsis synanche audit, internos pharyngis musculos occupat, pariter sine conspicuo externo tumore & rubore, majori deglutiendi, quam spirandi difficultate stipatur, sed ingesta pleurumque cum impetu per nares redduntur. Sed quando tumor & rubor oculos & tactum incurrit, inflammatio quæ externis pharyngis musculis incumbit, parasy-nanche, quæ autem laryngis paracynanche, a veteribus appellatur.

*Paracy-  
nanche &  
parasy-  
nanche.*

## S. V.

## §. V.

Deinceps a Practicis angina distinguitur in veram, sive *Vera*, vel exquisitam, & notham. Vera oritur a sanguinis stasi, spuria *spuria*. vero magis a congestione feri, quam sanguinis inflammatoria, in faucibus & colli internis. Illa morbus acutus est, nunquam sine rigore & febre, hæc autem junctam habet febrem plus lymphaticam & catarrhalem, quam acutam. In exquisita non modo dolor ardens & pungitivus circa interiora faucium observatur, sed & lingua sanguine turget, obscuro rubicundo dolore tincta, facies simul rubet, arteriæ temporales valide pulsant, quandoque cephalalgia, sopor, vel sensuum torpor, jungitur, quandoque lipothymia accedunt, quin, si gravior, spiritus difficulter trahitur, anxietas est maxima, inquietudo & extremorum refrigeratio. Citam hinc poscit opem, multumque periculi alit. Sed in spuria gravia hæc pathemata partim plane absunt, partim mitiora adsunt, minus etiam periculi, si rite tractetur, metuendum. Distin- *Sicca vel* gui porro angina potest in siccam & valde ardentem, & humi- *humida*. dam aut valde mucosam. Illa fit a sanguine, cum febre valde acuta, uti dictum de vera. Hæc autem magis chronica est, febribus catarrhalibus associatur, cachecticis & scorbuticis familiaris est, atque etiam linguam & fauces crasso viscido muco obducit, cum oris foetore.

## §. VI.

Omnes hæ anginae species merito discernendæ ab aliis *Differt a* faucium affectibus. Vera quidem & sicca non permutanda *prunella*. cum illa inflammatione oris & oesophagi mucosa, quæ vocari solet *prunella alba*. In hac enim muco albo tota faucium regio & lingua oblinitur, lingua fissuras dolorificas contrahit & junctus est simul magnus ardor, qui usque ad præcordia pertingit, proptereaue Germanis audit *die Herz-Bräune*. Malig- nis hæ sæpe accedit febribus, omine plerumque malo, quia præsentem arguit ventriculi & oesophagi inflammationem. Neque etiam omnis faucium inflammatio est angina, sed ea *a leviori* tantum, *inflam-* *matione*.

tantum, quæ cum spirandi & deglutiendi difficultate juncta. Hinc multum utique ab ipsa discrepat levior inflammatio colli & internorum in faucibus, cum tumore & dolore glandularum, quam nostri dicunt, *die bösen Hälse*, quæ frequens admodum est scorbuticis, nec non si malum contumax cum erosione, lue venerea affectis. Vera quoque & interna angina discernenda a solennibus feminis hysteris & hypochondriacis spasmodicis, qui faciem constringunt & respirationem æque ac deglutationem reddunt difficilem. Hi enim sine febre sunt, mox remittunt atque recedunt atque etiam discuti possunt facile. Demum angina differt ab ardentibus illis & dolentibus in lingua pustulis, quas dicunt aphthas. Etenim in angina dolor & ardor latius sese diffundit & vicinas partes simul in consensum trahit; aphthæ vero certas duntaxat partes afficiunt, quibus pustulæ cum dolore & rubore insident, neque tam familiarem habent comitem febrem, quam angina.

*Causa  
ipsius.*

§. VII. Causa igitur anginæ proxima stasis, vel quandoque congestio seri inflammatoria in faucium internis eveniens. Ad hanc autem inducendam faciunt multa. Scilicet observatione constat, eandem frequentius incurrere, quibus evacuationes sanguinis spontaneæ per nares, uterum, hæmorrhoides, aut lochia, suppressæ, aut omissæ artificiales, per scarificationes, vel venarum sectiones. In his certe prompta ipsius genesis post impensiores sanguinis commotionem, sive per potum spirituosum inebriantem, sive per validam corporis exercitationem, vel etiam nimiam vociferationem, præsertim in aëre frigido factam. Observavi quoque a sumto fortiori sudorifero, admissa mox aëre frigidiori, item a balneo nimis calido, post haustum potus frigidi, inflammationis anginosæ initia, quæ tamen adhibitis congruis internis & externis, feliciter mox discussa. Neque minus frequens anginæ generatio admissis in fauces acribus, fibras vasæque irritantibus impensius & constringenti-



gentibus. Sic experientia teste, funesta sæpe faucium inflammatio accidit iis, qui conclavia calce recenter inducta inhabitant in iisque dormiunt, quo quidem aliquando plures simul infantes enectos esse novi ego, ac idem notabili exemplo confirmat *Tulpius lib. III. cap. XLI.* Eandem inflammantem venenis causticis inesse facultatem, inter omnes constat. Ex purgantibus, elleborus albus specifica quasi indole petit fauces & strangulationem facit. Argentum vivum, præsertim male ex ipso preparata pharmaca, fauces male afficere & inflammare pariter constat. Et idem quoque de solano furioso, nec non morsu canis rabidi accidere, Medicorum testantur observata. Inprimis arsenicalium etiam & mercurialium minerarum fumi, item vapores spirituum mineralium, idem hoc malum improvide hausti causantur. Horum quippe omnium subtilissima & magnæ penetrantiæ spicula altius sese musculis, qui cartilagine laryngis movent, insinuando, nervosas ibi tunicas stringendo & liberum sanguinis per vasa transitum intercipiendo, tumorem ejusmodi inflammatorium, pulsatorium, cum dolore pūngitivo, sæpius excitant funestum. Quod enim res acutæ pungentes, firmitus hisce partibus inhaerentes, solam hujus affectus suppeditare possint causam, manifesto testantur spinæ piscium aut ossicula aspera deglutita & faucibus intrusa, a quibus tale malum sæpissime excitatur, de quo notabilis observatio *Hildani Cent. III. obs. 42.*

## §. IIX.

Sic per se & sua sponte exoritur angina; succedit vero *symptoma* etiam haud raro aliis morbis ceu symptoma. Accidit hoc *matica* sæpius in diarrhoea & dysenteria, præsertim si fluxus intempe- *etiam est* stive cohibetur, de quo memorabile exemplum apud *Hilda. quando-*  
*num Cent. III. obs. XXVII.* Idem evenit, a repulso præpo-  
stere erysipellate, aut topicis perperam tractato podagrico dolore. Neque minus in variolis & febribus malignis ac pesti-  
lentialibus, cum summo vitæ discrimine, supervenit demum.

(IV.)

D d d

In

Inprimis de febre sic dicta Hungarica, observationes anatomico-practicae testantur, quod ut plurimum inflammatione meningum & faucium, quæ ad ventriculum & oesophagum extenditur, necet. Sed causa hujus symptomatici insultus plerumque vel in nimis diuturna alvi constipatione, vel perspiratione improvide cohibita, vel repulsa præpostere ad interiora materia acri caustica, quærenda. Quando vero epidemicum est malum, aeris vitio tribuendum & plerumque aliquid maligna complicatum. Accidit hoc haud raro, si diuturna aeris pluviosa & humida fuit constitutio, si ver est, vel autumnus, præco jam Hippocratis Sect. III. aph. 16. 20. 22. testimonio, quod verum esse propria observatione confirmat Bartholinus Cent. I. obs. LXXXI. Frequens quoque hujus mali incurfus, si aer effluviis sale acerrimo subtili, ob insectorum copiam, refertus, sole præsertim occiduo, hauritur, eamque ob causam Romæ familiarem esse & quandoque pestis instar grassari anginam, fidem facit Hollerius lib. I. prax. c. XXIII.

## §. IX.

Prognosis  
de even-  
tu.

Ceterum anginæ morbus, tam ob febrem haud raro acutam, quam suffocationis metum, multum alit periculi. Periculosissimam autem esse veram, internam & latentem, jam diximus, & de hac valet illud Hippocratis effatum prædict. lib. III. cap. IIX. *angina gravissima est, & celerrime interimit, que neque in cervice, neque in faucibus conspicuum quid habet. Hac etenim eodem die, & secundo, & tercio, & quarto, strangulat.* Inprimis maximum suffocationis est periculum, quando musculus, qui vocatur thyroarithenoideus, rimæ oclusioni dicatus, affectus. Ancæps porro admodum est symptomata, ob corpus jam debile & materiæ virulentiam raro superanda. Malum etiam, quando tumor in externis subito disparet, non imminutis, sed auctis potius symptomatibus. Tum enim ad alias nervosas partes transfilit morbus, & vel cerebrum petens, phrenitidem cum convulsionibus, vel ad pul-

pulmones delatus, peripnevmoniam facit, testimonio *Hippocratis Sect. V. aph. X.* lethalem. Sed quando suffocatio strangulatoria remittit, tumor, dolor & rubor magis extrorsum vergit sensimque evanescit, felicem solutionem nunciant. Sin secus, in apostema aut mortem fit transitus. Si in apostema, ac pus in bronchia & pulmones effunditur, teste *Foresto lib. XV. obs. XXIV.* anceps admodum eventus. Si in mortem, nunciant hanc spuma ante os, lingua valde tumida, purpureo nigra, extremorum rigor, summa præcordiorum angustia atque anxietas, cum pulsu duro, convulsivo & intermittente.

## CURATIO.

## CVM METHODO MEDENDI.

## §. I.

Ipsa truculenti hujus mali curatio differt, prout variæ sanguis ipsius sunt species & singularum causæ differunt, ad quas remittente pernosendas & opportune removendas, unice directus. esse debet medentis intentio. Quando itaque ex manifestis signis eminens sanguinis ad caput congestio observatur, quæ non modo vehementiam inflammationis auget, sed & lethali symptomatum est causa, protinus & primo omnium hæc debet esse Medici cura, ut impetum sanguinis a parte affecta derivet, id quod commodissime sectione venæ confinis perficitur. In hoc enim auxilio præcipuam & unicam fere salutis spem, inde ab omni ævo, tam Veteres, quam recentiores Medici, collocarunt. Instar omnium sit *Hippocrates*, qui *lib. de loc. in hom. §. I.* sic angina tradit curationem: *angina affectis, a sanguine in venis colli collecto & coagulato, sanguinem ex venis brachiorum & pedum detrahes, & simul alvum inferne subduces, quo quod morbum exhibet detrahatur.* Sed quo pacto & ubi id faciendum, non omnes æque consentiunt. Plurimi enim sectionem venarum sublingualium suadent, quam alii rejiciunt, quia si non fiat sufficiens apertio, parum



sanguinis effluat, si vero amplum foramen, hæmorrhagia sequatur non raro lethalis. Inter eos qui spernunt, potissimum *Tulpius lib. I. obs. LI.* hanc ob causam, quoniam sanguis eadem attrahatur ad locum per se angustum & facile suffocatio inducatur, sæpius ab ipso annotata. Alii, uti *Zacutus Lusitanus Hist. Med. princ. lib. I. hist. LXXXVI. Joh. Stephanus in Hippocr. de struct. hom. Trallianus & Freind in lib. epid.* sectionem venarum jugularium externarum, præsertim in malo desperato, sique præsens est strangulationis periculum, mirifice commendant. Sunt porro qui scarificationem dilaudent, in nucha & mento, ut *Platerus lib. II. pag. 395. Amatus Lusitanus Cent. III. curat. XXXIX. Zacutus Lusitanus in prax. admirand. lib. IV. quæst. LIV. circa laryngem Riolanus in enchirid. anatom. lib. IV. p. 385.* Hirudinum appositionem pone aures atque in cervice *Capivaccius & Hollerius* malunt.

## §. II.

*Alvus du-  
cenda.*

Post sanguinis missionem, præcipiente eodem *Hippocrate*, aperienda alvus, quo etiam hujus beneficio humores versus inferiora trahantur & evacuentur. Sed his minime acriora, neque cathartica, in forma pulveris aut pilularum, sed mitiora, & quidem liquida, conveniunt. Ut vero una, quod dicunt, fidelia duo dealbentur parietes, ac non modo superflui humores detrahantur, sed & acres falsi contemperentur, utilissimum erit, decoctum ex mannæ unciis duabus, nitri antimoniati drachma una cum dimidia & feri lactis unciis decem. Si autem per os nihil ingeri potest, enema injiciendum ex lacte, melle, oleo amygdalarum dulcium & sale communi ac nitro.

## §. III.

*Tempe-  
randum  
& discu-  
tiendum.*

Evacuatis sic tam sanguine superfluo, quam humoribus impuris, opera danda, ut humor sanguineus, vel serosus, tubulis impactus, resolvatur & discutiatur congruis remediis, tam internis, quam externis, & febrilis æstus simul contemperetur. Hunc in finem per quam conducibilis frequens usus

mix-

mixturæ diaphoreticæ & leniter anodynæ ex aquis antiſpasmoticis & diapnoicis, ſorum ſambuci, tilia, primulæ veris, acaciæ, galegæ, herbæ cardui benedicti, ſcordii, cum diaſcordio Fra-caſtorii, antimonio diaphoretico, lapide prunellæ, aceto quo-que & cancrorum lapidibus, nec non ſirupo papaveris rhœa-dos. Conducunt etiam potus diluentes & humectantes paullo liberalius dati, ſerum quippe lactis dulce & acidulum, cum ſucco citri & ſaccharo paratum, ptiſana ex hordeo mundo, radice ſcorzonera & raſura cornu cervi, cum ſirupo acetosiſtatis ci-tri, decoctum avenaceum, ipſum lac quoque, tantundem aquæ remixtum & ſaccharo atque momento nitri conditum.

§. IV.

Externis præterea accipiti huic morbo obviam eundum, *Externis* nonnullis quidem in oris cavo, nonnullis exterius in collo *succur-* atque cervice, quo his etiam dolor & æſtus inflammatorius *rendum.* mulceatur, acrimonia humorum temperetur & qui in vaſcu-lorum anguſtiis firmius ſubiſtunt ſucci diſſolvantur. Externe frequentiffimi uſus ſunt cataplaſmata ex emollientibus, pare-goricis & diſcutientibus, floribus ſambuci, meliloti, chamomillæ vulgaris, verbaſci, radice liliorum alborum, ficubus, croco, ſemine aniſi, ſoeniculi, farina lini, ex lacte coctis, qui-bus nonnulli, nidos hirundinum & ſtercus canis, ceu ſpecifica, adjiciunt. Merentur hoc nomine etiam commendatio-nem emplaſtra lenientia ac mollientia, uti eſt diachylon ſim-plex, aut de meliloto, malaxatum cum oleo amygdalarum dulcium, vel admixtione ſpermatis ceti, croci & camphoræ efficacius redditum. Intra os vero non facile ſuaſerim garga-rifmata, cum injectione per ſyphonem, ubi magnus dolor & ficcus ardor eſt. Sufficit os ſubinde colluere, congruo tepi-do liquore, cui concinnando ſerviunt plura, rob dianucum, diamoron, ſirupus granatorum dulcis, papaveris rhœados, violarum, mucilago ſeminis cydoniorum, cremor lactis, la-pis prunellæ, quæ omnia pro circumſtantiarum ratione, vel lacte, vel decocto liquiritiæ, ficuum, aut avenæ miſceri poſ-ſunt.

funt. Neque minus nobilis est virtus olei amygdalarum dulcis recentis, cum spermate ceti, croco & syrupo violarum, in decocto avenacei dati & aliquamdiu in ore detenti.

### CAUTELAE ET OBSERVATIONES CLINICAE.

#### §. I.

*In sanguinis missionem tenenda.*

In angina sanguinea & corpore plethorico, omnium primo per sanguinis missionem succurrendum. Nam si in ullo morbo, certe in hoc, a praesentaneo periculo ipsius mortis liberat. Sed momentosa & praecipua est juvandi occasio. Optimum auxilium ex sectione jugularium. Si vero hanc instituendi copia deficit, aperiendae sublinguales, ita tamen, ut prius secetur brachialis. Et quando angina sanguinea accedit feбри ardenti & Hungaricae simulque phrenitidis metus est, vires tamen imbecilles largiorem sanguinis subtractionem non ferunt, cito sublinguales tantum aperiendae. Quando autem ab acrimonia caustica nervosis faucium & laryngis tunicis inhaerente hoc vitium oritur, neque manifesta adest sanguinis redundantia, indicatur potius scarificatio in cervice & mento, vel hirudinum appositio. Ubi etiam in cacochymicis & phlegmaticis, a copia feri viscerum, fauces & externas colli partes obsidet tumor cum dolore & leni inflammatione, praeferrenda venesectioni, scarificatio, in nuca & scapulis.

#### §. II.

*Usurpanda in angina ardente.*

In usu externorum attendendum merito ad diversa inflammationis in faucibus genera & singulis accommodata opponenda. Itaque in omni faucium inflammatione dolorosa & ardente, julepus rosarum cum nitro & momento camphorae, deglutitus, eximie conducit. Gelatina quoque cornu cervi rite parata, cum albumine ovi probe depurata ac succo pomorum Chinesisum, nec non saccharo condita, iteratsumta, egregie levat. Si autem fauces arent, ardent, lingua



gua tumet & respirationis æque ac deglutitionis difficultas est, linctus parandus, ex albuminis ovi in aquam quassati unciiis binis, aquæ rosarum uncia, sirupi granatorum, diamoron ana uncia dimidia, salis prunellæ granis duodecim, cui, pro circumstantiarum conditione, viginti vel triginta liquoris anodynæ guttæ indendæ. Tum etiam exterius collum & cervix oleo camphorato, ex olei amygdalarum dulcium uncia, olei papaveris albi drachmis duabus & camphoræ drachma dimidia, inungendum.

## §. III.

In angina latente interna, valde æstuosa, solo lacte & *Latente* ejus cremore, addito lapide prunellæ & sirupo papaveris *rhoe-sympto-* ados, os subinde colluendum & frequentius bibendum lactis *matica* serum. In oesophagi autem inflammatione, febribus mali- *ab acri-* gnis in statu haud raro superveniente, ex usu est pulvis, ex *bis indu-* nitri drachma, camphoræ granis tribus & sacchari uncia, cum *sta.* emulsione amygdalarum dulcium, & intus dandus, & exterius in ore aliquamdiu tenendus. Et ubi ab haustis & inspiratis exhalationibus acribus metallorum, mineralium, calcis etiam vivæ & argenti vivi, suffocationis periculum accidit, nec purgantia, nec venæsectio locum habent, sed commodissimam locant operam humectantia, demulcentia, interna & externa, lac cum nitro, cataplasmata superius descripta, nec non enemata.

## §. IV.

Inflammatorius ille dolor, qui a fero salso acri in glandulo-*Gargari-* fa faucium carne, circa pharyngis & laryngis confinia, fit, cum *sma ex* rubore & copioso salivæ fluxu, sine febre, optime discutitur ab *spiritu* initio statim gargarismo ex spiritu vini Rhenani, vel Franconi-*vini.* ci. Quam præsentanea enim hujus sit virtus disertis verbis testatur *Valens meth. med. pag 112.* inquiens, *angina affectus in* principio sese spiritu vini gargarizet, *omnis guttaris inflamma-* tio cessabit trium horarum spatio, *sive solus hunc in usum ce-* dat, *sive cum aliis remisceatur.* Et *Martianus* hac ob cau-  
sam

sam in cynanche vera commendat actu calida. Ipse quoque novi, faucium inflammationem brevi fuisse discussam, guttulis octo vel decem spiritus vini camphorati, in quo granum nitri liquatum, lente per fauces dimissis. Quem in finem alii commendant essentiam pimpinellæ albæ, cum spiritu vini confectam.

## §. V.

*In decubitu serosa facienda.*

Quando magna colluvies humoris impuri serosi ad palati & faucium glandulas decumbit, crebrius usurpanda sunt leniora laxantia, mannata, rhabarbarina, tartarea & passulata. Tum etiam apprime conducit gargarisma, quod pro basi habet sal pharyngæum a *Zobelio in tartarologia* descriptum, quod præparatur ex cremoris tartari & nitri uncia, aluminis usti uncia dimidia, solutis in aceto destillato & solutione postea secundum artem coagulata. Sic quippe parati salis drachma, cum duabus drachmis mellis, in quinque unciis aquæ plantaginis solvenda & cum liquore hoc fauces tam crebro eluendæ, quam idem cum syphone subinde injiciendus.

## §. VI.

*Emplastrorum, gargarismatum & injectionum usus.*

In faucium & glandularum tumoribus inflammatoriis, emplastra emollientia, supra tradita, præferuntur merito cataplasmatibus, quibus ob plures difficultates, rarius uti soleo, sed frequentius decocto specierum emollientium ex lacte, vesicæ indito. De gargarismatum vero usu tenendum, quod cum syphone injecta locum non habeant. Impensiori enim attritu dolorem & inflammationem magis exasperant. Melius igitur ac tutius, os cum liquore ad gargarisma subinde eluere. Quod si autem & hoc propter impotentiam fieri nequit, injectio lenissime tantum adigenda, ne irritatio ad vomitum fiat, caput quoque antrorsum inclinandum, non retrorsum, ne dilabendo ad asperam arteriam suffocationem minetur, & iterato injiciendum, si magna mucii copia inhæret. Præstat præterea in omnibus hisce faucium affectibus abstinere

nere a loquela, quia crebrior ac fortior linguæ agitatio malum exacerbat.

## §. VII.

Si tumores faucium ad suppurationem tendunt, eadem *In suppu-*  
optime procurari potest caricis pinguibus in ore detentis. Et *ratione*  
quando tonsillarum tumor inflammatorius ichore repletus, *agenda*  
externæ nihil præstabilius deprehendi melle rosato, cum spiritu vitrioli remixto, & sæpius cum penicillo admoto, quod tumorem minuit, mundat, ulteriorem affluxum impedit & pituitam subsistentem colliquat. In aphthis infantum, quæ linguam cum dolore & ardore obsident, ad hunc mulcendum nihil utilius, quam pustulas subinde illinire cremore lactis cum tantillo nitri imbuto. Interdum etiam expedit ad pituitam colliquandam & arcendum nimium affluxum applicare vitriolum album, in aqua pluviali, vel melius rosarum, aut florum sambuci, liquatum.

## §. IIX.

Demum ne faucium inflammatio, quod haud raro acci- *Recidiva*  
dit, repetat, vitanda cum cura omnia, quæ ad inducendam *arcenda.*  
eam facere supra diximus. Potissimum perspiratio custodienda, ac inprimis caput, cervix & collum ab omni refrigeratione defendere ex usu est, ne humores & acris per poros difflanda materia ad interiora agantur ac in molli faucium substantia subsistant. Cavendum quoque ab omnibus quæ succos impensius exagitant, maximeque ab impensiori vociferatione, qua humorum affluxus ad superiora allicitur. Si corpus plethoricum, tempestitiva sanguinis missio instituenda, & minus rite succedentibus hæmorrhagiis spontaneis, ut eadem in ordinem redigantur, videndum. Neque minus subinde alvus subducenda, quo & impuritates expurgentur & congestorius versus superiora motus intercipiatur.



## ENARRATIONES MORBORVM.

## OBSERVATIO I.

*Angina**alvi fluxu**soluta.*

Femina triginta annorum, cholericæ & catarrhosis de-  
 fluxionibus admodum obnoxia, levius vestita surrexerat tem-  
 pore autumnali ex lecto ac frigidæ sese auræ incautius ex-  
 posuerat. Inde nocturna est raucedinem cum ardore & dolore  
 gutturis, difficulter simul deglutire & loqui potuit & pulsus,  
 præsertim noctu, fuit celerior. Quum igitur menses restita-  
 sent, missus primum e vena brachii sanguis & injectum dein  
 clyisma, sed sine levamine. Gargariis vero, propter dolo-  
 res, ferre non potuit. Interim gutturis tumor, tam interius,  
 quam exterius, mirum increvit, & parum absuit, quin ægram  
 strangularet. Quinto tamen die subsedit tantisper tumor &  
 dolor mitigatus. Hinc exterius collo admotum emplastrum  
 maturativum, ex emplastro de meliloto cum croco, cui im-  
 positi sacculi calidi, ac ori inditum decoctum ex emollienti-  
 bus. His maturuit tumor & noctu inscia ægra etiam felici-  
 ter rupit. Sed illapsa procul dubio fuerat materia acris pul-  
 monibus & ob id suffocationem minari visa est. Ad quam dis-  
 pellendam, aqua hyssopi, cum essentia castorei & liquiritiæ,  
 additis aliquot guttulis spiritus cornu cervi succinati, infusum  
 quoque theiforme ex herbis pectoralibus cum aqua calida,  
 usurpata. Inde sudor erupit per universum corpus simulque  
 materia tenax viscida, sexies minimum quotidie, per alvi se-  
 cessum ejecta, non sine torminosa ventris contractione. Me-  
 dicus autem metuens damnosam fore hanc diarrhœam, de  
 supprimenda eadem cogitavit & electuarium ex dialcordio  
*Fracastorii*, conserva rosarum, pulvere hæmatitis & nucista  
 dedit. Cohibitus etiam protinus alvi fluxus, sed sequutus  
 singultus cum ardore per totum oesophagi tractum, sputatio-  
 ne materiæ viscidæ viriumque languore. Hinc alius advoca-  
 tus Medicus, qui pathemata hæc a perperam suppresso alvi

fluxu

fluxu deduxit & ob id suavit pilulas ex myrrha electa, diagrydio sulphurato, mercurio dulci, croco, castoreo & sale succini, cum vehiculo calido sumendas. His non modo singultus sedatus, sed & materiæ serosæ per alvum excretio revocata, cum summo ægræ levamine, quæ successive postea ad sanitatem rediit.

### *Epicrisis.*

Memorabile omnino, quod faucium inflammatio, pituitoso ac seroso alvi fluxu fuerit soluta; quod hujus adstrictio præpostera gravia induxerit pathemata & quod hæc revertente illo expirarint iterum. Sed sæpissime in inflammationis faucium affectibus, oesophagus, quin ipse ventriculus, affligitur, ita, ut eadem quali labe eademque vitio laborare videantur. De aphthis sæpius notavi, quod eadem oesophagum & ventriculum obsederint. Id enim factum fuisse, ardor, per totum oesophagi tractum usque ad præcordia excurrens, prodidit. Tum etiam ægri salsa, acria & calida plane non ferre potuerunt, sed decoctum hordei, avenaceum, raparum exsiccatarum, infusum theiforme cum lacte, ex usu fuerunt, hisque assumtis, ardores, siccitates & dolores anxii circa præcordia sublati. Vicissim vidi, ex ventriculo, in ardentibus febribus, a venenis, aut acrioribus purgantibus inflammato, inflammationem ad fauces & laryngis muculos fuisse propagatam. Hinc manet utique firmum, in faucium orisque affectibus, præsertim si pituita viscida, crassa fuerint obsessæ, laxantia præsentaneam exferere opem.

### OBSERVATIO II.

Sexagenarius quidam, diu quartana detentus, hac disce-*Synanche* dente, catarrhis & ventriculi imbecillitati admodum fuit ob-*curata.* noxius. Is quum noctu aëre pluvioso fecisset iter, incidit in faucium difficultatem, ut solida quidem, non autem liquida posset deglutire, ac nonnisi cum magna intensione deglutitionis, anxietate ac subsequente copiosa excretionem phleg-

matiss. Interius quidem rubescebant nonihil fauces, sed exterius nihil tumoris comparebat. Judicavimus igitur epiglottidem, quæ instar operculi orificium asperæ arteriæ claudit, sero mucido obsessam esse & turgidam, ut rimam subjectam non exacte claudat, sed liquidum deglutitum in asperam arteriam delabatur & anxietates subsequentes faciat. Quare iussi exterius applicare spiritum vini camphoratum, interius os subinde colluere aqua florum sambuci, mixta cum spiritu salis ammoniaci atque essentia croci, & quotidie usurpare pilulas nostras. His intra aliquot dies malum feliciter sublatum & æger convaluit.

### *Epicrisis.*

Proprium anginæ symptoma difficultas deglutendi, tam solida, quam liquida. Si enim tumor paullo amplior œsophagi principium obsidet illudque angustat, liquida quidem, sed non solida dimittuntur. Si vero tumor hæret in principio gutturis, quod tegit epiglottis, solida quidem, dum comprimunt tumentem epiglottidem, transeunt ad œsophagum, sed liquida minus prementia per hians a tumore spatium asperæ arteriæ illabuntur ibique magnas creant molestias.

### OBSERVATIO III.

*Angina  
sapius re-  
cidivans  
sanata.*

Putarant Medici feminam quandam venereo infectam esse contagio, eaque propter ipsi mercurialem adhibuerant salivationem. Hinc factum est, ut ipsa postea levi ex causa, ab aëre frigido & nebuloso, ab ira, ab assumtis acribus cibis, a refrigeratione capitis, a turbato mensium successu, sæpius incurreret exquisitum palati, nec non in faucium internis, circa pharyngem & laryngem, ardorem atque dolorem, sine febre tamen, sed cum respirationis difficultate. Accidit vero ut dormiret in conclavi humili, noviter exstructo & vaporibus calcis pleno, ac inde non modo capitis dolore, sed & impenso faucium & colli ardore atque dolore, cum inquietudine, spirandi angustia, anxietate & æstu afficeretur.



tur. Ego vocatus sanguinis missionem, ob vasa minus turgentia omisi, sed tantum applicare jussi collo cataplasma ex farina lini, floribus sambuci, ficubus, croco, oleo amygdalarum dulcium & lacte. Suasi quoque ut clyster injiceretur ex lacte, nitro, sale communi, melle & oleo. Potui dedi lac, cum dimidia parte aquæ hordei, sive ptisanæ remixtum, adjecta debita quantitate nitri & sirupi violarum, quod copiosius hausit & frequenter ore continuit. His brevi malum discussum. Ad arcendam autem crebriorem recidivam, dedi consilium, ut aquas Spadanas, vel Selteranas cum lacte per mensem & ultra biberet, & quotidie mane fauces gargarizando elueret, vel cum aqua sic dicta sclopetaria, vel decocto plantaginis ex vino.

#### *Episcris.*

Prompta tumoris & affectus anginodei genesis, quando compages fibrosa, glandulosa & tubulosa faucium debilitata & tono privata, quod heic factum per salivationem mercurialem. Quare qui semel, vel iterum ejusmodi tumore laborarunt, qui non statim congruis præsiidiis atque regimine discussus, ex facili postea, per nimiam vocis intensiorem, animi affectum, vinum copiose haustum ac frigido-humidum aërem admissum, idem malum rursus nanciscuntur. Optime autem ejusmodi recidivæ præcaventur, quando malum primum statim recte persanatur penitusque tollitur, ne partibus labem inferat, agere emendandam.

#### OBSERVATIO IV.

Virum novi honestum, quinquagenario majorem, san- *Angina*  
guineo-melancholicum, robustum, sanguinis missionem nun- *ex repel-*  
quam passum, belle tamen valentem, licet cerevisiæ lupulatae *tentium*  
& spiritus ardentis potu admodum delectaretur. Sed quum *præposte-*  
gravius inter rixas cum uxore excanduisset, in exquisitum *ro usu*  
capitis incidit dolorem, sub quo arteriæ fuerunt turgidæ, fa- *gravis*  
cies rubicunda, oculi torvi, noctes insomnes & arteriæ tam *discussa.*  
valide pulsarunt, ut de sensu mallei quasi in capite pulsantis

æger conquereretur. Hinc admotum cataplasma ex mica panis, baccis lauri, juniperi & aceto rosaceo. Fronti etiam & temporibus ex consilio vetulæ applicatum albumen ovi, cum alumine conquassatum. Sed gestatis his aliquamdiu, conquestus est æger de insigni dolore pungitivo faucium, deglutendi difficultate & spiritu angusto, lingua mirum intumuit, atro colore tincta, siccam linguam ex ore hiantem exseruit, liquida indefinenter appetiit, pulsus celer & vehemens manum vibravit & propter spiritum arctius meantem in erecto semper esse debuit situ. Ad gravissima igitur hæc pathemata depellenda cum fructu usurpata sequentia. Sanguis e vena missus largiter; clyster injectus acrior; cataplasma ex stercore canis, hirundinum nido, ficubus, cepis tostis, floribus sambuci, chamomillæ, meliloti, semine cymini, nitro & camphora, cum aqua florum sambuci & vino tepide collo appositum; interius mixtura ex aquæ florum sambuci, rosarum ana uncis duabus, aceti destillati drachmis sex, lapidum cancrorum drachma, nitri drachma dimidia, camphoræ granis quatuor in oleo amygdalarum dulcium solutis & sufficiens quantitate julepi rosarum, sæpius ad aliquot cochlearia data & potum quoque infusum theiforme ex veronica, floribus sambuci & radice liquiritiæ. His feliciter discussum suffocationis periculum. Postea laxans ex sirupo rosarum solutivo, cremore tartari, diagrydio & rhabarbaro exhibitum, quo aliquoties dejecit. Os demum frequentius elotum aqua pluviali, in qua nitri ac vitriolum parum & saccharum ad gratiam soluta. Sic brevi explicita ratione anceps hic morbus ex voto depulsus.

### *Epicrisis.*

Attendenda merito in nostro truculenti hujus mali genesis. Ortum quippe duxit ex sanguinis ad caput congestione; huic opposita exterius constringentia; his sanguis ad interiora repressus ipsasque fauces; heic copiose collectus cruor substitit & dolorem, tumorem, ardorem aliaque symptomata indu-

induxit. Albumen enim ovi cum alumine insigni repellente & vasa constringente virtute pollere, ex ipsius usu in ophthalmia patet. Et ex constrictione in externis facilem ad interna esse transitum, docet vasorum mutua communicatio. Sed quum illico venæsectione & internis æque ac externis discutientibus stasi & stagnationi obviam itum, non potuit non feliciter succedere curatio. Nam si occasio præceps captanda unquam, certe in congestionibus inflammatoriis id faciendum, quæ nisi celerrime removeantur, transitus fit in corruptionem lethiferam & sphacelofam.

## CAPVT V.

DE

## FEBRE PHRENETICA.

SIVE PHRENITIDE.

THESES PATHOLOGICAE.

## §. I.

**N**ULLA inflammatio, sive particularis febris, tam magni in Phrenitide medicina momenti, quam quæ in parte omnium nobis destinatissima ipsiusque animæ rationalis domicilio, cerebro, consistit, & tam omnem rationis usum evertit, quam præsentaneum vitæ periculum intentat, ac Græco nomine audit phrenitis. Est igitur hæc phrenitis febris acuta inflammatoria, orta a nimia sanguinis congestionem ejusdemque intercepto, per minimas potissimum membranarum cerebri arteriolas, transitu, juncta cum magno æstu, delirio atque vitæ discrimine.

## §. II.

Signa imminentis phreneticæ affectionis sic exacte & signa summarie compendiose exhibet *Trallianus lib. 1. cap. XIII. phrenitidem, tura.*  
inqui-



& præ-  
sentis.

inquiens, futuram vigilia potissimum continua & intensa somniq; turbulenti præcedunt, agri exsiliunt & somniorum imaginationibus detinentur, & facile eorum quæ dicuntur obliviscuntur; si respondent, ferociiores ac iracundiores, quam prius, apparent, pulsus habent parvos & duros atque occipitio frequentius indolescent. Si affectus increverit, fixioribus oculis cernunt eosque rubentes habent, nec non lacryma ex utrisque fluunt. Præsentis autem indicia & pathemata omnium optime ex Veteribus consignavit Calius Aurelianus lib. I. cap. II pag. 12. ita habens: in phreneticam passionem declives sequitur febris acuta atque pulsus difficile ad superficiem corporis ascendens, sive humilior, tensior, vultus subinflatus, sive plenus, sanguinis per nares destillatio, vigilia juges, aut turbatus somnus & insania turbulenta, mentis sollicitudo ac pravitas sine ratione, frequens tergorum est versio jacendi, cum capitis assidua commotione, aliquando etiam sine causa hilaritas, oculorum rubor, cum levi lacrymatione & circumjectio manuum, sine ullo capitis dolore, articularum frigus, sine tremore, urina abundantia flava, aquata, tenuis & paulatim exclusa; aliquibus etiam sonitus capitis atque aurium tinnitus, dolor quoque capitis non quiescens, nulla ex manifesta ratione præcordiorum tensio, visus attentus, cor frequenter palpitans.

### §. III.

Causa  
proxima.

Omnes hæ phrenitidi junctæ functionum in corpore læsiones, pendent a nimio & impetuoso sanguinis ad caput impulsu, ejusdemque ex intercepto per minima libero transitu, stasi & per alias insolitas vias celerrima traiectione, unde distensiones fiunt vasorum cerebri & faciei, serofus humor secedit, passim obhærescit & cerebrum in functionibus suis, maxime rationis usui servientibus, turbatur prorsus. Ex vero enim Hippocrates lib. de flat. & passim alibi tradit: prudentiam & rationem hominis in constanti sanguinis habitu in cerebro, sive rectius ejusdem æquabili motu consistere, adeo

ut

ut hoc inturbato, concidat simul & prudentia, & ratio. Et hæc omnino ita esse veramque phrenitidis sedem in cerebro consistere, testatum facit uberius sectio eadem defunctorum. In his quippe vasa, tam duræ matris cum sinibus suis, quam piæ meningis, mirum distenta & crasso coagulato cruore facta, ipsæ membranæ aridæ & exsiccatae, ut pia mater facillime a cerebri cortice separari queat, reperiuntur, & præterea medulla cerebri multo seroso humore perfusa comparet. Id quod pluribus confirmant *Blancardus in anat. pract. obs. III. Schenckius lib. I. fol. 64. nec non M. N. C. Dec. II. A. V. obs. LXII.*

## §. IV.

Inter antecedentes causas recte *Celius Aurelianus l. c. Cause* refert vinolentiam, vel vigiliam, aut jugem in sole moram, *antecedentes.* naturam mobilem, iracundiam, caput per literarum disciplinas debilitatum, ætatem juvenilem. Et certe ad phrenitidem disponunt omnia, quæ caput debile ac imbecillum reddunt, ut deinde in ipsius vasis facile fieri possit sanguinis & humorum mora, nec non quæ sanguinem, crassum præsertim & copiosum, ex partibus inferioribus impetuose ad caput agunt ac congerunt. Hinc observatione medico-practica constat, ad deliras ejusmodi febres admodum esse proclives, qui diuturna mœstitia, cura, studiorum & meditationum profundiorum intemperantia, mentem nimis fatigant, qui vegeti ætate, constitutione melancholico-cholerici, sæpius animo per iram aut odium moventur, desideriiis vehementioribus jactantur, vigiliæ, inquietudini, crapulæ ex cerevisiis liberaliter lupulatis, vel vino dediti, qui veneri litant, sedentariæ vitæ motus & exercitationis experti indulgent, & ob pravam victus rationem, & copiosum, & impurum sanguinem, in venis alunt. Hinc porro per experientiam in comperto est, a cessante consueto, vel etiam repente suppresso hæmorrhoidali fluxu, emanante quoque aut cohibito mensis, nec non in puerperis lochiorum profluvio, promptam

(IV.)

Fff

esse,

esse, præsertim alvo simul adstricta, phreneticarum affectionum genesin. Tum enim ob stagnationes sanguinis in abdominis visceribus, in nervosis partibus spastica suscitantur stricture, quæ inæqualem reddunt sanguinis circuitum & faciunt, ut is cum impetu aliorum ruat ibidemque nimium congeratur. Demum phrenitis etiam haud raro inducitur per violentiam externam. Accidit hoc in vulneratione & contusione capitis perquam facile, inprimis plethorico-cacochymicis, nisi cito sanguinis missione & discutientibus occurratur, tumque effato *Hippocratis Sect. VII. aph. XIV.* eventus sequitur ut plurimum funestus.

## §. V.

*Est vel  
idiopathica.*

Merito autem phrenitis distinguenda in idiopathicam & symptomaticam. In utraque quidem febris adest acuta, sed ea cum differentia, ut in illa præcedat, in hac vero individuus sit comes. Idiopathica in temperato nostro climate rarior, frequentior autem in calidis siccis & meridionalibus locis, unde etiam Veteres Græci Medici, inprimis *Aetius*, *Trallianus* optime & copiose de hac passione in monumentis suis disseruerunt. Dantur tamen subinde etiam inter nos exempla phreneticæ febris, sine præcedente alia, potissimum a nimia crapula, continua animi iracundia & cerebri per profundas continuas meditationes & vigilias fatigationes, imbecillitate, in sanguineo-vel etiam choleric-melancholicis hominibus & vitæ sedentariæ addictis, hypochondriacis, vel hæmorrhoidariis, præsertim si fluxus imprudenter cohibetur. Sed de hac recte omnino, confirmante id ipsius experientiæ suffragio, tradit *Vallisius in pathol. cerebr. cap. X. pag. 234.* quod, nisi cito & opportunis remediis discutiatur, quam facile in maniam, sive delirium furiosum transeat. Neque etiam infrequens est idiopathica ejusmodi & in maniam degenerans phrenesis, post superatas febres ardentes, item purpuratas, exanthematicas & catarrhales, male tractatas, per nimis æstuosum regimen, per medicamenta volatilia, sanguinem commoventia, opiata etiam, aut

repel-



repellentia nimis, refrigerantia, nec non incongruas venæsectiones. Id quod eo certius & vehementius fit, quando æger ad iram levi ex causa promptus ac facilis.

## §. VI.

Frequentior tamen apud nos symptomatica. Sæpius *Vel symptomatica.* enim evenit, ut in febribus malignis & exanthematicis acutis, petechiis, variolis, catarrhalibus malignis, potissimum castrensis & omnium maxime Hungarico morbo, præsertim male tractatis, phrenitis accedat in statu & mortem inferat. Scilicet supervenire solet circa dies criticos, cum rigore, tremore artuum, præcordiorum tensione, externorum refrigerio & urina tenui, vel parcius, vel effuse nimis fluente. Sed quia ob morbum præcedentem & diuturnas vigilias fractæ jam fere penitus vires & tonus quoque vasorum membranarum cerebri nimium labefactatus, stases fiunt in ejus vasis ex sanguine irresolubiles, quas tertio plerumque die mors excipit.

## §. VII.

Licet autem phrenitis sæpius in maniam transeat, *Differt a* veterum etiam, *Hippocratis, Celii Aureliani & Aretæi* testimonio, *mania.* qui illam ob id cum hac plerumque conjungunt, vel plane confundunt; ambo tamen multum discrepant. In phrenitide enim semper adest febris, cum pulsu celeri, duro ac parvo, delirium quoque non intermittens prorsus, sed tantum subinde remittens, quo tempore oblivio est omnium quæ sub delirio contigerunt. Sed mania chronica est passio, sine febre acuta, licet cum pulsu præternaturali, duro & inæquali, quandoque parvo, quandoque magno & celeri. Habet quoque maniacus furor sua intervalla, junctus est ordinario cum magno fastu, ira & odio adversus amicos atque propinquos, & paroxysmo cessante, exquisitam ut plurimum memoriam omnium quæ antea habent maniaci. *a levi delirio in* Deinceps phrenitis etiam differt a leviori illa mentis alienatione, quæ in acutis febribus, ante expulsionem criti- *post & acutam.*

cam exanthematum non raro observatur. Nam hæc facilius transit, neque etiam urinas tenues aquosas, vel rigorem & refrigerationem partium externarum habet comitem. Neque minus, quandoque post declinationem febris acutæ, observatur per aliquot dies, aut hebdomades, quædam desipientia & mentis inconstantia, a phrenesi diversa, quæ propter summam virium & cerebri ex perpeſſo morbo debilitatem oritur, & redeuntibus viribus, vel iponte cessat, vel congruis præſidiis facile iterum penitus discutitur.

### CURATIO.

#### §. I.

*Curatio  
quibus  
perficien-  
da.*

Quum gravia illa & exitialia pathemata, quæ phrenitidi juncta, a meningum inflammatione, ceu causa proxima dependant; prima utique & princeps medentis esse debet intentio, ut hæc in præſervatione arceatur & in curatione removeatur. Hujus autem causa quum sit sanguinis in vasculis meningum alibi stasis, alibi cum dolore, tensione spastica & ardore, celerissima trajectio; ipsa certe sana ratio dicitur: ea remedia, quæ effrenem sanguinis impetum ad caput sistunt, ibi congestum derivant, subsistentem expediunt atque discutunt & meninges spasmus constrictas relaxant, omnium esse, ut ita loqui liceat, indicatissima.

#### §. II.

*Sanguis  
mitten-  
dus.*

Jam in phrenitide, & curanda, & præſervanda, principem merito locum obtinet, communi Veterum & recentiorum omnium consensu, sanguinis missio; quam etiam circa affectam partem instituere præcipiunt omnes. *Tralliano* olim & Arabibus frequens jugularis venæ sectio, quæ nostris temporibus perperam exolevit. Nam per experientiam in comperto est, hanc in omnibus capitis a sanguine congesto & stagnante oriundis passionibus, aliarum venarum incisioni longe multumque esse anteferendam, eo quod hæc vena jugularis externa,

terna, cum interna, ex arteriis carotidibus & vertebralibus cerebri proxime sanguinem derivat atque deducit. Nec difficilis adeo & periculosa, ut vulgo putatur, hujus venæ incisio, sed constricto tantisper fascia commoda, ut turgeat vena, collo, facili negotio instituenda. Deinceps magni æstimatur a Medicis in hoc & aliis capitis morbis venarum sublingualium sectio. Inprimis *Ammannus in paren.* fatetur: ex militibus qui anno MDCLXIV. ab expeditione Hungarica redierunt & in nosocomio morbo Hungarico laborarunt, evasisse omnes, quibus tempestive raninæ venæ pertusæ, quibus non, esse mortuos. Atque ego etiam novi, eandem utilissimam fuisse ad præscindendum imminens in febribus acutis delirium, quinto, vel sexto die, sana adhuc mente, institutam. Sed difficulter admodum perficitur, si delirium jam adest, ac præterea ex foramine nimis amplo, ob sanguinis ad caput impetum, hæmorrhagia metuenda funesta, ex justo minori parum sanguinis fluit, & dato ibi spatio, fluxus potius ad cerebrum allicitur. Alii commendant venæ frontalis, constricto prius collo incisionem, eademque potissimum *Trallianus* se magna phrenitide correptum sanasse, testatur. Nonnulli præferunt arteriotomiam in temporibus, quos inter est *Panarolus*, qui *pentec. I. obs. XIX. pag 18.* testis est: se se arteriotomiam in phrenitide magna cum felicitate expertum, ut ipsa vexari statim resipuerint. *Calius Aurelianus* scarificationem in toto capite prius raso in usu habuit. Longe magis tamen probandus Ægyptiorum mos nares scarificandi, cujus vices, deficiente commodo instrumento, supplet experimentum, quo culmo straminis, aut bacillo exili acuto, in nares validius truso, sanguinis proritatur stillicidium, quod ego quidem cum præsentaneo commodo aliquoties factum esse vidi. Et hi in confini affectæ parte mittendi sanguinem modi, tam in phrenitide idiopathica, quam symptomatrica locum inveniunt. Sed quando ex lochiis, nec non mensibus retentis, aut suppressis, malum hoc metuendum, cito in pede



vena aperienda & sanguis largius exantlandus. Neque minus, si ex vitiato, aut intercepto hæmorrhoidalis fluxus successu, delirium imminet, optimum levamen ex apertione venarum hæmorrhoidalium, per appositionem hirudinum, expectandum.

## §. III.

*Alvus ducenda.*

Post sanguinis evacuationem alvus ducenda, qua adstricta, ad supernas partes, & qua soluta, ad infernas, humorum convertitur affluxus. Scite autem *Hippocrates lib. III. de morb. §. IX.* monet: in curatione phrenitidis alvum esse præparandam ut egerat, humectantibus potionibus, quæ tunicas intestinales spasmò constrictas relaxant, quia primarum viarum spasmus frequens deliriorum est causa. Ego instar omnium hunc in finem commendo potiones mannatas, ex mannæ minimum unciiis quatuor, solutis in libra feri lactis, cum cremoris tartari drachma, nitri drachma dimidia, & olei amygdalarum dulcium uncia una. *Baglivus lib. I. prax.* pulverem Cornachinum commendat, ita pag. 102. scribens: *quum pluries observatum fuit, alvi fluxu solutum fuisse delirium, ideo natura id docente, proficuum non semel experius sum pulverem Cornachini, superbibendo ei longa diluentia, ex decocto hordei limari, salis prunellæ aliusque dulcificantibus, præcipue, si nimius viscerum ardor adsit & interna inflammatio.* Si vero celeri opus est auxilio, alvus solvenda leniente & paregorico domestico enemate.

## §. IV.

*Humectandum & discutiendum.*

Ex internis porro adversus phrenitidem præsidii, sunt maxime potiones diluentes, demulcentes & humectantes, largissima copia datæ, modo, quod rarius fieri solet, ut innuit *Aretæus*, phrenitici sitiant. Instar omnium est potus ex sero lactis dulci, vel acidulato, cum succo citri parato & julepo rosarum, vel sirupo papaveris albi edulcorato, in cujus mensura cum fructu dissolvitur drachma una nitri depurati, vel salis prunellæ. Utiles quoque emulsiones ex decocto hordei, rasuræ

rasuræ cornu cervi & seminibus quatuor frigidis, cum julepo rosarum, præsertim quando mensuræ duo nitri scrupuli adjiciuntur. Non minus confert lac cum acidulis Selteranis, vel Antonianis remixta, item ptisana. Qui potus omnes quo largius bibentur, eo plus efficaciam in diluendis humoribus, relaxandis constrictis tubulis, expediendis obstructionibus & extinguendo aestu præstabunt. Ex medicamentis autem mixtura diaphoretica & discutiens, capite antecedente descripta, uti in omnibus inflammationibus, sic etiam phrenitide, effectum exserit longe saluberrimum.

## §. V.

Inter externa quæ caput ab humorum affluxu liberant *Externa* connumeranda pediluvia, vel involutiones pedum in lintea *usurpan-* humida calefacta, & quæ omnium optima, balnea aquæ dul-*da.* cis temperata. Horum insignem utilitatem quotidiana uberius confirmat experientia & locuples inprimis testis est *Trallianus*, qui lib. I. ita disserit: *lavare eos & perungere convenit, quibus jam vacuatio facta est & quantitas totum corpus non offendit, verum siccitas & vigilia plurima urgent. Etsi febri- ceter ager, nihil nocebit ei si ita lavetur, præcipue etiam, cum balneum tepidum adhibitum fuerit, ut neque aer sit igneus, neque solum nimis calidum. Qui autem febris metu eos non lavant, maxime offendunt. Nam agri vigiliis magis torquentur balnei abstinentia, adhuc magis etiam animo turbantur. Lavandi igitur sunt, quemadmodum comprehensum est. Sic enim balneo uenies, ad bonam temperiem revertuntur, & in posterum delirio & affectu febrem accendente, liberantur.* Dein Veteres, ac inter hos potissimum *Trallianus* & *Aræteus*, post sanguinis & alvi vacationem, caput oxyrrhodino, ex aceto rosaceo composito fovebant, ne, uti loquuntur, caput liberalius attraheret humores iisdemque repleretur. Nec male. Interim nos summo cum fructu, in omni delirio, caput totum rasum fovere suavisimus, temperato hoc epithemate: recipe aceti rosacei uncias

uncias duas, spiritus rosarum, in quo decem grana camphoræ soluta, drachmas duas, nitri puri scrupulos duos, olei ligni Rhodii guttas XX. M. D.

## CAUTELAE ET OBSERVATIONES CLINICAE.

### §. I.

Règimen  
phreneti-  
corum.

Quam modo tradidimus phrenitidis medicationem, tam in symptomatica, quam idiopathica, & præsertim illa inveniata, quæ in maniacum affectum transire videtur, quam maxime esse accommodatam, expertus scribo, nec quicquam præterea vix potest excogitari, sed opus est, ut aliquamdiu horum usui insistatur. Quæ autem in regimine phreneticorum servanda, egregie tradit sæpe laudatus *Trallianus lib. I. pag. 50.* sic præcipiens: *considerari debet etiam habitatio, in qua degit ager, ut aërem nec admodum crassum, neque humidum frigidumque, aut nimis calidum habeat, ne capiti meatuum densatio, aut repletio superveniat, sed temperatus existat, quo animalis spiritus temperie ipsius refocilletur ac relaxetur. Sit autem magis lucidus, quam tenebrosus, ut ager per hujus sensum ad consuetorum perceptionem ac conscientiam perveniat. Quare & amici nonnulli admodum familiares ei assistant, ut etiam increpantes ipsum propter ea, quæ facit, revereatur. Neque vero domesticus, aut cognatus, cujus causa aliquando irascitur, aut cui irascatur, ingredi debet, quippe hoc irritare agros & commovere solet: & ut valde perturbentur, manifestam præbet occasionem. Sed nec amici frequentes & copiosi ad eum ingradientur, quippe urbem ei tantum excitant, præterea aërem quoque crassum efficiunt, frigidos eminentes spiritus. Jam non violentem movendus est, sed leniter, ne in lecto propter imbecillitatem concutiat. Hoc enim, si quid aliud, agrum irritat & somnum impedit, ii vero, qui adsunt, omnia ipsius membra citra violentiam teneant, leniterque perfricent, & præsertim inferiora: atque tunc magis, ubi convulsiones agro*

obori-



oberiuntur, artus vinculis excipiantur. Quippe hoc materiam ad inferna provocat, præterea convulsiones lenit. Satius autem est, inferiora quoque, ubi perfricata fuerint, fovere atque sic deligare, ut materia, quæ fotu simul & fricatione accita fuerit, ad ima potius derivare possit.

## §. II.

De venæsectione tamen, hæc adhuc tenenda: quod si, De san- ut sæpissime fit, phrenetici eam admittere prorsus renuunt, <sup>guinis</sup> ego nil præsentius & factu facilius novi, quam ut ex impro- <sup>missione</sup> vilo calamus, aut culmus stramineus valide in narium cavum <sup>tenenda.</sup> adigatur, sic enim sanguis sæpius illico liberaliter & cum commodo evocatur. Ad venæ frontalis autem incisionem, si idiopathica & chronica est passio, non prius accedendum, præsertim in corpore plethorico, quam aperta prius brachii, vel pedis vena, ne impetus ad caput crescat. Cavendum etiam sub hac operatione, ne instrumentum adhibeatur acutius, venam perfodiens & pericranium cum detrimento lædens.

## §. III.

Quæ etiam ex mensium, vel hæmorrhoidum vitio & O-Phrenitis riundis inde vehementibus spasmodis pullulat phrenitica passio, <sup>ex sup-</sup> optime levatur balneis, mineralium aquarum potu & apposi- <sup>pressis hæ-</sup> tione hirudinum ad venas ani, vel uteri, adhibito simul con- <sup>morrhæ-</sup> gruo victu atque regimine. Novi enim, phrenitidem diu <sup>giis &</sup> durantem, erumpente mensium, vel hæmorrhoidum fluxu, <sup>materia</sup> feliciter fuisse discussam. Sed quando phreneticum malum non tam a sanguinis in vasis cerebri congesti copia pullulat, quam potius a materia subtili, acri, virulenta, vel repulsa ab exter- <sup>acri.</sup> nis, uti in exanthematicis, vel per calidiora & volatilia nimium exaltata, quæ firmiter nervosæ duræ matri impacta spasmos concitat, liberum sanguinis transitum & ad cor recursum intercipientes, præter venarum quæ capiti propinquæ sectionem, expedit calvariæ rasæ partes & viscera ex animantibus recenter mactatis adhuc calentia, uti pulmones, hepar & o-

(IV.)

Ggg

men-

mentum, admove, & quando refrigerint, calidæ eadem immergere, quo iterum calefiant.

## §. IV.

*Et plica  
Polonica  
cura.*

In Polonia frequens est delirium phreneticum, melancholicum & maniacum ob latentem plicam, hacque erumpente insania cessat. Hinc optimum consilium plicæ egressum elicere, quem in finem usurpare suescunt decoctum ex musci clavati manipulis binis, in duabus aquæ mensuris decoctis. Quo dum bis quotidie caput & crines abluunt, intra hebdomadis decursum prodire solent citri, delirium discutientes. Non raro etiam abscissam plicam sequitur crudelis capitis dolor, quem excipit phreneticus furor cum febre ipsaque mania, quæ tamen usu decocti, vel linimenti ex musco clavato in *M. N. C. Dec. I. Ann. II. obs. LIV.* descripti, plicam revocantis, promte iterum abigitur.

## §. V.

*Absint  
commo-  
vantia.*

Cavendum autem, sicut in omnibus inflammationibus, sic etiam in phrenitide ab acris & commoventibus, liquoribus spirituosiss, a motu animi & corporis fortiori, immo ab omnibus, medicamenta sint, sive alimenta, quæ sanguinem in præternaturalem motum ciere valent. Inprimis nullo modo ad iram irritandi ægri & ob id arcendi ab iis, a quibus læsi

*Narco-  
tica*

& quos ferre nequeunt, domestici sint, sive alieni. Opiata & narcotica absint penitus, præsertim ubi vires jam imbecilles. His enim deliria quandoque in febribus induci testatur experientia. Perite hinc monet *Trallianus l. c. si vires*, inquiens, *imbecilles fuerint, tunc maxime vitabis, ne quid torpore somnoque inducendo incommodum exhibeas.* Nam in his, qui infirmas vires habent, non mediocris noxa talium portionem

*& ves-  
cantia.*

comitatur. Vesicantia etiam, nonnullis solemnina in phrenitide improbo. Nam cantharides acri quo pollent stimulo strictas jam & tensas spasmo membranas irritando, delirium augment & convulsionem facile accersunt. Testatur id diserte

*Bagli-*

Baglivus, lib. I. prax. pag. 102. ita scribens: in aere Romano, per adhibita viris vesicantia plures vidimus mortuos, ac sanatos. Proficere autem magis feminis, quam viris, vidimus. Et paullo post sic pergit: delirantibus cum febre acuta, lingua arida, indicii magna viscerum inflammationis, si applicentur vesicantia, omnes fere in pejus ruunt, & magna ex parte moriuntur convulsi.

## ENARRATIONES MORBORVM.

### OBSERVATIO I.

Laborabat ardente febre cum intolerando ferme capitis *Phrenitis* dolore, quadragenarius quidam, cui sexto die accedebat al-<sup>ex cohibi-</sup>vi fluxus, quem Medicus detrimentosum esse putans, pulvere <sup>to critico</sup> ex bolo Armena, hæmatite & laudano opiato composuit. <sup>alvi flu-</sup>Cohibito hoc, dolor capitis gravior factus & poto præterea <sup>xu.</sup>vino, cui essentia ambræ instillata, maximæ præcordiorum anxietates subsequutæ, fauces cum oesophago inflammatione affectæ magnaque colluvies viscidæ mucosæ materiæ in oris cavo collecta. Successit etiam delirium furiosum, tam vehemens, ut æger vix a quatuor robustissimis viris in lecto contineri posset. Adversus hoc multa quidem & varia adhibita præsidia, vena in pede pertusa, admota epithemata, appositus calens vituli pulmo, sed omnia incassum, perstitit potius per quinque dies delirium non interruptum, donec decimo quarto, a primo morbi insultu die, mors ipsius simulque vitæ faceret finem.

#### *Epicrisis.*

Nihil profecto perniciosius, quam in ardente biliosa febre, ex colluvie acrium biliosorum prima in regione succorum oriunda, alvi fluxum, tempore præsertim critico erumpentem, imprudenter sistere. Neque enim hoc facto fieri potest aliter, quam ut materia biliosa retenta, vel inflammationes in ventriculo & intestinis, vel etiam in capite, uti heic factum, suscitet. Id quod tanto certius accidit, quia a Me-



dico temerarie vini usus concessus, qui nunquam, ubi metus inflammationis in primis viis, etiam in parca quantitate, admittendus. Accessit etiam delirium furibundum alvo suppressa, quia ex spastica primarum viarum constrictione, sanguis cum impetu ruit ad caput, ibique congestus, dolores primam, ac postea, ob meningum inflammationem, delirium, peperit. Atque adeo patescit, imprudentem medicationem, frequentissime atrocium non modo pathematum, sed & ipsius mortis esse causam, tum maxime, quando eadem critica humoris peccantis excretiones supprimuntur & materia nocens in corpore retinetur.

## OBSERVATIO II.

*Phrenitis  
in lentam  
& he-  
ticam con-  
cedens.*

In puerpera tenera, ad iracundiam prona, cerevisiæ & vini potui assueta, restitaret penitus post partum lochiorum fluxus, cum virium ingenti debilitate, ardore, præcordiorum anxietate & spirandi angustia. Medici igitur ad provocandum sanguinis profluvium pulverem ex myrrha, flavedine corticum aurantiorum, lapidibus cancrorum, succino & oleo cinnamomi propinarunt, ac præterea sal volatile cornu cervi, in aqua cinnamomi solutum, dederunt. Sed his nihil aliud effectum, quam ut anxietates præcordiorum ingravescerent, urina supprimeretur & alvus dura ac tensa dimitteret plane nihil. Quin post sex dierum pervigilium, oculi fulgidi & facies rubicunda delirium nunciarunt, quod etiam paullo post successit, tanto cum furore, ut ægra e lecto surgens in plateam excurreret, nullumque frigoris sensum experiretur, sed potius in extremis intense caleret, licet hiems tum regnaret algidissima. Accitus hinc alius Medicus, qui venam in pede pertundere iussit, interius dedit in emulsione seminis papaveris albi pulverem ex nitri drachma, camphoræ, theriacæ cælestis ana granis sex, in quatuor doses divisum & exterius temporibus admovit epithema nostrum cephalicum. His ægræ placidus somnus conciliatus, cum sudore largo, ex quo expergefacta, de languore & debilitate maxima est con-

questæ,

queſta, ſudor autem ille per totam hebdomadem manavit, ſub quo ipſi liberali manu potui datum decoctum cornu cervi cum ſucco citri. Sic periculoſum hunc morbum evaſit quidem, ſed remanſit lenta febris poſt puerperium, quæ inordinato victu ſuſtentata & adaucta, tandem degeneravit in hecticam, quæ circa æquinoctium autumnale attulit mortem.

*Epicriſis.*

Peccant communiter Medici, quando lochiorum fluxum imminutum, vel penitus emanentem, calidioribus & pellen-  
tibus urgent, quæ majorem organiſmum ſanguini inducendo, anxietates augment alvumque ſiccant. Tum potius, in exquisi-  
tioris præſertim ſenſus corporibus, antiſpaſmodica & ſanguinis æſtum temperantia nitrum & caſtoreum, ex uſu ſunt, & longe felicius reſtitantem fluxum revocant. In noſtra matu-  
rius mittendus fuiſſet ſanguis, quod præſidium ex optimis in puerperis lochiis deſtitutis, ad præſcindenda pathemata gra-  
viſſima. Neque dubitandum, quod neglecta venæſectione, ſanguis, ob ſpaſmum interiorum, ex urinæ & alvi ſuppreſſio-  
ne cognoscendum, ſit ad caput delatus cum impetu, ibique induxerit phrenitidem, quæ deinde aliis convenientibus auxi-  
liis, venæſectione, nitroſis & internis æque ac externis diſcu-  
tientibus, depulſa, felicem finem naſta per magnum criticum ſudorem. Quod autem remanſerit lenta febris, id non in-  
frequens in puerperis, præſertim inordinato & incongruo victui indulgentibus. Nam naturæ robore per puerperium  
& morbum fracto, ventriculus etiam debilis eſt, ut poſtea ingeſta non rite digerat & comminuat, ſed cruditates gi-  
gnantur multæ novicæ, lentis febribus anſam & cauſam præbentes.

OBSERVATIO III.

Sub initium hujus anni, in febrem nobis aliquamdiu *Phrenitis*  
epidemicam, ſynocham catarrhalem, cum animi deliquio, *ex cali-*  
horrore, æſtu & catarrhis, incidit vir probus & profundæ *dioribus*  
eruditionis, muneri eccleſiaſtico haud ita pridem præſectus. *lethalis.*

Medicus vocatus, ad malignitatem arcendam crebrius exhibuit mixturam simplicem & tincturam bezoardicam, jussit quoque, ut æger in lecto & conclavi calido detineretur ac ipsi nihil aliud potui præberetur, quam infusum calidum herbæ thée. Quinto die apparuere in cute exanthemata. Hinc continuata eadem remedia, additum oleum bezoardicum *Wedelii* & interpositi quoque pulveres nitrosi. Ægrum vero a primo morbi initio affligerunt vigiliæ assiduæ, sitis intensa, corpus sudore diffluit, jactatum anxietate perpetua ac inquietudine, eademque pathemata perstiterunt jugiter, licet purpura esset expulsa firmamque in cute servaret stationem. Nonno die data a Medico ad quietem conciliandam medicina, opii contagium haud obscure prodens; perstiterunt tamen anxietates & corporis jectigationes & æger subinde delirare visus, absurda nonnulla loquutus. Accidit postea, ut, cur nescio, vehementius animo commoveretur æger, quo in furorem per intervalla delirium erupit. Ad quod componendum Medicus alius accersitus undecimo morbi die venam secare jussit, emissis decem circiter unciiis. Inde primum quidem somnus inductus, sed post hunc plane furere coepit æger, ut vix ab aliquot viris in lecto contineri posset, omnia discerneret & domesticos, parentes atque agnatos, diris verbis, quin verberibus exciperet, donec vigesimo primo die mors miseriarum faceret finem.

#### *Epicrisis.*

Pervenit ad nos tristis hæc historia, eo ipso tempore, quo hæc de phrenitide tractatio typis exscribebatur, quam non levibus causis inducti heic inferendam duximus. Luculentum autem præbet exemplum, quomodo ex præpostera medicatione, regimine nimis æstuoso externo & internis calefacientibus, exanthematica alias benignæ indolis materia, malignam & subtilem in intima membranum cerebri penetrantem induere possit naturam, ad delirium atrox, maniaë tantum non æquale, inducendum, præsertim ubi cerebrum

jam



jam tum imbecille. Dictum igitur hoc sibi putent, juniores inprimis Medicinæ Practici, ne unquam in exanthematicis, etiam purpura, calido regimine & calefacientibus pharmacis, suos excipiant, vires pessundent, morbum exasperent & truculenta inducant pathemata. Deinceps venæsectio undecimo morbi die largior, levamen afferre potuit nullum, ut potius, uti subinde observavimus, detrimento fuerit. Nam in principio quidem, si vires adhuc valent & corpus sanguine redundat, tutissimum & efficacissimum præsidium est utique; sed ubi vires ob morbum, vigilias & præposterum calidum regimen calidaque pharmaca exhaustæ sunt; rejicienda largior subtractio, quippe quæ vires longe magis prosternt, ad vincendam morbi causam tamen necessarias. Recte ob id monet *Sydenham in opp.* phreneticis & maniacis, plus interdum succurrendum esse analeptics, quam sanguinis missione. Quod si tamen sanguis in cerebri vasis subsistens ventilationem poscit, satius est, ut eidem proxime per nares procuretur exitus, eo quod ex anatomicis notum est, quod internæ carotidis ramus per os cribriforme, unacum nervo olfactorio, ad pituitariam-narium tunicam fertur. Hinc ego sæpius cum fructu, ad phrenitidem arcendam, stilo in nares provide, sed alte intruso, stillicidium elicere jussi.

#### OBSERVATIO IV.

Virgo tenera & in iram prona, septendecim annorum, *Delirium* a parciore mensium fluxu febrem incurrit pleuriticam, cui *post phre-* accessit phrenitica. Liberata tamen a mortis periculo libe-  
*nitidem* rali narium stillicidio; sed restitit postea mentis alienatio & *sanatum.* phantasia corrupta, ut interdum angore ac moerore afficeretur, interdum furore percieretur, cum crebris *tensivis* artuum tractationibus. Ego in consilium vocatus suasi Selternarum cum lacte potum ad mensem cum balneo aquæ dulcis. Peracta hac cura, pro potu dedi decoctum hordei amygdala-

gdalatum, cum nitro & saccharo conditum, quod largiter bibit. His non modo mens ad constantiam & sanitatem, sed & mensium fluxus in ordinem redactus, ac intra semestri spatium perfectæ reddita est sanitati.

### *Epicrisis.*

Dici vix potest, quam spectatæ virtutis in cerebri & nervorum gravibus affectibus, tam convulsivis, quam cum insania junctis, sit diluentium & humectantium usus. His enim humores fluxiles redduntur, obstructions expediuntur, acres succi diluuntur ac temperantur, spasmus crispatæ fibræ remittuntur & insigne imbecillis partibus adjicitur robur. Quo nomine, ego quidem, inprimis celeberrimum balneum aquæ dulcis & lac, si obtinendum, optime asininum, cum aquis mineralibus temperatioribus, alcalino sale foetis, quales sunt maxime Selteranæ.

### OBSE RVATIO V.

*Phrenitis  
ex ira in  
chronicā  
insaniam  
mutata,  
curata.*

Adolescens quindecim annorum, literarum studia intemperantius tractans, iracundus & cum sodalibus inter perpetua jurgia versans, aliquanto durius a parente verberibus fuerat exceptus & paullo post cibum ceperat. Ex eo male habuit, parum appetiit, minus dormivit, somno insomniis terrificis interturbato, donec post septimum diem in phreneticam pathemata erumperent febrem, cum motibus artuum convulsivis, qui per intervalla gravius affligerunt. In paroxysmo vehementissime vociferabat, maledicta in omnes eruclabat, cædebat & discerpebat obvia. Licet etiam somnum ad aliquot horas caperet, ut videbatur placidum, delirium tamen manebat idem. Comparuerunt postea nonnullæ pustulæ rubicundæ in dorso ac pectore, urinæ secesserunt tenues sine sedimento & pulsus durus semper fuit, celer & inæqualis. In hoc tam gravi morbo, æger præter ptisanam, cum lacte, si rupo rosarum & nitro, bibit nihil, sed largiter, tam salubri effectu, ut gravia symptomata cum febre discederent. Non tamen perfecte mentis morbus sublatus, sed incessit animum odium

odium erga propinquos & præpositos, levi ex causa vehementissime excanduit, ut tremere, fastus fuit insolens & domesticos cibos plane respuit. Hinc datum consilium, ut Schvvalbacenses aquas biberet, per mensem, & postea per quatuordecim dies balneo uteretur ex aquis Schlangenbadensibus, quod etiam tam feliciter cessit, ut sanus, & corpore, & animo, domum rediret. Ut autem integritas hæc servaretur, suavis Medici abstinuit postea a cerevisia gravi lupulata, ac ptisanam ex hordeo cum radice scorzonera loco ordinarii potus bibit, mane etiam usus infuso theiformi cum lacte, cui subinde nitrum inditum.

*Epicrisis.*

Quam noxia post cibum sit ira, ex his uberius patet. Ac uti verum omnino est tritum: ira furor brevis, sic etiam in dispositis ira in febrem facile degenerare potest furibundam. Patet dein quam utilis sit humectantium & diluentium potus, ut recte adhibitus, curationis punctum absolvat fere omne. Porro notandum, ad abigendam insaniam, multum conferre itinera, ob loci, aeris & personarum invisarum mutationem corporisque motum. Multum vero etiam præstat, recte jam notante Hippocrate, ætatis mutatio, ut sponte sæpe, post vigesimum primum ætatis annum, ejusmodi capitis morbi discedant.

CAPVT VI.

DE

FEBRIBVS PNEVMONICIS.

SIVE

PLEVRITIDE ET PERIPNEVMONIA.

THESES PATHOLOGICAE.

§. I.

**P**Neumonica febris est acuta inflammatoria, orta a stasi sanguinis intra sanguifera vascula pulmonum, vel etiam  
(IV.) Hhh venæ febris.

*Descriptio pneumonica febris.*



venæ azygos ramulos in pleura, juncta cum acuta & pungitivo dolore lateris, spirandi difficultate, æstu immodico, pulsu duro & frequenti, tussi sicca, vel etiam humida, quandoque cruenta, periculi nunquam expers.

## §. II.

*Differt  
ratione  
loci in-  
flamma-  
ti.*

Nulla febris inflammatoria est, quæ omnis ætatis, sexus & temperamenti hominibus, in frigidis, æque ac calidis, & temperatis regionibus degentibus, adeo infesta est, & quæ etiam simul plures ob aëris inæqualitatem & intemperiem epidemice corripit, quam quæ in thorace fit, sive in ipsis pulmonibus, sive in musculis intercostalibus, tam internis, quam externis, pleura nervosa interius cinctis. Prout autem inflammatio in thorace partibus insidet diversis, varia non modo accipit nomina, sed & symptomatibus, eventu & curandi ratione, plurimum differt. Veteres quidem, accurata anatomica partium cognitione destituti, subjectum pleuritidis & peripneumonix esse putarunt pleuram, & ob id omnem fere thoracis inflammationem dixerunt pleuritidem. Hippocrates tamen distinctionem jam fecit inter pleuritidem & peripneumoniam. Quo forsan omnes fere prisca & medii ævi, quin superiori adhuc seculo Medici, inducti, ut in peripneumonia pulmones, in pleuritide autem vera hos plane non, sed tantum pleuram cum musculis quos succingit affici, asseruerint. Falsum autem esse hoc assertum & pleuriticum malum omnino etiam in pulmonibus consistere, pluribus & momentosis rationibus docui in *dissertatione de pleuritide & peripneumonia*. Validissimum enim est argumentum ex sectione pleuriticorum, quam Petrus Servius teste VVelschio Dec. I. curat. IV. Romæ in nosodochio ad S. Spiritum, vel in trecentis instituit, & semper lobum pulmonis infectum materiaque repletum conspexit, pleura aut nihil omnino ad sensum vitata, aut leviter tantum quodammodo inquinata. Hinc, mea quidem sententia, ita sedes diversa inflammationis in thorace determinanda, ut si externas tantummodo partes occupet,

emer-

emergat pleuritis spuria, si membranosa pulmonalis substantiæ superficiem, instar erysipelatisprehendat, pleuritis sit vera, & ubi altius in ipsam pulmonum substantiam descendat, gravior sit atque profundior, peripnevmoniam excludat.

## §. III.

Hæ igitur inter se dissidentes inflammationum in thorace *signa* species probe sunt discernendæ a Medico, per notas quasdam *pleuritidis spuria-* essentielles & characteristicas, jam sigillatim commemorandas. In pleuritide quippe spuria dolor est valde acutus & pungitivus lateris, qui etiam tactu augetur, decubitus in latere affecto difficilis, tussis sicca, sine ejectione materiæ pituitosæ, vel cruentæ, dolorem tamen, si valida est, exacerbans. Juncta etiam simul est febris, cum pulsu subduro, depresso & frequente. Causam deinceps ipsi præbet, non tam sanguinis, quam potius seri acris stasis, in sinibus arteriolarum & venularum azygæ connexarum, nec non tubulorum lymphaticorum, in pleura, vel etiam periostio costarum, ubi sensus adhuc est acutior. Hinc nihil aliud quam rheumatismi species, & ob id familiaris illis, qui catarrhis, doloribus rheumaticis, arthriticis obnoxii sunt, vel hemicrania subinde vexantur, præsertim si ex aëre nimis calido in frigidum, vel contra, tempore potissimum vespertino, concedunt. Neque ea propter sanguinis missionem poscit, nisi eminens admodum urgeat plethora, sed sola diaphoresi & auctiori perspirationis successu, mox & facile iterum, circa septimum plerumque diem, solvitur ac periculi expers est.

## §. IV.

Pleuritis vera inflammatio est sanguinea, a stasi sanguinis in vasculis vasorum bronchialium, quæ superiori sæculo *dis vera,* detexit *Rayschius*, & quæ tantummodo nutritioni membranarum, vesicularum & vasorum, pulmonum compagem constituentium, serviunt. Atque adeo principaliter ipsi pulmones sunt affecti, sed quoad partem tantum externam *superficia-*

ficialem. Et hinc est major quam in spuria spirandi angustia, sputum cruentum & quod expectoratione morbus solvatur. Febris etiam juncta ut plurimum, sed magis acuta ac in spuria, adsunt quoque dolores, sed non tam acerbi, nec tactu exacerbandi, in latere affecto. Trahitur enim simul in consensum pleura thoracem investiens, tum quod exterior pulmonalis membrana pleuræ soboles, tum etiam quod in plurimis hominum pulmones in alterutro minimum latere pleuræ annati atque concreti sint.

## §. V.

*Et peripnevmonia.*

In peripnevmonia dolor est magis tensivus, obtusus, preforsius, quam acutus & ad dorsum usque & scapulas propagatur. Sed major spiritus difficultas, anxietas, & ægra expectoratio, qua sputum varii coloris ex imo ducitur. Nam in hac vasa pulmonum ipsa, quæ sanguinis cursum ex uno cordis ventriculo in alterum absolvunt, affecta & sanguine crasso, in solidescendentem naturam abeunte, facta sunt atque obstructa. Quare majori stipatur periculo & facile quos corripit necat, præsertim si senes & tempestitiva sanguinis omittitur ventilatio.

## §. VI.

*Morbi historia ex Aræto.*

Interim licet Veteres minus exacte distinxerint thoracis inflammationes; quia tamen frequentissimus fuit morbus ubi vixerunt prisce illi medicinæ principes, *Trallianus*, *Aræteus*, *Celsus Aurelianus* & reliqui, ex ipsis morbi symptomatum historia accuratior peti potest, quam forsan ex recentioribus. Mihi præ reliquis placuit *Arætei* descriptio, quam lib. I. cap. X. de pleuritico morbo consignavit: *comitatur*, ait, *illum dolor acutus, ad jugula ascendens, ignis acer. Quibusdam vero & in terga & in scapulas dolor protenditur. Sequitur etiam difficilis spiritus, vigilia, ciborum fastidium, malarum rubor, tussis arida, sputa agre exeuntia, puvitosa, aut abunde cruenta, aut subflava. Pejus est si cruentum sputum non adsit, si deli-*  
*rant,*



rant, vel comate occupantur. Scribit porro, ægros intra septimum, vel decimum quartum diem convalescere, aut perire, pro symptomatum vehementia. Vel si ad vigesimum diem malum extendatur, fieri empyicos. Addit etiam, quod hiems maxime ferax sit, secundo autumnus, ver minus, nisi interdum perfrigidum sit, æstas vero minime. Item quod inter ætates senes maxime huic malo obnoxii sint, pueri minime, vel minus eo periclitentur, quia puerilia corpora rara sint, humida & fluxa, multaque in iis difflatio & exhalatio.

§. VII.

Quum autem gravia omnia quæ febrem pnevmonicam *Ad proximam causam* comitantur pathemata, unice fundamentum suum habeant in inflammatione pulmonalis substantiæ; in procinctu est judicium *con-* re: quod omnia, quæ libero sanguinis progressui per minima *currunt* pulmonum vascula, vel canalium a copia crassæ materiæ ob *plures.* structione, vel eorum valida spastica, a materia tenui, acri, constrictione, obicem ponunt, ad ingenerandam inflammatoriam hanc febrem sint aptissima, præsertim quando plures simul causæ, quæ dicuntur antecedentes, procatarcticæ & remotæ, in unum hunc effectum conspirant. Igitur ii, qui ex vi *Crassus & copiosus sanguis.* etu crasso, impuro, potu spirituosio, humidi & motus defectu, sanguinem in venis alunt, & copiosum, & spissum, qui recte *Sydenhamo* aut' *ἰσχυρὸν* dicitur pleuriticus, quam facile, conspirantibus aliis procatarcticis causis, morbum hunc nanciscuntur, tum maxime, quando corpus per intensiorem exercitationem, operosum laborem, balnea item calida, nec non spirituosorum potum, vehementius exæstuatur, & postea frigida septentrionali auræ incautius committitur, aut, quod pejus adhuc, subito potus ingurgitatur perfrigeratus. Prompta etiam eandem ob causam hujus passionis genesis in sanguineis & plethoricis, ommissa tempestiva sanguinis missione. Idem evenit feminis, quibus menses, vel inordinate, vel justo parcius fluunt, vel etiam ob ætatis rationem plane emanent,

nec non viris quibus hæmorrhoidum fluxus non rite obtingit, aut plane suppressus est.

§. IIX.

*Spastica  
naforum  
strictura.*

Deinceps non semel, sed sæpius observavi, tormina, spasmos & colicos, nec non hypochondriacos in abdomine & intestinis dolores, cum alvi vehementiori constrictione, sequutam fuisse inflammationem pulmonum, maxime in plethorico-cacoehymicis. Nam horum ea est natura atque facultas, ut comprimendo vascula, præsertim venosa, liberum sanguinis iter impediant ejusdemque motum inæqualem & majorem præter naturam appulsum ad alias, inprimis superiores partes, efficiant. Quo postea nimio appulsu fit, ut sanguis non modo urgeatur ad tubulos, qui ob minorem diametrum sanguinem ordinario nec vehunt, nec capiunt, sed & in hisce vasorum angustiiis impactus hærens, æquabilem & inoffensum progressum intercipiat & omnes functiones quæ fiunt secundum naturam perturbet. Et quia corpora hæmorrhagijs admodum obnoxia, plerumque sanguineæ sunt complexionis & spasticis in imo ventre stricturis patent; hinc fit, ut juvenes qui largas narium hæmorrhagias, sputum cruentum & hæmorrhoides præmaturas experiuntur, perquam facile, accidentibus occasionalibus causis, in pleuriticis & peripnevmonicis febres incendant. Porro frequenti observatione constat & illud, quod a scabie retropulsa, a præpostere cohibito simplici, vel dysenterico alvi fluxu, a consolidatis antiquis ulceribus, a critico consueto pedum, vel totius corporis sudore suppresso, vel purpura chronica ob frigus externum retrocedente, pectoris abortæ fuerint inflammationes. Illa enim materia acris causticæ indolis, recrementitia, nervosis pulmonum & thoracis & tunicis impacta, ob spasticas quas suscitatur stricturas sanguinis progressui obicem ponit eundemque in æqualitate turbat. Neque etiam rarum est, post variolas & morbillos, præsertim male tractatos, gigni in thorace inflammationem, quum hi morbi nunquam non pulmonibus infesti esse,

esse, ac in iisdem labem & imbecillitatem relinquere soleant.

§. IX.

Præterea quandoque ab extraordinaria & insueta aëris *Epidemi-*  
temporumque constitutione, pleuritides, tam veræ quam spu-*ca est.*  
riæ, populares sunt & epidemicæ. Evenit hoc si hiems diu-  
turna nimis rigida regnavit, item quando longam austrinam  
aëris temperiem & levem atmosphæram, repente frigida &  
borealis, valde elastica aura, excipit. Quod postremum  
quum inprimis vere & autumnò contingere soleat, hinc tum  
febres tam catarrhales, & malignæ & benignæ, quam pleuri-  
ticæ, circumire solent. Post asperam etiam hiemem notavi-  
mus grassantes pleuritides crudas, in quibus vix nono & deci-  
mo die sputum apparet. *Hippocrates morb. lib. II.* vocat siccas  
& in ipsis ægri primis diebus admodum anguntur, viresque  
dolore & inani tussi admodum concidunt, ut procedente spu-  
to, expectorationi vix sufficiant & ægri difficulter convale-  
scant. Endemiæ etiam dantur peripnevmoniæ. Notum *Et ende-*  
quippe est frequentem admodum esse peripnevmoniæ mor-*miæ.*  
bum & plures interficere, in Westphalia, Pomerania, Suecia,  
Dania & Russia. Id quod vero tam propter solennem his in  
regionibus victum durum & crassum, quam propter aërem  
frigidiorum & asperiorum, septentrionalibus locis proprium,  
accidere arbitror.

§. X.

Ego quidem vix in ulla febre tam accurate observavi *Crises*  
crises, quam in pnevmonica, pleuritica scilicet & peripnev-*servat.*  
monica. Nam in juvenibus & qui paulo vegetioris naturæ,  
circa quartum plerumque diem sputum prodit cruentum &  
septimo die morbus sponte sua per sudorem largum solvitur.  
In phlegmaticis & segnioribus, nec non ubi vitium pulmo-  
nibus insidet altius, undecimo, vel etiam decimo quarto die,  
morbi fit solutio, partim sreatu, partim sudore, pulsu facto  
molliori, accedente somno placido & virium incremento.

In



In imperfecta autem crisi criticis diebus etiam apparet sudor, sed non sufficiens, ideoque nec ægrum levat, nec morbum solvit. Et ubi symptomata durant ad vigesimum primum diem, metus est abscessus in pectore periculosi. Bonum igitur indicium, quando expectoratio ex imo pulmonum succedit bene, evehens materiam viscidam, quarto die cruentam, dein flavedine tinctam, interdum etiam purulentam. Et quo expeditior scireatus, eo major sanitatis spes, quo impeditior, eo minor. Laborandum modo, quando morbus expectoratione materiæ copiosæ virulentæ terminatur, ne in fine phthisis, vel hectica accedat. Nunquam autem tuta crebra alvi fluxio, suspecta etiam urina sine sedimento & minus quoque fausti ominis sudor largus, extra dies criticos. Quando tamen undecimo, vel duodecimo die alvi dejectio non nimis copiosa accidit, non adeo pertimescenda, sed purulenta materia quandoque simul ejicitur. Quando etiam circa diem quartum naturæ beneficio narium prodit stillicidium, id non sine notabili contingit euphoria.

## §. XI.

*Recidivæ  
frequen-  
tes.*

Nulla ex inflammationibus tam facile recidivat, ac febris pnevmonica, præsertim quæ paullo profundior fuit cum quodam abscessu. Mihi nota sunt exempla, ubi quidam vix convalescentes, inordinata diætâ, potu inprimis copioso vini meracioris, in eundem morbum, elapso vix mense relapsi, lethali plerumque eventu. Quin novi inflammationem hanc, bis, ter, quater & pluries anno, eodem in loco, ubi primum constiterat, recruidisse. Ut adeo, qui semel hoc affectu tentati, ejusdem repetitum insultum exacta vitæ victusque ratione, semper opus habeant arcere cum cura.

## §. XII.

*Mortis  
causa.*

Qui autem inflammatione pulmonum moriuntur, suffocatione pereunt, quia materiam in vesiculis aëreis & ductibus bronchialibus hærentem tussi amplius ejicere nequeunt. In sectione pulmones inveniuntur inflati, duri, instar hepatis, &

ob vasa sanguine crasso tenaci facta, aquæ injecti fundum petunt. Vidi etiam pulmones abscessibus parvis & tuberculis duris obsessos, cum inflammata & sphacelata pleura, pulmonum substantiæ adhærente. Neque minus nota mihi sunt exempla, ubi polyposæ concretiones, in vena pulmonali, item arteria magna repertæ, obicem posuerunt liberiori sanguinis per pulmones cursui, & inflammationem, ob sanguinem copiosius, quam debebat eo delatum, induxerunt.

### CURATIO.

#### §. I.

Quia igitur sanguis subsistens & æqualem circulum inter-*Indica-*  
cipiens unica proxima hujus morbi causa, palmarium utique in *tiones cu-*  
sanando momentum, ut is expediatur iterum atque discutia-*torie.*  
tur. Ad quod perficiendum, hæ subordinatæ faciunt indica-  
tiones: 1) quando ulterior sanguinis stasis atque stagnatio  
impeditur; 2) quando lentor in sanguine pleuriticorum ob-  
vius diluitur & colliquatur; 3) quando pars affecta, per spa-  
sinum, dolorem & copiosum affluxum rigida mollitur & laxa-  
tur, quo impactus cruor ab appulso sanguine arterioso elua-  
tur ac in motum rursus cieatur; 4) quando excretio materiæ  
viscidæ, sanguinolentæ ac purulentæ, in bronchiis pulmonum  
hærentis, per sreatum facilitatur simulque abscessus & empy-  
ematis generatio præscinditur.

#### §. II.

Ad præcavendum inflammationis incrementum, nihil uti-*Sanguis*  
lius est sanguinis missione, quæ quo citius administratur, eo *mitten-*  
plus auxilii præstat. Secetur vero vena in brachio, & qui-*du.*  
dem illius lateris quod affectum. Mittatur etiam liberalius,  
si plethora eminens & cum impetu exsilit sanguis. Quin ubi  
serum admodum tenax & glutinosum emisso sanguini innatat,  
& respiratio post sectionem adhuc valde difficilis urget, con-  
fidenter iterato subtractio administranda, præsertim si paullo  
profundioris staseos inflammatoriæ suspicio.

(IV.)

Iii

§. III.

## §. III.

*Diluentia  
profunt  
& discu-  
tientia.*

Ex internis quam maxime proficua, quæ sanguinem, ferum ac humores tenues reddunt ac fluxiles, crassos vero ac spissos colliquant blandamque simul movent diaphoresin. Quod ut obtineatur, conducunt hæc: Infusum theiforme, ex herbæ veronicæ, chærefolii, salviæ ana manipulis duobus, radicis liquiritiæ uncia, seminis fœniculi drachmis tribus, de quo frequentius patellæ quatuor vel quinque forbillandæ. Dein mixtura discutiens & diaphoretica, hunc in modum: recipe aquæ cardui benedicti, scabiosæ, florum sambuci, acaciæ ana uncias duas, theriacalis unciam semis, aceti destillati unciam, lapidum cancrorum drachmam, antimonii diaphoretici scrupulos duos, sirupi papaveris rhœdas, vel sirupi croci, ex sacchari dissoluti uncia & extracti croci granis octo parandi, drachmas duas. De qua duo vel tria cochlearia, bihorio quovis, alternatim danda cum pulvere hoc: recipe antimonii diaphoretici, sive cerussæ antimonii, lapidum cancrorum, mandibularum lucii piscis, dentis hippopotami, solutionis oculorum cancri ana drachmam, nitri puri drachmas duas, cinnabaris scrupulum. M. f. pulvis ad drachmæ dimidiæ pondus pro dosi exhibendus. Quando etiam natura paullo segnior & pleuritis epidemia mali moris, pulveri huic adjicienda camphora, quæ potenter resistit inflammationibus & ne latius serpent impedit. Tenendum tamen, dimidium granum pro dosi sufficere & desuper bibendam esse emulsionem ex seminibus quatuor frigidis majoribus, cardui Mariæ & nucleis pinearum, cum decocto hordei & cornu cervi paratam.

## §. IV.

*Spasmus  
laxandus  
& sputum  
secundandum.*

Dolores acutos mulcet & rigidas fibras optime remittit, vesica calida dolenti parti tantum non perpetuo admota, plena decocto emollientium specierum, uti florum sambuci, meliloti, verbasci, chamomillæ, malvæ, liliorum alborum, seminum quatuor carminativorum, croci, ex lacte. Recte enim jam *Areæus lib. I.* in curatione pleuritidis præcipit, ut lateri dolenti



dolenti applicetur vesica calente oleo repleta, modo fatus levis sit, ne pondere dolorem efficiat. Et certe hoc topicum mirifice levantur dolores, respiratio facilitatur simulque materia ad expectorationem preparatur. Ipsam tandem expectorationem egregie promovet linctus: ex olei amygdalarum dulcium uncia dimidia, spermatis ceti drachmis duabus, croci grans decem, sirupi violarum, sacchari canthi ana uncia una cum dimidia. De quo crebrius quicquam deglutendum, vel cum decocto avenæ excorticatæ, aut fero lactis dulci assumendum.

### CAUTELAE ET OBSERVATIONES CLINICAE.

#### §. I.

Potissimum curationis momentum situm est in sanguinis missione, de qua perite *Areteus lib. I. pag. 180.* monet: *circum nulla mora atque dilationis in pleuriticis, quin protinus vana sectio- lenii remedio succurramus, datur occasio, quo primo praeipue nem. die vena secanda est cubiti, & quum mediocriter effluerit, recreandus homo, interjecto temporis spatio, iterum detrahi potest, si bene habeat, sin minus, postridie.* Hæc quippe non tantum in juvenili ætate utilissima, sed & senili, quia hæc plus sanguine abundat, quam alia, magisque crassum ac tenacem in venis alit, qui inflammationes facit profundiores ægre discutien- das, eaque propter hac in ætate etiam, si vires patiuntur, venæsectio potest repeti. Inprimis curandum, ut pro viribus & quantitate sanguinis, nec nimium, nec parcius extrahatur. Quod si enim iusto plus emittitur, non modo expectatio inhibetur, sed & stasis sanguinis dissolvenda obfirmatur magis, vel plane in sphacelum transit. Si autem minus quam par est evocatur, parum juvat, sanguis nato spatio impetuosius affluit & stagnatio cum inflammatione increfcit.

## §. II.

Alvi va-  
cuatio-  
nem.

Deinceps curandum quam maxime in his pnevmonicis febribus, ut alvus aperta & intestina a spasms libera maneat. Suadet id jam *Trallianus l. c.* nec non *Hippocrates lib. III. de morb. §. 17. alvum*, inquit, *in primis quatuor aut quinque diebus subducere oportet, & hoc paullo amplius, quo & febres obusiores sint & dolores leviores.* Nos quidem commendamus hunc in finem clysteres emollientes & paregoricos, domesticos, cum oleo amygdalarum dulcium, quibus & alvus referatur & strictura intestinorum spastica laxatur. Recte etiam *Aretius l. c.* præcipit: *medelam inferioribus partibus adhibendam negligere non oportet, viris quidem in anum, oleum rutacium, mulieribus in uterum, infundendum est.* Quod experimentum etiam locum habere potest, si intestina crassa spasms constricta, vel spasmodica uterina passio mulieres detinet.

## §. III.

Potum.

*Trallianus lib. VI. pag. 269.* majorem in modum in ejusmodi inflammatoriis affectibus commendat, & quidem merito, potus aquoso mulsos. Commendat quoque & laudat cremorem ptisanæ, bene decoctum, largiter sumtum, cum amygdalis incoctum, *neque desinas*, ait, *repidam adhibere, dum cibus & alia poriones exhibentur*, & addit, nullum aliud auxilium pleuriticis ita accommodatum invenies, *etiamsi febris adsuerit vehemens.* Ptisanam suam semper etiam laudat *Hippocrates.* Et certe humida tepide sumta, omnibus præferenda esse, expertus scribo. Ad humores vero diluendos, nil utilius decocto avenaceo, vel hordeaceo, addita decenti quantitate mellis Prussici, nec non sero lactis dulci. Et quo plus humidi, præsertim si corpus valde sudat, assumitur, eo salubrius est.

## §. IV.

Regimen  
& valida  
evacuatio.

Uti in omni febre inflammatoria, sic maxime pnevmonica, abstinendum a regimine nimis calido, quod lectum & con-

conclave, potu etiam nimis calido. Cavendum vero etiam vicissim a refrigeratione & potu frigidò. In medicatione exulent omnia fortiter urinam, sudorem, nec non alvum moventia, ne lymphatici tenues humores, quorum beneficio stasis dissolvenda, aliorum trahantur. Nam de alvina excretionem perite jam monet *Hippocrates lib. III. de morb. multus humor si infra secedit a quinta die mortem inducit. Etenim superna partes resecantur & sputi purgatio sursum non prodit. Oportet igitur & infernam alvum neque valde suppressam esse, ut ne febres sint acutæ, neque valde egerere, quo saliva sursum educi queat & ager viribus valeat.* Quando tamen alvus bis, vel etiam quater sua sponte fertur, minime id est prohibendum.

§. V.

Ad dolores acutos sopiendos commendantur plerum-*Anodyna.* que anodyna & opiata. Sed cavendum ab iis est, præsertim in senili ætate, ubi humorum spissitudo & inflammatio profundior. *Fugito, serio monet Trallianus l. c. diacodium & philonium. Nam maxima pericula inducunt, cum humores educationi contumaces reddunt & vires prosternunt redduntque emortuas.* Ubi vero impensior dolorum atrocitas in ætate juvenili, ultra papaveracea, emulsionem nempe cum semine papaveris ejusdemque sirupo, vel diascordium *Fracastorii*, non facile ascendendum, ita tamen, ut semper ipsis admisceantur nitrosa & diaphoretica. Externe autem ad mulcendos dolores ipsamque discussionem secundandam, præter superius commendata, utilis est fots cum pinguedine caponis calefacta, in cuius uncia, dimidia camphoræ drachma soluta.

§. VI.

Expectorantia & dulcia non nimis cito propinari debent, *Expecto-* primis scilicet diebus, sed tunc demum, quando materia co-*rantia.* cta, viscida, mobilis est & ad excretionem apta; alias major ad pulmones proritur affluxus. Nonnulli etiam sperma ceti in copia assumtum ad sanguinem dissolvendum commendant.



dant. Ego vero, ob nauseam quam parit, plus illud nocuisse, quam profuisse, observavi. Neque etiam hoc tanta dissolutoria facultate pollet, quam acetum cum cancrorum lapidibus.

## §. VII.

*Morbo  
declinan-  
te tenen-  
da.*

Quando die critico, uti sæpius, nisi turbas faciat Medicus, incidit, inflammatio per copiosum sudorem solvitur, quem liberior respiratio, corporis quies & virium incrementum subsequitur, diaphoreticis & diluentibus aliquamdiu adhuc insistendum, sed non tam crebro. Exacta quoque victus habenda ratio, ne plus, quam par est & ventriculus debilis subigere potest, assumatur. Quo morbi reliquæ penitus consumantur & recidiva arceatur.

## ENARRATIONES MORBORVM.

## OBSERVATIO I.

*Peripnev-  
monia  
omissa V.  
S. lethali.*

Juvenis accedens ad annum vigesimum sextum, sanguineo-cholericus, habitus corporis strictioris, ante duos annos singulis fere mensibus sibi applicari curavit cucurbitulas cum scarificatione, postea simul & semel per annum id intermisit. Aliquamdiu nullo notabili incommodo circa pectus fuit affectus, sed Februario mense, hieme tepida, corripitur primum horrore & rigore, corporisque lassitudine, quibus mox accessit dolor in pectore, spirandi angustia, cum prostratione appetitus, virium, calore præternaturali, pulsu celeri, duro & inæquali somnoque inquieto. Adhibita remedia varia interna pneumonica, omissa tamen venæsectione, incassum. Adaucta enim in pectore angustia cum metu suffocationis, expectoratio fuit difficillima, febris facta intensior, facies rubicunda, oculi feroces & assidua vigilia circa diem septimum delirii præbuerunt indicium, quod etiam eodem adhuc die accidit, cum ipsa morte. Aperto post mortem thoracis cavo, in conspectum venerunt pulmones mirum inflati, distenti & tactu duri. Replerunt hi omnem fere cavitatem & firmissi-  
me

me præterea erant adnati diaphragmati, costis & dorsi vertebribus, in utroque latere, ut difficillime cultri acie potuerint separari. Exempti apparuerunt admodum duri instar carnis, vesiculæ quasi carnea crassa rubicunda substantia erant infarctæ, & quum discinderentur, pauca quantitas ichoris putridi sanguinei effluxit, præsentē pure nullo. Lanci impositi gravitatem quinque ponderum exhibuerunt & aquæ injecti semper ad ima descenderunt. Ipsa in aspera arteria spumosa & tenax materia reperta. Arteria & vena polyposis concrectionibus, quæ ex corde & auriculis, quarum columnis & fibris firmiter erant connexæ, exemptæ, plus quam duarum unciarum pondus habuerunt. Cordis ventriculi crasso & nigricante cruore penitus erant conferti, & in pericardio sex minimum cochlearia aquæ, instar carnis loturæ, fluctuaverunt.

*Epicrisis.*

Patet hac ex sectione, in peripnevmonia, non semper adesse pus & materiam, sed potius crassam sanguinis substantiam firmissime poris & tubulis pulmonum impingi, & ita tumorem durum, qui omnium symptomatum succedentium causa est, effici. Innotescit deinceps hoc casu, omissam consuetam sanguinis subtractionem, in corpore plethorico sanguineo-cholerico, gravissimæ tali sanguineæ inflammationi ansam præbere posse & occasionem. Porro admodum probabile, polyposam substantiam ex crassiori sanguinis parte concretam & in pulmonalibus vasis hærentem, multum ad generationem hujus affectus contulisse. Testatur enim *Malpighius de polyp.* peripnevmoniam sæpenumero induci a polyposis concrectionibus in pulmonum vasis hærentibus. Non immerito quidem mirandum, cur, posito hoc sanguinis progressui obice, non perpetua ante peripnevmonia invasionem difficilis fuerit respiratio. Sed vasa, quibus polypi inhærent, ordinario magis ampliantur, ut sanguis nihilominus præterlabi queat. Quamdiu igitur sanguis placide circumagitur, nec

nec quantitate nimis redundat, liber manet ejusdem per hos etiam tubos transitus, nullumque subsequitur incommodum, ut viderim, polypos ad ulnæ usque longitudinem per arteriæ aortæ, item venæ cavæ truncum superiorem & inferiorem fuisse elongatos, sine ullo sanitatis detrimento atque periculo. Verum si sanguinis copia accrescit nimium, tumultuarius violentus in ipso motus exsurgit, præsertim si ab externis constrictis impetuosè ad interna urgetur, congestus circa cor & pulmones cruor, maximeque in tubis quibus inhæret polypolia massa, stagnans & accumulatus, inflammatorios tumores, præsertim in viscere sanguineo, facillime excitare potest. Tum vero quam maxime necessaria sanguinis missio tempestitiva, quo sanguini iterum paretur circuitus, quæ nostro in ægro pessimo consilio omissa.

## OBSERVATIO II.

*Pleuritis**spuria V.**s. sanata.*

Quum synochæ & catarrhales febres sub finem elapsi anni milites nostros prædiciarios epidemica prorsus ratione infestarent, Januario mense etiam plures, præsertim ex iis, qui contagium vitaturi in circumjectas civitates, sub frigido valde & humido aëre hinc discesserunt, corripuit spuria pleuritis. Ex his triginta commissi sunt curæ Medici, amici & auditoris olim mei, qui febre laborarunt valde gravi, cum acuto dolore lateris alterutrius in thorace, tussi sicca, sed intollerandum dolorem concitante & somni defectu. Omnibus is statim sanguinem mittere jussit in brachio, qui in pluribus cuticula glutinosa obductus comparuit. Potui liberaliter dare præcepit decoctum avenaceum tenue, cui incocta salvia. Temperatum in omnibus injunxit regimen, & præterea nil nisi pulveres, ex nitro, antimonio diaphoretico, lapidibusque cancrorum, admixto nonnunquam aceto vini & aliquot unciiis aquæ cardui benedicti, dedit. Et exterius lateri dolenti calida tantum lintea admotæ. Sic morbus solutus fuit largo sudore, septimo, vel etiam undecimo, aut decimo quarto die.

Juve-



Juvenibus nonnullis & quibus non sufficiens sanguinis quantitas subtracta, septimo, vel nono die, nares sanguinem stillarunt cum euphoria, & pulsus per totum morbi decursum magis fuit depressus, quam velox. Quos autem febris longius ad decimum usque quartum diem detinuit, his accidit purpura rubra, quæ vesiculis aquosis albis quasi erat obsita in omni corporis ambitu. Nihil tamen aliud usurpatum, quam pulvis bezoardicus cum nitro, liquor noster anodynus mineralis & decoctum hordei, nec non avenæ excorticatæ, tepide largiter potum. His convalescere omnes, mortuus nullus, excepto unico, qui pleuritide cum petechiali febre fuerat affectus.

*Epirisis.*

Facile in pleuritidem spuriam incidit, quæ vestibis non satis munitus, in aëre frigido & humido, autumno, vel hieme, diu versatur. Nam ego nullum morbum & inflammationem febrem, tam promte ab aëris intemperie, inæqualitate & mutatione generali, observavi, quam quæ in thorace consistit. Notavi quoque, æstate valde sicca & calida, si admodum frigidus & septentrionalis ventus subito excipit, non tantum destillationes catarrhicas, sed & rheumatismos & pleuritides cum sputo cruento vehementesque lateris dolores fuisse frequentes. Nam aër quam maxime & proxime, propter continuam inspirationem, afficit pulmonum viscus intus, & exterius quoque thoraci & costis, quæ tenuioribus musculis, membranis nerveis & vasculis septa sunt allabitur, eaque propter quam facile spasticas crispaturas inferre & liberum humorum circuitum sistere potest. Recte autem Medicus spuria hac pleuritide laborantibus omnibus secari jussit venam, ob crassum & copiosum quæ hieme gignitur sanguinem, quum alias non semper in spuria, si corpus magis serosum, sanguinis missio sit necessaria. Neque etiam in pleuritide notha externe ita accommodata sunt unguenta & linimenta oleosa, vel etiam humida, eo quod perspirationem, qua stagnans humor discutiendus & diffan-

dus, impediunt. Præstat tantum partem affectam in temperato & æquabili calore, sub levi calefacto lectulo, servare, imprimis quum nec omnis cutis, eodem modo ac in arthritide & erysipelate, ferre possit topica. Demum quoque notandum, purpuram rubram vesicularem non esse confundendam cum alba miliari. Illa enim longe benignioris est naturæ, & a sero non tam putrescente & vappido, sed potius acri scorbutico ortum ducit, & ob id, si modeste & perite a Medico excipitur, non tanti est periculi.

## OBSERVATIO III.

*Pleuritis  
vera pur-  
gantis usu  
corrupta.*

Juvenis literarum studiosus, viginti circiter annorum, spongiosus habitu & sanguine plenus, in prima ætate ob id crebrius narium stillicidium expertus, liberatus vix ante aliquot menses a quartana, qua cum per unum & dimidium annum fuerat conflictatus, Martio mense, post multos in victu errores, potum vini minus boni & corporis refrigerationem, incidit in pleuritidem veram, symptomatibus stipatam consuetis. Datum in principio purgans, quod aliquot sedes movit, non sine subsequente imbecillitate. Secta etiam in cubito vena, qua exiit sanguis valde spissus, niger, obductus materia tenaci glutinosa. Nihilominus tam impensa fuit spirandi angustia, ut propter suffocationis metum, nec supinus, nec in dextro latere cubare posset, sed erectus semper sedere necessum haberet. Pulsus simul erat admodum durus, parvus & celer, vigilia continua, perpetua tussis & sputum quodammodo cruentum, cum exquisito pungitivo dolore rejiciebat. Quinto morbi die vocor ego, & statim lateri dolenti admovere jussi vesicam speciebus emollientibus ex lacte coctis plenam. Interius dedi pulverem hunc: recipe lapidum cancrorum, mandibularum lucii piscis præparatarum, antimonii diaphoretici ana drachmam, solutionis oculorum cancri, nitri puri ana drachmam semis, cinnabaris antimonii grana XV. M. f. pulvis, de quo ternis singulis horis dimidia drach-

drachma oblata, interposito potu infusi theiformis. Ter etiam vel quater quotidie porrigere jussi hanc mixturam: recipe aquæ chærefolii, florum sambuci, cardui benedicti ana uncias duas, aceti destillati drachmas sex, lapidum cancrorum drachmam, mandibularum lucii piscis, antimonii diaphoretici, ana drachmam dimidiam, sirupi jujubini drachmas tres. M. Cerevisiæ & frigidum potum interdixi omnem, sed liberaliter præbere jussi infusum herbæ veronicæ, florum sambuci, radicis liquiritiæ & seminis fœniculi, ex aqua. Septimo die supervenit hæmorrhagia narium, sequutus quoque per universum corpus sudor & morbus ex voto solutus. Sanus etiam hinc discessit juvenis, sed audiui, eundem postea fere quotannis eodem malo fuisse affectum ac trigesimo ætatis anno pthhisi tandem extinctum.

*Epicrisis.*

Juvenes sanguinei, qui hæmorrhagiis narium, vel hæmorrhoidum præmaturo fluxui in juventute obnoxii, a thoracis perfrigeratione facile incidunt in pleuritidem sanguineam. In his vero omne præsidium in sanguinis missione tempestiva. Quæ si negligitur, vel non conveniens quantitas emittitur, maxima spirandi ingruit difficultas. Quod ubi accidit, sanguinis e naribus stillicidium sponte obortum egregio est levamini. Quam salutarem crisin etiam in binis pleuriticis gravidis vidi, quæ semel tantum, non vero bis, aut ter, ut in graviditate necessarium, venam sibi pertundi curarant. Deinceps nunquam per totum pleuriticum, & peripnevmonicum morbum tuta sunt, quæ alvum ad dejectiones sollicitant, sed clysteres mox in morbi principio ejusdemque progressu, in fine autem laxantia pectori amica possunt admitti. Quæ autem ego adhibui auxilia, a me incomparabili cum fructu semper fere sunt usurpata, inprimis quum Medicinam facerem ante quadraginta annos in Westphalia, ubi endemiæ pnevmonicæ febres. Inprimis habeo, quod laudem crebriorem & largiorem potum infusi theiformis superius descripti,



five decocti avenacei cum saccharo & nitro conditi. Neque reticendum, me sæpius circa dies criticos pulveribus diaphoretico-nitrosis unum aut alterum camphoræ granum adjunxisse, eodemque effecisse, ut morbus solveretur sudore & subsequeretur expectoratio. Demum nulla inflammatio tam facile & crebro redit, quam pleuritica & peripnevmonica, nec non ipsa pleuritis spuria, certis præsertim temporibus. Hæc enim rheumatismi genus, quod ad aëris vitia facile incidit. Et ubi semel vel iterum pars quædam per ipsum morbum debilitata & pristino robore privata, structura quoque vitarum & canaliculorum vitiata, accedentibus aliis causis, æquabilem & naturalem sanguinis motum turbantibus, perquam facile præternaturales humorum stagnationes in minimis vasculis accidere possunt.

## OBSERVATIO IV.

*Peripnev-  
monia ex  
colica le-  
thalis.*

Illustrissimus Consiliarius, robustus & habitior, bene appetens & duro victui a longo tempore assuetus; interdum cum euphoria hæmorrhoidalem fluxum passus, mense Januario, coelo algidissimo, ex abdominis refrigeratione & esu leguminosorum, colicam incurrit, per diem & noctem graviter affligentem. Quum vero Medicus alvum clausam clystere non molliret, sed potionem carminativam cum calidioribus essentiis propinaret, tertio die accessit ingens respirationis angustia, cum febre, inquietudine & tensivo ac pungente dolore, a pectore ad dorsum usque excurrente. Secabatur igitur vena in brachio, ac non ita multo post decoctum mannatum cum aliquot tartari emetici granis porrigebatur. Inde quidem & intestina & stomachus depleta largiter, sed anxietas & spirandi difficultas facta major. Exhibita postea mixturæ pectorales resolventes, sexto die iterum vena pertusa & septimo denuo datum infusum mannatum. Omnia autem incassum, ut potius morbus inde ingravesceret. Exterius tum admotæ thoraci species carminativæ & pectorales, cum aqua calcis vivæ in cataplasmatibus formam coctæ, pariter

pariter frustra. Tandem potandas suasit Medicus Tönnstedenenses acidulas, quas æger avide per biduum frigide ingessit, donec undecimo morbi die, suffocatione & syncope superveniente, periret.

### *Epicrisis.*

Sæpius observavi, ex solo dolore colico præcedente, quiclysteribus & aliis congruis facile solvi potuisset, ortam fuisse peripnevmoniam, in robustis & crasso sanguine plenis, præsertim senibus. Ob distenta enim a flatibus intestina, sanguis ad cordis & pulmonum vala validius urgetur, ibique collectus & densatus, ægerrimam facit spirationem cum pectoris angustia. Nam quod dolor est in partibus nervosis, id anxietas in corde & pulmonum vasis, a sanguine nimium distentis. Frustranea autem fuit evacuatio per superiora & inferiora, quippe quæ subtrahit humidum sanguinis, genuinam morbi medicinam, coarctatione etiam abdominis sub vomitu, magis fursum ad pectus sanguis est coactus & spiratio difficilior reddita. Potus quoque acidularum frigidus in morbi vigore, caruit ratione omni, ac propter frigus, non potuit non noxam inferre gravem. Fuit autem hic morbi artifex, qui singulari methodo febres petechiales curandi, in *Actis Berolinensibus* inclaruit.

### OBSERVATIO V.

Vir sanguineus, facie floridus, corpore obesus & spongiosus, post aliquot dierum epulas, vino & cibus saginatus, *Empyema* ex pleu-noctu & interdiu, Martio mense, Berolino Mindam Westphalo-*ro-pnevmonia cu-*rum iter facit. Peracto hoc, post aliquot dies nanciscitur *ratum.* pleuropnevmoniam, febre stipatam intensa. Ego vocatus venæsectione repetita & pulveribus antipleuriticis, nitrosis & cinnabarinis, nec non potu infusi theiformis, a periculosis liberavi ipsum symptomatibus. Remansit autem tussis quædam cum lenta febre, virium languore corporisque marcore, respiratione tamen non adeo difficili. Hinc usurpata auxilia varia diætetica & pharmaceutica, sed nihil per octo hebdoma-

dom. des iisdem profectum, & tussis potius cum dolore pectoris gravativo increvit, parum autem rejecit & vesperi lenta quādam gliscere visa febricula. Tandem ex improvise simul & semel, intra tres, vel quatuor horas, ultra mensuram materiæ purulentæ cum impetu quasi ex ore rejecta, respiratio illico facta liberior & febrilis calor remisit. Duravit postea hæc puris exspuitio per mensem, minori tamen copia, ac æger interea bene appetiit atque dormivit, successive etiam per DEI gratiam sanitati redditus, solo lactis cum saccharo roseo cocti potu calido, quotidie ad unam cum dimidia mensuram, interposito usu balsami pectoralis, ex floribus sulphuris, oleo amygdalarum dulcium, spermate ceti, terebinthina Veneta, croco & oleo anisi, nec non pulveris pectoralis, ex lapidibus cancrorum, spermate ceti, saccharo, myrrha, radice liquiritiæ in pulverem redactæ & bolo Armena.

#### *Epicrisis.*

Abscessum pleuritidem & peripneumoniam non sufficienter solutam sequi, passim prisca Medici tradiderunt. Confirmat id quoque experientia, & ego id præsertim observavi in sanguineis, spongiosi & obesi habitus hominibus. In nostro autem memorabile, quod rupto abscessu, pus effluens simul & semel per os exturbatum, quod si in thoracis cavum delabatur, hæcticam facile inducit lethalem, nisi educatur paracathesi, de qua notabile exemplum communicavimus, *in dissertatione de perpetuo succi nutritii ex thorace stillicidio*. Per sanari tamen posse talem in thorace abscessum & amplam in pulmonibus cavitatem, monstrat hæc historia. Non vero prætereundum, ægrum hunc postea sæpius de dolore quodam acuto in latere affecto fuisse conquestum, post paullo fortiorum corporis motum, equitationem, largum vini potum ac nimium acidorum usum.

*Peripneumonia  
gravis sudore soluta.*

#### OBSERVATIO VI.

Juvenis generosus, viginti annorum, sanguineo-phlegmaticus, narium hæmorrhagiis & largis & crebris ab ineunte ætate



tate obnoxius & ante biennium gravem acutum pectoris morbum passus, Februario mense, postquam corpus saltando vehementius exagitasset & mox postea in prandio cerevisiam frigidam bibisset & legumina cum salita carne avidius ingessisset, obscurum quendam in scorbiculo cordis sensit dolorem, sed magnam cephalalgiam, cum pulsu celeri, contracto, sub alvo adstricta. Datus vesperi pulvis temperans, noctem autem duxit insomnem & mane spiratio fuit laboriosa, cum pectoris angore & dolore in sinistro latere, paullo supra costas spurias. Hinc mane vena in brachio pertusa, sanguis evocatus niger, cuticulam glutinosam in superficie gerens, data quoque mixtura discutiens atque resolvens passim descripta. Subtracto sanguine, melius primum habere visus & dolor capitis discessit, postero tamen die & dolor lateris & pectoris angor rediit, quin magis adhuc increvit, cum virium debilitate, somno inquieto, appetitus prostratione, ut æger spem vitæ abjiceret ipse. Ad dolorem igitur mulcendum imposita vesica decocto ex speciebus emollientibus cum lacte plena, alvus quoque stricta clystere emolliente domestico mollita, flatus multos multaque crassa stercora dimisit, ægro inde aliquod levamen percipiente, inprimis quum subinde ex infuso theiformi sorbillaret, & sputum rejiceret crassum fusci coloris. Septimo autem die iterum pejus habuit, corpus jectigavit, spiritus factus angustior & respiratio accisa, invalescente simul febrili calore & accedente mentis turbatione, inprimis quando oculos clauderat. Interpositi hinc mixturæ pulveres nitrosi cum camphora, quibus pectoris quandam sensit liberationem & tantisper appetente nono die sudavit, sputo semper succedente fusco, jam etiam quadantenus flavo. Post nonum diem accessit levior quidam alvi fluxus, ut quotidie ter vel quater dejiceret, primum crassa foetida, postea mucosa & uti dicebant purulenta. Parum tamen levaminis inde sensit, sed debilior potius factus; donec undecimo morbi die ex improvise subito largissimus per universum corpus prodiret

ret sudor & per bihorium manaret, tam salutari eventu, ut æger post illum somno obrueretur alto, expergefactus virium incrementum & respirationem liberiores perciperet, ac postea, sputo & alvi fluxu cum leni madore per aliquot adhuc dies persistente, sensim cum sanitate in gratiam rediret.

*Epicrisis.*

Sic juvenem hunc generosum in ædibus meis commorantem ante annum curavi. Id autem ex casu hoc in practicum usum convertere licet: quod origo peripnevmoniaci mali etiam esse possit ex primis viis, si stomachus flatibus & spasimis detinetur, qui sanguinem nimia copia, ad partes superiores, inprimis thoracem, urgent. Tum quidem, si candide æger delictum confitetur, occasio datur cito præscindendi gravem futurum morbum, si commodis evacuantibus, lenioribus emeticis, laxantibus, aut clysteribus, primæ viæ a sordibus depleantur. Et hoc in casu ratione non destituuntur Practici nonnulli, uti *Rulandus* atque *Hartmannus*, qui in principio inflammationis pulmonum dare præcipiunt vomitorium, quod, si hæc causa non subest, alias nocentissimum. Porro hac etiam ex historia apparet, non fidendum esse istis excretionibus, quæ in acutis pulmonum morbis fiunt per alvum. Sed quæ genuinæ & saluberrimæ crises, succedunt per sudorem largum.

CAPVT VII.

DE

FEBRE HEPATICA.

SIVE

HEPATITIDE.

THESES PATHOLOGICAE.

§. I.

*Hepatitis  
vera rarissima.*

**Q**UO frequentior quam modo exposuimus pulmonum inflammationis; eo rarior hepatis inflammatio vera. Quod & cur

& cur hoc fiat, primus ego ante aliquot annos multis & validis rationibus adstruxi peculiari *dissertatione, de hepatis inflammatione vera rarissima, spuria frequentissima*. Potiora huc redeunt. Inflammatoriæ febres accidunt quam maxime nervosis & sensu acuto præditis partibus, in quibus ille in incongruis tubulis subsistens sanguis, dolorem movet ac spasmum, qui postea universum nervosarum partium systema in consensum pertrahit, exagitat sicque febrem accendit. Sanguinea autem minus exquiliti sensus viscera, non tam ægre ferunt sanguinis stagnationem, sed cedunt impetuosius affluenti, nec dolor supervenit, nec spasmus, atque adeo neque etiam febris. Quia igitur hæc inter eminet inprimis hepar, quod ex paucis arteriis, sed maximam partem venis, portæ & hepaticæ propaginibus, coagmentatur, & propter tunicarum nervosarum absentiam, in magnam molem potest expandi sine acuto dolore; hinc in ipsius substantiam minus cadit inflammatio.

## S. II.

Illæ autem hepatis inflammatio, quam Veteres fuscæ de-  
scribunt, merito externa tantum, superficialis, quasi erysipe-  
lacea & spuria hepatitis, non secus ac pleuritis spuria, censenda, ejusdemque sedes non in ipsa interna hepatis substantia,  
sed potius circa convexam partem, in membranis & ligamentis viscus hoc cingentibus & quibus costis spuris ac diaphragmatis portioni adhæret, constituenda videtur. Sic enim  
*Hippocrates de intern. affect. S. II. hepaticum describit morbum: dolor acutus in hepar incidit & sub ultimas costas, & in claviculam, & sub mammam & suffocatio fortis tenet, & aliquando lividam bilem revomit, & rigor ac febris primis diebus debilior habet, & dum attingitur hepar, dolet & color ipsius sublividus est, & cibi, quos prius comedebat ager, suffocant ipsum & ingesti urunt ac torquent ventrem. Huic conducunt, ubi dolorem habuerit, tum alia, tum reprofactoria eadem apposita, quæ etiam pleuritidi prosunt.* Celsus lib. IV, cap. VII. hæc a-



cuti jecinoris morbi signa esse perhibet: *dextra parte sub præcordiis dolor vehemens est, idemque ad latus dextrum & ad jugulum humerumque partis ejusdem pervenit; nonnumquam manus quoque dextra torpet, horror validus est, bilis evomitur, interdum singultus prope strangulat.* Jam quicumque hæc pathemata curatius expendet, facile perspiciet, illum ab Hippocrate delineatum morbum, non tam in ipso hepate consistere, sed potius ad magnam & paullo profundiorrem erysipelaceam inflammationem partium externarum, thoracem & hepar investientium, esse reterendum, eo quod non modo ultimas costasprehendit, sed & ad humerum, mammam & claviculam sese extendit ac dolor tactu augetur. Cum rigore quoque, febre & vomitu invadit, quæ symptomata inflammatione partium nervosarum solennia. Dolor porro externis mollientibus & fibras laxantibus remittit. Ac respiratio ad suffocationem usque difficilis, a spasmo pleuræ & peritonæi, quæ membranæ diaphragma superne & inferne investiant, idque in consensum trahunt, haud immerito derivanda. Qui autem a Celfo describitur morbus, non etiam in ipso hepatis viscere, sed in externis ipsi adhærentibus membranoso-nervosis partibus consistere videtur, quæ dolore & spasmo affectæ, nervos diaphragmatis intercostales & qui ad ventriculum excurrunt, per consensum simili afficiunt. Hinc recte monet Trallianus lib. IIX. cap. 1. *considerari oportet, num inflammatio ipsi jecori proprie acciderit, an tunicis ipsius & musculis extrinsecus ambientibus.* Quin Avenzoar lib. I. theix. tr. XIII. cap. IV. disertis verbis scribit: *aliquando in panniculo hepatis fit extensio, unde sequitur dolor fortissimus, quasi intolerabilis, & apparet patienti, quod hepar sit, quod doleat.*

## §. III.

*Licet hepaticæ corruptionis, & nigrore cognoscendam, nec non in purulentam & apostematicam interdum abire hepar, testatum faciunt observata in dis-*

*sectione.*

dissectione cadaverum, notata passim a *Foresto lib. XIX. de hep. affect. obs. X. Coitero in obs. anatomico chirurg. M. N. C. Dec. II. obs. II. Capiuvaccio lib. III. cap. XXIII. Bartholino Cent. IV. hist. 18. M. N. C. Cent. III. & IV. obs. CXLIV. Dec. II. Ann. IX.* Sed tenendum omnino, non omnem sphacelationem supponere inflammationem. Nam illa etiam commode fieri potest a quiete & stasi sanguinis in ramis majoribus, & nullas omnino partes in corpore citius & frequentius sphacelo affici aut apostemate, quam pulmones, hepar, lienem, uterum & omentum, observavi. Eadem quoque corruptio ex facili in hæc viscera transire potest, si contigua pars primum eadem fuit infecta, haud secus ac videmus in externis artuum exiguo loco ortam sphacelationem, subito latius serpere & vicinam carnem, quin integrum amplum membrum, manum & pedem, corrumpere atque corrumpere.

## §. IV.

Est igitur inflammatorius ille affectus, qui partes exte-<sup>Hepatici-</sup>nas hepatis contiguas & confines frequentius invadit, & ut-<sup>dis sym-</sup> plurimum cum horrore, frigore, interdum etiam vomitu & <sup>ptomata</sup> febre incipit, ac dein dolore, insomnia, spirandi difficultate, & <sup>cause.</sup> inquietudine & alvi adstrictione stipatur, ac vulgo pro hepatitis inflammatione haberi solet, nihil aliud, quam species febris rheumaticæ, sive rectius erysipelaceæ, quæ fit non tam a decubitu & stasi sanguinis, quam potius feri visceris acrioris, membranas & fibrillas nerveas lancinantis. Propterea eidem quam maxime obnoxii sunt, qui arthriticis & rheumaticis passionibus alias patent, qui potibus spirituosis ac iræ indulgent, quibus lueta sanguinis evacuationes suppressæ, qui in aëre frigido diu versantur, aut plane corpus æstuans eidem incautius committunt, nec non qui diarrhoeam potu largiori spiritus vini cohibuerunt. Quod vero dextrum thoracis latus rheumaticis doloribus longe frequentius afficiatur ac sinistrum, hanc inprimis ob causam fieri arbitror, quia hepar magnum & ponderosum viscus ibi diaphragmati costisque spu-

riis connexum, quod sub vehementiori corporis motu & respiratione citiori, has partes jugi tensione debiliores reddit, eo-que facit, ut humores ibi discurrentes facilius subsistant & etiam in tubulos incongruos urgeantur. Atque hæc etiam subest ratio, quod per lapsum, ictum, aut emplastrum calidius admotum, nec non cucurbitulas, longe facilius dolores & inflammationes inducantur in dextro latere, quam in sinistro & alibi.

## §. V.

*Pleuriti-  
di sæpe  
compli-  
catur.*

Perquam autem notatu digna est observatio practica, quod interdum casus in praxi occurrant, ubi partes membranaceæ, supra & infra costas spurias, gravi dolore tensivo, cum febre, tussi sicca & angustia spirandi afficiuntur, ob irritatam graviter ab acri rheumatico confluxu, non tantum pleuram supra diaphragma, verum etiam peritonæi membranam infra hoc, ut adeo morbus partim pro spuria pleuritide, partim hepatide haberi possit. Multum enim affinitatis bini hi morbi alunt, dum in utroque dolor sæpe ad jugulum & humerum sese extendit, difficultas quoque spirandi adest & tussis sicca, propter consensum non modo diaphragmatis, cui hepar firmiter annexum est cum pleura & peritonæo, sed &

*a qua ra-  
men dif-  
fert.*

nervorum intercostalium, eo excurrentium. Sunt tamen notæ nonnullæ, quibus ambo hi affectus possunt distingui. In pleuritide quippe notha intra veras costas dolor pungitivus & tensivus, cum tussi sicca, febre & doloris sub inspiratione exacerbatione percipitur; in hepatide autem dolor magis sentitur circa spurias costas, qui sese explicat ad cordis usque scrobiculum, cum febre, præcordiorum anxietate & quandoque vomitu atque singultu. In hepatide quoque, secus quam in pleuritide, decubitus in sinistro latere semper est difficilis, quia, ut recte notat *Celius Aurelianus lib. III. cap. IV.* pondere suspensi hepatis adducuntur dextræ partes, membranose scilicet, & propterea fiunt punctiones, ob tractam & tensam membranam cui jecur annexum est & quæ cum diaphragmate colligatur.

## §. VI.



## §. VI.

Neque minus hepatitis merito distinguenda a dolore ar-<sup>Differen-</sup>  
denti & fixo circa scrobiculum cordis versus latus dextrum,<sup>tie ab</sup>  
cum singultu & vomitu sæpe complicato, qui fit a calculo in<sup>aliis dex-</sup>  
ductu cystico, aut cholocho hærente, & propterea aliam<sup>tri late-</sup>  
causam obtinet & aliam sedem, prognosin etiam aliam requi-<sup>ris affe-</sup>  
rit & medicationem. Facile etiam hepatitis permutatur cum<sup>ctionibus,</sup>  
dolore tenfivo hypochondriorum, nec non qui est in muscu-  
lis abdominis, de quo jam monuit *Forestus lib. XIX. sæpe impo-*  
*nit tumor dextri hypochondrii Medico, tanquam sit in jecore affe-*  
*ctus, quum tamen sit in musculis abdominis.* Sed dolor ille  
dextri lateris, in hypochondriacis & hæmorrhoidariis admo-  
dum frequens, consistit in flexura coli, sine febre est, disce-  
dit citius, sæpe repetit, nec symptomatibus febris inflamma-  
toriæ, sed malo hypochondriaco solennibus, stipatur, aliam  
habet causam, medicationem aliam. Et inflammatio muscu-  
lorum abdominis, præsertim transversorum, qui arctissime al-  
ligati sunt peritonæo circa hepatis confinia, sensibus magis est  
obvia & tumor tactui ac visui sese offert, cutis circumjecta ten-  
sa comparet, ut digitis attracta minime sequatur, febris socia-  
ta mitior, nec tussis, nec vomitus adest, plerumque etiam  
fit a violentia externa & contusione, ac nisi mature congruis  
præfidiis succurratur, confines partes afficit, inflammat, in  
abscessum, febrem lentam & hæticam transit.

## §. VII.

Interim hæc frequens hepatitis non adeo terrere debet, <sup>Eventus</sup>  
nec Medicum, nec agrotum, eo quod si medicatio recte in- <sup>bonus.</sup>  
stituitur, non multum alit periculi & raro jugulat, nisi visce-  
ra interna labe sint affecta. Ut plurimum enim morbus intra  
septem, vel undecim dies, finitur largo sudore. Natura  
quippe ipso febrili motu utitur pro Medicina, cujus benefi-  
cio intra certum tempus materia peccans & subsistens atte-  
nuatur, resolvitur ac sensim sensimque discutitur. Hinc qui  
ex inflammationibus convalescunt, hos per febrilem motum

Malum.

rite succedentem evadere, censendum est. Quo sensu merito accipiendus Hippocratis aphorismus 52. Sect. VII. quibuscunque hepar circum circa dolet, iis febris accedens solvit dolorem. Quando autem spuria hæc hepatis inflammatio, Medici, aut ægroti culpa, non tempestive discutitur, sed diutius persistit, dolor permanet, febris accedit lenta, corpus tabescit, vires cum appetitu prosteruntur, os siccum est, urina tenuis alba, abscessus facti præbent indicium, qui tamen non tam in ipsa interiori hepatis compage, quam potius in externis tunicis, ligamentis, peritonæo & subjacentibus musculis consistit, gibbam hepatis partem simul afficit & plerumque funestum facit eventum, testimonio observationum & sectionum anatomico-practicarum.

## MEDENDI METHODVS.

CVM

## CAVTELIS ET OBSERVATIONIBVS

## CLINICIS.

## §. I.

Nature  
ductui in-  
fistendum.

Quam pleuritis & hepatitis multum convenientiæ quoad causam, originem, symptomata & prognosin alant, ac non nisi loco differant; hinc modus sanandi hanc parum discrepat ab illius, quem capite antecedenti exposuimus. Quemadmodum vero Medicus in quovis morbo sanando prudentissime semper procedit, si ductum naturæ, quo morbus sponte solvi solet, comite ratione sana sequitur; ita idem hoc in medicatione hujus passionis quam maxime servandum. Jam quia hepatitis eodem modo ac pleuritis per sudorem, congruo critico tempore, dimidio nempe septimi & septimo ipso die, sponte solvi solet; eidem viæ merito insistendum, & usurpanda primo omnium ea, quæ ad liberiores perspirationem conferunt, vitanda vicissim, quæ cuticularis excretionis successum, diætetica sint, five pharmaceutica, ullo modo remorari

rari & impedire possunt. Quia autem secundum principem illum practicum *Hippocratis* canonem, non cruda, sed concocta movere oportet; hinc principio id agendum, ut serum acre falsum, nervoso-musculosis partibus vasisque minimis impactum, temperetur, diluatur ac resolvatur simulatque viæ ad criticam excretionem sunt præparandæ, iis maxime, quæ fibras rigidas, tensas, spasmo contractas remittunt ac molliunt.

## §. II.

Igitur omnibus modis commendandus potus diluens, *Facienda* decoctum hordei cum passulis, vel etiam citratum, serum lactis dulce, cum pauxillo nitri & saccharo, nec non emulsiones ex decocto hordei, vel cornu cervi, cum amygdalis, quæ liberaliter sumta & temperant & diluunt. Ejusdem dein & adhuc diaphoreticæ virtutis sunt infusa theiformia ex herba veronicæ, cardui benedicti, floribus bellidis atque sambuci, crebrius forbillata. Diaphorein movent simulque temperant pulveres, ex antimonio diaphoretico, præsertim ex regulo parato, lapidibus cancrorum, cornu cervi philosophice præparato, nitro & cinnabari, cum aqua cardui benedicti, cerasorum nigrorum, cinnamomi & florum acaciæ crebrius assumendi. Quibus subinde ad auctiorem perspirationem interponendus ulus liquoris bezoardici, vel nostri, vel Buffiani, cum dupla parte liquoris nostri anodyni mineralis, vel spiritus nitri dulcis. Neque negligenda alvina vacuatio, sed si segnior, clystere emollienti, aut clementi solutivo promovenda. Exterius quoque temperato calido fotu evaporatio & discussio subsistentis humoris secundanda. Quem in finem conducunt decocta ex herbis & floribus emollientibus, cum croco & lacte, vesicæ bubulæ indita & parti dolenti admota, nec non sacculi ex speciebus resolventibus & discutientibus, herba absynthii, cardui benedicti, floribus sambuci, chamomillæ vulgaris & Romanæ, baccis juniperi, semine anisi & carvi confecti, & in vino, aut aceto vini cocti, ac prævia expressione impositi.

## §. III.



## §. III.

*Fugienda.*

Abstinendum vero interius ab omnibus opiatis, narcoticis & sopientibus, nec non a sudoriferis calidioribus, quæ febrem accendere, vigilias intendere & delirium suscitare valent. Exteriorius fugiendum regimen nimis calidum. Neque oleosa & pinguis illinenda, quæ poros cutis obstruunt, neque emplastra saturnina, vel epithemata ex aceto & lithargyrio admovenda, quæ nimis refrigerant & constringunt, neque etiam spirituosa applicanda, quæ fibras rigidiores efficiunt ac dolores intendunt. Ipse adeo decantatus camphoratus & crocatus vini spiritus, cautissime adhibendus, ob exsiccationem nimiam, quam partibus æstu ac incendio jam detentis, infert. Si tamen usurpare placet, fiat id statim in principio, ante intentum febrilem æstum, vel eo valde remittente, & maxime quidem in naturis segnioribus.

## §. IV.

*De Vñe  
tenenda.*

Præterea ad præscindendum inflammationis incrementum admodum utilis & necessaria est, sanguinis missio inter initia, præsertim in manu vel pede lateris affecti instituta. Quantitas autem sanguinis mittendi, nec non repetenda quandoque venæsectio, pro ratione plenitudinis vasorum, consuetudinis, virium, ætatis corporisque habitus, dirigenda & iudicio Medici merito relinquenda, ne in excessu, vel defectu peccetur. Interim si quis hæmorrhoidarius, præstat venam feligere in pede & si plethora urget, postea cubiti venam percutere.

## §. V.

*Sympto-  
matum  
singula-  
rium me-  
dicatio.*

Si spasmus in loco affecto tantæ est vehementiæ, ut etiam ventriculum, duodenum ipsaque biliaria vasa in consensum trahat, & præcordiorum anxietas, vomitio, singultus & alvi adstrictio id prodat, & externis, & internis, opem ferre expedit. Tum ego sæpius non sine fructu alvo infundere iussi enema pure oleosum, parti dolenti & præcordiis admo-  
veré vesicam decocto emolliente plenam & interius crebrius  
dare

dare mixturas diapnoicas & resolventes, quæ aquam cardui benedicti, florum tiliaë, acaciæ, chamomillæ vulgaris, d'ascordium Fracastorii, nitrum & liquorem anodynum mineralem habuerunt. Quod si autem infarctus & obstructio hepatis, ac oriunda inde icteritia, complicantur; ego quidem singularis virtutis deprehendi epithema ex herba cardui benedicti, scordii, absynthii, floribus sambuci, chamomillæ Romanæ & vulgaris, semine levistici ac cymini, in vino coctis, & crebro admotum. Idem hoc epithema egregium quoque in declinatione morbi ad intercipiendum abscessum cum suppuratione. Sed ubi in inflammatione, a causa potissimum violenta & externa, suppurationis, vel etiam abscessus indicium præbet materia purulenta, per urinam, aut alvum secedens, cum febre lenta; ea utique adhibere convenit, quæ ad extinguendum æstum febrilem & suppurationem debite tractandam proficua, de quibus tamen infra pluribus agemus.

ENARRATIONES MORBORVM.

OBSERVATIO I.

Vir sexagenarius, militum præfectus, sanguineo-cholericus, in Bacchi & Veneris castris strenue militans, anno ab-<sup>ex lapsu</sup> hinc post gravem ex caballo lapsum, per aliquot hebdoma-<sup>in absces-</sup> des laboravit ingenti & acuto dolore in dextro hypochondrio, cum febre, spirandi difficultate & alvo adstricta. Cu-<sup>sum desi-</sup> ratus tamen fuit, sed dolor remansit obtusior & conquestus <sup>nens le-</sup> thalis. fere per annum de virium & appetitus languore, nec tamen vini potum, nec veneris exercitium intermisit. Accidit vero ut quum equo gradario veheretur, sensum quendam disruptionis internæ perciperet, quo simul & semel pressorius ille dolor cessavit. In urbem delatus me vocare iussit, magnasque querelas effudit de miro languore, summa spirandi difficultate & præcordiorum constrictione. Ego propius accedens, extrema frigida & frigidum in facie sudorem offendi, pulsum autem arteriarum vix percepi. Suasi igitur ut ægrum,

(IV.)

Mmm

in

in lectum transferrent calidum & animæ Medicum advocarent, meæ enim medicationi non amplius esse locum. Interim secta vena, sed nil fere effluxit, data analeptica interna & externa, sed frustra, & elapsis decem horis, e vivis discessit. Post mortem venter mirum in modum intumuit, ac in umbilicali regione die post disruptus, effluente sanie putrida & tam foeda, ut tota domus cadaverosa mephiti inficeretur.

*Epicrisis.*

Quemadmodum pleuritis vera & levior etiam peripneumonia, si ultra vigesimum diem persistit, facile in empyema, sive abscessum admodum periculosum abit; sic & hepatitis, sive inflammatio musculosarum & membranacearum partium circa hepar, si non discutitur, abscessum formare solet, qui ipsam hepatis substantiam labe inficit atque corrumpit. Testatum id facit casus, quem ego Mindæ Westphalorum observavi & jam enumeravi. Quia autem hanc observationem egregie illustrat, similis a *Foresto* notata lib. XIX. de hepat. affect. non abs re erit, si eandem heic inferam. Vir, habet, annos triginta sex natus, dolore hypochondrii dextri per integrum fere annum confectus, cui lenta accessit febris, tunc confectus & plane consumptus est, tota facies citrina & universum corpus flavum evasit & dolor atrox eum torquebat in dextro hypochondrio, quod durum & valde subtrudum, musculus abdominis plane extenuatus erat, urina tenuis & ignea, oris siccitas, alvus modo adstricta, modo liquida, cibi fastidium, sitis inexhausta. Incisione facta, materia purulenta fetida emanavit, cum tanto fœtore, ut totam domum impleret, ita ut vix quisquam apud agrum in cubiculo persistere posset. Aeger autem paullo post animam efflavit. Cadavere aperto, in tota ventris cavitate reperta est ingens copia puris, peritonæum quoque disruptum & purridum conspiciebatur, hepar durum, ingentis magnitudinis, albicans circa stomachum, sed in gibba sui parte prope costas spurias nigrum, exustum & gangrana infectum. In hepate vero nullum conspiciebatur pus.

Præ-



*Præcipua autem corruptio hepatis erat in parte dextra, versus costas spurias & circa musculos intercostales, qui etiam cum costis spuriis nigredinem contraxerant, instar carbonis & facillime frangi poterant.*

## OBSERVATIO II.

Vir sanguineo-melancholicus, triginta circiter annos *Hepatitis* habens, diu jam vitæ sedentariæ addictus, neque cibus boni *sudore* succi usus, vinis vero dulcioribus semper delectatus, omissa *discussa*. per aliquot annos sueta sanguinis missione, in ingentem per universum corpus languorem incidit & miram quoque expertus est ad iracundiam proclivitatem, ita ut a levissima causa commoveretur & protinus saporem in lingua perciperet amarum. Post mensem correptus est insigni dolore in crure & hypochondrio dextro, tensivo partim, partim gravativo, qui attactu fuit exacerbatus. Accessit cibi fastidium, iniquies, somnus infomniis turbatus, calor præternaturalis, extrema ab aëre frigidiusculo mox refrigerescebant, faciei color sæpius mutabatur, alvus erat quidem fluida, & a pulveribus, quos nitrum parca dosi ingrediebatur, foetida & biliosa multa dimittebat, sed post alvi secessum semper fere dolor acerbior reddebatur, qui etiam sub risu & fortiori inspiratione ingra-vescebat, urina crassa, rubicunda, cum sedimento secedente. Misso primis statim diebus ex mediana largiter sanguine, dabantur diaphoretica, tinctura bezoardica bis quotidie ad triginta guttas cum infuso veronicæ, item pulvis bezoardicus, cum nitro & camphora mixtus, arcanum quoque duplicatum cum nitro & cinnabari, quo sedes proritati & anxietates adauctæ. Septimo die accedente, cutis, antea sicca & arida, madescere primum coepit & postea sudor erupit largissimus, per viginti quatuor horas manans, quo omnia symptomata, respiratio difficilis, anxietas, horror & extremorum refrigeratio discussa, & somnus quoque rediit, ita ut post decimum quartum diem æger lectum relinqueret. Mense autem Augusto idem malum rediit, non quidem cum tanta sym-

Mmm 2

pto-

ptomatum & doloris atrocia, sed diutius ægrum detinuit & lentam febrem reliquit, diæta salubri & congruis remediis post aliquot tempus etiam abactam, ægro perfectam sanitatem recuperante & expirante simul illa ad iracundiam promptitudine.

### *Epicrisis.*

Origo hujus morbi merito a crasso & copioso sanguine repetenda, quem vita sedentaria, victus crassus & crebrior potus vinorum dulcium ingenuit, eaque propter multum simul ad infarctum & obstructionem hepatis contulit. Accessit postea crebrior animi commotio, qua sanguis lentus in minima vascula impulsus, stasin ibi concepit inflammatoriam. Id enim curatam meretur observationem, quod qui hepatis vitio laborant, ad iracundiam admodum sint faciles. Nec prius prava hæc dispositio cessat, quam sublata hepatis labe. Videtur autem hæc inflammatio levior tantum fuisse ac in ligamentis, forsân etiam superficie concavæ hepatis partis, constitisse, ideoque septimo die sudore discussa est largissimo, quod tempus ordinarium criticum inflammationum esse solet, si discussioni adhuc est locus.

### OBSERVATIO III.

*Hepatitis  
sudore  
soluta.*

Ante aliquot annos vocabar ad generosum virum in vicina urbe degentem, sanguineo-cholericum, strictioris habitus & quadragenario jam majorem. Is a quinque diebus lecto fuerat affixus, conquestus de acutissimo lateris dextri sub costis spuriiis, cum maxima præcordiorum constrictione & anxietate, spiritus difficultate summa, febre, vigilia & inquietudine. Medici primum in auxilium vocati, morbum oppido periculosum, quin capitalem fore, propinquis & adstantibus dixerant. Putarant enim hepar ipsum laborare & sphacelosa tantum non corruptione esse infectum, ideoque, præter interna putredini resistentia & analeptica, exterius epithema ex aceto cum lithargyrio cocto, adjecta camphora,

appo.

apposuerant. Ego vero candide ipsis edixi, non adeo perniciosum esse, ut crederent, morbum, sed partes tantum externas hepatis connexas, non hepar ipsum, pati. Removere hinc iussi primum epithema & apponere lateri dolenti, vesicam cum decocto emolliente. Interius præbui pulverem supra descriptum, nec non mixturam, pro potu ptisanam, item emulsionem ex semine cardui Mariæ, melonum, cucurbitæ & papaveris albi, cum aquis diapnoicis & analepticis, nec non infusum theiforme ex herba veronicæ, floribus chamomillæ, summitatibus millefolii & semine fœniculi. Usurpatis his, lenis inador in universo corpore obortus, cum symptomatum levamine, undecimo die sudor manavit largus & alvus quoque, sub dolore stricta & vix clystere soluta, sponte aliquoties deiecit. Atque sic æger ex voto convaluit, adhuc vivens & optime valens. Dedit autem hic casus mihi occasionem scribendi dissertationem academicam, *de hepatis inflammatione vera rarissima spuria frequentissima*, quam epicriticis loco legendam commendo.

## CAPVT IIX.

DE

## FEBRE NEPHRITICA.

## THESES PATHOLOGICAE.

## §. I.

**O**Ritur nephritica febris ex renum inflammatione, juncta cum dolore ardente fixo in lumbis, mictu difficili & aliis pathematibus spasmodicis infimi ventris.

*Descriptio nephritidis.*

## §. II.

Prout autem inflammatio levior est, vel gravior, five profundior, differunt etiam symptomata aliusque morbi est eventus. Scilicet quando extima & propria renum tunica,

Mmm 3

innu-



innumeris capillaribus vasculis, ex emulgentibus renum vas-  
 sis prodeuntibus, perfusa, inflammationem patitur, levior hæc  
 est, superficialis & erysipelatis speciem habet, stipatur tamen  
 dolore ardente fixo, acuto, cum pulsu celeri, duro, siti, mi-  
 ctu ardente, urina tenui, cruda & convenienti medicina, cum  
 regimine leni diaphoretico, citra suppurationem, brevi tem-  
 pore discutitur.

## §. III.

*Gravior*

*in ulcus*

*transiens.*

Quando vero inflammatio profundior, febris etiam ve-  
 hementior, dolor in lumbis ardens diuturnior, mictio diffi-  
 cilior, alvus strictior & præcordiorum anxietas atque angustia  
 major, urina cruda alba secedente. Quod si autem hic dol-  
 or ad decimum quartum usque diem persistit, suppurascere  
 incipit, tumque haud secus ac in aliis inflammationibus in pus  
 mutatis, dolor mitior fit & conquiescit, urina autem prodire  
 solet admodum saturata cum crasso sedimento, quod partim  
 ex purulenta materia, partim muco tartareo conflatum est.  
 Quin sæpe inflammatio tam profunda & inde oriunda exul-  
 ceratio tanta est, ut per plures annos duret, & successive to-  
 tam renum substantiam consumat atque depascat, tandemque  
 macie & febre hectica ægri moriantur, ac post mortem, re-  
 nis loco, nil quam sacculus reperiatur plenus pure. Quod  
 si perrumpit & in cavitatem pelvis delabatur, incredibiles, uti  
 notavimus, facit ante mortem dolores & urinæ retentionem,  
 ob vesicam, ceu partem nervosam & exquisiti sensus ab in-  
 cumbente pure corrosam & vehementi spasmo affectam.

## §. IV.

*Brevi ex*

*spasmo*

*renum.*

Deinceps datur febris nephritica brevis & quandoque  
 tantum diaria, quæ cum horrore, dorsi & partium extrema-  
 rum rigore incipit, postea cum dolore lumborum & dorsi  
 ardente, cardialgica ventriculi & alvi strictura decur-  
 rit & tandem sola diaphoresi & perspiratione aucta, intra  
 XXIV. horas, sæpe solvitur, secedente per urinam sabulo  
 crasso. Frequens hic affectus sanguine plenis, maxime fe-  
 minis

minis post quinquagesimum annum, & a sola refrigeratione dorsi, præsertim lumborum inducitur. Ibi enim renes antè minus integumentis & tantum musculis transversis sunt obtecti, propterea ex facili frigus penetrat & subjacentibus hisce partibus spasticam infert stricturem. Igitur febris hæc magis est a spasmo, quam inflammatione, & ideo facile etiam converso ab interioribus ad exteriora sanguinis motu & perspiratione revocata, iterum dissipatur. Quod vero renes spasticis stricturis pateant, ex eo facile concludendum, quod plexus nervorum ex pari octavo & intercostali, renalis dictus, ipsam renum substantiam ingreditur & non modo vasis sanguiferis, sed & ductibus urinariis, tonum, sensum & motum largitur. Et quia idem hic plexus, per ganglion connectitur cum plexu mesenterico & intestinorum, cum stomachi quoque nervis; hinc est, quod renibus, magis adhuc ureteribus, dolore & spasmo affectis, stricture cardialgicæ etiam in ventriculo & intestinis oboriantur, flatus in stomachum cum ructuum elisione urgeantur & alvus stringatur, quin ob inflatum ventriculum diaphragma prematur & spirandi angustia cum anxia præcordiorum constrictione inducatur. Ne dicam tenues, limpidas & aquosas urinas, quæ sub spasmis minguntur, luculenter testari, quod tubuli illi, qui in renibus liquorem urinosum sequestrant & ad pelvim ducunt, spasmo, seu motu contractili afficiantur.

## §. V.

Aliud febris nephriticæ genus, vehemens & ardentem *Calculosa* tantum non mentiens, oritur a calculo. Hic quidem, quam *gravis*. diu in rene quiescit, nihil incommodi affert; ubi vero loco movetur & transitum per pelvim ac ureteres molitur, spasmos & dolores gravissimos, febrem & supra memorata inducit symptomata, quæ etiam non prius quiescunt, quam in vesicam fuerit delatus. Jungitur autem calculosa hæc nephritis sæpius non modo cum dysuria, sed & nonnunquam periculosa urinæ suppressione. Neque etiam prætereundum, non facile

facile calculosam nephritidem gigni, nisi præcesserit nephritis simplex inflammatoria, vel etiam purulenta, in vasculosa & canaliculosa renum substantia, post quam urina extravasata & stagnans, vel puri commixta, sensim dimittit terreas moleculas, e quarum coalitu tandem succrescunt calculi.

## §. VI.

*Causæ nephritidis.*

Omnis autem nephritica febris & passio, eodem modo ac aliæ febres incipit cum horrore & frigore, quod maxime ex spina dorsali & primis lumborum vertebrae sumit initium, sub quo sanguinis motus convertitur ad interiora ipsumque cor, eoque a copioso sanguine lacescito, systole postea sequitur celerior. Atque adeo facile innotescit ratio, quare renibus & iis, qui ad nephritidem, sive simplicem, sive calculosam, sive spasmodicam, proclives, nihil sit tam infensum, quam frigus hibernum, regnante vento boreali, aspero & rigido, quo improvide admissio, passionis hæc promte vel inducuntur, vel recrudescunt illico. Ad ingenerandas vero nephriticas has passiones & febres disponunt multa, tanto magis quando plura simul concurrunt atque in unum effectum conspirant. Primum inter hæc merito obtinet locum plethora, præsertim in corporibus spongiosis & copiosis exilibus vasis dotatis, item in iis, qui evacuationibus sanguinis spontaneis criticis, vel artificialibus opportuni & assueti, si illæ suppressæ, vel ob ætatis rationem emanserunt, hæc autem aliquamdiu intermissæ. In his expedita mali nephritici genesis, quando conveniunt simul hæreditaria dispositio, vita sedentaria, nimia stomachi repletio, cibi flatulenti, potus crassus non diluens, aut nimis spirituosus, nec non impensior animi moeror. Tanto magis & citius excluditur, quando plethorica ejusmodi crasso & copioso sanguine farcta corpora, vehementi & inconsueto motu, succussante equitatione aut vectura in curru agitantur, vel etiam medicamenta calidiora, urinam moventia, terebinthinata, juniperina, succinata, vel etiam purgantia aloëtica, liberalius assumuntur, quibus san-

guis



guis crassus cum impetu in subtiles & ultimas renum arteriolas urgetur, ibique subsistens, inflammationem efficit.

## §. VII.

Quod autem sinister ren plus tentetur nephriticis passio- *Cur sini-*  
nibus ac dexter, id tribuendum esse videtur tum quod ipse *strum re-*  
non tam bene tectus & a frigore munitus est, ac dexter, qui *nem affi-*  
sub hepate delitescit, tum quod flexura coli ei proxime ad- *ciat.*  
iacet, quæ, uti sæpius quam alibi fit, a flatibus incarceratis  
distenta, renem & vascula ipsius sanguifera comprimit, ut  
difficilior fiat per vasa emulgentia sanguinis circuitus & ab  
hoc dependens urinæ secretio. Atque hinc etiam est, quod,  
qui calculi renalis doloribus obnoxii frequentius, insultum eo-  
rum illico experiantur, si cibos lentos & crassos, aut alia fla-  
tus procreantia assumerint.

## CVRATIO.

CVM

CAVTELLIS ET OBSERVATIONIBVS  
CLINICIS.

## §. I.

Quam Veteres servarint in curanda nephritide medendi *Veterum*  
methodum tradit Hippocrates de intern. affect. pag. 217. si, in- *methodus*  
quiens, urina prodit velut a carnibus bubulis assatis succus, ex *medendi.*  
renibus ulceratis, dolore lumborum & vesica, mox intensiori, &  
qui simul descendit ad imum ventrem, hanc insinuat curam:  
multa calida lavato & reprofactoria ad dolentem maxime locum  
adhibeto & sorbitione utatur e farina cocta, melle affuso, &  
reliquo victu utatur quam maxime per album secedente & vi-  
num bibat album Mendesium, mellei coloris, aut aliud album  
jucundissimum, probe temperatum. Pro temporis opportuni-  
tate serum & lac bibat, serum quidem ad purgationem, lactis  
autem potum faciat in tempore per XLV. dies. Hæc si ita feceris,

(IV.)

Nnn

mor-

*morbum in melius dispones.* Eundem fere curandi modum proponit Celsus lib. IV. cap. X. oportet, ait, ubi renes male habent diu, conquiescere, cubare molliter, solvere alvum, si aliter non respondet, etiam ducere, saepe desidere in aqua calida, neque cibum, neque potionem frigidam assumere, abstinere ab omnibus falsis, acribus, acidis, pomis, liberaliter bibere. Deinde ad dolorem levandum, immo, si renes exulcerati sunt, semina cucumeris, nucleorum pinearum, crocum cum lacte decoctum commendat.

## §. II.

*Congrua  
praesidia.*

Hæc Veterum curandi ratio ita est comparata, ut nephritico morbo admodum sit accommodata ac nil fere in eadem desiderari possit, quum omnia eo conspirent, ut vascula & fibræ tensæ, duræ & a spasmo contractæ relaxentur & molliantur, humores stagnantes crassi diluantur & obstructions solvantur. Nos etiam hanc methodum deprehendimus probatissimam, in eaque perficienda his potissimum usi sumus auxiliis; sero lactis dulci, vel lacte asinino acidulis Selteranis remixto, item prisana cum lacte confusa & potui data, emulsionibus ex amygdalis amaris, nucleis persicorum, semine cucumeris, cucurbitæ cum aquis florum acaciæ, ulmariae, ceraforum nigrorum; pulveribus, ex oculis cancrorum, cornu cervi philosophice præparato, lapide manati & nitro compositis, cum supra dictis, vehiculi loco, sumtis. Infusum quoque herbæ thée, propter blandam suam adstrictionem in omnibus renum affectibus, præservandi & curandi scopo, egregiæ est virtutis & ceu specificum olim maximi semper fuit habitum.

## §. III.

*Levioris  
nephriti-  
dis medi-  
catio.*

Interim quum variæ sint nephriticæ hujus febris species & causæ, diversi etiam gradus; hinc diversimode etiam adornanda erit cura. Itaque in levi illa & diaria sæpe, ex solo frigore & spasmo, renum dolore, nihil aliud agendum, quam ut sacculis lateribusque calefactis, & dorsi, & abdominis re-

gio,

gio, & ipsi quoque pedes, probe foveantur exterius, interius vero infusum thee, aut theiforme ex floribus chamomillæ, summitatibus millefolii, semine fœniculi, successive, sed largiter, corpore simul ad sudorem disposito, bibat & alvus stricta validius expediatur clystere ex lacte, nitro, melle & oleo. Inprimis ad dolores mulcendos & diaphoresin eliciendam spectatæ virtutis liquor noster anodynus mineralis, si tres ipsius partes, cum una liquoris bezoardici *Bussii* parte remisceantur, & bihorio quovis viginti guttæ cum potu calido porrigantur.

#### §. IV.

Quando dolor ardens & fixus in lumbis diutius tenet, *In gravi-* & indicium est, vasa renalia sanguine crasso sarcta esse atque *ori usur-* obstructa, cito solvenda plethora per venæsectionem in pede, *panda.* vel in dispositis ad hæmorrhoidalem fluxum hirudinum appositionem ad anum. Postea interius danda, quæ æstum sanguinis temperant & liberiores humorum circuitum cum diaphoresi procurant, quo nomine emulsiva, demulcentia, diluentia, antispasmodica, pulveres diaphoretici cum cinnabari & nitro, omnibus aliis palmam præripiunt.

#### §. V.

Ubi vero inflammatio in abscessum transit, ex puris mi- *Exulce-* etu & dysuria cognoscendum, medicatio eo dirigenda, ut pus *rata pra-* acre temperetur, abstergetur & etiam fiat consolidatio. Ad *fidia.* hoc perficiendum laudata virtus lactis, vel feri lactis, cum herbis vulnerariis, floribus hyperici, summitatibus millefolii, herba veronicæ, scabiosæ, hederæ terrestris, consolidæ Sarcenicæ & saniculæ decocti. Tum quoque utiles emulsiones ex seminibus quatuor frigidis & amygdalis, quibus adjicienda sufficiens quantitas seminis lycopodii, cujus magna vis est dolorem leniens, exsiccans & consolidans. Sunt etiam qui in renum vitiis multum tribuunt gummi ceraforum in aqua, vel sero lactis soluto & crebrius assumto. In illo etiam renum cum



exulceratione vitio, quod plerumque in iis, qui diutius calculo laborarunt præsto est, ab omnibus acribus, calidis, spirituosus, diureticis & lithontripticis est cavendum, quia novam facile inflammationem, vel etiam mictum cruentum, excitare possunt. Præstantissimi vero tum usus mell Prussicum album, præsertim cum pulvere nucistæ remixtum & loco sacchari in decocto veronicæ sumtum, vel etiam sirupus dialthæa *Fernelii*, qui certe, ceu specificum, in renum labe merito commendari dignus. Præterea malvaticum juniperinum, quod ex vino Malvatico & rob juniperi paratur, in antiquis renum ulceribus, a senibus præsertim, ad aliquot cochlearia, post cibum, fumitur cum fructu.

## §. VI.

*Clysteres  
proficui.*

In nephritide tam inflammatoria, quam calculosa, primum & princeps auxilium in clysteribus demulcentibus ano infusis, qui sine stimulo salino & purgante parandi, ex lacte, fero lactis, vel pura aqua dulci cum floribus sambuci & chamomillæ decocta, adjectis binis vel una tantum uncia sirupi de althæa *Fernelii* & drachma una nitri. Diutius enim enemata debent retineri, quo spasmos laxent & flatibus sic exitum parent.

## §. VII.

*Flatus discutiendi.*

Quum magna sit consensio & communicatio inter renes, colon intestinum ipsumque ventriculum; adeo ut unius vitium facile transeat & communicetur cum altero, atque etiam inflatio coli, circumflexæ potissimum ipsius partis circa sinistrum renem, comprimendo hunc, non modo ad ipsius morbos disponat, sed & eos proritet atque exacerbet, hinc tam ad præservandum, quam mitigandum quod in renibus consistit vitium, operam dare oportet Medicum, ut omnia ex iis, quæ flatus cient, & alvum stringente facultate pollent, evitentur, contra quæ eam lubricam servant, uti oleum amygdalarum dulcium, flatibus etiam discutiendis dicata sunt, usurpen-

pentur, e quibus instar omnium est semen cymini cum saccharo obductum & frequentius deglutitum.

## §. IIX.

Ad externorum usum quod attinet, si ipsa febris cum *Externa* dolore acuto adest, non facile ego suaferim linimenta pingua, *cum di-* neque etiam applicationem spiritus vini camphorati, multo *stinctione* minus balneum, sed fots temperate calidus, cum vesica se- *adhibenda.* mirepleta decocto florum emollientium cum croco ex lacte, longe erit utilior. Si autem febris abest, & labes exulcerationis postea metuenda, vidi emplastrum spermatis ranarum, sumendo uncias ipsius duas, addendo sacchari saturni, camphoræ ana drachmam, olei hyoscyami drachmas duas, dolorem mitigando, eximie profuisse.

## §. IX.

Utut aquarum mineralium usus in omnibus fere renum *Minerali-* vitiis opem spondeat eximiam, sed tamen quum magna sit in *les aquæ* hisce ingredientium diversitas, non omnes promiscue in usum *cum di-* trahere convenit, sed utique selectus habendus. *Carolinæ* *scrimine* *profunt.* thermæ, si in renibus ulcus, propter sal calcarium purgans & diureticum quo pollent minus quadrant, quia nimium abstergendo, cavitatem faciunt majorem. Provide quoque & caute agendum cum acidulis efficacioribus Pyrmontanis & Egranis. Emsenses vero thermæ aquæ & ex acidulis Selteranæ, propter sal tenerum alcali & subtilitatem aquarum, magis conducunt. Semper tamen tutior est & acidularum & thermarum usus, si cum dimidia parte lactis mixtæ, usurpentur. Inprimis præstat ad abstergendas exulceratas renum partes, Selteranam, primum per quatuordecim dies solam, postea adhuc per mensem lacti nuptam caprillo, potare & travmatica, decoctum, sive essentiam, interponere.

## ENARRATIONES MORBORVM.

## OBSERVATIO I.

Serenissima Princeps, sexagenaria ferme, mollioris & *Nephritis* *exulcerata* *san-ta sanata.*  
Nnn 3

sanguineæ texturæ, per aliquot annos nil nisi vinum, ac interdum aquam spirituosam, carminativam, quam vocant, Aquavit, bibens, subinde tamen copiose infulum thee potans, ante aliquot annos, post præcedentem corporis exæstuationem per motum, incidit primum in dolorem dorfi & hypochondrii sinistri, cum horrida refrigeratione, febre, anxietate, inquietudine, strictione alvi, dolore in sinistro rene, fixo, subinde tamen de vehementia remittente, sed versus noctem semper exacerbato, sub quo urinæ tenues & albæ secesserunt. Perseverarunt hæc symptomata usque ad undecimum diem, quo tandem mitior dolor redditus & urina postea valde turbida cum crasso multo sedimento & bruni coloris emissæ. Medicus disciplinæ meæ alumnus, non destitit per morbi decursum idoneis remediis succurrere & potissimum emulsiones demulcentes & refrigerantes, pulveres temperate diaphoreticos & nitrosos, nec non oleum amygdalarum dulcium interne, & externe fomenta ex emollientibus & unguenta ex oleo amygdalarum dulcium cum camphora in usum vocavit. Ad impediendum quoque ulcerationis incrementum & consolidationem promovendam, suavit postea infusa herbarum vulnerariarum, ut alchymillæ, veronicæ, summitatum millefolii, florum hyperici, cum lacte per mensem & longius potanda, ac vere demum consilium dedit, ut acidulas Selteranas, per sex hebdomades, sub debito regimine biberet. Quibus per Dei gratiam perfecte convaluit Serenissima ægra & etiamnum in exoptata vivit incolumitate.

#### *Epicrisis.*

Hæc inflammatio sine dubio ab obstructione vasorum minimorum in renibus fuit suborta, quæ in plethoricis, sicut omnes inflammationes, quam facile fieri potest, quando sanguis per motum, aut calidiora, in extremitates arteriolarum, qui lympham vel succum nutritium vehunt, urgetur & accedit lumborum refrigeratio. Non facile autem talis inflammatio, præsertim si paullo profundior discutitur, sed in

sup-



suppurationem abit, id quod certum requirit tempus. Deinde etiam illud in usum practicum hinc discendum, quod cito suppurationi factæ succurrendum sit blandioribus vulnerariis, ne scirrhum quid, quod longiorem suppurationem sequitur, gignatur & ulcus postea fiat insanabile.

## OBSERVATIO II.

Vir sanguineus, forma venustus, venereus vero & vi-<sup>Nephritis</sup>ni potator, natus e familia nephritidi obnoxia, vigesimo octa-<sup>calculosa</sup>vo atatis suæ anno, febre admodum ardente, cum vehementi dolore in regione lumbari lateris sinistri affectus est, adfuerunt simul cruciatus diri in abdomine, alvus adstricta, ructus crebri, mingendi difficultas & urina exiit pauca, album deponens sedimentum. Medicus consultus febrem ardentem & colicam convulsivam esse putavit, ideoque venam secare iussit & clysteres applicare. Ego vero in auxilium vocatus, quum æger de colore instar palii circa renem sinistrum infixi & spasmodico cruris sinistri contractione conquereretur, quæsi, num olim laborarit calculo? respondit: non, sed ex familia eorum esse, qui calculi cruciatibus obnoxii. Dixi igitur, nephritidem esse calculosam, cum intestinorum doloribus, & exhibui emulsionem ex nucleis persicorum, cerasorum, cucurbitæ, milii solis, papaveris albi, cum aqua graminis, perlarum matre, nitro & sirupo papaveris albi adjecto. Exterius loco dolenti admovere iussi vesicam oleo lili-  
orum alborum & chamomillæ cocto plenam & ternis singulis horis injicere clyσμα ex fero lactis, oleo amygdalarum dulcium, sirupo dialthæa *Fernelii* & nitro. His alvus soluta, ructus molestissimi intercepti & ventris tormina nonnihil sedata, sed calculus gravissimis doloribus descendit in urethres, ad quos tantisper componendos & spasticam crispaturam in uretheribus remittendam dedi liquorem meum anodynum mineralem cum aliquot guttis laudani opiati liquidi, quibus in vesicam dimissus & inde etiam ad urethram delatus calculus,

culus, ob magnitudinem ibi obhærescens ac instrumenti ope eximendus, sub qua operatione meatus urinarius læsus quodammodo, ut dein, ob cicatricem hunc angustantem, per omnem vitam miçtio facta difficilior. Ad præservationem igitur postea suasi primum potum infusi millefolii, dein acidularum Selteranarum cum vino & usum crebriorem pulveris ex magnesia & nitro. Et his jam per aliquot annos a calculi doloribus degit immunis.

### *Epicrisis.*

I. Quoniam doloribus ex calculo non modo febris valde ardens, sed & dolores intestinorum, cum firma alvi obstructione, vomitibus & ructibus junguntur; hinc in nullo morbo diagnosis tam fallax, quam in hoc, præsertim si ægri antea nunquam insultum ipsius experti. Novi calculosam passionem pro ardente febre, pro iliaca passione, pro colica convulsiva, hæmorrhoidali, vel flatulenta, fuisse habitam, donec calculi proventus errorem argueret. Interim licet minus exquisitè cognoscatur causa, in remediis tamen propinandis ea propter non multum errabit artifex, quum in omnibus his, non alia possint usurpari, quam demulcentia, sedativa, fibras rigidas laxantia & spasmos remittentia. Quo magis patet, eandem methodum eademque remedia, pluribus morbis sanandis esse posse accommoda.

II. Febris vehemens inflammatoria ex calculo sine subsequente inflammatione esse potest. Sed causa febris tum potius spasmus, quam obstructio vasculorum ab incarcerationo sanguine; spasmus enim facilius solvitur, quam obstructio discutitur.

III. Ad arcendam calculosam nephritidem nihil utilius infuso vulnerario, antispasmodicæ simul virtutis, cujus generis est ex millefolio. Selterana dein pota aqua abstergit mucum viscidum & prima calculi rudimenta colliquat sensim ac evehit. Alvus autem laxa, ne ex intestinis male afficiatur ren, prohibet, licet eadem neutiquam movenda sit pilulis,

lis, præsertim quæ aloën habent, quibus in sanguineis, præter dolorem calculosum, & colicus, & hæmorrhoidalis, suscitari potest.

### OBSERVATIO III.

Femina quadraginta circiter annorum, sanguine & suc-<sup>Nephritica</sup> cis plena, facie florida, venæsectioni antea assueta fuerat, a male tra-<sup>ata su-</sup> biennio vero omiserat & tamen sedentariam coluerat vitam, <sup>nesta.</sup> plenæ ac vinosæ diætæ indulserat, neque sufficientem uterine purgationem habuerat. Hæc corripiebatur fixo in regione sinistra lumbari dolore, qui per aliquot dies cum virium prostratione, nausea & alvi adstrictione insistebat. Ad hunc leniendum Medicus præbebat pulveres ex antimonio diaphoretico, lapidibus cancrorum & opiato sic dicto laudano, ita ut dosis laudani haberet granum, eoque obtinebat, ut dolor redderetur obtusior, alvus vero magis obstiparetur, urina suppresseretur, spiritus arctius mearet, vigilia esset assidua & præcordia impensius angerentur. Nihilo tamen secius insistebat papaveraceorum usu & emulsionem non modo cum larga seminis papaveris quantitate, sed & pilulas ex diureticis & opio præbebat. Licet autem his dolorem abigere & somnum inducere niteretur, neutrum tamen obtinebat, sed symptomata potius cum spirandi difficultate ingravescebant, abdomen durum reddebatur ac tensum & accedebat quoque febris. Alius igitur in consilium vocabatur Medicus, qui ad alvum expediendam & respirationem facilitandam, exhibebat decoctum ex dulcibus, emollientibus, foliis sennæ sine stipitibus atque rhabarbaro, cui ad sitim extinguendam nonnihil spiritus nitri instillatum. Sed omnia frustra. Ægra enim corripiebatur horrore frequenti cum interiorum ardore, subsequeretur syncope cum levi delirio, quumque Medicus sub his emeticum ex tribus tartari emetici granis daret, operatio nulla sequuta, & duabus ab eo assumpto horis, ægra exspiravit.



*Epicrisis.*

Imprudentissimæ medicationis hoc est exemplum, quæ morbus benignus, in capitalem plane conversus. Expenfis enim probe circumstantiis, facile judicandum, malum hoc a nimia sanguinis redundantia in femina alias vegeta, ejusdemque stagnatione in vasis majoribus circa lumbos, nephritidem faciente, ortum traxisse, omneque damnum tempestiva liberali sanguinis missione & alvi apertione per clysteres, mature potuisse præscindi.

## OBSERVATIO IV.

*Nephritica febris ex calenlo.*

Vir quadragenarius, cholericus-sanguineus, multorum liberorum pater, ac ob mercaturæ negotia, multum in itineribus versans, postquam autumnalem sanguinis missionem justo diutius distulisset & novissime curru noctu & interdium vectus, corporis & succussionem & refrigerationem fuisset passus, domum delatus vespere correptus est horrore, quem excepit æstus & dolor acutissimus in sinistro latere supra ischii os, prope dorsi spinam, cum alvi adstrictione, inquietudine, siti, præcordiorum stricture & ructuum elisione, urina non quidem difficulter, sed alba & tenui secedente. Medicus ordinarius suavitatis clysterum oleosorum usum & potum olei amygdalarum dulcium cum jusculis. Delinita inde tantisper dolorum atrocitas, mane ob alvum strictiorem ac sponte nec flatus, nec stercora dimittentem, tormina quoque & murmura in abdomine, pilulas purgantes cum croco deglutire jussit, quibus non sine prægressis cruciatibus alvus quidem soluta, dolor autem fixus circa renem sinistrum exacerbatus, inquietudo cum calore adaucta, æger assumpta illico revomuit corpusque admodum jectigavit, alvo simul denuo arctissime clausa. Ego in auxilium vocatus, ex dolore fixo in renis regione & subinde ad femur usque excurrente cum aliquali hujus rigore, nephriticam febrem esse conjeci, ac propterea primo omnium sanguinem e vena brachii mittere, dein alvo clysterem paregoricum domesticum cum nitro injicere & interius liquo-

liquorem meum anodynum mineralem, alternatim cum pulvere temperante salino-nitroso præbere iussi, dato simul pro potu decocto avenaceo, nonnunquam cum oleo amygdalarum dulcium, nonnunquam brodium carnis cum citri succo. His æstus restinctus, vomitus compositus, dolor quoque conquievit, per intervalla tamen, vesperi præcipue, recrudit. Hinc locum dolentem unguento dialthæa, populeonis, cum oleo juniperi subinde fovere ac bis quotidie liquorem salino-alkalinum ac nitrosum sumere suasi, quibus etiam effectum, ut post septimum diem alvus sponte solveretur, cutis antea arida maderet, pulsus mollesceret, urina, sub dolore pel lucida, crassa nunc secederet ac sedimentum poneret, ipseque dolor penitus evanesceret. Licet autem tum nec sabulum, nec calculus prodiret, nephriticum tamen morbum fuisse patuit postea, luculentius. Quum enim æger ad vernalem sanguinis missionem sese accingeret & ob id alvum prius purgandi causa decoctum mannatum cum cremore & terra foliata tartari usurparet, inde non modo efficaciter alvus est subducta, sed & post perpeffos vesperi leniores in lumbari regione versus pubem excurrentes dolores, mane cum urinam mitteret ex improvise simul etiam excrevit calculum oblongum, figuræ pyramidalis fere, diametri lentis, basi durum, superius autem friabilem atque porosum.

*Epicrisis.*

Calculus in renum substantia occultatus, paullo majorem & duriorem, febrem inflammatoriam cum acerbis doloribus & spasticis symptomatibus, excitare posse, hæc docet historia. Neque tamen id fit, quod irritando vel distendendo partes nervosas spasmos facit, sed quia comprimendo canaliculosam renum substantiam, obstaculum ponit liberiori sanguinis per eorum compagem progressui, & quando tum sanguis abundans cum vehementia per motum succus-fatorium vehementem in curru aut equo, impetuose ad renes pellitur, nec tamen per venas omnis æque expedite ite-

rum reducitur, gignitur demum inflammatio. Illa enim dorſi ſub vectura aut equitatione ſuccuſſatio, ſanguinem omnino impetuoſius agit ad renes; unde novi, feminas curru vectas ad crebriorem urinæ urgeri miſſionem. Novi etiam validiori hoc motu calculum in renibus quieſcentem, eſſe loco truſum & in uretheres cum dolore tranſlatum. In cura autem ſic excluſæ nephriticæ febris, optimum & præſentiſſimum auxilium in ſanguinis ſubtractione, cujus tamen quantitas merito Medici judicio relinquenda. Neque etiam ego melius novi in plethoricis renum paſſionibus obnoxiis præſervativum, quam venæſectionem tempeſtive & cum judicio inſtitutam. Atque hinc petenda eſt ratio, quod notante dudum *Hippocrate*, ab inflammatoriis ejusmodi febribus, nephriticis, peripnevmonicis & phreneticis, liberi mancant, quibus hæmorrhoides recte fluunt.

## OBSERVATIO V.

**Nephriticus & hæmorrhoidalis dolor cum numeroſo calculorum excretionē.** Illuſtriſſimus Comes, quadraginta circiter annos habens, optimæ & ſanguineæ conſtitutionis, bis quotannis hæmorrhoidum, parciori tamen fluxui obnoxius, in intenſum dorſi & abdominis incidit dōlorem, ut erectus ſtare non poſſet, ſed corpus ſemper incurvare neceſſum haberet. Aderat ſimul creber ad mingendum ſtimulus, & urina ſecedebat parcior. Medicus huc uſque ordinarius anſam hujus doloris eſſe voluit ſanguinem per ani venas exitum molientem & in tunicis inſteſtinalibus ſtagnantem, eaque propter venam in pede aliquoties ſecare juſſit, pulverem antiſpaſmodicum exhibuit & ad proritandum hæmorrhoidum ſtillicidium, crebriorem pilularum ad exemplar Beccherianum paratarum uſum ſuaſit. Sed inde nihil acceſſit levaminis, dolores non modo remanſerunt, ſed & periodice ſæpe cum extremorum frigore & ſubſequentē totius corporis æſtu, præſertim in regione lumbari, recurrerunt. Adiit igitur Carolinas thermas, ibique me in conſilium accivit. Quumque ex ſedimento urinæ mucoſo & quodammodo tartareo conjicerem, illuſtriſſimum ægrum non



non esse liberum a calculo, ut temperatas tantum thermales aquas biberet consilium dedi. Potis his optime habuit, & quod mirandum, post potum plures numero, magnitudinis variæ, lapillos subcinericios, leves, cum urina excrevit, ut numerus eorum intra aliquot hebdomades, vel ad quadringentos accederet. Postea successive pauciores secesserunt ac quadriduo ante finem curæ nullus amplius prodiit. Interim licet sub hoc potu dolores essent mitissimi, in itinere tamen recruderunt acerbiores, nec per annum postea penitus discesserunt, donec usurpatis infusis herbarum vulnerariarum, liquore anodyno minerali & ad roboranda sub doloribus afflicta membra, Toeplicensibus thermis, liberaretur tam a dorsi, quam renum calculosis passionibus.

### *Epicrisis.*

Sanguineæ & forma venustæ personæ, si corpus jam omne nactum augmentum, ex facili patent internis partium inflammationibus, nec non sanguinis evacuationibus, præsertim per sedis venas. Quæ sanguinis excretio, si deficit, haud raro renum inflammatio & calculosa dispositio excipit. Hinc perite *Hippocrates Sect. II. aph. XI.* scribit: nephriticis si hæmorrhoides fluunt bonum. In nostro illustrissimo agro & hæmorrhoidalis intestinorum, & calculi renum dolor fuit conjunctus, quod haud infrequens est. Thermarum autem Carolinarum ea virtus est atque efficacia, ut renes valide expurgent a sabulosis & tartareis fordibus. Sed cautus sit earum usus, si magna in renibus exulceratio, ne irritando eandem augeant majoremque faciant cavitatem. Optimo consilio in nostro agro post thermalis aquæ potum in usum vocata decocta & infusa vulneraria, cum pulveribus nitrosis & liquore anodyno minerali. Renes enim male affecti ad consolidationem optime ferunt lenem adstrictionem. Unde ab auctoribus omnes fere herbæ vulnerariæ, in morbis ex renum vicio, quam maxime celebrantur.

## CAPVT IX.

DE

## INFLAMMATIONE VESICÆ.

## THESES PATHOLOGICÆ.

## §. I.

*Inflam-  
mata ve-  
sicæ pa-  
thogno-  
minica  
signa.*

**V**esicæ compages, ex quatuor tunicis, una a peritonæo, altera musculari, tertia nervosa, cui quarta mucosa seu villosa obducta, si spasmo & inflammatione afficitur, haud secus ac si ventriculi ejusdem texturæ corpus, aut aliæ nervosæ partes eandem patiuntur, & multis & gravibus stipatur symptomatibus, licet auctores medici recentiores paucam & vix ullam hujus passionis injiciant mentionem. Pathognomonica autem & essentialia ipsius signa sunt hæc: dolor acutus, ardens & pressorius in regione pubis, cum febre, perpetuo tenesmo sive desidendi stimulo, & continuo ad mingendum conatu.

## §. II.

*Causa in-  
flamma-  
tionis.*

Inflammationis hujus proxima causa sanguinis vel etiam feri impuri in extremitatibus arteriolarum stasis est, qua sanguifera per vesicæ tunicas discurrentia vasa, a sanguine copiosius congesto nimium replentur, distenduntur & nervosa exquisitissimæ sensationis tunica, in vehementem spasmum abripitur, ex quo reliquorum symptomatum origo.

## §. III.

*Item  
sympto-  
matum.*

Nimirum gravia illa pathemata, quæ inflammationi vesicæ juncta, dolor ardens pressorius, ani constrictio, tenesmus, difficilis & continuo urgens mictus, borborygmi, ventris tormina, summa præcordiorum anxietas, ægra spiratio, inappetentia, mala digestio, vomitus, extremorum frigus, pulsus durus, inæqualis, contractus, celer, inquietudo, quandoque et-

iam

iam convulsio, unice pendent a spasmo in vesica, qui, si vehementior, ob nervorum communionem, non modo rectum, sed & reliqua intestina, ventriculum & diaphragma, immo ipsas cerebri & spinalis medullæ membranas, cum universo nervosarum partium systemate, in similes ipsasticos & constrictorios motus abripit. Quam intima enim stomacho cum vesica intercedat consensio, notavit jam *Celsus lib. VII. cap. XXVII.* ita habens: *non ignoramus, orio vesicæ ulcere, saepe affici stomachum, cui cum vesica quoddam consortium est, ex quo fit, ut neque retineatur cibus, neque, si quis contentus est, concoquatur, neque corpus alatur.*

## §. IV.

Non tamen semper unius ejusdemque est vehementiæ, *Levior est* sed quandoque levior, quandoque gravior. Levior illa seu vel superficialis magis est, spuria quasi & rhevmatica, vel erysipelaceæ species, ac propterea brevi etiam & facilius ipsa febris per diaphoresin tollitur. Oritur etiam non tam a sanguine, sed potius a sero salio, acri, impuro inter vascula & fibrillulas nerveas hærente. Hinc familiaris quam maxime senibus, scorbuticis, arthriticis, rhevmaticis, hemicranicis, purpura scorbutica laborantibus atque cachecticis, tum maxime, quando refrigeratione inferiorum a rigido & boreali aëris statu, perspiratio intercipitur ac inoffensus sanguinis & humorum per minimos tubulos circuitus sistitur. Quæ autem gravior, profundior est, a crasso & impuro sanguine in vesicæ vasis uberius collecto provenit, plethorico-cacochymicos hinc frequentius infestat, atrociora habet symptomata & perquam facile in suppurationem, exulcerationem vel sphacelum funestum plane transit.

## §. V.

Ex iis quæ ad ingenerandam vesicæ inflammationem *Oritur a* conferunt, sunt maxime criticæ sanguinis evacuationes, per suppressis menses, vel hæmorrhoides, deficientes, vel plane suppressæ. *Sanguinis* Magna enim consensio vesicæ & intestini recti, alterutra partium evacuationibus.



te male & spasmo vel inflammatione affecta, propter hæmorrhoidaliam tam interna, quam potissimum externa vasa, e quibus, notante *Vesalio lib. III. cap. IX. de fabrica C. H. pag. 475.* rami, hypogastricæ propagines, ad vesicæ cervicem abeunt, unde etiam suppuratio & exulceratio ex ruptis sanguiferis vasculis in cervice ut plurimum observatur magna. Inprimis in feminis, si, uti haud infrequens, & mensium & hæmorrhoidum fluxum experiuntur, ac ille cessat, nec hic recte succedit, sanguis impetuosè ruit ad vesicæ vasa & gravia symptomata, febrem, ulcerationem, purulentam mictionem, quandoque cruentam, dysuriam & alia plura incommoda adducit.

## §. VI.

*Nec non  
a gonor-  
rhæa male  
tractata.*

Deinceps non raro inflammationem vesicæ infert gonorrhæa, præsertim virulenta, male per adstringentia, vel etiam nimis calida & acria pellentia tractata. Attenta enim observatione constat, gonorrhæam sæpius recurrentem & perversa medicatione exceptam, abire in prostaticum, vesicularum seminalium & ipsius vesicæ ulcus. Prostratæ quippe glandulæ, quæ ut plurimum gonorrhœæ sedes, quando tumore, dolore, inflammatione & suppuratione afficiuntur, facile labem communicant vesicæ collo proxime adjacenti, ut vitium latius serpat, de quo notabilis conferri meretur casus in *Medicin. nostræ consult. tom. V. Dec. I. cas. IIX. pag. 56. sqq.* Tum vero præter fluxum seminis ex urethra involuntarium, urina mingitur, quæ crassum, copiosum, mucilaginosum purulentum sedimentum ad fundum dimittit, quod ab urina separatum & exsiccatum flammæ si injicitur, tetrum foetorem, non secus ac sanguis combustus, spargit.

## §. VII.

*Eventus  
morbi.*

De successu & eventu morbi veritati & experientiæ omnino congruum *Hippocratis* effatum de *prænot.* pag. 464. sic habens: *vesica dura & dolentes penitus quidem horrenda sunt & perniciofa; perniciosissima vero, quæ cum febre continua sunt.* Etenim dolores ab ipsis vesicis ad occidendum sufficiunt,

*& alvi*

& alvi non egerunt hoc tempore, nisi durum quoddam & hoc coactum. Solvit autem urina micta purulenta, qua albam ac levem subsidentiam habet. Si vero neque ab urina quicquam remiserit dolor, neque vesica molliatur & febris continua fuerit, in primis circuitibus morbi, agrum moriturum esse timor est. Quando autem inflammatio non tempestive discutitur, lentius aut citius necat. Qui cito, ex sphacelo pereunt, ac uti testantur observationes anatomico-practicæ, vesica sphacelo affecta, vel vasa ipsius sanguifera varicosa, & nigro cruore farta repériuntur. Tardius autem mors excipit, quando exulceratio succedit, ex mictu purulento cognoscenda, quæ tandem vel hæctico calore necat, vel latius serpens intestinum rectum etiam exedit ac gangrænam inducit funestam.

## §. IIX.

Interim non omnis urina turbida & sub mictu difficili *Urina*  
& ardore excreta, inflammata, aut exulcerata vesicæ est in- *mucida*  
dicium. Id enim haud raro obvium in senibus, scorbuticis & dysu-  
& qui dyscrasia humorum laborant, & accidit sine periculo. *ria non*  
Quandoque etiam solus vesicæ spasmus, ab urina acri, calcu- *semper*  
lo asperiori, aut collectione seri impuri in vasis vesicalibus, *ab in-*  
inductus, insignem mucii quantitatem ex villosa tunica expri- *flamma-*  
mit ac urinæ insinuat. Neque minus vesicæ spasmus & dysu- *ta vesica.*  
ria sæpe comitatur febrem, quæ plerumque est scorbutica &  
exanthematica, cum purpura, vel maculis scorbuticis instar  
petechiarum, nec periculum vacat. Quin aliquoties in pur-  
pura scorbutica affectis observavi, quod impedita materiæ  
purpuraceæ per improvidam refrigerationem excretionem, vel  
hac retropulla, eadem pathemata, spasmus nempe vesicæ ac  
difficilis mictus, accesserint, nullam aliam ob causam, quam  
quod constrictis a frigore tubulis subcutaneis, motus sangui-  
nis & humorum ab exterioribus ad interiora conversus, si-  
mulatque recrementitia & acris illa materia nervosæ vesicæ  
illapsa.

## CVRATIO.

## S. I.

*Spasmus  
vesicæ ex  
sanguine.*

Nulli morbi difficilius curantur, quam qui in vesica consistunt. Est enim nervosa & exquisiti sensus pars, secundum Veterum loquendi morem frigida, & paucò sanguine perfusa, ac urina perpetuo superne affluens consolidationem impedit, præsertim in senibus. Quare vesicæ vitia, uti spasmus, inflammatio, exulceratio, difficilis & dolorosus mictus, facilius arcentur, quam persanantur. Interim quia spasmus vesicæ primam fere causam omnibus quæ ipsam infestant passionibus subministrat, præcipua utique medentis intentio, ut eundem tempestive præscindat & modis declinet cunctis. Sed quum hic spasmus vesicalibus tunicis vel a sanguine uberius ibi congesto, tendente ac premente, vel ab acri impuro sero eo decumbente, inducatur, causæ hæ probe sunt discernendæ in medicatione. Quod si igitur post suppressum mensium vel hæmorrhoidum fluxum, tale vitium imminet, optimum consilium, ut excretionēs hæ vel revocentur, vel sanguis copiose congestus per sanguinis, præsertim in pede, missionem, derivetur, quod auxilii genus, iis inprimis, quibus ani, aut uteri venæ stillare amplius jam cessarunt, proficuum est. Et hoc in casu verum omnino Hippocratis aph. LXXIX, Sect. VII, dictum: urinæ difficultatem & stillicidium solvere venæsectionem.

## S. II.

*Ab humore  
acri  
quibus  
arcentur.*

Quando scorbuticis & iis, qui rheumatismis, arthritide & purpura chronica laborarunt, ulcera antiqua consolidata sunt, aut materia quædam exanthematica retropulsa, senibus quoque ob dyscrasiam sanguinis & humorum impuram, vesicæ passiones imminet, cito remediis diluentibus, acrimoniam temperantibus, blandis diaphoreticis sanguinemque depurantibus est succurrendum. Hunc in finem utilia decocta pro potu ordinario temperantia, ex radice scorzonæræ, chinæ, füsere, foeniculi, item infusa theiformia ex summitatibus millesolij,



lesfolii, floribus malvæ, baccis alkekengi & semine dauci parata, cum dimidia parte lactis mixta & sirupo dialthæa *Fernelii* dulcificata. Neque minus spectata feri lactis dulcis virtus. Quibus si accedit usus emulsionis ex seminibus quatuor frigidis, & pulverum temperantium ex pulvere Marchionis, antimonio diaphoretico, lapidibus cancrorum, matre perlarum, cum nitri tantillo & aliquot guttis olei macis, effectus est exoptatus. Quia tamen puritas humorum multum etiam debita purgamentorum alvi excretionem conservatur, videntum utique, ut hæc præstetur libera, optime alimentis, sin vero minus responderit, mannatis, cum, vel sine rhabarbaro, addito nitro antimoniato, aut clysteribus emollientibus ducenda.

## §. III.

Ubi vero inflammatio cum spasmo jam præsto est, præ-*In inter* jam dicta, commendatissimus est usus liquoris anodyni *flamma-* mineralis, ad drachmam unam, remixti cum granis quinque *tionem &* extracti croci & granis duobus camphoræ. Tum etiam pul-*spasmo* veres diaphoretici ac temperantes, aucta nitri dosi, cum *proficua.* emulsionibus ex seminibus quatuor frigidis sunt porrigendi. Et exterius partem affectam antispasmodicis & leniter discutientibus fovere expedit. Nobis hunc in finem usitata vesica decocto florum emollientium plena, vel loco hujus emplastrum ex emplastri de meliloto uncia, spermatis ceti drachmis tribus, croci, camphoræ ana drachma, nec non oleum anodynum camphoræ, ex olei amygdalarum dulcium uncia, hyoscyami drachmis tribus & camphoræ drachma, pubis & perinæi regioni crebrius illitum. Ubi etiam spasmus solus tenesimum molestum, vel difficilem, dolorosam mictionem efficit, præter balnea aquæ dulcis, omnia alia auxilia virtute superant vapores ex decocto florum meliloti, sambuci, chamomillæ officinalis, malvæ, summitatum millefolii cum lacte, in perforata sella ad laborantes pares admissi.

CAVELAE ET OBSERVATIONES  
CLINICAE.

## §. I.

Minera-  
les aque  
utilissi-  
ma.

In vesicæ vitiis inveteratis, quæ cachecticis, hypochondriacis, scorbuticis, senibus & hæmorrhoidariis, nunquam non sunt frequentia, ad incrementum eorum præscindendum, per longum usum efficacius deprehendi nihil, quam peritum aquarum mineralium usum. Celebres jam pridem hoc nomine Spadanæ aquæ, de quibus sic disertis verbis scribit *Henricus ab Heer in Spadacren. hæc fontis Spadani, propria ac singularis facultas, ut vesicæ renumque dolores sopiat ac leniat, morbos vero harum partium persanet, ventriculum debilem roboret & ciborum languentem appetentiam excitet.* Quin idem gravis auctor suadet, ut, si renum & vesicæ vitiis affecti liberi ab iis vivere velint, per totum annum hanc medicatam aquam bibant. Neque minus *Tulpius lib. II. cap. LIII.* testis est fide dignus, deploratum vesicæ ulcus, omnibus parum aut nihil proficientibus, continuo aquæ Spadanæ usu, tam feliciter fuisse debellatum, ut summe obstupuerint, quibus id visum certam habere desperationem. Ego vero habeo, quod maxime laudem usum Selteranarum, quarum saluberrima ingredientia penitus inspexi, quarumque virtutem in omni interna pulmonum, renum & vesicæ labe exemplis habeo confirmatam fere innumeris. Hinc suadeo, ut vere semper & autumno, per mensem & longius bibantur, vel quod melius inter cibum potus ordinarii loco, cum quarta vini Mosellani parte remixtæ, potentur.

## §. II.

Lac cum  
aqua  
prodest.

Lacticinia quidem per se renum ac vesicæ læsionibus & morbis minus accommoda. Sed si lac ipsum, præsertim asininum, cum Selterana aqua bibitur, vel quod melius adhuc, acidulæ hæ, ad abstergendam eo melius saniosam & mucosam materiam, per aliquot hebdomades primum solæ, ac postea vel

vel solum lac, vel medicatæ huic aquæ confusum, usurpantur, magis quam ullum aliud remedium prodesse, expertus scribo.

## §. III.

Licet sanguinis missio utilissima sit, tam ad arcenda, quam *V. S. cum* per sananda vesicæ ex sanguinis congestione vitia; multum tamen nocet frequens ipsius administratio, ubi humorum magis impuritas, quam abundantia in vitio est, ac ubi materia acris purpurea altius sanguini est insinuata. Nam subtrahendo nimium sanguine, motus ipsius ad corporis ambitum elanguescit, perspiratio simul imminuitur & morbi causa magis obfirmatur, licet in principio doloris lenimentum inde accedere videatur.

## §. IV.

Vini potum *Hippocrates l. superius c.* in urinæ difficultati bus commendat; merito tamen tenendum, quod nullum aliud ex usu sit, quam dulce, Malvaticum, Hispanicum, vel etiam Hungaricum, quod moderate & medice potum, tam ad roborandum stomachum, quam ad vires refocillandas, aptissime conducit, nisi febris & calor prohibeant. Illa vero vina quæ multum acidi tartarei in sinu sovent, ut Rhenana, item nostratia austera, penitus merito sunt rejicienda.

## §. V.

Quum omne frigidum nervis nervosisque partibus sit inimicissimum, calidum vero amicissimum; hinc in nervosæ vesicæ passionibus summa cum cura etiam vitanda refrigeratio, præsertim inferiorum, frigidus potus ac, præsertim in senili ætate, remedia nimium refrigerantia, acida & nitrosa. Vi-  
cissim quæ corpus, abdomen inprimis & pedes, a frigore defendunt ac in perspiratione servant, ut motus corporis moderatus, potus infusi theiformis, potio calida, item pediluvia & balnea aquæ dulcis, optimum doloris procurant lenimentum. Atque etiam hanc ob causam e re est, ut aquæ medicatæ



ipsæ, tam solæ, quam lacti nuptæ, tepidæ potius, quam frigidæ, bibantur.

## ENARRATIONES MORBORVM.

### OBSERVATIO I.

*Dolor vesicæ ex sanguine stagnante.*

Vir quadraginta annorum, vitæ sedentariæ ob intemperantiam studiorum addictus, intolerabili cruciatu & tormento circa pubis & perinæi regionem cum magna difficultate reddendi urinam diu sæpe per intervalla afflictus fuit, & propter dolorum atrociam, inquietudinem, anxietatem, vigiliam viriumque defectionem, cum extremorum tremore ac frigore, tam misere decubuit, ut ad desperationem quandoque redactus, cultro filum vitæ abrumperere voluerit. Affligebat hæc miseria interdum per aliquot hebdomades, postea sensim paulatimque remittebat, ut officio suo fungi posset, urina plerumque pauca & turbida profluebat, crassum sedimentum deponens. Et quum per sex fere annos hoc malo exagitatus esset, viribus tandem penitus consumptis, quadragesimo ætatis anno obiit. Omnes, quos per totam civitatem in auxilium vocarat, Medici, & calculum, & vesicæ exulcerationem, hujus miseræ affectionis causam judicarunt; sed aliud longe partis affectæ post mortem scrutinium docuit, vesica quippe integra, sine exulceratione, inventa fuit, nec vestigium sabuli aut calculi in ea repertum, ipsum vero vesicæ corpus longe crassius & densius, copiosis & valde distentis vasis sanguiferis, quorum nonnulla calamum scriptorium crassitie æquabant, oblitum. Ut adeo omnium horum cruciatuum nulla alia fuerit causa, quam insolita illa stagnatio & incarceration sanguinis in vasis vesicæ.

*Epicrisis.*

Hæc historia luculenter docet, spasmodum vesicæ urinariæ vehementiorem, tantum valere, ut universum nervosarum partium systema in consortium trahere & œconomiam omnium

um corporis functionum perturbare queat. Dein patescit: difficilem cum ardore & stillicidio mictum, urinam quoque glutinosam, juxta *Hippocratem* furfuraceam, non semper exulcerationem, vel calculum intus latentem prodere, sed a sola spastica contractione vesicæ oboriri posse, qua tunica interior mucosa fortiter compressa mucosum liquidum copiose in cavitate vesicæ eructat, quod urinæ immixtum, postea cum ipsa excernitur, eodem modo ac notum est, dolorificum illud spasmus, qui sæpe fit in extremitate intestini recti exquisiti sensus, ita comprimere tunicam cum vasis suis villosam, ut insignis copia muci albi, instar albuminis ovi, cum tenesmo dimittatur, quod vulgo vocant hæmorrhoides albas. Vesicæ autem spasmī causa non tam est in cavitate vesicæ, quam potius intra ejus substantiam. Nam, sicuti a mensium vel hæmorrhoidum fluxu sufflaminato, sanguis regurgitans ad vasa ventriculi & intestinorum, & intra eorum tunicas sentientes stagnans, distractione & compressione, vehementia tormenta, anxietates, dolores, convulsiones & spasmos concitat, ita etiam, quando vel ex vitio & emanatione fluxus hæmorrhoidalis, vel aliis ex causis, sanguis ad vesicæ corpus magna copia delatus ibi stagnat, non mirum est, quod in nervosa ipsius compage spasmos, & quæ ab iis proficiuntur symptomata, producat.

## OBSERVATIO II.

Vir quadraginta annorum, sanguineo-cholericus, ex vi-<sup>Ex bæ-</sup> tæ genere valde inquieto transiens ad quietum & sedentarium, <sup>morrhoi-</sup> experitur brevi post hæmorrhoidalem fluxum, quem præpo-<sup>dibus sup-</sup> tere remediis adhibitis suppressi curavit. Sequuta hinc <sup>pressis le-</sup> mictio cruenta, singulis fere mensibus rediens, qua cessan-<sup>thalis ve-</sup> te, anxietates præcordiorum, dolores lumborum, borbory-<sup>sica in-</sup> gmi ventris, prava digestio & inappetentia oborta. Ad tol-<sup>flamma-</sup> lenda hæc mala variis usus quidem remediis thermis, lactis cura, sed non cum debito regimine. Accessit hinc postea funesta vesicæ inflammatio, cognoscenda satis ex magno ardore,

dore, dolore in regione pubis, mictu difficili & dolorifico, febre, præcordiorum anxietate & delirio, ac post mortem vesica inflammata & sphacelata inventa fuit.

*Epicrisis.*

Hæmorrhoidalis fluxus interdum transit in mictionem cruentam, criticam quoque, quæ nullo modo cohibenda, nisi rursus provocentur hæmorrhoides, alias gravissima subsequuntur spasmodica pathemata non modo, sed & ipsa vesica tandem inflammatione gravi cum febre afficitur, quæ facile abit in sphacelum. Nam qui morbis vesicæ moriuntur, ii plerumque pereunt sphacelo, qui etiam intestinum rectum sæpe afficit, ut hæmorrhoidalia vasa sanguine nigro infarcta cum penis livore compareant.

OBSERVATIO III.

*Vesica inflammatio a materia acriter lethalis.*

Summus hujus urbis Theologus, vita sedentaria perpetuaque mentis per ardua multa negotia fatigatione usus, a purpura intus delitescente scorbutica in gravem primum per intervalla dysuriam incidit. juncta simul paralyfi spuria dextræ manus, quæ, quamdiu perstitit, remissior fuit dysuria, illa vero evanescente, atrocior vesicæ spasmus & dolor, cum assiduo urinam mittendi stimulo, illico rediit. Tandem cum sanitate quidem in gratiam redire videbatur, sed quum forte languidum adhuc corpus auræ frigidiori exposuisset, rediere intoleranda mictus tormina, quæ vesicæ inflammatio, ex parte exulceratio febrisque acuta exanthematica exceperunt, funesto proh! eventu.

*Epicrisis.*

Inflammatio vesicæ, a sero salso impuro & corrupto, vesicæ tunicis nerveis firmitus inhærescente eosque lancinante, quandoque subnascitur. Vidi non ita pridem in sene octogenario, qui per aliquot annos summa difficultate mittendi cum dolore urinam laborarat, ac demum, frustra adhibita omni efficacissima medicina, in pede nactus est erysipelas, quod



quod reliquit ulcus, ichorem saniosum sat copiose quotidie fundens; tam salubri effectū, ut ex eo, & dysuria, & dolor in pube, omnis evanuerit. *Dravvitzius* quoque qui ante seculum jam omnium fere optime germanico idiomate de scorbutico integrum scripsit tractatum, in eo pagina 350. & seqq. plures affert observationes & casus agrorum, qui de doloribus sævis sub urinæ emissionē conquesti, quorum causa non vesicæ labe ulla, aut calculus fuit, sed humor tantum impurus scorbuticus. Memorabilis maxime casus, quem consignavit de lanione, qui, quum nunquam antea ex calculo laborasset, subito atroces in pedibus perferens dolores, qui hinc depulsi, urethram invaserunt, cum intenso ardore & difficultate guttatim vix mingendi, applicatis tamen discutientibus cessarunt quidem, sed ad pedes redierunt, consequente eorum tumore.

## OBSERVATIO IV.

Fœmina quadraginta circiter annorum, sanguineæ constitutionis, vitæ sensili nimium indulgens, venæsectioni alias fuerat assueta, sed per biennium eam omiserat, quo factum, ut obstructis mensibus, in summos dolores circa pubis regionem incideret, cum impensis præcordiorum anxietatibus, fortis alvi adstrictione, appetitus viriumque destructione. Sedatis quodammodo ab imperito medico per opiata doloribus, mox incidit in syncopen & majores ac vehementiores circa præcordia urserunt anxietates, subsequutum delirium & mors. Inspecto post mortem corpore, & vesicam & uterum inflammatio ac sphacelus occuparant, ceteris omnibus partibus sanis.

*Epicrisis.*

Instar axiomatis practici hoc loco notari velim: in inflammationibus nervosarum & membranacearum partium, ut in phrenitide, pleuritide, hepatitide, item inflammatione ventriculi, intestinorum & vesicæ, nil perniciosius esse & quod tam facile ad mortem perducere queat opiato remedio inter-

(IV.)

nō. Stuporem enim hisce partibus facile inducit & in minimis vasculis motum & progressum sanguinis penitus sistit, ut sphacelus ac mors inducatur. Quare cautissime cum ejusmodi remediis etiam exterius applicatis, hisce in morbis agendum esse moneo ac inculco serio, compluribus lethiferis exemplis hanc observationem confirmantibus. Conferunt potius, præter idonea diluentia, discutientia, blanda anodyna cum diaphoreticis mixta, inter quæ liquorem nostrum anodynum mineralem, cum spiritu Bussii mixtum, & reiteratis vicibus, parca tamen dosi, exhibitum, cum blando regimine diapnoico, non satis laudare possum, si prius plethoræ, quando adest, tempestitiva sanguinis missione rite fuit prospectum.

## CAPVT X.

DE

INFLAMMATIONE ET FEBRE  
UTERINA.

## THESES PATHOLOGICAE.

## §. I.

*Uteri  
morboſa  
diſpoſitio  
& con-  
ſenſio.*

**P**Eculiaris uteri fabrica & structura, mira scilicet fibrarum totius substantiæ elasticitas, vasorum sanguiferorum copia eorumque tortuosus & serpentinus flexus, glandulosa & nervosa textura, nec non colli & maxime orificii interni exquisitus sensus, faciunt, ut multis & variis morbis, maximeque etiam acutis & periculosis inflammationibus, oriundis inde abscessibus & mali moris ulcerationibus, pateat hoc viscus. Quin, quia non tam ob nervorum communionem & sensibilitatem, quam potius sanguinis progressum in fibrosa & vasculosa uteri compage interceptum, ipsius in omnibus reliquis corporis partibus motus turbatur atque pervertitur; hinc magna etiam uteri cum nobilissimis corporis partibus, capite, pectore,

pectore, præcordiis, ventriculo & omni nervorum systemate est consensio, & ipso gravato, aut inflammato, sæva in propinquis & remotis partibus accidunt pathemata.

## §. II.

Ex his quæ in uterum cadunt passionibus frequens admo-<sup>inflam-</sup>  
dum est ipsius inflammatio, cognoscenda ex ardore & do-<sup>mationis</sup>  
lore fixo in inguine, cum febre acuta, dolore lumborum & <sup>uterine</sup>  
imi ventris, abdominis inflatione, stimulo ad urinam & alvum, <sup>signa.</sup>  
mictu ardenti & difficili, gravibusque aliis in præcordiis, ca-  
pite & pectore symptomatibus. Parum hujus morbi remini-  
scuntur Medici recentiores, sed eo crebrius in monumentis  
suis Veteres. *Areteus* quidem sic egregie ipsum delineat  
*cap. LXIV. inflammatio uteri*, inquiens, *fit ex pluribus causis,*  
*ex plaga, ex mensium suppressione, & frigidityte, & inflatione,*  
*non minus etiam abortu & pariu, propter malam partus edi-*  
*tionem.* Sequitur ad uteri inflammationem febris acuta dolorque  
capitis ac ejus tendinum & basis oculorum juncturaque manuum  
& digitorum, & colli detractio & declinatio, stomachi per con-  
sensum affectio, osculi uteri conclusio, pulsus parvi, densi. Si  
totus est inflammatus, totus vehementius pulsatorio motu dolet:  
si posteriores ipsius partes solum inflammata fuerint, dolor circa  
lumbos fit & stercora supprimuntur ex recti intestini compressione;  
si partes ejus anteriores, dolor circa pectinem fit & uri-  
na stillicidium ac emittenda difficultas ex vesica compressione;  
at lateribus inflammatis, & inguina tenduntur, & crura gra-  
vantur; si vero fundum ipsius fuerit inflammatum, circa umbi-  
licum maxime dolor consistit cum tumore; at si circa osculum est  
inflammatio, circa supernum ventrem dolent & digito immisso du-  
rum ac renitens osculum occurrit.

## §. III.

Hæc uteri inflammatio merito dispescenda in levio<sup>Differen-</sup>  
superficialem, & graviorem, seu profundio<sup>tia inter</sup>  
rem. Illa sæpe <sup>levem &</sup>  
<sup>puer-</sup> <sup>gravem.</sup>



puerperis accidit, facile gignitur potissimumque crebrius sequitur febrem lacteam, admittit etiam medicationem, si recte & prudenter instituatur, ac facili negotio, intra paucos dies, discutitur. Gravior autem, quæ febre intensa & sævis symptomatibus de vehementia non remittentibus stipatur, septimo, nono, vel etiam undecimo sæpe die necat, superveniente maxime purpura alba, quæ pessimum semper præbet omen, atque ex corrupto, putrido, vappescente fero ac sanguine, in uteri latibulis hærente, ortum ducit, immo de corrupto jam & sphacelato utero testatur.

## §. IV.

*Causa  
varia.*

Causa inflammati uteri materialis proxima est inæqualis sanguinis per uterina vasa circulus. Ob oppleta scilicet, coarctata a spasmō & obstructa minima vascula, sanguis majori cum impetu ac celeritate fertur per vascula vicina, eorumque ramos laterales, qui cruorem alias non capiunt, unde tumor, rubor & ardor fit, cum pressione & irritatione tunicæ nervosæ. Ad hoc autem vitium concipiendum in genere disponunt læsiones, contusiones & vulnerationes externæ, status plethoricus, tachoymicus, mensium & lochiorum suppressio, copiosior sanguinis ad uterum allapsus atque decubitus, partus laboriosus, animi affectus, ira maxime & terror, vomitus enormis, vel nifus impensior ad hunc, motus & labor corris plethorici fortior cum subsequente refrigeratione imi ventris, balneorum calidorum abusus, abdominis & uteri refrigeratio externa, potus frigidus, fluentibus inprimis mensibus, lochiis aut hæmorrhoidibus, colica quoque convulsiva, nec non affectio spastico-hysterica gravior.

## §. V.

*In puer-  
perio cur  
frequens  
fit.*

Nunquam vero magis hæc periculosa affectio infestat feminas, quam si in puerperio sunt constitutæ. Post partum enim uterus ab onere levatus, elastica qua pollet virtute iterum in arctius spatium coit & sensim sensimque sese contrahit. Hinc diducta uteri vasa angustantur, contentus in iis san-

sanguis per oscula aperta, secundinis prius continua, exprimitur ac sub nomine lochiorum foras prodit, cum sanitatis emolumento. Simul vero etiam hac angustatione motus & cursus sanguinis aliter dirigitur & quidem ab utero & inferioribus ad superiora ipsasque mammas, quod circa tertium plerumque diem accidit, non sine febrili commotione, & Germanis propterea audit *das Milch-Fieber*. Quod si igitur lochialis sanguinis exitus per stricturas uteri spasticas impeditur, non modo in ipso utero periculofam inflammatoriam stasin concitat, sed & ordinarius ille sanguinis ab inferioribus ad superiora impetus, tam ratione vehementiæ, quam molis sanguinis validius increfcit. Tum enim spasticæ & dolorificæ in abdomine urgent stricturæ, sanguinis vel mucidi humoris ex utero fluxus restitat, alvus clausa est, pedes frigidi, ad urinam stimulus, dolorosa mictio, caput rubet, tumet, oculi fulgent, nares nonnunquam guttulas quasdam stillant, animus est inquietus, somnus nullus, vel insomniis terrificis turbatus, ac gravia illa symptomata, respiratio difficillima, lipothymia, convulsionones & delirium phreneticum, demum subito sæpius puerperis accidunt funesta.

§. VI.

Luculentis verbis hæc ita evenire testatur *Hippocrates Quibus lib. I. de morb. mulier. §. 72.* ita tradens: *si inflammati fuerint solennis puerperæ uteri, venter ardet & magnus fit & ad præcordia suffocatio habet, & uterus, ubi puerperii purgamenta intus manserunt a frigore, occulte distenditur.* Nec non *lib. II. de morb. mul. p. m. 489.* si, inquit, *ignis sacer in uteris fit, etiam pectus id percipit, venter intumescit, perfrigeratur, febris habet magna & rigor supervenit, & spiritus densus, & animi deliquium, & debilitas, & dolor totius corporis, & irascitur, & mente variatur, & affectio ascendit ex inferno venire ad lumbos, & ad dorsum, & præcordia, & pectora, & colulum, caput & stomachum & mortua esse videtur.* Experientia autem teste, femina teneræ, exquisitoris sensus, in ve-

mentes animi commotiones pronæ, pathematibus spasmodicis & flatulentis obnoxia, mensium inordinato successu affectæ, alvi adstrictioris, si gravida fiunt, post partum quam facile in lochiorum suppressionem cum febre uteri acuta incidunt, non sine summo vitæ discrimine. Interdum etiam inflammatio uteri nascitur, a secundinarum vel totali, vel tantum quoad partem retentione. Hac enim resistante, non tantum sanguinis ex utero exclusio prohibetur, verum etiam succedens putredo febrem movet, vel si hæc jam adest, deteriorem reddit.

## §. VII.

*In sphacelo  
lum abit  
aut ulcerationem.*

Jam sicuti in omni inflammatione, ille subsistens humor, si non discutitur, putrescit & in corruptionem transit, vel sphacelosa, vel ulcerosa; ita idem etiam accidit in ea quæ uterum infestat. Quæ in sphacelum abit, brevi necat & solennis maxime est puerperis, in quibus post sectionem uterus ut plurimum cum vagina durus, coloris ex atro bruni deprehenditur. Quæ autem suppuratur & ulceratur, diutius trahit, & accidit quam maxime extra puerperium. Patent inflammationi huic suppuratoriæ femina sanguinea, mollioris & spongiosioris habitus, præsertim si fluori albo sanguinolento fuerunt affectæ isque adstringentibus intempestive cohibitus. Frequentius etiam eandem incurrunt, quæ impurum & crassum in venis alunt sanguinem, dietam insalubrem sectantur, fructibus horæis, dulcibus & lacticiis indulgent, inferiora subinde refrigerant, corpore præsertim æstuante, quæ tristitia anguntur, veneris stimulos concubitu obtundere impediuntur, suetam sanguinis missionem intermittunt, aut seniores quietam & ærumnosam vitam ducunt. Ac in his quidem frequentior est inflammatio in collo & orificio interno, quod ex multis fibris nerveis spiraliter est contextum, quam in ipso fundo, eaque propter dolor acerbus & ardens est in pube cum mictu difficili. Signa autem abscessus uteri sic in compendio Hippocrates lib. I. de morb. mulier. exhibet: si, ait,

*uteri*



uteri fuerint ulcerati, sanguis & pus purgatur & fœtor gravis oboritur, & dolor acutus corripit lumbos ac inguina & intum. ventrem, & dolor sursum procedit ad laterum mollitudinem, costas & scapulas, aliquando etiam ad claviculas pervenit & caput vehementer dolet deliratque, processu vero temporis intumescit & debilitas ipsum corripit, & animi deliquium, & febris tenuis, & perfrigeratio, intumescunt autem maxime crura. Morbus autem corripit ex abortu, si qua corrupto humore ac putrefacto intus non fuerit expurgatus & calor totum corpus tenet. Corripit etiam ex fluxibus, si in ipsis acria fuerint & biliosa mordeant. Sed plerumque ulcus uteri tandem etiam in gangrænam & sphacelum abit ac interficit. Interdum tamen accidit, ut apostema in utero prognatum interne rumpatur & copiose effluat sanies alba minime foetida & ægra evadat, qua de re legi meretur *Forestus lib. XXII. obs. XLIV. pag. 693.*

§. IIX.

Quod si autem exterior uteri pars inflammata, ob fri- Nec non  
 gus externum, quam facile abit in scirrhum, qui ulceratus, in can-  
 cancer uteri recte dicitur ac est insanabilis. Neque adeo in- crum in-  
 frequens est, glandulas copiosiores circa collum uteri, & ma- sanabi-  
 xime orificium ejus internum confidentes, mutari in scirrhum lem.  
 tandemque abire in inflammationem ulcerosam, quæ haud se-  
 cus ac cancer exulceratus, medicationem admittit plane nul-  
 lam. Recentiores quidem parum hanc uteri affectionem no-  
 tarunt; ego vero aliquoties observavi, eadem omnino ratio-  
 ne iisdemque symptomatibus ac pridem jam exacte prodidit  
*Areæus lib. II. cap. LXVII.* ita perhibens: *cancris in utero, par-*  
*tum cum, partim sine ulceratione sum, tumor reperitur circa*  
*uteri osculum durus, inæqualis, præminens, colore feculentus,*  
*rubicundus, quandoque etiam sublividus & dolem vehementer*  
*inguina ad supernum ventrem & pectinem ac lumbos, ægreque*  
*ferunt contactum & variegatorem medicationem. Si vero ul-*  
*ceratus est cancer, ad dolores, durities & tumorem, erosa etiam*  
*& in-*

& inequalia ulcera conspiciuntur, plerumque quidem sordida oris tumida albicantia, turpes crustas inductas habentia. Quæ vero pura videntur, feculenta, livida, rubicunda & cruenta apparent. Excernitur autem assidue ab ipso sanies tenuis, aquosa, nigra, aut fulva, graveolens, aliquando etiam sanguis fertur & alia signa ad inflammatum uterum relata. Affectio igitur ipsa incurabilis est, veluti alicubi etiam dixit Hippocrates, mitigare tamen oportet, per infessus ex sænu græco, malva & per cataplasmata similia.

## CURATIO.

## §. I.

Curatio  
& præfer-  
ratio  
causis ac-  
commo-  
danda.

Uteri inflammatio, quum nunquam frequentius occur-  
rat, quam in puerperis & post abortum, dum vel ab impro-  
vida obstetricum in partu difficili tractatione & contrectatio-  
ne violenta, vel a violento nisu sub partus laboribus, san-  
guinem præsertim impurum ad uterum pellente, vel a lochio-  
rum per dolores & spasmos hystericos, terrorem, aut refri-  
gerationem, fluxu impedito, inducitur; necessarium omnino  
est, ad præsertionem æque ac curationem, ut Medicus om-  
nes has causas probe noscat atque discernat. Quia autem  
facilius longe est periculosum hunc morbum imminuentem  
arcere, quam præsentem perferare; hinc medens etiam pri-  
mo omnium eo eniti debet, ut eundem tempestive præscin-  
dat, ejusque incursum avertat.

## §. II.

Post par-  
tum spa-  
smi rela-  
xandi.

Jam missis illis læsionibus, quæ ab externis & violentis  
causis inducuntur, frequentissimum in artis exercitio est, in-  
flammatariam hanc febrem, post partum, ob excretionem  
sanguinis lochialis vel plane deficientem, vel non sufficien-  
tem induci. Quare id inprimis agendum artifice, ut confe-  
cto partu, primis statim diebus, lochia rite secedant. Quod  
ut ex voto perficiatur, ad causas fluxus lochialis intercepti  
remo-

removendas, medicatio perite dirigenda. Notum autem est, sub diuturnis & gravioribus partus laboribus, tam vehementem fieri partium, & solidarum, & fluidarum, commotionem & exagitationem, ut quisque ex pulsuum celeritate, totius corporis ardore, siti & inquietudine vix aliter judicare possit, quam adesse febrem, sub quo impetu parum etiam vel nihil recrementorum putridorum & cruentorum utero effertur. Igitur opera danda, ut impetuosus hic post partum motus placide componatur. Fit hoc commodissime, si puerperæ in quiete & temperato regimine diaphoretico servantur iisdemque diluentia ac blande æstum sedantia propinantur. Quia tamen sub partu, qui nonnisi stricturis spasticis & convulsivis ex spinali medulla absolvitur, per consensum spasmi & dolorificæ stricturæ ad intestina transeunt, quæ superato partu adhuc aliquamdiu persistunt, atque etiam eandem ob consensionem uteri fibras musculosas & nerveas stringendo, liberum sanguinis cursum præcludunt; merito etiam curandum, ut eadem sedentur placide. Hunc in finem utilis pulvis, ex pulveris Marchionis, lapidum cancrorum ana drachma, antimonii diaphoretici drachma dimidia, nitri puri granis XVI. cujus quarta pars pro dosi, adjectis nonnunquam, si spasmi hysterici simul impensius urgent, granis sex, vel quatuor pulveris castorei, cum aqua florum chamomillæ vulgaris, destillata cum cerevisia triticea, sumenda. Conducit quoque oleum amygdalarum dulcium, ex recentibus, sine igne paratum, quod vel solum, vel cum quarta parte spermatis ceti remixtum, quotidie ad unnam vel dimidiam unciam, cum jusculo pulli gallinacei, aut decocto avenaceo, usurpandum. Externe vero totum abdomen inungendum oleo ex anethini, chamæmelini & liliorum alborum ana uncia, olei carvi drachmis duabus, vel camphoræ drachma, superposita mappula complicata calefacta.

### §. III.

Composito sic tumultu, ad promovendum lochiorum *Lochia* fluxum, vix præstabilius huc usque innotuit remedium, quam *promovenda.*  
(IV.) Rrr pilu. *renda.*



pilularum massa, quæ ad imitationem *Beccheri*, ex amaris extractis, gummatibus resinosis temperatis, & aloë probe correctâ concinnata est. Secundo igitur statim die, ceteris paribus, quindecim grana pilulari forma, mane, vel vespere exhibentur, & pro circumstantiarum ratione, per quinque vel octo dies continentur. Est enim hoc evacuans clemens maxime & accommodum. Nam roborando, tam intestinorum, quam ipsius uteri, per extensionem nimiam robore exuti, tonum, blande simul stimulando, imum ventrem ac intestina a sordibus, ipsum quoque uterum a stagnante corrupto sanguine repurgat, eoque quam optime & inflammationem, & febrem aliaque sæva a recrementis retentis oriunda pathemata, arcet. Quin eadem hæc curandi ratio apprime ex usu est, quando secundina, vel ipsius pars, aut aliud quoddam exturbandum concretum in utero resistat.

## §. IV.

*In febre  
sanguis  
mittendus.*

Quod si tamen medentis scopus his expediri nequit, sed febris impetit assidua, venter flatibus attollitur, uteri purgamenta retinentur & spasmi ad superiora vergunt infesti, alia ineunda est medendi via. Scilicet sanguinis copia, sub gravitate justo plus accumulata, minuenda, per venæsectionem, non in superioribus, sed pede institutam. Sæpe enim a nimia vasorum distensione fiunt spasmi, & sanguinis exsuperans moles uteri compagem nimium distendendo, ejusdem systalticam & expulsiuam potentiam minuit ac impedit. Hinc venæsectionis remedium omnino maximi, ad promovendum loquiorum fluxum & inflammationem arcendam, est usus. Quod sicuti in Gallia hunc in finem frequentius quam par est adhibetur; ita perperam in nostra Germania rejicitur, ut plures inflammatoria uteri febre correptæ, pereant, quæ temperativa sanguinis missione potuissent fervari.

## §. V.

*Et sanguis  
stagnans  
discutiendus.*

Præter venæsectionem, ubi jam præsens est inflammatoria febris, id quam maxime agendum, ut sanguis stagnans in motum

motum cieatur, humores spissi fluxiles reddantur & stasis discutiat. Quod ut obtineatur, conducit mixtura hæc: recipe aquæ chærefolii, cardui benedicti, scordii, florum sambuci, acaciæ, aceti destillati ana unciam unam semis, lapidum cancrorum drachmam unam semis, antimonii diaphoretici, vel bezoardici mineralis drachmam semis, spiritus nitri dulcis, sive liquoris anodynii mineralis guttas XX. sirupi card. bened. drachmas duas. M. de qua binis quibusvis horis, duo vel tria cochlearia porrigenda. Tum etiam pro potu exhibeatur tenue jusculum ex pullo gallinaceo, cum radice scorzonæræ, cichorei & rasura cornu cervi confectum, addito ad gratiam succo pomorum aurantiorum. Præbeatur quoque subinde infusum theiforme ex herba veronicæ, scabiosæ, sonchi, floribus hormini, chamomillæ vulgaris, semine fœniculi. Nec omittantur pulveres temperantes ac resolventes, ex lapidibus cancrorum, solutione oculorum cancri, nitro & sale polychresto compositi. Quales præterea Béccherianis, vel ad harum exemplar paratis pilulis, ad lochialem fluxum promovendum & sanguinis a capite impetum divertendum, commode interponuntur. Sint demum in usu clysteres ex sero lactis dulci, vel decocto florum chamomillæ vulgaris, herbæ artemisiæ, salviæ, hormini, mercurialis, addito melle, nitro & pinguedine gallinarum.

### §. VI.

Quando vero extra puerperium in corporibus impuris *Extra* variis ex causis accidit inflammatio uteri, non tam in fundo, *puerpe-* quam potius in collo, cervice atque vagina, præter jam me- *rium u-* morata interna, simul in auxilium vocanda præsidia externa, *tendum* epithemata scilicet pubis regioni admota, injectiones uterinæ *externis.* ex accommodis paratæ, nec non pessi, item ob loci vicinitatem suppositoria in anum trusa. Epithema egregium est, quod ex aquæ sic dictæ d'arquebousfæ, (quæ nonnisi vinum Rhenanum a herbis vulnerariis in balneo maris ad siccitatem abstractum,) unciis quatuor, essentiæ croci, spiritus vini cam-

Rrr 2

phorati

phorati ana unciiis duabus, nitri, in aqua florum sambuci soluti, drachma, paratur, ac pro circumstantiarum ratione cum aceto rutaceo, aut scordii remixtum, linteis duplicatis sæpius applicatur. Ad injectionem vero commendo solum lac, vel asininum, vel muliebre, cum floribus sambuci myrrha & croco, adjecto nitro decoctum. Molestissimum demum hujus passionis symptoma tenesmus, præter infessus emollientes, egregie lenit oleum amygdalarum dulcium, vel mucilago seminis psyllii, aut foenu græci, ad uncias duas, cum duodecim extracti croci granis ano injecta. Et eadem hæc remedia semper etiam ex usu sunt, quando inflammatio abiit in suppurationem.

## §. VII.

*Quibus  
meden-  
dum si ex  
fluore  
albo.*

Porro non adeo infrequens est, ex fluore albo diuturno, præsertim si simul sanguinolentus, male tractato, vel imprudenter cohibito, uterum ejusque partes tumore affici cum dolore & febre inflammatoria, immo in suppurationem abiire & exulcerationem. Tum vero cura admodum perplexa est atque difficilis, inprimis, quando fluor non e glandulis externis, sed interna uteri substantia venit. Ego, si passio chronica, nil præstabilius novi, quam usum thermarum Emsensium & Carolinarum mitiorum, quippe quæ humores subsistentes efficaciter dissolvunt partemque affectam simul roborant. Sed cavendum a balneis adstringentibus, ipsis etiam Carolinis fortioribus, quæ propter terram calcaream & martialem, adstringente & repellente virtute pollent. Infessus verò ex herbis uterinis & aromaticis, cum aqua dulci decoctis, profunt utique. Sic laxatis ductibus & humoribus dilutis, cum fructu postea pilulæ dantur Beccherianæ, quæ inter specifica uterina locum tuentur præcipuum. Nec rejicienda videtur Hippocratis hæc uteri ulcus curandi methodus, quam lib. I. de morb. mul. §. 88. sic tradit: *si hic morbus inciderit, multa calida lavato & reperfectoria adhibeto, qua parte fuerit dolor. Et si quidem superne fuerint dolores & mulier fortis est, rotam fomentata &* phar-



pharmacum deorsum purgans bibendum dato, & ubi tempus anni fuerit, serum coctum insuper bibendum prabeto, per dies quinque, si id facere poterit. Si vero non adfuerit serum, lac asininum coquito & per dies tres, aut quatuor bibendum dato. Post lactis autem potum, cum aquis ipsam reficito & cum cibis commodis, carnibus ovillis, teneris recentibus, & volucrium, & beta, & cucurbita. Abstineat autem a salsis, & acerbis, & marinis omnibus ac caprimis. Et certe lactis serum & asininum lac egregie proficit, non modo ad obtundendam humorum acrimoniam, sed & contemperandum calorem hecticum, qui agros graviter ut plurimum urit.

§. IIX.

Quæ demum a violentia externa inducitur uteri inflam- *Inflam-*  
matio, cum febre, dolore inguinum, mejendi difficultate & *mationis*  
spasimis in remotis etiam partibus, nec non alvi adstrictione, *a causa*  
poscit quam maxime venæsectionem, non modo maturam, *externa*  
sed & repetitam, primo in brachio, ac dein in pede institu- *medica-*  
tam. Opus in hac etiam, ut alvus subducatur clystere, in *tio.*  
uterinis morbis nunquam non singularis plane utilitatis. Et  
exteriorius imponendum emplastrum ex emplastri de meliloto  
unciis duabus, spermatis ceti uncia dimidia, gummi ammo-  
niaci drachmis duabus, croci drachma, camphoræ drachma  
dimidia. Non omissis internis blandis diaphoreticis & discu-  
tientibus.

CAVELAE ET OBSERVATIONES  
CLINICAE.

§. I.

Quum puerperæ plurimæ in puerperio ex febre inflam- *Præfer-*  
matoria uterina moriantur, præsertim si multum sanguinis *vatio.*  
crassi & impuri in venis alant; hinc optimum certe ad præ-  
sciendendas capitales ejusmodi affectiones est consilium, quan-  
do gravidæ partim salubri diætâ & vitæ regimine, partim et-

iam aptis & congruis præfidiis, tam solidas, quam fluidas partes, in debita temperie, quantitate & motus æquilibrio servare student. Nam qualis natura ægrotantium, etiam puerperarum, talis etiam est vis medicatrix, pugna adversus morbum, quin ipsa medicatio, in qua omnino plus præstat natura, quam ipsius ministra ars. Igitur ad antevertendum hoc malum quam maxime necessarium est, ut tempore graviditatis sanitati consulatur tam opportunis sanguinis missionibus, quam debitis laxationibus, per rhabarbarina potissimum, ut etiam gravidæ modicam & laudabilem diætam sectentur, animi temperantiæ studeant & potus diluentes perspirationem simul sustinentes bibant. Deinceps quum haud raro inflammati in puerperis uteri causam præbeat, potus nimius calidorum & spirituosorum, vini aromatici, crocati &c. ad partum facilitandum datus, præsertim in sanguineis & quæ non ultimis mensibus sanguinem miserunt; serio omnino monendæ sunt, & obstetrices, & uterum gerentes, ut ab ejusmodi sanguinem exagitantibus remediis abstineant, ac potius venæsectione in pede, item balneis, novissime ante partum duabus vel tribus hebdomadibus, rite usurpatis, liberiores sanguinis per uterum com meatum & facilem post partum effluxum procurent.

## §. II.

*Omittenda.*

In nullo morbo tam infensa & perniciofa est animi commotio, per terrorem potissimum ac iram, quam in uteri inflammatorio. Nunquam etiam nocentior abdominis & inguinum perfrigeratio, quam post abortum & partum. Puerperæ enim, ob continui quæ ipsis accidit solutionem, fibrarum & vasorum dilacerationem humorumque extravasationem, haud aliter sunt considerandæ, quam graviter vulneratæ. Quam facile autem dictæ causæ læsis & vulneratis partibus, adeoque etiam utero, inflammationem inferre queant, res est nota etiam in vulgus. Quare ut puerperæ, nec non quæ labem in utero gerunt, solícite sibi ab his caveant, iterum inculcamus iterumque.

## §. III.

§. III.

Ad emovendum lochiorum fluxum subsistentem, nun- *Cautela*  
quam danda pellentia fortiora, crocata, myrrhata, succinata, *de pellen-*  
aloëtica, vel calida aromatica, nec non salina stimulantia, *tibus.*  
tanto minus, si mox post partum adhuc præsto est motuum.  
impetus. Hæc enim febrem magis accendunt, spasmus in-  
tendunt, sanguinem in latibulis uteri hærentem, humido ab-  
sumto, plus densant & ad effluxum reddunt ineptum, vias  
quoque & emuntoria magis siccant atque occludunt. Sed  
quando spasmus laxari, dolores remittere, viæ patefcere in-  
cipiunt & sanguis ex utero ferri, tum demum moderate pel-  
lentia & tonica propinare expedit. Inter quæ solutio succini,  
myrrhæ, rhabarbari, croci, non cum spiritu vini, sed aqueo li-  
xivioso menstruo parata, nec non aqua melissæ, aut artemissæ  
leviter spirituosæ, qualis est quæ cum cerevisia triticea destil-  
latur, omnibus palmam præripiunt fere, si crebris & parcis  
dosibus offerantur.

§. IV.

Ex præcipuis etiam lochiorum fluxum revocantibus au- *Vena se-*  
xiliis est venæsectio. Nec deterreri se patiatur artifex sym- *ctione.*  
ptomatum gravitate, neque etiam ipsa purpura efflorescente,  
sed confidenter admittat, si indicationes adsunt, uti jam pluri-  
bus superius *Seç. I. cap. IX. de febre purpurata obs. VI. pag. 220.*  
monui. Quando autem provida, ut ita loquar, natura, ces-  
santem aut insufficientem lochiorum evacuationem liberali su-  
dore, aut alvi fluxu compensat, abstinendum ab iis, quæ lo-  
chiis proritandis alias serviunt.

§. V.

Quando autem humor ex utero fertur viscidus, flavus *Ulceræ-*  
& sanguinolentus, haud obscurum præbet indicium læsæ ute- *tionis me-*  
rinæ substantiæ & imminenti inflammationis atque ulceratio- *dicatio.*  
nis. Ad hanc igitur arcendam, vel si jam præsens est perfa-  
mandam, tuta quam maxime est ac necessaria crebrior purga-  
tio



tio & rhabbaro, tamarindis & manna, quæ frequenter iteranda est, quo vitiosi ab utero humores divertantur. Tanti enim hæc ad curationem est momenti, ut *Forestus Lib. XXIX. obs. XLIIIX.* fidem faciat, quendam Amstelodamensem nobilem matronam ab ulcere uteri sanitati reddidisse, cui dederat de quarto in quartum diem uncias quinque decocti fennæ, epithymi, rosarum rubrarum, myrobalanorum Indorum, saccharo dulcorati & abstergentia decocta in uterum injicere jusserat. Si ulcus adhuc curandum est, post lenes aliquot dierum purgationes, decoctum ex santalo, lentisco, farsaparilla, mentha, epithymo, radice liquiritiæ & ligno Rhodio, per viginti quinque dies cum regimine sudorifero bibitur cum fructu, qua de re pluribus consuli potest *Sylvaticus Cent. IV. obs. LXIIX.*

## §. VI.

*Cancris  
auxilia.*

Ulcus uteri cancri ulcerati naturam æmulatur, tumque sanies putrida & lacinia corruptæ uterinæ substantiæ cum magno foetore, summo dolore gravibusque symptomatibus prodeunt & malum fere est incurabile. Quicquid autem agendum, nonnisi demulcentibus & lenientibus perficiendum. Si spes sanationis adhuc superest, ego quidem habeo quod laudem potum lactis, potissimum alinini, nec non usum temperatarum mineralium aquarum, Wildungensium maxime, vel Selteranarum, interposito mane & vesperi balneo aquæ dulcis cum furfuribus triticeis, in quo per horam & longius desidendum. Vicissim abstinendum ab omnibus acerbis internis & stimulantibus calidis. Caute etiam in uteri abscessu ac ulcere adstringentibus & repellentibus utendum, quia iisdem facile scirrhus inducitur. Optimæ injectiones ex lacte caprillo, croco & aqua florum sambuci. *Hippocrates* brassicæ usum commendat, sed præstat betæ rubræ succus, crebrius calide injectus.

*Dolores  
complacandi.*

## §. VII.

Immanis sæpe dolor exulcerato uteri cancro jungitur, qui

qui vires penitus pessundat omnemque somnum adimit. Ad hunc leniendum optimum solatium in anodynis, cujus generis sunt extractum croci & papaveris, massa pilularum de styrace, de cynoglossa, *Wuldegansii, Matthia, Starckii*, Notabilis enim hac in rem *Riverii Prax. cap. X. pag. 332.* locus: *hæc tamen omnia, iniquentis, aliquando non sufficiunt ad immanissimum dolorem placandum, qui interdum nullum quieti & somno relinquit locum.* Vnde cogimur non raro ad narcotica recurrere, quæ in hoc affectu propter intensum humorum fervorem minus nocent. Et vidimus nos mulierem, cancro in mamma laborantem, quæ singulis noctibus, per quatuor menses, laudani grana duo, vel tria, innoxie, cum magno solatio sumebat.

ENARRATIONES MORBORVM.

OBSERVATIO. I.

Laborarat per aliquot menses largo sanguinis ex utero <sup>Vteri la-</sup> profluvio femina sexaginta sex annorum, cholERICA, macilen- <sup>bes ex ha-</sup> ta & iniram prona, multos in consilium adsciverat Medicos, <sup>morrh-</sup> & variis etiam usæ fuerat medicamentis, sed incassum. Tan- <sup>gia cohi-</sup> dem accedens junior quidam Medicinæ Practicus, suasit exter- <sup>bita.</sup> na, partim calida & acria, partim adstringentia & aluminosa. His fluxus quidem cohibitus, sed dolores oborti atrocissimi, ac brevi post loco sanguinis materia saniosa foetidissima effluxit, accessit lenta febris, corporis tabes, summaque imbecillitas. Notabile hæc inter imprimis fuit, quod ægra, quando aliquid de pilulis Anglicanis Matthiæ, quas etiam Starckianas vocant, deglutivit, doloris intolerandi senserit aliquod lenimen, hoc autem omisso, illico recruderint tormina acerba. Semper etiam aliquid materiæ foetidæ ex utero secessit, hac autem retenta, accesserunt protinus borborismi in abdomine, spasmi flatulenti, hysterica pathemata, cardialgiæ & circa præcordia anxietates. Sic ægra per bienni-

(IV.)

Sss

um

um miseram traduxit vitam ac demum macie & febre confecta fatis cessit.

*Epicripsis.*

Imprudens medicationis hæmorrhagiæ uteri hoc est exemplum. Nunquam enim sanguinis profluvium, ubicunque fiat, sive internis, sive externis sistendum, sed potius roborantia cum discutientibus mixta exterius, si interna non suffecerint, parti affectæ laboranti sunt admovenda. Si secus sit & stiptica constringentia in usum vocantur, aliter fieri nequit, quam ut sanguis in coagulum abeat, in valis subsistat ipsamque uteri substantiam labe inficiat. Anodynis autem dolores quidem tantisper sopiti, sed non in totum sublati, quia putridæ corruptioni auferendæ non fuerunt idonea. Et quod ab impeditiori materiæ saniosæ effluxu pathemata hysterica oborta, argumento est, non tantum a sanguinis & humorum copia atque stagnatione, verum etiam a materia acri caustica, fibras uterinas irritante, pathemata ejusmodi spasmodico-hysterica suscitari posse.

OBSERVATIO. II.

*Inflam-  
matio  
suppura-  
ta uteri  
post ab-  
ortum.*

Femina quadragenaria, sanguinea, plethorica, quarto mense gravida, fualu mariti, ut vegetior esset & infantem quoque robustum ac sanum ederet, sumsit pulverem *Monckii*, Ramoneur dictum, qui nihil aliud quam antimonii regulus cum nitro in calcem ustus. Successit autem effectus oppido infelix, ut plus quam vigesies vomeret miramque experiretur debilitatem. Ex eo pessime semper habuit & post quatuordecim dies accidit abortus, quem præcessit dolor in inguine atrocissimus, & sub ipso cum lochiis secessit materia graveolens. Passo abortu, perpetuos & fixos in abdomine ac inguine dolores experta est, pulsus semper fuit celer, interdum animi quandam defectionem incurrit, interdum etiam tussi & articulo- rum dolore divexata. His symptomatibus per aliquot menses graviter detenta, nacta est tumorem in abdomine, cum dolore



dolore lancinatorio jugi & alvi fluxu torminoso. Sequuta est summa corporis imbecillitas viriumque prostratio, extremorum refrigeratio, spirandi difficultas & frequentius syncope, donec tandem inter hæc vitam poneret. Dissecto post mortem cadavere, ingens puris ex albo viridescantis copia ad aliquot libras ex abdominis cavo profluxit. Intestina utero propinqua erant erosa eorumque tunica comparuerunt quasi abrafa. Vterus fuit spongiosus & ita ampliatus, ut in longitudine ad decem, & in latitudine ad octo transversos digitos accederent. In ipso lacunæ fuerunt multæ puræ repletæ, ex quibus ingens illa puris quantitas fluxerat in abdomen. In vasis sanguiferis majoribus, nullus repertus sanguis, sed omnis fere in puris abierat materiam.

*Epicrisis.*

Quam perniciofa gravidis sint emetica & quidem validiora, ex hoc casu patescit luculenter. Quæ enim uterum gerunt sunt fere semper plethorica, eaque propter fortiori illo nisu & pressione diaphragmatis & musculorum abdominis sub vomitu, sanguis cum magno impetu in uteri vasa urgetur, ibique impactus, inducit inflammationem in ulcus transeuntem. Hinc igitur abortus & reliqua gravia pathemata duxerunt ortum. Non tamen dubitandum, quin partu ab actò, gravissimum illud malum, uteri apostema, potuisset præscindi, si mature discutientia, resolventia & roborantia in auxilium fuissent vocata. Pus autem ex utero effusum in abdominis cavum, tunicas intestinales arrosit ac erosit, unde abortus alvi fluxus, intensus abdominis torminibus.

OBSERVATIO III.

Elapso anno vocabar ad mulierem tertium supra quadragesimum ætatis annum agentem, sanguineo-cholicam, quæ misere decumbebat, conquesta potissimum de dolore in regione pubis pressorio & elisorio quasi atrocissimo, par-

*Canceru-  
teri le-  
thalis.*

tus dolores longe superante, stipato cum tenefmo, dorsi tensione, ructibus, vomitibus & alvi stricture, somni appetitusque defectu. Inquirenti in morbi causam & originem, dixit: se ante octodecim annos ultimo laborioso admodum partu esse perfunctam, tam male simul ab obstetrice tractatam, ut vestigia digitorum impressa adhuc in pube gerat. Tum menses, antea semper largos & ordinatos, post puerperium primum cum dolore aliquo stillasse, servasse tamen periodum postea & sufficienter etiam fluxisse. Ante sex autem annos se mensium tempore cecidisse in itinere in torrentem. Inde mox constituisse fluxum & sequuta multa & varia pathemata spastico-hysterica, quin post aliquot menses corpus intumuisse totum, cum colore plumbeo. Discussum tamen congruis remediis esse post aliquod tempus tumorem & mensium fluxum etiam repetiisse, excreto multo coagulato crasso & quasi concreto sanguine, ac postea viscida alba & flava materia. Ex eo quotiescunque mensium accesserit periodus, se per triduum acerbis in abdomine afflictam esse doloribus, tamdiu insistentibus, donec sanguis prodierit grumolus primum & crassus, dein tenuior, tum aqua sanguinolenta ac demum materia viscida flava. Sic transiisse quatuor iere annos, & adhibitis interea variis medicamentis, maximeque pilulis Stahlianis, cum pulvere salino temperante, spem valetudinis melioris fuisse irritam, malum potius increvissse magis. Jam a binis mensibus & dolorem & fluxum sanguinis emanasse, nunc vero eo esse graviolem & spasmos quasi convulsivos. Hæc audiens & atrocia pathemata videns, male statim ominari coepi, ac scirrhum, aut aliud immedicabile uteri vitium subesse sum suspicatus. Interim alvum valide strictam clystere oleoso emolliente cum asa foetida subducere, interius pulverem temperantem cum nitro, cinnabari & castoreo, nec non liquorem meum anodynum mineralem dedi & exterius parti dolenti admove-re jussi vesicam decocto emolliente plenam. His dolorum atrocia primum frangi est visa, & elapsi

elapsi nonnulli sanguinis grumi, sublequente liquore sanguinolento. Sed post aliquot dies vehementia recruduerunt eadem, ut ægra lamentabili voce uterum extrorsum trahi violenter & jam vaginæ imminere clamaret. Advocata obstetrix, quæ orificium uteri apertum esse eique incumbere durum quoddam corpus dixit. Data priora remedia, sed frustra. Parati infessus, momentaneum levamen afferentes, imposita exterius, ex muliercularum etiam consilio, varia carminativa, spirituosæ & acriæ, incassum tamen, & accessit capitis dolor. Optimum fuit solatium ex pilulis, quæ pilulas aleophanginas ac de styrace cum croco & cinnabari habebant. Sub his doloribus iterum aliquot sanguinis grumi & postea sanguis floridus parvus exiit, stillante postea liquore cruento. Sic decubuit aliquamdiu; doloribus, modo gravius, si fluxus restitabat, modo mitius, si excretis sanguinis grumis quibusdam serum manabat sanguinolentum, afflicta, simul quoque tumorem sensit durum in latere sinistro supra inguinæ. Adhibita interea pro circumstantiarum ratione varia tandem impositum emplastrum efficacius discutiens atq; resolvens, quo admoto, fornicationis quendam in regione tumoris percepit sensum, dolores mitiores afflixerunt & post triduum primum iterum sanguis grumosus, tum tenuis & serum non cruentum, sed magis flavescens ichorosum, ac post aliquot dies materia crassa sebacea flavescens profluxit. Secessit hæc materia aliquamdiu ac ægra tolerabilius decubuit, usa interius, infuso ex herbis vulnerariis cum lacte, balsamo quoque ad imitationem balsami *Locatelli* parati, axungia canis cum herbis traumaticis confecta & exterius injectionibus modo lenientibus, modo abstergentibus & balsamicis. Nihilominus tamen latius serpsit labes interna, pus & sanies foetida, quin nunquam lacinia quasi corruptæ carnis prodierunt, vires morbi diuturnitate sensim collapsæ, corpus contabuit, appetitus periit, calor hæcticus increvit, urina per octiduum suppressa cathetere fuit evocanda, somnus intercidit, accessit demum mentis alienatio,



natio, quam triduo post excepit mors, elapsis inter hæc tribus mensibus.

*Epicrisis.*

Plurimi certe sunt morbi, etiam ipsius *Hippocratis* effator, qui ex utero prodeunt. Hic enim propter plane singularem valorum fibrarumque structuram, dispositionem & situm, ita a sapientissimo opifice est fabrefactus, ut non solum ad generationis negotium aptus sit, sed etiam, ut superflui & effoeti in corpore muliebri humores serosi, nec non ipse sincerus nimium exundans sanguis, salutari plane modo & motu, per ipsum foras ejiciantur. Huic scopo maxime quadrat tanta valorum sanguiferorum copia & serpentinus ac inflexus eorum progressus ac cursus, quo scilicet propter paulo tardiolem & difficiliolem sanguinis & humorum per uterum transitum, eo melius inutilis & superflui humoris fiat se- & excretio. Interim propter eundem hunc difficilem ac segnem humorum commeatum, non secus ac in hepate, multæ stases & stagnationes & inde obstructions, indurationes, extravasationes, scirrhusitates, foecundissimæ morborum matrices, gignuntur. Quinimo quia in hoc visceremora & obstaculum sæpe ponitur universo sanguinis libero & æquabili circulo, fit, ut in aliis partibus, propter majorem sanguinis motum & impetum, functiones sæpe totius corporis labascant & vitium contrahant, ut in pathematibus sic dictis hysterice clarum est ac manifestum. Multum itaque ad sanitatem mulierum refert, ut hæc pars salva, sarta & tecta omnibus modis & artificiis conservetur. Parva enim ibi consistens labes, magnas perturbationes efficere potest. Clarissime id videmus, quando sub partu laborioso atque difficili, præsertim ab imprudenti obstetricum tractatione, labes in parte quadam uteri contracta fuit, quæ sæpius facit, ut ab eo tempore nunquam recte convalescant iterum puerperæ. Atque etiam ea est natura vitiorum, quæ utero longius insident, ut demum post multos annos pernicipalem suum effectum prodant, uti quidem

quidem etiam ex nostra morbi historia liquet. Morbus autem quo laboravit nostra recte pro cancro uteri, qui ex scirrhus demum ulcerato productus fuit, haberi debet. Sed uti ego nunquam exulceratum cancrum, cujuscunque partis fuerit, medicamentorum ope curatum vidi; ita eo magis uteri cancer incurabilis est, quia minus commode externorum topicorum applicationem admittit. Neque etiam aliis symptomatibus incedit uteri cancer, neque alio modo interficit, quam febre succedente lenta, eodem modo ac is qui in mammis consistit. Præter dolores quippe immanes & putridas foetidas varii coloris & consistentiæ emanantes sordes, cum sanguine sæpe mixtas, totius corporis languor, prostratio virium, hæticus & consumens calor, somni defectus & animi deliquia accedentia, vitales tandem motus extinguunt. Providendum igitur cum cura ac eo annitendum, quo apto consilio ejusmodi atrox & funestum malum arceatur. Jam ego certe non aptius ad roboranda uteri vasa & sanguinis cursum liberum & salvum tuendum, adeoque ad omnis generis morbos inde propullulantes præscindendos, maximeque etiam ad hujusmodi scirrhusitates valde suspectas amovendas, præstantius & certius novi auxilium, quam post abortum vel post partum, usum laxantium balsamicorum, uti nostræ sunt & aliorum balsamicæ pilulæ, item balnea ex herbis roborantibus & nervinis, vel etiam potum aquarum mineralium cum accuratiori diætæ & vitæ regimine. Quare ut Medicus hæc remediorum genera multum, imo plurimum ad averruncandas morbosas, quæ ex puerperio oriuntur, affectiones, commendata sibi habeat, serio inculco.

#### OBSERVATIO IV.

Generosæ feminae, triginta annorum, sanguine & succis *Febris uterina* plenæ, quum feliciter peperisset & secundinæ etiam prodiiissent integræ, subsistit mox sanguis lochialis ac tenuis tantum *sudore fo-* materia profluxit ex utero. Hinc ad emovenda lochia, & *aluta.*

Medi-

Medicis, & a mulierculis, multa calida & pellentia exhibita fuerant medicamenta. Sed frustra, & spasmi potius, ac dolores imi ventris, quin tertio die febris acuta & continua accesserunt & ægram in magnum discrimen adduxerunt. Petito a me consilio, suasi, ut primo omnium vena pertunderetur in pede ac clyster postea molliens injiceretur. Factum utrumque & dolores mitigati, febris tamen cum pulsu duro & celeri perstitit. Quum vero septimo die sudor erumperet & per quatrimum ex universo corpore manaret tam largus, ut lectus & lintheamina aliquoties mutanda, vires quidem multum dejectæ, sed febris cum omnibus aliis symptomatibus sublata. Hinc sub sudore juscula tantum pullorum cum succo citri data, post eum vires analepticas, tam pharmaceuticis, quam diæticis, resectæ & sic sanitas rediit perfectæ, ad quam confirmandam, elapsis quatuordecim diebus, uterum infuso laxante rhabbarino, cum aliis congruis nupto, expurgare consului.

#### *Epicrisis.*

Notatu dignus ob id hic est casus, quod fere plane defecerit lochiorum fluxus, puerpera tamen servata. Ego vero notavi, difficiliorem semper esse lochiorum effluxum in feminis, quæ vasa gerunt exilia & habitum corporis spongiosum, Sunt tamen hæc proniores in sudorem. Heic provido naturæ instituto factum est, ut febris cesserit in medicinam, cujus beneficio stagnantes in vasculosa uteri compage humores sanguinei, ut in aliis inflammatoriis febribus, resoluti atque discussi, simul etiam corpus per liberalem sudorem a superfluis humoribus repurgatum saluberrime. Nam recte scribit *Celsus lib. V. cap. IIX.* medicamentum sacri ignis fortissimum est febris, quæ humorem noxium absumit. Ita sæpius natura compensare solet defectum excretionis cujusdam in certa parte, per eo uberiores in alio emunctorio succedentes. Igitur cautelæ loco servetur: nunquaam invita natura, vi quadam urgendas esse & movendas excretiones.



### OBSERVATIO V.

Honestafemina, tenera & macilenta corpore, animo *Febris u-*  
alacris, vigesimo secundo ætatis anno feliciter enitebatur filio *terina sa-*  
lum, altero statim die, post admissam ultimam venæsectionem. *nata.*  
Post partum parcius secesserunt lochia, graves in abdomine,  
dorso & inguinibus oborti dolores, quinto die accessit vehemens  
febris, cum inquietudine, præcordiorum anxietate, insomnia,  
magna impatientia & interveniente subinde delirio. Datum  
de venæsectione consilium, sed quia haud ita pridem admini-  
strata, admittere noluit. Hinc ob alvum adstrictam injectus  
clyster emolliens, ex decocto avenaceo, cum fl. chamomillæ vul-  
garis, herba & floribus homini, oleo chamomillæ cocto,  
addito nitro. Datus postea quotidie, bis, vel ter, cum tenui  
jusculo dosis pulveris hujus: recipe solutionis oculorum can-  
cri, salis polychresti, nitri puri, lapidum cancrorum ana  
drachmam. M. dividatur in XII. partes æquales. Circa no-  
ctem deglutitæ viginti pilularum harum: recipe pilularum  
marocostinarum drachmam, extracti rhabbarbari scrupulum,  
extracti croci, castorei ana grana sex M. f. pilulæ ex scru-  
pulo uno no. XX. His per quinque dies usurpatis, alvus so-  
luta & aliquot sedes quotidie motæ, nono quoque die flu-  
xus humoris putridi & sanguinolenti ex utero adauctus, &  
successive ægra sanitati reddita.

*Epicrisis.* 1774-1775, 440-2

Quando natura ex variis, sæpe occultis causis, corruptum sanguinem & humorem ex utero vel plane non, vel insufficienter, post partum emovet, ac inde imminet periculum; Medicus, si non per ordinarias vias potest, per alia congrua emuntoria, noxium expurgare debet humorem. Sed quia febris adest, minus tutæ evacuantia, præsertim per alvum. Hinc lenienda tantum hæc, quod optime fit per clysteres atque nitrofa. Stagnantes dein humores resolvendi, quem in finem utilissimus fuit pulvis ille ex neutris salibus, innocentis & tamen præstantissimæ virtutis. Demum ten-

(IV.) Ttt tanda

tanda lenior alvi stimulatio, per innoxia etiam & clementia balsamica laxantia. Quod si ex voto succedit & vires decumbentis respondent, aliquamdiu est continuandum. Tutius enim semper est puerperas purgare per alvum, quam sudorem. Quam in rem peculiarem laudem sibi vindicant pilulæ Becherianæ, vel ad earum exemplar paratæ correctæ, quæ certe in mulierum morbis, præsertim qui in puerperio accidunt, leni evacuante & simul roborante virtute, omnia reliqua antecellunt, si perite & cum aliis congruis in usum vocantur.

## OBSERVATIO. VI.

*Febris uterina secundina lochiis & retentis sanata.*

Femina acutioris sensus, macilenta ac tenera, viginti octo annos nata, pathematibus hypochondriaco-hystericis obnoxia & aliquoties abortum passa, pepererat novissime filiolum laborioso admodum ad tres dies extracto partu, post quem nec secundina eliminata, nec lochia evacuata. Sequenti hinc dolores abdominis totius, præsertim sinistri lateris, cum febre, vomitu, dyspnæa, inquietudine & cardialgia. Ego in consilium vocatus, tertio post partum, die secare jussi venam pedis, ad uncias minimum quinque & injicere enema ex sola aqua pluviali tepida, cum una drachma pilularum Beccherianarum, mellis cochleari, adjectis duabus olei chamomillæ cocti uncis & dimidia salis Ebshamenfis. Sic alvus bis subducta & cardialgici dolores cum vomitu depulsi. Ad æstum autem extinguendum pulveres nitrosi dati, & ad mulcendos dolores, sperma ceti cum extracto croci in jusculo avenaceo. Septimo die quum æstus defervesceret, lochialem fluxum promoverè studui per usum pilularum nostrarum balsamicarum item sale aperitivo ex lapidibus cancrorum, terra foliata tartari & sale polychresto, nec non infuso theiformi ex mellissa, pulegio, floribus cheiri, calendulæ & chamomillæ. Quibus male olens sanguinolentus humor e putrefacta secundina, quin integra hujus frustula excreta, & ægra præter omnium spem, intra tres hebdomades, sensim sanitati reddita. Quinta demum

demum puerperii hebdomade infusum laxativum roborans uterinum, ex radice vincetoxici, pimpinellæ, rhabarbaro, agarico trochiscato, semine levistici, herba melissæ, floribus salviæ, foliis fennæ sine stipitibus, passulis & tartaro crudo, ad aliquot dies bibendum obtulimus.

*Epicrisis.*

Feminæ quæ spasinis hypochondriaco-hystericis & flatulentis passionibus obnoxia, sensibillioris ut plurimum ingenii, difficulter pariunt & gravius quoque in puerperio agrotant. Spasmi enim, ad quos natura jam dispositæ, non modo debitum sanguinis lochialis effluxum, sed & secundinarum exclusionem sæpe intercipiunt. Quin, dum per spasmos sanguis motu inverso urgetur ad superiora, caput, pectus & stomachum, accidunt illa symptomata gravia, dolor sinistri lateris in stomacho & coli flexura, cardialgia & vomitus. Tum itaque præstabilius non suppetit auxilium, quam venæsectio in inferioribus instituta & alvi subductio, quibus sanguinis motus ad inferiora revocatur simulque materia, quæ oneri naturæ est ac fovet & sustentat sæva illa symptomata, expurgatur. Quum vero pilulæ balsmicæ ad secundinarum & lochiorum emotionem virtutis sint celebratissimæ; propter dolores tamen & vomituritionem ore assumi nequiverint, optimum, ut sæpius expertus sum, fuit consilium, easdem dissolvere & cum clystere per os inferius injicere. Sedato post ea motuum impetu ac æstu, ipsa natura sponte materiæ putridæ ex secundina corrupta egressum est molita. Quem ductum sequi & molimen secundare fuit ex usu. Non tamen prætereundum post septimum diem, nostram affectam fuisse horripilatione quadam & frigore, intercurrente æstu, ac in situ erectiori lipothymia, quod procul dubio ab incipiente corruptione secundinæ accidit. Necessarium autem, sicuti in omni post puerperium morbo, sic etiam in hoc fuit, uterum cum primis viis, ultimis hebdomadibus, quando vires redeunt, convenientibus laxantibus & roborantibus expurgare,



non neglectis, pro circumstantiarum ratione, balneis ex herbis nervinis ac uterinis.

## OBSERVATIO VII.

*Febris u-  
terina re-  
petita ve-  
næsectio-  
ne & su-  
dorifero  
curata.*

Puerpera habitior, plethorica, exposuerat quinto post partum die corpus auræ frigidiori, simulque gravi terrore propter exortum incendium fuerat percussa. Mox inde male habuit, lochiorum fluxus substitit, dyspnœa accessit, dolor acutus sinistri lateris thoracis, cum tussi sicca, pulsu duro, celeri & præcordiorum anxietate. Data mixtura diaphoretica & discutiens & postera die secta in talo vena. His respiratio quidem facta liberior, sed fluxus lochialis non revocatus. Hinc exhibitum crebro infusum theiforme ex herba veronicæ, cardui benedicti, floribus salviæ & radice liquiritiæ, repetita quoque mixtura modo laudata. Nil tamen profectum, pulsus mansit celer, dolor perstitit, nox fuit inquieta, leviter etiam deliravit & nares aliquot guttas stillarunt. Quare quum sanguine redundaret femina, iterum in cubito vena per-tusa, & postea datus liquor anodynus, cum quarta tincturâ bezoardicâ parte & grano camphoræ. Quo sudor per universum corpus per viginti quatuor horas manavit effusus, post quem alvus clystere molliente subducta. Demum rursus prodierunt uteri purgamenta & ægra ex ancipiti est levata.

*Epicrisis.*

Puerperis nil certe perniciosius, quam frigus & terror. His enim spastica infertur strictura, sanguinis motus ad caput & pectus convertitur, lochiorum fluxus sistitur, pedes frigent, alvus stringitur, caput rubet & tumet, somnus fit turbulentus, delirium leve ingruit, ac nisi cito succurritur, aut phrenitis, aut lypothymia graves, mortis prodromi, accidunt. Hoc si evenit, præstantius non est remedium venæsectione, etiam reit-rata, & clysteribus lenientibus iterato, si necessitas urget, injectis. Post sanguinem autem missum conducit efficax sudoriferum cum regimine congruo datum. In hoc casu, ubi spasmi & dolores symptomatum causa, liquor meus anodynus, qui

qui tutissimæ virtutis sedativæ, cum sudorifero, uti spiritu cornu cervi succinato, aut spiritu bezoardico *Busii* datus, ad sudorem movendum & motum humorum exterius vertendum, optimum fuit præsidium. Sola enim anodyna non suffecerunt, neque etiam sola sudorifera, sed ambo mixta & quasi ad temperamentum reducta. Ratio vero, quare frigus tam pernicialia in puerperis inducat pathemata, est acutus sensus orificii ipsius uteri, quod ex multis fibris nerveis & musculosis contextum & quo a spasmo gravius affecto, universa œconomia motuum salutarium, tam secretiorum, quam excretiorum potest inverti. Nam ex vero scribit *Hippocrates lib. II. epid.* post partum os uteri sæpe contorqueri & dolorem fieri juxta coxam & crus, sed secta tali vena liberari. Quem in locum *Mercurialis præl. Bonon.* commentatur hunc in sensum; contorsionem uteri esse affectum, in quo os uteri discedat a propria regione. Tandem in nostra etiam commemorabile, quod secunda venæsectio in cubito plus effecerit, quam prima in talo. Est tamen hoc non perpetuum. Quod si enim lochia subsistunt, præstat semper in inferioribus sanguinem post pediluvium subtrahere. Sed quando sanguis jam cum impetu ad caput delatus, ad arcendam phrenitidem, satius est, in loco propinquiore impetum derivare. Mihi certe aliquot innotuerunt exempla, ubi lochiis subsistentibus, purpurata febris oborta, cum gravissimis symptomatibus, lipothymiis, præcordiorum anxietatibus, mortem ipsam minitantibus, quæ tamen misso in brachio sanguine & derivato a corde & appensis ipsi majoribus tubis sanguine mox per DEI gratiam discussa.

#### OBSERVATIO. VIII.

Illustrissima persona triginta aliquot annorum, habitu *Vteri stil-* corporis laxo & pleno, sanguinea, antehac optima valetudine *licidum* usa, sed ab aliquot annis, ob præmaturum conjugis dis- *perpetu-* cessum, impenso mœrore aliisque crebris animi commotio- *um cum* nibus affecta, multis quoque arduis negotiis distenta minusque *gravibus* salubrem victum colens, ante quadriennium incidit in pectoris *sympto-* oppressionem & spasticam ventriculi inflationem, quæ ta- *matibus.*

men interno & externo Carolinarum mitiorum usu abacta, ut postea belle valeret & mensium quoque successus legitimus esset atque sufficiens. Anno autem abhinc, post superatam febrem continuam & perpeßos diuturnos catarrhos, primum turbari coepit mensium fluxus, modo anticipare, modo postponere semperque cum exquisitis ventris torminibus ac dorfi tensione prodire. Recruduerunt quoque pathemata spastica hypochondriaco-hysterica & accessit stillicidium muci rubicundi ex utero perpetuum, cum virium languore, appetitu prostrato, somno turbato & plumbeo corporis aspectu. Quin, quum nuncio aduerso admodum percelleretur instante mensium periodo, præter superiora pathemata, dolor acutus in hypogastrio obortus, ac si omnia ex imo ventre vi quadam deorsum urgerentur, secedente simul cum difficultate urina turbida feculenta, intermixtis mox cruoris lenti grumis, mox fibris & filamentis cruentis. Potissimum dolor acerbissimus compunctorius consedit fixus in hypogastrio, supra os pubis, in circumscripta regione, magnitudine dimidii uncialis, ex qua antrorsum ad vesicam, retrorsum ad sacrû os, inferius versus femora excurrit, superius autem venter flatibus fuit cum molestia obsessus. Interim ad hypochondriaco-hysterica pathemata & stomachi vitium tollenda ad Carolinas iterum tendit iisdemq; sub debito regimine interius usa est atque exterius. Quibus ventriculi & intestinorum dispositio morbosâ emendata, uteri autem vitium nec in deterius interea, nec melius mutatum. Idem potius perstitit, & interjecto aliquò tempore, eo processit morbus, ut post spasum in infernis, semper mox sanguis sincerus, nunc spissior, nunc crassior, mox concrementum quoddam coagulatum & quasi membranaceum secederet, difficultates tenesmodos sub mictione & cacaturitione essent perpetuæ, per alvum mucositates globosæ ac teretes, modo cum, modo sine excrementis, evacuarentur, urina excreta turbida cum sedimento limoso, subroseo & cuticula carulescente pituitosa, pulsus maximam partem esset exilis, debilis ac frequens, corporis & faciei habitus pallidus admodum, extenuatus, appetitus inconstans, tussicula sicca agrypnia propter dolores



lores in hypogastrio exquisitos parum cessantes ferme habituales, post partum phlogoses affligerent, refrigerationes artuum sæpe recurrerent, vires collaberentur & quandoque deficerent plane.

*Epicrisis.*

Ad oppugnandum gravem hunc morbum in consilium vocati Medici multi, & plures forsitan quam expediebat, in diversum plane abeuntes. Aliqui enim calculum & nephritidem esse volebant, alii malum hypochondriacum, alii scorbutum, alii affectum hypochondriaco-spasticum hystericum, alii organum furiosum. Ego vero, cum ordinario & celeberrimis binis Medicis censui, vesicam uterum & rectum intestinum arctius invicem connexa & in cavitate pelvis comprehensa, a sanguine & succis stagnantibus esse infarcta, eorumque vasa & glandulas relaxata partim esse nimiumque distenta, partim læsa, plane erosa atque exulcerata, & hinc prodire illum fluxum uteri perpetuum & pressorium illum etiam sub alvi & urinæ excretionem dolorem atrocem. Dedi etiam consilium, ut adhiberentur ea, quæ partes affectas & spasmis & inflammatione defendant; quæ nimium humorum affluxum ab iisdem avertant easdemque tam interius quam exterius mulceant, roborent atque consolident, pulveres scilicet temperantes nitrosos, pilulas balsamicas, infusa theiformia, ex melissa & millefolio, potum ordinarium Selteranarum cum quarta vini parte epithemata & emplastra discutientia & roborantia, injectiones quoque in uterum circumspecte factas demulcentes & balsamicas, & postremo omnium saluberrimum lactis alinini potum aliquandiu continuatum, interposito subinde balneo tepido, ex aqua dulci cum lacte & fursuribus triticeis. Sed uti fieri assolet in principibus personis, ut multi Medici perdant ipsas, ita heic etiam, & multa, & varia, quin nonnunquam incongrua plane, usurpata sunt remedia, & quod præcipuum est in longis ejusmodi vitiis rejectum, diu continuatus accommodorum medicamentorum leniorum usus. Hinc sensim, uti comperi, in pejus ruit malum, pathemata magis adaucta, corpus plane contabuit, vires exhaustæ, & vix alius eventus sperandus, quam quem in simili fere casu supra *observatione II.* accidisse meminimus.

OBSER-

## OBSERVATIO IX.

*Febris u-  
terina ni-  
mia ve-  
næ sectio-  
ne lethali.*

Illustris femina, triginta & trium annorum, sana & vegeta, post partum conquerebatur altero statim die de insigni ardore, dolore & tumore in interioribus vaginæ, a rudi contrectatione obstetricis colli uteri interni, inducti. Exacerbatis postea symptomatibus, accedente febrili aestu & lochiis etiam non rite fluentibus, advocabatur Archiater. Is venam secare iussit in brachio. Quo quum nil levaminis accederet, sed præcordiorum anxietates, cordis palpitaciones & inquietudo intenderentur, alvus quoque cum pedum frigore stringeretur, decoctum mannatum cum cassia dedit, & spatium septem dierum, sexies misit, modo in brachio, modo pede, sanguinem. Sed quum postremo id fieret, ægræ oculi coeperunt obfuscari, ut candelam inferre juberet, quum tam dies esset quam lucidissima, quin brevi post lethali lipothymia correpta obiit. Die post sectum cadaver, nil autem repertum, præter tumorem vaginæ, cui insidebat macula nigra dinidii uncialis magnitudine, ad internum uteri orificium, ac in toto vasorum systemate vix aliquot restitabant sanguinis cochlearia.

*Epicrisis.*

De veritate hujus historiæ testis ego sum *αὐτόπτης*. Quilibet autem illico judicabit, temerarie & imprudenter tam crebro administratam esse venæsectionem, a Medico, qui in Gallia hoc artificium edoctus & alias ob peculiarem variolas & petechiales febres curandi modum non est ignotus. Dolor enim & spasmus ac inflammatio facili negotio, applicato parti dolenti epithemate discutiente & datis interius blandis diaphoreticis, potuissent abigi. Nimia vero sanguinis subtractione, & lipothymia inducta, & sphacelus contractus, licet unica non nocuisset venæsectio. Nam ipsa inflammatio sufficienti & valido sanguinis appulsu discutienda, eodemque plus justo subtracto, necessario sequitur sphacelus. Igitur sicuti plures Medici delinquant in eo, quod in inflammatoriis puerperarum affectibus sanguinis missionem repudient omnem; ita heic in excessu peccatum fuit graviter. Sed medium tenere beati.

## CAPVT XI.

DE

INFLAMMATIONE OCULO-  
RVM CVM ET SINE FEBRE.

## THESES PATHOLOGICAE.

## §. I.

**F**requentissima est inflammatio membranarum oculum in-  
vestientium, tunicae praesertim adnatæ, sive albugineæ, *Ophthalmia de-*  
græco nomine dicta ophthalmia. Iungitur hæc cum dolore *scriptio.*  
acuto, interdum & pressorio, ardore, rubore, tumore & feri  
falsi ex oculis effluxu, nec non visu imminuto, vel plane de-  
perdito. Oritur autem quando vasa arteriolarum lateralia,  
quæ secundum naturam pellucidum nulloque colore infectum  
liquorem vehunt, a sanguine valide ad caput congesto im-  
plentur, distenduntur & visui sese offerunt. Hanc enim cau-  
sam esse, patet experimento, quo injecto per siphonem in  
carotidis ramum liquore spissiusculo rubicundo, adnata oculi  
tunica, per omnem sui ambitum rufescens & inflammata com-  
paret.

## §. II.

Est autem ophthalmia, vel levior, vel gravior, velet- *Levior*  
iam gravissima. Levior albugineæ tantum tunicae insidet, *est, gravi-*  
nec tam late diffunditur, facilius discutitur & oritur potissi- *or, vel*  
mum a causa externa leviori, insperso pulvere, appulsu aspe- *gravissi-*  
riori, plaga aut allisu leniori, aura liberius admissa frigida & *ma.*  
fudore subito represso, nec non ab administrata cataractæ  
depositione. Gravior, præter adnatam, etiam confines pal-  
pebras infestat totumque oculum exquisito ardore & dolore  
afficit, qui ad levem lucis accessum exacerbatur. Enascitur  
hæc maxime a causis internis, feri nempe impuritate & salu-  
taribus excretionibus cohibitis, ac uti ego observavi, a sup-  
(IV.) Vvv presso



presso solenni matutino sudore, a scabie, nec non tinea capitis intempestive abacta, a cohibitis mensibus, ulceribus & fistulis consolidatis, item repulsa rosacea gutta, & propterea ægrius, nec nisi internis & externis adhibitis, discedit. Gravissima demum profundior est, ad ima oculi & interiores tunicas penetrat. Comitatur hanc dolor acerbissimus cum febre, quandoque etiam cum delirio, sequitur suppuratio & humorum effluxus, remanente cœcitate perfecta. Rarius tamen a causis internis, sed plerumque a contusione validiori inducitur. Vidi ego suppurationem excidente lente crystallina, post ictum fortem inter pugillandum oculo inflicto, vidi vero etiam talem casum a tinea capitis inveterata, subito externis siccata.

## §. III.

*Vera, vel  
notha.*

Deinceps alia ophthalmia est vera, alia notha, sive spuria. Veræ causa maxime interna & symptomata graviora, a sanguinis in tubulis stasi, ægrius abigenda. Spuria a causa magis externa, uti pulvisculo in oculos illapso, a vapore acris, ceparum & alii, symptomata hinc sunt mitiora & facilius cedit ipsa. Alta sicca est, alia humida. Illa fit a sanguine calido, cum dolore acuto, pungitivo ac nil ex oculo effluit. Hæc mitiori quidem stipatur dolore & ardore, sed palpebræ tument & multum feri acris effluit, ut oculi noctu conglutinentur. Illa frequens sanguineo-cholericis, juvenibus ac æstivo tempore, hæc pueris & infantibus, nec non feminis & plegmaticis.

## §. IV.

*Epidemica & periodica.*

Datur quoque ophthalmia epidemica & periodica. Epidemica enascitur certis anni temporibus a diuturna humida & frigida aeris constitutione, post quam ophthalmicum morbum plures invadere sæpius observavi ac idem testatur *Amatus Lusitanus Cent. VII. obs. LXXX.* Quæ autem certo quodam tempore, vel quotannis, vel circa æquinoctium, vel singulis mensibus infestat, solennis est, quando sueta sanguinis

nis missio intermittitur, menses non rite fluunt, aut retinentur, quando hypochondriacus affectus subest & sanguis in vasis hæmorrhoidalibus stagnans flatus & spasmos concitat in abdomine, quibus sanguis cum impetu urgetur ad caput & oculos.

## §. V.

Præterea vero quæ jam de causis ophthalmiæ diximus *Cause* passim; ad eandem maxime disponunt crapula, venus & vi-*ophthal-*gilia immodica, lucubrationes cum intemperantia studiorum, *miæ.* ventus borealis, crebrior aspectus ignis, solis, & colorum splendidiorum. Idem faciunt fumi acres & metallici, alvus diu & multum adstricta, refrigerationes extremorum immoderata, inprimis mensium tempore, item præcedentes oculorum morbi, debilitatem quandam relinquentes; ophthalmia ipsa, nec non quam maxime variolarum & morbillorum morbus, maximam ad oculorum affectus inducens dispositionem. Quando autem, uti haud raro fit, hemi-craniæ, interdum etiam odontalgia, jungitur ophthalmia, serum acre scorbuticum subest, idque aliquoties contigisse novi, a podagra retropulsa, ejusdemque materia non modo ad pericranium, sed & oculorum tunicas & periostrium maxillæ superioris delata.

## §. VI.

Levem illam ophthalmiam facile dispelli, gravissimam *Eventus.* in oculi suppurationem cum cæcitate transire, etiam jam monitum. Gravior autem est contumacior, durat sæpius per mensem & longius, ac haud raro maculas in cornea relinquit, splendorem oculorum obfuscet, humores turbidos tunicamque corneam crassiores, glaucam minusque pellucidam reddit. Semper etiam difficilior curatu in pueris, nec non in senibus, in illis ob succorum lymphaticorum abundantiam & partium teneritudinem; in his vero ob humorum impuritatem.

## CVRATIO.

## §. I.

*Humores  
derivandi.*

In medicatione ophthalmiæ tria hæc perficienda : I. sanguinis, vel etiani feri acris motus a capite derivandus; II. stasis inflammatoria discutienda; III. symptomata graviora arcenda & oculus defendendus a recidiva. Inter ea quæ humores a capite divertunt, est maxime sanguinismissio, quam ex jugulari institutam mire laudat *Hildanus Cent. IV. obs. XIII.* Alii sublingualium commendant sectionem, sed ante hanc, si sanguis redundat, in brachio aut pede prius pertundenda vena. Sunt qui cucurbitulas cum scarificatione in nucha & pone aures suadent, & veteres appositis hirudinibus multum detulerunt. Dein divertunt efficaciter pediluvia, quibus ter intra viginti quatuor horas usurpatis, potò simul liberaliter infuso theiformi feliciter discussam esse ophthalmiam, aliquoties vidi. Serum porro acre falsum valide ab oculis revocant vesicatoria, nec non si malum inveteratum setacea, prosunt quoque sinapismi, ex semine erucæ sacculis incluso, in vino cocto ac in nucha, vel sub axillis admoto. Præterea optime caput ab humorum affluxu liberant laxantia, vel etiam pro circumstantiarum ratione purgantia. Sponte enim purgatione sæpe solvi ophthalmiam notavit *Hippocrates Sect. VI. aph. XVII.* Et *Galenus Meth. med. lib. XIII. cap. 2.* gravis testis est, nonnullos quibus oculi inflammati sola purgatione per alvum una die sanatos.

## §. II.

*Stasis discutienda*

Divertens simulque discutiens egregia virtus inest dia-phoreticis quæ liberam perspirationem procurando, non modo ab oculis & capite ad corporis ambitum humores agunt, sed & succos ab acrimonia falsa repurgant. In ipsa autem parte affecta inflammatoria stasis discutienda & internis & externis. Ex illis omnibus præferendum infusum theiforme ex radice valerianæ, liquiritiæ, floribus sambuci & semine fœniculi, quod largi-



largius potandum & ante potum vapor ipsius consulto sub tecto capite ad oculum admittendus. Inter externa efficax & securum hoc collyrium : recipe aquæ florum sambuci, sclopetariæ ana unciam unam, camphoræ grana tria, sacchari saturni grana decem. M. quod cum linteo triplicato crebrius tepide oculis applicandum. Quando autem nimis mordens adest acrimonia, mucilaginem corticis medii florum tilix, item seminis cydoniorum, cum aqua rosarum, addito pauxillo croci, sine vel cum opio, admoveere expedit. De symptomatum medicatione dicetur in cautelis.

### CAUTELAE ET OBSERVATIONES CLINICAE.

#### §. I.

Quia ophthalmia gravitate differt, diversa etiam ineunda medendi methodus. Quam levem diximus, optime fert frigida & repellentia, ac solum albumen ovi, cum aqua rosarum & pauxillo aluminis conquassatum, sufficit omnibusque aliis palmam præripit. Gravior non solis externis cedit, sed interna efficacia exigit remedia, quæ serum recrementitium ab oculis divertant, salios & acres humores diluant atque contemperent eosdemque successive per congrua emunctoria eliminant. Proficua hunc in finem infusa theiformia, serum lactis dulce, aquæ minerales, tam martiatæ, quam alcalinæ, temperantes & diaphoretici pulveres, non omissis laxantibus, pediluviis, nec non urgente plethora & suppressis criticis sanguinis evacuationibus, venæsectione tempestitiva. In gravissima cum febre & ubi periculum est, ne in suppurationem transeant interiora, e re est, ut repetita venæsectio instituat, aut liberaliter sanguis subtrahatur, & hoc quidem omnium optime per venam sectam jugularem. Interius pugnandum diaphoreticis, demulcentibus & resolventibus, inter quæ salubritate antecellunt pulveres bezoardici, cinnabarini, leniter nitrosi

*Curatio  
gravitatis  
mali ac-  
commo-  
danda.*

& camphorati, pota simul loco ordinarii potus ptisana. Exterius vero abstinendum a collyriis refrigerantibus & potius aqua sic dicta sclopetaria, cum aqua rosarum & florum sambuci, adjecto pauxillo croci & camphoræ, tepefacta, cum linteo duplicato admovenda.

## §. II.

De V.S. &  
vesicato-  
riis.

Non in omni ophthalmia necessaria sanguinis missio, sed tantum ubi plethora eminens, venæsectio aut scarificatio omissa, vel etiam critica quædam hæmorrhagia intercepta. Interim si mali origo a sanguinis redundantia, præstat prius venam brachii, pedis, aut jugularem aperire, ac postea, si opus est, scarificare pone aures, vel in nucha. Setacea & vesicatoria non facile applicanda in plethoricis, nisi soluta prius plethora, & alvo, præsertim in cacoehymicis, subducta. Neque, si vesicatoria necessaria, ea semel tantum apponere sufficit, sed sæpius, in locis sensibilibioribus, uti nucha, olecrano, carpis Manuum. Hinc præfertur setaceum, cui tamen, quia & dolorosum, & molestum nimis, nos anteponimus vesicatorium temperatum minus, grossi magnitudine, per mensem & longius in nucha gestatum.

## §. III.

Purgan-  
tibus &  
diaphore-  
ticis.

De purgantium usu tenendum, corporum & naturarum diversitati eundem esse accomodandum. Si res mannatis, tamarindinatis & tartareis expediri potest, non confugiendum ad acriora. Alias in torpidioribus & phlegmaticis, pilulæ efficaçiores, uti tartaræ & de succino *Cratonis*, vel tutius nostræ balsamicæ, aliquoties porrigendæ. Diaphoretica egregii usus, sed diutius adhibenda, quando magis serum acre salsum, quam sanguis in vitio est, tanto magis si ophthalmia symptomatica, alii morbo supervenit, aut jungitur hemicrania.

## §. IV.

Regimen  
& victus.

Quemadmodum in omnibus oculorum morbis; ita maxime in eorum inflammatione, ab omnibus

bus spirituosus, spiritu vini, vino, fumo tabaci, etiam sternutatoriis. Arcendi fumi, ceparum & allii vapor, cum ignis, radiorum solis, lucis & colorum fulgidorum aspectu. Vitandus corporis exæstuans motus & nimius crassusque victus. Potus sit aqua pura, vel ptisana, aut decoctum ex semine foeniculi, rasura cornu cervi & hordeo, Colenda sobrietas, victu molli & temperato utendum, ac quiete in loco tenebricoso commorandum.

## §. V.

In administratione topicorum, sive collyriorum, magna <sup>Topica</sup> opus est cautione. Plures enim, notante etiam <sup>noxia.</sup> *Septalio*, imperito horum usu, cœcitate affectos novimus. Scilicet ut plurimum aut acria nimis sunt, ex aqua calcis vivæ, sale ammoniaco, cum vitriolo albo, vel Cyprio; aut nimis adstringentia, cum alumine, sanguine draconis, bolo Armena, lapide calaminari, tutia & albumine ovi; aut nimis refrigerantia, quæ aquam spermatis ranarum, rosarum, plantaginis, adjecto saturni saccharo habent; aut nimis exsiccantia, ut quæ cum cornu cervi usto, lapide calaminari & tutia confecta; aut etiam nimis laxantia, ex mucilagine seminis psyllii, cydoniorum, foenu græci, tragacantha & butyro insulso. Omnia autem hæc, licet in aliis oculorum affectibus præstanti non careant usu, in inflammatione tamen, præsertim sanguinea, tantum abest ut prosint, ut potius noceant. Inde enim non modo peior & profundior redditur stasis, sed & ipsi humores oculorum pellucidi fiunt turbidi, sequitur oculi tabes corrugatio, suffusio, epiphora chronica, rubens, sicca & aspera, quin palpebrarum exulceratio.

## §. VI.

Ego potius auctor sum, ut seponantur topica omnia <sup>Quæ pro-</sup> ante tertium diem & antequam convenientia interna jam <sup>ficia.</sup> usurpata, exceptis solis sacculis ex paregoricis & demulcentibus compositis. Postea vero omnium optima quæ supra commendata. Neque tamen etiam in chronica ophthalmia, ubi



ubi continuum lymphæ falsæ, acris est stillicidium, inglori-  
um est *Hæchstetteri* medicamentum ophthalmicum, ex butyri  
recentis infusi drachmis duabus & vitrioli albi scrupulo, de  
quo granum pisi majoris magnitudine in oculi canthum sub-  
inde indendum.

## §, VII.

Reliquia  
ex oph-  
thalmia  
quibus de-  
lenda.

Quando, quod sæpius fit, ophthalmia tandem discedens  
relinquit speciem maculæ & visum imminutum, tunc nihil  
præstantius est axungia viperarum recenti ex Italia allata,  
& crebrius ad aliquot guttas oculo instillata. Egregie etiam  
visum turbatum & imminutum restituit sal volatile falis am-  
moniaci siccum, oleo majoranæ imbutum & odore crebrius  
naribus susceptum. Ejusdem virtutis vapor ex decocto radi-  
cis valerianæ, florum sambuci, seminis fœniculi, ad oculos  
tecto prius linteo capite, admixtus. Sed opus est, ut hæc  
auxilia mature ac tempestive adhibeantur. Si enim invete-  
ravit & radices egit vitium, difficillime sanescit. Novi ta-  
men, visum fere deperditum ex ophthalmico morbo linimen-  
to mercuriali genubus & poplitibus illito interpositisque bal-  
neis aquæ dulcis, redditum fuisse. Neque minus potenter  
viscidos & coagulatos humores dissolvit ac sudorem movet,  
sulphur nostrum antimonii fixatum, eaque propter in ocu-  
lorum vitiis egregie conducit.

## ENARRATIONES MORBORVM.

## OBSERVATIO I.

Ophthal-  
mia ex  
ictu sup-  
purata.

Juvenis sanguineus, in palæstra gladiatoria æstuans, ac-  
ceperat forte inter pugillandum ictum cum gladio palæstrico,  
quem vocant *ein Rappier*, in oculum sinistrum, subsequen-  
te mox rubore ac dolore. Ille tamen pensi hæc habens,  
vesperi largiter ingurgitavit vinum, rixas quoque acres cum  
sodalibus movit. Inde die post magnus tumor oculum ejus-  
que vicinas partes occupavit, cum dolore pulsatorio, cepha-  
lalgia, præcordiorum anxietate ac pulsu celeri. Chirurgus  
advo.

advocatus, non adeo magni momenti esse putans, applicuit collyrium frigidum, quo symptomata adeo exacerbata, ut somnum abigerent omnem. Hinc Medicus in consilium vocatus, qui sanguinem mittere & pedibus bursam pastoris admove jussit. Sed incassum. Inflammatio potius abiit in suppurationem; & quinto ab inflicto ictu die, ingens puris quantitas ex oculo fluxit; quam ipsi humores sequuti & sic oculus cum omni visu periit. Quin postea summa cura intendendum fuit, ne hæc inflammatio & exulceratio in sphacelum degeneraret, quod etiam a Medico applicatione spiritus vini camphorati cum essentia croci, & data interius tinctura bezoardica, præstitum est.

*Epicrisis.*

Nunquam periculo vacat oculi inflammatio profundior, qualis exsurgere solet a graviori contusione, vel vulnere, quia ejusmodi inflammatio non facile discutitur, sed in suppurationem, non sine sphaceli ipsiusque vitæ discrimine, abit. Nostro quidem judicio averti potuissent gravia hæc symptomata, si æger non largiori vini potu sanguinem commovisset majoremque ad partem jam affectam proritasset affluxum; si dein statim post contusionem sanguis e brachio missus fuisset & cataplasma, sive sacculus ex discutientibus, uti radice sigilli Salomonis, ireos Florentinæ, rosarum rubrarum, anthos, lavendulæ, sambuci, chamomillæ, camphora & croco in vino coctis, fuisset admotus, nec Chirurgus instillatione frigidi collyrii inflammationem reddidisset deteriore.

OBSERVATIO II.

Femina XLII. annorum, sanguinea, obesa, scorbutica & *Ophthalmia peridica.* glandulas in collo tumefactas gerens, post retentum mensium fluxum, corripiebatur oculi sinistri dolore ac rubore, cum ejusdem lateris cephalalgia admodum vehementi. Liberata primum, annum postea semper, mense Octobree, hujus mali experta est recursum, sub quo appetentia erat prostrata, lu-

(IV.)

Xxx

cem

cem ferre non poterat & feri ex oculis copiosum stillicidium semper experiebatur ; quod per aliquot menses persistebat. Pluribus usa remediis, sed incassum, & notabile erat, quod quoties sal volatile oleosum sumeret, toties soporem & torporem ingentem capitis pateretur. Vt itaque hic affectus, qui per triennium ægrum mirum afflixerat, radicitus extirparetur, acidulas Pyrmontanas ætate sub debito regimine potabat, quibus etiam alvus & urina optime secessit & ipsa postea a contumaci malo est liberata.

*Epicrisis.*

Periodica hæc est ophthalmia, ex mensibus suppressis in plethorica femina oborta, mense maxime Octobre, quo alias solennes sunt sanguinis excretiones, commotiones & molimina ad excernendum, præsertim per hæmorrhoides. Quare impensius hoc tempore sanguis regurgitavit ad caput, ac non tantum oculum, sed etiam membranas capitis ejusdem lateris male affectis, unde dolores. Sopor vero & torpor ille, qui ex usu salis volatilis assumpti accidit, inde derivandus, quod hoc remedio, congestus in capite sanguis magis rarefactus, sicque recursus ipsius per venas interceptus. Dein notabile est, quod morbi qui statas servant periodos, plerumque fundamentum habeant in abdominis visceribus, unde optimo consilio ad eradicandos eos, commendari solet usus aquarum medicatarum, thermarum & acidularum, ad removenda vitæ vitia efficacissimus.

OBSERVATIO. III.

*Subita inflammatio a festuca ferrea.*

Vir quadragenarius sanguineo-cholericus, subito affectus est dolore oculi ac rubore, quem sibi accidisse putavit, a festuca minima ferri, sub ictu clavi cum malleo in oculum saliente, licet nihil omnino de ea in oculo compareret. Ipse igitur ad tollendam passionem oculo subinde instillavit collyrium frigidum, ex aquis ophthalmicis, quo quidem calor & ardor delinitus, sed bulbus turbidus & obscurus comparuit



ac omnis visus periit. Me hinc vocavit in auxilium, qui, ne coecitas ingrueret perfecta, obviam ivi hisce; sal volatile ammoniaci siccum, oleo majoranæ imbutum, crebrius naribus admove, fronti & temporibus emplastrum ex gummi elemi, animæ, mastiches, olei nucistæ ana drachmis duabus, camphoræ & balsami Peruviani ana drachma, applicare & frequentius ac copiose bibere jussi infusum seminis foeniculi cum aqua. Quibus intra aliquot hebdomades oculus recepit splendorem & visus aciem.

*Epicrisis.*

Si inflammatio subito oculum adoritur, non injusta est causæ externæ suspicio, licet eadem non semper in conspectum veniat, quia interdum adeo subtilis, ut visum fugiat, ut fit si a fumo acri membranæ oculi male afficiuntur. Discimus vero etiam, quam nocens sit instillatio frigidi in oculum ardentem, nec non quo pacto quibusque remediis oculorum humoribus turbidis reddenda sit perspicuitas.

OBSERVATIO IV.

Juvenis literarum studia intemperantius tractans, indulse-  
rat a longo tempore nimium lucubrationibus & inde sibi *ophthal-*  
infirmam contraxerat visus debilitatem. Post annum inva-  
sit oculos dolor gravativus pressorius, non sine ardore, adeo *mia no-*  
ut nec lumen aspicere, nec citra molestiam legere posset, *tha rebel-*  
sed statim largum oculorum stillicidium experiretur. *lis.* Medi-  
ci suaferunt purgantia, tabaci fumum, oculi cum balsamo  
Peruviano inunctionem externam, nec non fonticulum in  
nucha. Frustra tamen. Quin licet purgantia postea forti-  
ora, decocta sanguinem purificantia, venæsectionem in pede,  
pediluvia cum accurato in diæta & victu regimine adhibe-  
rent, nihil tamen aliud omnibus effectum, quam ut ventricu-  
lus debilitaretur insigniter. Alii de scarificatione admini-  
stranda, fonticulo brachio inurendo & pinguedine vipera-  
rum instillanda oculo dederunt consilium, sed eodem frustra-  
neo effectum. Adiit etiam æger Pyrmontanas acidulas, qui-

bus labes & infirmitas oculi adaucta & nubecula visui oblata, ut cataractæ plane metus esset. Pariter in vanum laboravit Medicus, qui decoctis sanguinem purificantibus, vesicatoriis, sternutatoriis variisque collyriis pertinax malum abigere molitus est. Tandem vero solo usu pilularum mercurialium cum gummatibus & extractis balsamicis amaris, item infuso theiformi, ex semine foeniculi, cum anatica lactis parte, nec non externe cataplasmate, ex mica panis similaginei, cum cremore lactis, croco & floribus sambuci, allatum mihi ferro levamen, dolor pressorius discessit, remansit vero quædam visus imbecillitas.

*Epicrisis.*

Hic oculorum affectus non quidem ad veram & exquisitam ophthalmiam referendus, sed magis ad notham, quæ ex stagnatione lymphaticorum humorum in oculis & sanguinis circuitu libero impedito, ortum traxit. Hæc autem causa, quia Chirugos & Medicos latuit, adhibita præpostere medicamenta nihil profecerunt. Erant enim non tanti, ut vasculorum tenuissimorum obstructionem expedire potuissent. Illa vero postremo usurpata efficacia resolventia, pilulæ mercuriales, nec non exterius cataplasma, accommodata utique fuerunt atque proficua. Igitur multitudo & varietas medicamentorum, prodit ut plurimum Medici ignorantiam, qui, si causam morbi rite intelligit, nec adeo multis, nec variis opus habet remediis, sed paucis, usu probatis, sæpe simplicibus, diutius tamen usurpandis.

OBSERVATIO V.

*Ophthalmia gra-  
vis cum  
ruptura  
cornea.*

Viro triginta annorum inopinato pauxillum succi illius acris, quo capillorum concinnatores, capillos atro colore inficere solent, in oculum ceciderat. Hinc sequutus rubor oculi & dolor acerbissimus, ut patiens nec cibum, nec somnum capere posset, ac ferendo cruciatu fere esset impar. Chirurgus in consilium vocatus, collyrium ex aqua rosarum, plantaginis & tutia, frigide instillandum suavit, hocque

que nihil plane proficiente, saccharum saturni in aqua rosarum solutum crebrius cum linteò dolenti oculo admove-  
 jussit. Sed nihil his dolorum atrocita mitigata, oculi potiùs  
 bulbus quasi decrevit & minor factus, humores turbati &  
 visus plane periit, in cornea quoque tumor apparuit durus,  
 instar pisi. Admotà quidem nuchæ vesicatoria, usurpata  
 quoque purgantia, sed malum plus in deterius, quam melius  
 versum. Hinc Chirurgus desperabundus deseruit ægrum,  
 omnesque adstantes de visu unquam recuperando dubitare  
 coeperunt, inprimis quum præterea palpebra oculi affecti ele-  
 vari non posset, sed semper clausa & elevata manu sensus  
 expers esset, quin vesiculosus tumor in internis palpebræ  
 compareret, aspectum oculi fere intercipiens.

*Epicrisis.*

Ophthalmia hæc fuit gravissima, cum ruptura corneæ,  
 oborta a succo acri in oculum illabente, qui arrosione afflu-  
 xum sanguinis ac humorum tunicarumque distensionem fecit.  
 Multum vero etiam ad grave malum contulit collyrium fri-  
 gide adnotum, eo quod stasin & stagnationem humorum  
 firmiorem reddidit & graviorem. Nos sequentibus ivimus  
 obviam: spiritus vini camphoratus cum balsamo Peruvia-  
 no, exhalato prius spiritu, cum linteò duplicato crebrius  
 oculo fuit admotus. Alvus pilulis ex mercurio dulci, gum-  
 mi ammoniaco, extracto panchymagogo *Crollii*, balsamo Pe-  
 ruviano & sale succini subducta. Adhibita pediluvia. Po-  
 tum copiose infusum theiforme ex veronica & semine fœni-  
 culi. Datum interius diascordium *Fracastrorii*, cum lapidi-  
 bus cancrorum & nitro. Et exterius cataplasma, ex pomo  
 affato, croco, mica panis similaginei cum lacte coctum,  
 oculo impositum. His dolor & rubor cum ardore sublatus,  
 palpebræ quoque tumor discussus, sed visus, ob corneam ru-  
 ptam & humores incrassatos, rediit nunquam. Vt adeo pa-  
 teat, quantum damni ab improvida collyriorum applicatio-  
 ne sit metuendum.



## OBSERVATIO VI.

Febris  
ophthal-  
mico-ce-  
phalica.

Juvenis generosus, viginti aliquot annorum, constitutio-  
nis teneræ & a scorbuticis parentibus genitus, capitis dolo-  
res & narium hæmorrhagias crebrius expertus, defluxionibus  
etiam catarrhalibus & coryzæ sæpius obnoxius, vitæque se-  
dentariæ, literarum amore ductus, nimium indulgens, incidit  
in cephalalgiam gravem, cum atroci oculorum dolore, alvo  
simul adstricta. Dolor hic erat periodicus, ita ut matutino  
quotidie tempore eum rubore & serisalsi effluxu, præcedente  
refrigeratione & subsequente pulsu celeri accederet, per sex  
circiter horas insisteret ac postea sensim discederet, die post  
rediturus, agro interim nec in somno, nec appetitu vitium  
observante, nisi quod subinde post cibum ructus experiretur.  
Detinebat singularis hic affectus per mensem agrum & fru-  
stra adhibita fuerunt præsidia varia, collyria, errhina, eva-  
cuantia, cephalica, nec non cucurbitulæ, tandem vero a me  
abactus est hisce. Ter scilicet alternis diebus dedi pilularum  
harum viginti: recipe extracti panchymagogi *Crollii*, gum-  
mi ammoniaci, mercurii dulcis, cinnabaris nativæ præparatæ  
ana drachmam semis, extracti croci, castorei ana grana sex M. f.  
c. balsamo Peruviano pilulæ ex scrupulo no. XX. Vna ante  
accessionem hora pedes immittere jussi ad genua usque pedi-  
ludio ex aqua fluviali, cineribus clavellatis imbuta, ac dum  
sic in balneo pedes servabantur, ad mensuram unam bibere  
infusum theiforme, ex herba melissæ, floribus tilia, radice  
valerianæ & semine fœniculi, quo sudor prolektus copiosus.  
Vesperis exhibui per aliquot dies pulverem ex pulveris Mar-  
chionis drachma dimidia, succini, nitri puri, cinnabaris anti-  
monii rectificati ana granis octo. Oculo exterius applicare  
præcepi aquam Regina Hungariæ, cum dupla parte aquæ  
rosarum & camphoræ momento. Crinibus quoque quoti-  
die inspersus pulvis ex succino præparato, radice ireos Flo-  
rentinæ, caryophyllis aromaticis & cardamomo. Quibus  
per octiduum usurpatis, discessit malum, sed restitit nubecula  
quæ-

quædam, visum quodammodo intercipient, quæ tamen crebriori instillatione pinguedinis viperinæ recentis, etiam sublata.

*Epicrisis.*

Febris hæc recte dici potest cephalico - ophthalmica, cujus causa fuit non tantum capitis debilitas a longo tempore contracta, verum etiam alvi ob vitam sedentariam adstrictio, qua spasmi in primis viis inducti, quibus ferofus sanguis ad caput impetuosius actus. Hinc primo omnium in medicatione fuit subducenda alvus, ac postea recte ante accessionem pediluvii & potu infusi theiformis roborantis copioso sudor prolektus per universum corpus. Sudor enim & aucta perspiratio egregie serviunt spasms & doloribus periodice certis stasisque temporibus redeuntibus discutiendis & abigendis. Deinde quoque in pertinacibus ejusmodi capitis oculorumque doloribus einnabarina & ipse mercurius dulcis, serum lentescens stagnans fundendo & obstructions expediendo, opem ferunt præsentissimam. Errhina vero & sternutatoria, plus nocent quam prosunt, quia humores magis ad oculorum confinia convocant. Varii etiam generis collyria, nisi simul discutiente virtute polleant, in ejusmodi oculorum affectibus plus nocementi, quam enolumenti asferre, multoties observavi. Tandem ad maculas oculorum & nubeculas delendas, pinguedine viperarum efficacius nihil, quam etiam *Ludovici & Wedelius* passim miris ornant encomiis. Habet enim acrimoniam subtilem, blande detergentem. Sed præstat in fine illam exhibere, non in principio, si ardor adhuc & dolor impensius urgent. Ceterum plura tum de ophthalmico, tum aliis oculorum affectibus commentatus sum in dissertatione, *de morbis oculorum præcipuis recta medendi ratione*, nec non in *Medicina consiliatorio*. *Tom. II. Dec. IV. Caf. II. pag. 163. sqq.* de dolore & imbecillitate oculorum cum suffusione incipiente.

OBSER-

## OBSERVATIO V.

*Ophthalmica hemicrania*

Generosus vir, sexagenarius, macilentus, victui duro & crasso falso assuetus, aliquot per annos singulis fere tribus mensibus, erysipelatis in pede dextro cum horrore & vehementi dolore insultum expertus est, quod tandem in suppurationem & ulcus desit, ac per annum & ultra ipsum detinuit, postea vero a Chirurgo perito consolidatum fuit. Ex eo tempore singulis fere mensibus, circa novilunium, incidit in hemicraniam dextri lateris, quæ simul gravi dolore, profundius in orbita hærente, cum feri falsi effluxu stipata, qui circa noctem exacerbatus fuit, & paroxysmus semper invasit cum horripilatione & extremorum refrigeratione, pulsu postea alterato & auctiori facto. Malum autem solvebatur post quartum diem facta crisi, mediante sudore largiore, ægro alias etiam sueto. Mali pertæsus, nostro ex consilio usus est Pymontanis acidulis, quas olim usurparat, hacque cura absoluta suasi ut loco potus ordinarii decoctum ex radice scorzonæræ, chinæ, cassaparillæ, liquiritiæ & passulis, biberet & singulis mensibus infusum ex manna, rhabarbaro & cremore tartari, assumeret, ut victum durum, salsum, aromaticum vitaret & fonticulum etiam dextro brachio inuri permitteret. Quibus remediis quum omni adhibita cura uteretur, liber non modo ab erysipelate, sed & ab hemicrania ophthalmica degit, scabie tamen sicca pruriente divexatus, sicque septuagesimum ætatis annum excessit.

*Epicrisis.*

Ophthalmica hæc est hemicrania, in qua notabile, quod cessante erysipelate & ulcere consolidato in pede dextro, materia scorbutica ad dextrum latus capitis & oculum fuerit conversa, & certis stasisque periodis hunc excitaverit morbum. Quum vero scaturigo tam erysipelatis, quam hemicranie & ophthalmie, sit quærenda in sanguinis & lymphæ dyscrasia scorbutica, utique potu acidularum, decoctorum & congruorum laxantium usu, universam sanguinis & humo-  
rum



rum massam perpurigare expedit & hac ratione in corpus potius ab ejusmodi vitiis defendere, quam eadem si adsunt abigere.

## CAPVT XII.

DE

## FEBRE INTESTINORVM INFLAMMATORIA EX MESENTERIO.

THESES PATHOLOGICAE.

§. I.

**I**Ntestina, tam tenuia, quam crassa, quæ membranosa fere <sup>Intestino-</sup> tota, ex tunica prima a peritonæo, altera musculari, cum <sup>norum</sup> fibris longitudinalibus & circularibus, nervosa & villosa <sup>inflam-</sup> contexta, innumeris nervorum & vasorum surculis perfusa <sup>mationes</sup> & exquisito sensu ac motu instructa, & multis, & gravibus <sup>frequen-</sup> morbis patent, e quibus haud postremus inflammatorius, qui <sup>tes.</sup> ipsis ex variis causis accidit. Nam atrocia illa & lethalia quandoque pathemata, quæ assumpta venena, emetica validiora & drastica purgantia excipiunt, ab inflammatione in sphacelum transeunte ortum ducunt. Vulnura ac læsiones intestinorum, non aliter, quam inflammatione necant. Febres synochas & ardentes, maxime cholericas, dysentericas, item plurimas malignas, neque minus exanthematicas, inprimis variolas, lethalem sæpe inducere inflammationem, uberius testatur dissectio his morbis defunctorum. Convulsivam etiam colicam, maximeque eam, quæ a podagra retrocedente, ac subsistente, ex cohibito, aut sufflaminato hæmorrhoidali fluxu, sanguine inducitur, iliacam quoque, ex hernia incarcerata, aut intestinorum convolutione, passionem, non alia ratione, quam intestinorum inflammatione, lethum inferre, est in comperto. Nihil quippe vitalibus motibus adeo est infensum,

(IV.)

Yyy

quam

quam putredo, quæ excipit inflammationem, ac in nervosis, exquisito motu ac sensu pollentibus partibus, consistit.

## §. II.

*Minus*

*nota quæ*

*ex mesen-*

*terio.*

Sed quia de intestinorum inflammationibus symptomata quæcunque eisdemque complicatis febribus, jam supra actum & adhuc congruo loco agetur; nunc duntaxat pauca tradere libet, de inflammatoria febre illa intestinali, quæ proficiscitur ex mesenterio. Jam apud Medicos in confesso est, plures morbosas affectiones, præsertim hæcticas, lentas, errantesque febres, nec non apostemata, in mesenterio sedem habere fixam; sed diarrhoeas, dysenterias, immo inflammatorias febres intestinorum, pullulare ex mesenterio, id non æque omnibus patet. Verum qui ex physiologicis novit, sanguinis progressum, in mesenterio & mesocolo quibus annexa intestina, esse tardissimum, tum quod tunicis nervoso musculosis sanguinem urgentibus destituantur, tum quod vena portæ, pulsu carens, recipiat sanguinem ex intestinis & tardo flumine vehat ad hepatis; is ultro fatebitur, promptam ibi esse genesin stagnationum & stases, & amplissimum nidum ad excludendas materiales morborum causas. Quin quum intestina arctius mesenterio sint connexa, ut ab ipso etiam sortiantur membranam, fibrarum quoque in intestinis annularium tendo juxta *Villisum*, sit mesenterium & vasa ac nervi utrisque sint communes, magnam inter has partes esse communionem, quoad morbosas affectiones, utique certum.

## §. III.

*Quæ acuta, vel chronica.*

Ipse tamen febres, quæ ex mesenterio veniunt & nobis cum *Baglivo* audiunt mesentericæ, in duo merito genera sunt dividendæ, acutas scilicet & lentas, sive chronicas. Vtrarumque materialis causa ejusdemque sedes in mesenterio, sed febrium & symptomatum generatio quærenda in annexis intestinis membranaceis, ita quidem, ut acutæ & inflammatoriæ in tunicis magis consistant & ibi tyrannidem suam exercent. Licet enim mesenterium, quod ex duplicata

cata constat membrana , cui interpositi innumeri arteriarum & venarum rami, vasa lymphatica & lactea, glandulae quoque copiosae magnitudinis variae , nec non nervorum propagines, non omni careat motu ac sensu ; hic tamen admodum obtusus ac magis gravativus est, quam acutus, qualis ad concipiendam inflammationem requiritur.

## §. IV.

Quare si in infimo ventre ardor, dolor, cum praeternaturali totius corporis aestu, pulsu celeri, virium prostratione, anxietate & inquietudine sese prodit, in intestinis haec consi-  
Signa eaturum & symptomata.  
 dere, merito judicandum. Sed pro diversitate locorum, quae haec pathemata occupant, varias & certas affectas esse partes, merito concludendum. Scilicet si dolor acutus est supra umbilicum & sub ventriculo cum febre, nausea & vomendi conatu, indicium praebet, laborare eum coli tractum, qui infra stomachum a dextro ad sinistrum latus porrigitur. Qui in dextro hypochondrio sub costis spuris urget doloris sensus, praeter naturam affectum & inflammatum esse coli principium, ubi ileo committitur, arguit, quod etiam *Spigelius* in defunctis reperit sphacelatum. Acuti cum febre cruciatus in sinistro latere sub lumbis, ubi psoas musculus, in colo & mesocolo, praesertim ubi peritonaeo adharet, mali esse sedem produnt. Quando vero medium abdomen circa umbilicum cum febre gravius dolet, tenuia utique intestina inflammatione laborare, certum praebet indicium.

## §. V.

Febres etiam, quae cum dolore, ardore, nec non tumore imi ventris junctae, & tandem per alvi fluxus putridos & copiosos, vel etiam purulentos solvuntur, cum magna intestinorum difficultate, ex mesenterio provenire, nil dubii est. In cachecticis & scorbuticis corporibus, qui proveniunt diuturni alvi fluxus, cum lenta febre, vires & corpus consumente, & qui non tam facile curationem recipiunt, ex eodem fonte scaturire, non sine ratione censendum. Febres quo-



que quæ epidemice & certis temporibus invadunt, cum diarrhoeis, immo cruentis sedibus, non ex ingestorum alimenterum vitio, sed ex præternaturali aëris, præsertim nimis calidi & sicci, constitutione oriuntur, quales biennio abhinc ob insolitum diuturnum, ad medium fere autumnii productum calorem, universam propemodum Germaniam sunt pervagatæ, simul etiam grassantes tunc intermittentes anomalæ, vix aliam habent originem, quam quod in mesenterio multi acres & corrupti humores accumulati.

## S. VI.

*Earum origo & causa.*

Ad ingignendas autem infestas ejusmodi primis in viis inflammatorias febres, præcipuum momentum habet plethora, vel simplex, vel cacochymica, a suppressis aut deficientibus salutaribus excretionibus oborta. Promte etiam inducuntur ab intentata per fortiora pellentia, hæmorrhoidum, mensium aut lochiorum provocatione, ab usu copioso validiorum purgantium ad superandam contumacem alvi stricturam, nec non, uti observavi, a purgantium & emeticorum acriorum assumptione ad abortum provocandum. Idem facit impensior animi corporisque commotio, ac vicissim improvida abdominis & corporis, præsertim æstuantis, refrigeratio, potus perfrigeratus & qui opulentioribus in more est, glaciatus. His enim humorum ad interiora, maximeque primam regionem, convocatur partim, partim urgetur affluxus, omniumque facillime fertur ad eas partes, quæ imbecilliores, quibusque ob defectum sufficientis potentiæ motricis systalticæ, vel perpendicularem vasorum tractum, difficilior est humorum progressus, quarum in numero potissimum sunt mesenterium, metocolon & omentum. Quando igitur his in sedibus, maximeque intestinorum tunicis cum mesenterio continuis, inclusus hæret sanguis, aut humor acris, febrem ciet inflammatoriam continuam, alvi verò, cruentus etiam fluxus, vel ex nimium ampliatis, vel exesis plane & disruptis vasorum osculis, succedit. Hæc enim omnia ita omnino evenire uberius testa-

testatur dissectio ejusmodi febribus intersectorum, in quibus *Spigelius de semitert. cap. lxx.* se invenisse prodidit: venas hepatis majores sanguine vacuas, ventriculi tunicam internam leviori erysipelate inflammata, venas mesaraicas & quæ ad ventriculum atque omentum tendunt distentas & crassiori sanguine tartas, omentum consumptum & semiputrefactum, durum quoque pancreas & ductum cholodochum obstructum. Idem confirmat *Chiffletius* notabili observatione, de mesenterii inflammatione cum dolore umbilici.

## §. VII.

Merito tamen consistentes his in sedibus inflammationes *differentia inter-* in leviores & graviores sunt distinguendæ. Leviores exterioribus tantum intestinorum tunicis, quæ maxime membra *leviores,* narum mesenterii productiones, insident; graviores vero al- & *gravi-* tius ipsam intestinorum substantiam pervadunt eorundemque *ores* interiora ipsasque glandulas tangunt, ideoque & profundiores sunt & ampliores. Quæ superficiem occupant, non tantum periculi alunt, sed adhibito laudabili regimine & congrua medicina, intra quartum, vel septimum diem, discutuntur. Quæ autem interiora profundius obsident, nisi per diarrhoeam aut sanguinis fluxum solvantur, longius extrahuntur, quin in suppurationem ruunt & in hecticam desinunt. Ex mesenterio quoque ibique stagnantibus corruptis humoribus prodeunt hemitritæ, sic dictæ sive semitertianæ febres, quæ ex continua inflammatoria & intermittente tertiana sunt compositæ, periculi non expertes. Notæ hæc jam fuerunt *Hippocrati & Galeno*, easdemque nitide & accurate descripsit *Spigelius* peculiari libello. Discrepant tamen a nostris in eo, quod quotidie circa vespere, & alternis quoque diebus, levi accedente horrore, ingravescant, junctum habeant abdominis dolorem ventrisque tumorem & quandoque ad aliquot hebdomades protrahantur & nonnunquam in febrem lentam & hecticam concedant. Sed quia de harum ortu, decursu

& curatione jam supra Sect. I. cap. V. uberius actum, heic plura dicere non attinet.

CURATIO.

CVM CAUTELIS ET OBSERVATIONIBVS  
CLINICIS.

§. I.

Morbi  
præfer-  
vatio.

Quum febres ventriculi & intestinorum inflammatoriæ, propter horum summam sensibilitatem & conspirationem cum nobilissimis corporis partibus, atrocissimis symptomatibus stipatæ & subinde funestæ, medentis cogitationem & intentionem quam maxime ad eas avertendas dirigere expedit. Igitur serio & cum cura sibi commissis Medicus inculcet, ut vitent omnia quæ superius §. VI. ad easdem ingignendas facere diximus. Et quia præterea sæpius observavi, febribus ardentibus, item biliolis, dysentericis, nec non puerperarum acutis cum purpura, a vehementi ira, vel gravi terrore, accessisse mox gravem intestinorum inflammationem & sphacelationem, ac lethum brevi tempore attulisse; inprimis necessarium, ut occasiones sævorum affectuum fideli consilio & monito præscindat artifex peritus.

§. II.

In cura  
sanguinis  
affluxus  
derivandus.

Si vero jam adest inflammatoria stasis sanguinis, omnibus modis lenior est discutienda & gravior avertenda, Primus igitur recte medentis erit scopus, ut vehementiorem sanguinis motum ad partem affectam impediat & hac ratione graviolem inflammationem avertat. Obtinetur id commodissime in plethoricis sanguinis missione, ex venis in superioribus partibus, amplo satis foramine facto, pertusis, qua in colica convulsiva, in diarrhœa & dysenteria, in acuto dolore venarum sedis, gravior inflammatio averti potest utique. Post sectam venam divertunt sanguinis affluxum a loco affecto pediluvia temperata, sed diutius usurpata, quæ solvendo & laxan-



laxando strictas inferiorum partium fibras, affluxum ad pedes vidertunt & invitant.

§. III.

Ad discutiendam dein inflammatoriam stasim, <sup>Et stasis</sup>serviunt quam maxime quæ dolores & spasmos sistunt, antispasmodi- <sup>discuti-</sup>ca, humectantia & blanda sedativa, clysteres ex oleosis, gela- <sup>enda.</sup>tinosis & dulcibus compositi, item exterius regioni abdominis applicata epithemata, sacculi, vesicæ oleis expressis, vel pinguedinibus animantium, aut decoctis emollientibus repletæ, pinguedo cati sylvestris, mixta præsertim cum camphora & pauxillo olei hyoscyami. Interne vero discutiunt & inflammationem arcent quam optime diaphoretica cum anodynis mixta, pauca, sed crebriori dosi per aliquot dies data, quæ inter eminet spiritus carminativus de tribus, aut spiritus tartari, vel bezoardicus *Busii*, cum liquore anodyno minerali, aut spiritu nitri dulci mixtus. Item mixturæ ex aqua cardui benedicti, florum sambuci, aceto sambuci, rob sambuci, antimonio diaphoretico, nitro & sirupo papaveris rhœados confectæ, nec non pulveres temperantes nitrosi & diaphoretici, cum momento camphoræ & pauxillo laudani. Neque minus huc spectat cautus pilularum Wildegantianarum usus. Quæ remedia, cum prudentia, certo tempore & ordine usurpata, etiam in passione iliaca & spastica tunicarum intestinalium corrugatione, quam Græci chordapsim vocarunt, lenimen afferunt exoptatissimum.

§. IV.

In dolore, spasmo & febre inflammatoria intestinorum, <sup>Vitanda</sup>omnia acria stimulantia, etiam salina majori copia data, cali- <sup>acria, ad-</sup>da, & purgantia, ceu perniciosissima vitanda. Et culpandus hic <sup>hibenda</sup>communis & detestabilis Practicorum error, qui alvo pertinena- <sup>enmata</sup>cius adstricta, unum post alterum purgans ingerunt, eoque <sup>mulcen-</sup>malum non tantum exacerbant, verum etiam reddunt mor- <sup>tia.</sup>tiferum. Neque etiam clysteribus admiscenda salia acrius stimu-

stimulantia, ut sal gemmæ, vel purgantia, ut extractum colocynthidis, vel catholiconis, sed ex folis emollientibus sunt parandi. Sic enim balnei aut fots instar, crassa eluunt intestina, & in colo tenuibus circumvoluto contenta, ceu vesica decocto emolliente plena, eadem mulcent, foveant & laxant. Parari igitur possunt ex solo lacte, mixto cum nitro, vel aqua pluviali, nupta cum sirupo violarum, de althæa *Fernelii*, rosarum solutivo, aut melle mercuriali. Hæc tamen circa usum clysterum addenda observatio, ut bihorio fere quovis, si necessitas urgeat, injiciantur & paulo diutius retineantur, quod maxime necessarium, si flatus per os eructant & crebrae adsunt vomitiones.

## §. V.

*In dolore  
opiata,  
post cum  
roboran-  
tia pro-  
sunt.*

Præmissa, si vasorum plenitudo urget, venæsectione, laxata etiam clysteribus admissis alvo, si atrox dolor cedere non lit; optimo consilio, sine omni metu, anodynum ex opio proficit, quo tormina conquiescunt & spasmi ac sudor sequitur. Sed quiescente & sedata dolorum & spasmodorum cum febre ferocia, si summa debilitas corporis viriumque imbecillitas excipit, non ulterius insistendum superius laudatis diluentibus, laxantibus & humectantibus, sed potius nervina & roborantia in usum vocanda, quorum in numero sunt maxime essentia aut spiritus succini, aut mastiches, extracta cum hoc essentia chaccarillæ, elixir nostrum stomachale, pulvis solaris Zellenis, balsamum nostrum vitæ cum liquore anodyno mixtum, quod balsamum etiam exterius applicatum, levamen insigne affert, tonum resuscitando & robur addendo.

## §. VI.

*Alvi fluxus  
super-  
veniens  
perite ex-  
cipiendus*

Quando vero inflammationes & dolores alvi fluxu simplicis, aut cruento, maxime hæmorrhoidali, aut etiam, ut quandoque accidit, purulento solvuntur, laxantia leniora, ut passulæ rhabarbarinæ & clysteres, item infusa theiformia, ex speciebus travmaticis & sanguinem purificantibus, scabiosa, veronica, alchymilla, agrimonia, consolida Saracenica & sum-

summitatibus millefolii confecta & cum lacte pota, nec non pulveres roborantes, ex cornu cervi philosophice preparato, usto, cortice cascarillæ & succino, in usum vocantur commo-  
dissime.

## §. VII.

Quum diarrhoea & dysenteria epidemica sæpe cum ve-<sup>sanguine</sup> hementi inflammatoria febre invadat juvenilia corpora, non <sup>missio in</sup> infructuosa est medico-practica quæstio: an conducatur venæ-<sup>dysente-</sup> sectio? Communis quidem Medicorum, <sup>ria cum</sup> Hippocratis & Ga-<sup>febre uti-</sup> leni autoritate confirmata est sententia: alvo fluente, non <sup>lis.</sup> esse subtrahendum sanguinem, quia vires prosterнат, Ne-  
que etiam ego aliter sentio, quum per ipsam experientiam constet, multos, tam enterico, quam <sup>dysenterico</sup> alvi fluxu laborantes, sanari, sine sanguinis missione. Sed jam de illa tantum dysenteria sermo est, quæ cum febre acuta, præsertim synocha inflammatoria, conjuncta. In hac utilem & necessariam esse venæsectionem, affirmo utique. Notum enim est, non facile quempiam alvi fluxu, etiam dysenterico diuturno perire, nisi ex inflammatione & sphacelatione intestinorum, quam semper antecedit & comitatur vehemens acuta febris, expulso magno & celeri, ardore & siccitate corporis, linguæ ariditate & ingenti inquietudine cognoscenda. Et licet omni dysenterix lenta quædam & levis, quasi erysipelacea inflammatio, sit juncta; multum tamen hæc ipsa differt a synocha inflammatoria febre, in qua proficuum esse sanguinis subtractionem assevero, & consentientes habeo viros amplissima & felicissima praxi celeberrimos. Sane Sydenhamus in opp. cor-  
date affirmat pag. 111. se semper fere curam dysenterix cum venæsectione auspicari, quin pag. 115. sq. habet exemplum dysenterix rebellis, quæ nullis plane remediis cedere voluit, sed sola venæsectione tandem curata. Idem hoc auxilium mire dilaudat Riverius, qui Cent. II. obs. LVII. fidem facit, se in dysenteria cum febre acuta, octavo demum die, cum fructu quinque sanguinis uncias e brachii vena extraxisse, & obs.



**XLIV.** testatur, se venæsectionem, in muliere dysenteria cum febre graviter decumbente, septimo & octavo die cum emolumento instituisse. *Amatus* quoque *Lusitanus Cent. II. obs. XI. IIX.* consignavit exemplum Abbatis, sanguine pleni & multo vini potui dediti, dysenterici & febricitantis simul acute, qui secta vena, longe melius habuit & paucis subjunctis remediis, plenarie convaluit. Maxime omnium vero multus est in adstruenda hujus remedii singulari utilitate *Rotallus*, qui *cap. IV.* plus quam decem exempla narrat, ubi nil ex omni remediorum censu, præter venæsectionem, attulit levamen.

### ENARRATIONES MORBORUM.

#### OBSERVATIO. I.

*Passio spasmodico-inflam-  
matoria,  
iliacæ  
munitans,  
curata.*

Femina, quadragenaria major, ob vitam sedentariam & tacitum animi profundum cum iracundia moerorem, pathematibus colicis & spasmodicis affecta, quum omisisset vere hoc suetam quotannis circa æquinoctium vernale & autumnale sanguinis missionem, Martio mense vehementi commota fuerat ira, ad tremorem usque omnium corporis partium, & sumserat postea vesperi pilulas consuetas purgantes. Hinc noctem transegit inquietam, & die post nulla post pilulas sequuta purgatio, alvus potius firmissime clausa mansit & ipsa æstuosis anxietatibus circa præcordia atque etiam eructationibus continuis ex ore fuit afflicta & vomitu fere omnia assumpta rejecit, tum medicamenta, tum alimenta. Injectus ad alvum aperiendam clyster domesticus, qui per horam retentus, integer, nec flatibus, nec stercoreibus stipatus, rediit, etiam sine symptomatum levamento. Adhibitum decoctum mannatum cum salibus aperitivis & rhabarbaro, sed mox vomitu rejectum. Medicus etiam ordinarius, flatum in causa esse putans, dedit carminativa. Irrita tamen fuerunt omnia. Perstiterunt potius symptomata, firma nempe alvi adstrictio, eructatio crebra & vomitus, magna debilitas, inappetentia & so-

& somni defectus, tantum quod circa vesperam gravius, circa auroram vero mitius, affligerent, cum crebriori ad urinam stimulo, quæ tamen parca & turbida emittebatur. Tertio die vocatus ego, mox venam pedis secare jussi, & emissis, sine ulla virium jactura, ob vasa sanguine valde distenta, octo unciiis, mox meliuscule habuit ægra, conquieverunt anxietates æstuosæ & eructationes, ut etiam extra lectum versari potuerit. Nihilominus pertinax ventris adstrictio & dolores tensivi abdominis in hypochondrio dextro perstiterunt. Injunctus igitur clyster & data pilulæ nostræ balsamicæ polychrestæ, sed his nihil emotum; quin quum ad septimum usque diem alvus esset obstipata, & eructationes, & anxietates nocturnæ æstuosæ, cum febricula & dorsi doloribus redierunt. Hinc demum consilium dedi, ut singulis tribus horis clyster injiceretur, ex aquæ pluvialis unciiis XII. sirupi de althæa *Fernelii* uncia semis, nitri puri drachma, & abdomini vesica emolliente decocto plena admoveretur. Sic clysteres injecti semper per horam retinebantur, & postquam quartus esset infusus, flatus primum elisi, per aliquot dies coerciti, & post sextum secesserunt etiam fæces, quibus evacuatis, ructus atque anxietates in abdomine discesserunt, mictio etiam melius successit. Interius vero simul data essentia carminativa, cum liquore anodyno ad unciam dimidiam remixta, instillatis laudani liquidi guttis XV. inductus somnus, sequutus sudor ex cute ante sicca & arida, pulsus antea durus & celer mollior factus & urinæ fluxus liber redditus. Hoc facto, ex mixtura remotum laudanum & sola essentia cum liquore anodyno oblata, donec perfecte convalesceret.

*Epicrasis.*

Affectio hæc nonnisi fuit spasmodico-inflammatoria intestinorum, iliacam minitans passionem. A sanguine quippe, ob venæ sectionem consuetam omissam, nimium redundante, & vehementi ira, quæ insensibilissima intestinis, nec non purgante assumpto, ortum duxit hæc passio, & inde etiam omnia quæ

jungebantur symptomata derivanda. Ad discutiendam itaque inflammatoriam stasim & avertendam hujus pedissequam, passionem miserere mei, ante omnia necessarium duxi, ut sanguinis quantitas subtraheretur, quod etiam quoddam attulit levamen. Sed quum spasmus intestina interiora fortiter stringens adhuc permaneret, consilium coepi, quod me tali in casu non destituit, de clysteribus pure demulcentibus & humectantibus, paullo frequentius injiciendis, qui quasi instar balnei interni sunt, fibras spasmo contractas temperato humido relaxantes, cui fini etiam exterius apposui emolliens remedium. Interius vero discutiens, sive carminativum, cum blando anodyno permiscui, & ita spasmi soluti, discussa sanguinis & humorum inflammatoria stasis & excretiones per alvum & cutem adstrictæ, jam liberius & largius sequuntur.

## OBSERVATIO II.

*Inflam-  
matio in-  
testinorū  
cruenta  
diarrhœa  
soluta, re-  
petens le-  
thalis.*

Præfectus militum, natione Gallus, quadragesimum ætatis annum jam emensus, vir constitutionis alias robustæ, vitæ genus laboriosum & agile cum quieto & sedentario permutarat, interea largiter comedens & liberaliter quoque vinum Gallicum, quod vocant Pontack, bibens. Hinc primum alvi factus adstrictioris & somni inquietioris, post aliquod tempus vero, dolorem lancinatorium in abdomine toto atque etiam lumbari regione expertus est, cum phlogosi, eructatione, pulsuum celeritate & deficiente somno. Medicus primis diebus colicum dolorem esse judicans, carminativa fortiora & spirituosæ elixiria, cum oleis destillatis remixta, una cum clysteribus usurpavit, sed inde potius exasperata symptomata, & febre, & inquiete, & dolorum facibus magis accensis. A me quum peteret opem, & conquereretur de dolore tensivo circa os sacrum acuto, quæsi: an hæmorrhoidali antea fuerit obnoxius fluxui? respondit: semel tantum ante aliquot annos, sed pariori, cum prægressis lumborum & ossis sacri doloribus. Hinc quum venæsectionem penitus respue-

ret,



ret, mutavi tantum medendi methodum & loco calidorum, interne dedi humectantia & refrigerantia, pulveres nempe diaporetico-nitrosos, demulcentes & lenientes clysteres, copiosius applicare jussi, largiter simul & temperate calida sumpta ptilana. Levata inde quidem fuerunt symptomata, nihilominus remansit dolor in imo ventre, ab osse sacro ad inguina sese extendens lancinatorius, multum incommodi faciens. Exhibui igitur essentiam carminativam, cum liquore anodyno & pauxillo laudani opiat, ad mulcendos dolores, & postea dedi drachmam magnesiæ albæ cum drachma dimidia nitri in decocto mannato, inde alvus aliquoties soluta, & quod mirabile, larga portio sanguinis atrii, corrupti, foetidi excreta, ita ut intra sex dies aliquot libræ secederent, remittentibus inde mox doloribus & sævis pathematibus. Demum assumptæ pilulæ nostræ balsamicæ, cum pulvere roborante, cujus basis chaccarillæ cortex & succinum. His tum perfecte convaluit, sed vertente anno, adulto jam vere, eundem in morbum cum gravissimis doloribus & intolerandis cruciatibus ad dorsum usque excurrentibus, febre & purpura rubra stipatis, correptus est idem hic vir. Data iterum omnia, quæ levando huic malo antea cum fructu adhibita, administrata etiam in dorso scarificatio, sed frustra. Sexta enim hebdomade, ob somnum plane deficientem, viribus omnibus exutus, vivere desit.

*Epicrisis.*

Sine ullo dubio vir hic, animo & corpore fortis, intestinorum inflammatione periit. Causa hujus morbi in statum plethoricum, sine sanguinis missione & omiſſa simul consueta corporis exercitatione, & in potum copiosum vini rubri, quod adstrictivæ est virtutis, conjicienda, quum alias sanguine & humoribus abundantes, qui corpus nec satis labore exercent, nec sanguinem mittunt, si alvum paulo largius solutam habent, liberi permanere possunt a passionibus ex plethora oriundis. Si vero hæc etiam excretio deficit, grave imminet

sanitati periculum. Prior morbus fluxu sanguinis nigri & coagulati, procul dubio in vena hæmorrhoidali interna congesti, feliciter fuit solutus, id quod etiam in aliis similibus casibus notavi. Contra ea vidi etiam, quod febres intestinales, cum doloribus & spasmis abdominis, aliquot jam per hebdomades durantibus, subinde post excretum putridum & corruptum nigrum sanguinem, brevi mors sequuta fuerit. Ceterum non possum non hoc loco hanc observationem de vini rubri gallici, austeri potissimum, noxa, adjicere, quod ipsius frequentiori potui causa multorum morborum, quibus Galli inter nos degentes occumbunt, merito sit adscribenda.

## OBSERVATIO. III.

*Diarrhœa  
purulenta  
cum  
febre ex  
lapsu.*

Ruricola habitior & quadratus, pronus cum ventre ceciderat in truncum acuminatum, & ex eo exquisitum in abdomine, paullo supra umbilicum, persenserat dolorem, cum animi deliquio, accensa simul, præcedente horripilatione & refrigeratione, febre. Post aliquot dies sanguinolentam & saniosam per superius & inferius os ejecit materiam multam, coque facto, siluit febris, remansit tamen languor & appetentiæ prostratio. Quum vero elapsis circiter quatuordecim diebus, domesticis laboribus manum admoveere inciperet, de novo recruduit abdominis dolor, animi defectio, horrore & febre stipatus, cum extremorum frigido sudore, ut animam agere videretur. Sequuta tamen diarrhoea cruenta & saniosa per aliquot dies, symptomata iterum mitiora facta ac remiserunt. Sed vix septem dierum fuerunt induciæ, quibus circumactis, priora repetierunt symptomata cum febre, obortoque alvi fluxu, conquieverunt rursus. Imploratum igitur meum auxilium, qui crebriorem decocti avenacei usum, cum humana, vel canis axungia, butyro rubro potabili & balsamo *Lecatelli*, suasi, ac demum decocto herbarum vulnerariorum, alchymillæ, agrimonix, saniculæ, pyrolæ, fragariæ, veronicæ, florum bellidis, hyperici aliorumque, ex cerevisia,

fia, ægrum hunc ad sanitatem, fortunante DEO, tra-  
duxi.

*Epicrisis.*

Celebris ille Itatorum Medicus *Benedictus Sylvaticus*, ab-  
fcessus subinde in mesenterio succrescere notavit; & notatu  
inprimis digna, quæ habet *Cent. II. obs. LXXXVI.* ubi sic scribit:  
*mesenterium sæpe fit semina multorum excrementorum. Acobusti  
sensus quum sit, diuturnas tolerat affectiones, & in quo non raro  
suboriuntur apostemata suppurantia, qualia frequentissime a me fue-  
runt observata, quæ tandem subsidebant per dejectiones purulentas,  
iterumque statis temporibus recurrebant, & obliuescebant denuo per  
similes dejectiones, non raro cruentas, ita ut imposuerint quibus-  
dam, illas pro dysentericis habentibus.* In nostro certe ægro,  
lapsu illo in stipitem acuminatum, quassatus forsan fuit excur-  
rens infra ventriculum supra umbilicum colli tractus, quo in-  
ductus dolor, raptis etiam in consensum reliquis intestinis, fe-  
brem eiens, & per spasmodicam simul stricturam in mesenterii  
canalibus sanguinem detinens, qui in purulentam postea cor-  
ruptionem abiit, perrupit & alvo exiit. Latius vero semper  
serpsit malum, & relicta iterumque commota vicina arrodens  
materia, mali recursum iterato induxit, donec acrimonia ip-  
sius obtunderetur, abscessus abstergeretur, demumque post  
semestre spatium, in robusto & agresti corpore consolidatio-  
nem reciperet.

OBSERVATIO IV.

Adolescens quindecim annorum, constitutione tener, *Febris ili-*  
indole alacris, Bacchanalium tempore, quotidie duas, vel *aca in-*  
tres, siccas & duriusculas spiras ingesserat, sub pilæ lusu cum *flamma-*  
sodalibus admodum incaluerat, & postea, depositis vestibus, ad *toria.*  
fluvii ripam confidens, corpus perfrigerarat. Inde paullo  
post atrocia ventris incurrit tormina, cum alvi pertinaci ad  
aliquot dies strictura. Implorato nostro auxilio, causam a  
liberali esu spirarum & corporis refrigeratione duximus, in-  
primis



primis quum in sinistro abdominis latere eminentia quædam dura tactui sese offerret. Suasimus igitur ut alvus ocyus duceretur clystere emolliente, quo bis alvus stercora dura dimisit, postea dedimus infusum nostrum usitatum mannatum, cum oleo amygdalino, quo sex sedes motæ, tumor subsidere & dolorum vehementia remittere visa. Sed sequenti die tormina cum duro in hypogastrio tumore redierunt, licet flatus multi eliderentur, accessit præternaturalis æstus, cum pulsuum celeritate, somnus inquietus, oris siccitas & ardor, cum lenta pituita. Hinc fauces gargarismatibus elotæ & ad æstum inflammatorium restinguendum oblata emulsio ex seminibus quatuor frigidis, cum pulvere nitroso, interposito ad perspirationem secundandam, liquoris anodynî, cum momento bezoardici remixti usu. Æstu autem crescente, ani os adeo fuit occlusum, ut clysteris tubulum admitteret plane non & a crebriori molimine potius læderetur, circa vesperam tamen calor semper fuit intensior ad mediam noctem durans. Adhibuimus pulveres nitrosos cum salibus digestivis, quibus calor mitigatus & scybala cum flatibus multa emota. Sic decubuit ad duodecimum usque diem, quo tanta anxietas, inquietudo, æstus & virium jactura accidit, ut morti videretur proximus, conquerens maxime de atroci dolore in abdomine, ibi potissimum ubi durities illa consistebat. Igitur ad arcendam funestam inflammationem potio discutiens ex aqua cardui benedicti, cum aceto, rhabarbaro, antimonio diaphoretico & cancrorum lapidibus data, qua aliquoties usurpata, dolores complacati & sudor prolektus. Imposita etiam ad emolliendum tumorem vesica decocto emolliente plena & clysteres aliquot injecti atque retenti. Hinc ingens stercoreum copia quotidie secessit cum emolumento & successive ad sanitatem factus est transitus.

#### *Epicrisis.*

Febris hæc recte dici potest iliaca inflammatoria. In ileo enim confedit obstructio, ab esu spirarum siccarum contracta,

tracta, quæ dolorificos spasmos non tantum in abdomine, sed ad ipsam etiam vesicam excurrentes fecit, ut urina per totum morbi decursum parca & rubicunda tantum cum dolore secederet. Non tam promte autem ex tenui hoc intestino materiam tenacem obstruentem everrere licet, quia clysteres eo non pertingunt & nec laxantia sufficiunt, nec potus diluentes. Hinc morbus diutius protractus. Interea ut intestinorum inflammatio arceretur, data mixtura & injuncta diaphoresis continua. Quia tamen intestinorum inflammatio quam facile recrudescit, hinc suasi demum, ut non modo exactam servaret diætam & ab omnibus constringentibus abstinere, animum tranquillum haberet, nec frigidum, sed calidum potum assumeret, verum etiam ad tempus aliquod mane infusum accommodum theiforme potaret in lecto & sudorem blandum expectaret.

## CAPVT XIII.

DE

FEBRIBVS LENTIS ET  
HECTICIS.

THESES PATHOLOGICAE.

S. I.

**H**ECTICÆ febris apud *Hippocratem*, *Aretæum*, veteresque *Hectica* Græcos æque ac Latinos, ipsum *Cornelium Celsum*, mentione nulla. Neque lentæ febris nomen in primorum Medicinæ parentum monumentis obvium, sed *Celsus* demum lentæ curationem primus tradidit. Quæ autem postea lentæ & hecticæ appellatæ, priscis, longæ, tabidæ, marasmi audiunt. *Hippocrates* in primis lentas febres *sect. V. aph. 64.* vocat febres longas, iisque affectos non valde multum febrientes, hecticam vero sub nomine tabis passim describit. Nostro tempore

(IV.)

Aaaa

lentæ

lentæ & hecticæ febres dicuntur eæ, quæ diuturnæ sunt & continuo, licet leniori ac remittente, æstu præternaturali, succos corporis consumendo, tabem inferunt viresque debilitant.

## §. II.

*Vtriusque  
differentia &  
symptomata.*

Magna tamen harum est varietas & differentia, ratione vehementiæ symptomatum & quoque periculi. Stricte nimirum lentæ febres appellantur illæ, quæ mitiora habent symptomata, æstus leniorem, sudorem sub somno largum, pulsum post somnum & ante meridiem naturalem, non tantam appetitus & virium prostrationem, corporisque ariditatem & urina livescens, neque etiam tantum periculi. In hectica autem æstus est continuus, pulsus semper durus, debilis, celer, licet post cibum & vesperi calor, celeritas atque durities incrementum, cutis cum lingua sicca, dura & arida, genæ rubent, totum corpus est imbecillum flaccidum, somnus reficiens nullus, urina rubicunda, inferius cum sedimento, superius cum cuticula coerulescente pinguedinosa, corpus contabescit totum, adeo ut ossa ubique promineant. Deinceps eminens est lentarum & hecticarum differentia respectu utriusque causæ. In illis enim vitium magis in fluidis & incipiente mala dispositione solidæ cuiusdam in his vero solidæ potius patiuntur & ipsa jam labe, aut magna corruptela, adest visceris. Hinc lentæ etiam accommodata medicina adhuc possunt abigi earumque causa vinci, sed hecticæ difficillime, vel plane non sanationem recipiunt. Hecticæ quippe sunt magis symptomatice & gravioribus ulcerationibus, vomitis, abscessibus & viscerum corruptionibus superveniunt. Unde qui phthisi, abscessu, vomica aut exulceratione pulmonum, mesenterii, renum, uteri & gravioribus supurationibus in internis, musculis quoque abdominis latentibus, qui cancro genitalium, mammarum, uteri, item qui cachexia & hydrope, ex induratione, scirrho, corruptione & putredine hepatis, lienis, omenti, pancreatis & glandularum mesenterii, moriuntur, hectica febre pereunt omnes.

## §. III.



## §. III.

Causa caloris continui his in febribus, nulla alia, quam humor quidam corruptus & putridus. Hic enim temperata & naturali sanguinis & humorum vitalium mixtioni penitus est adversus, eandemque intestino alieno motu turbat, immutat atque dissolvit. Idem hic putris succus infestus plane ac alienus est nervorum fluido nervosisque partibus, & sensibiles has atque motrices partes ad intensiorem contractionem, quæ febris essentiam absolvit, exstimulat. Igitur quo uberior & diuturnior putridorum & corruptorum ejusmodi succorum ex viscerum vitio insanabili est proventus, eo vehementior febris eoque graviora symptomata.

## §. IV.

Lentæ, five diuturnæ, mitiores tamen febres, sunt frequentissimæ, neque ulli ætati, aut temperamento, sexui, regioni, aut loco parcunt. Origo vero illarum & causa varia est. Sæpissime ex morbo præcedente & corpus cum viribus nimium debilitante. Scilicet experientiæ testimonio in comperto est, qui per contumaces intermittentes, vel continuas, item variolas & morbillos, effusiora sanguinis per uterum, anum & nares profluvia, per diuturnum alvi fluxum, simplicem æque ac dysentericum, nec non nimiam salivationem, gonorrhæam & fluorem album diuturnum vires perdidere, qui etiam moerore, curis vigiliis & assiduis, lucubrationibus & studiorum intemperantia, nec non per famem, labores graves & continuos, veneris etiam crebrius exercitium, corporis robur attriverunt & exhauserunt, in lentescentes & longas ejusmodi febres delabi facillime. Ratio hujus generationis in proclivi. Corpora his perfuncta benignis sanguinis & alibilis humoris succis, sufficienti etiam purissimi & nobilissimi nervorum liquidi copia destituuntur, post morbum autem ciborum impensior succedit appetentia, succi tamen intimæ ingestorum dissolutioni servientes spirituosius, fermentescibiles & salivales, nec non biliosi, a naturali habitu descivere, nec adeo sunt ef-

ficaces, vigor quoque motus peristaltici in ventriculo & canale intestinorum languidus est, hinc ciborum liberalius ingestorum non exacta perficitur solutio, concoctio atque digestio, sed succus chylosus crassus, rudis minusque subactus elaboratur, ad sanguinis massam truditur & aliena sua natura fluidorum crasin temperatam & solidorum æquabilem naturalem motum turbat atque pervertit.

## §. V.

Ex suppressis excretionibus.

Deinceps perpetuæ & uberius confirmatæ observationis est, tabificas ejusmodi febres succedere quam maxime evacuationibus criticis solennibus deficientibus, aut perperam cohibitis. Nihil certe frequentius, quam ut ii, quibus vacuationes acutos morbos & febres solventes, sudor inprimis & aucta perspiratio, interceptæ, vel non sufficienter successerunt, quibus sudor consuetus nocturnus siccatus, quibus fonticuli & ulcera antiqua consolidata, quibus catarrhi aliæque per uterum ceteraque organa defluxiones acres repulsæ, quibus alvi fluxus cohibitus intempestive, febribus lentis postea tabescant. Sic enim vitiosi, impuri, inutiles ac superflui humores, cum salute foras excernendi, intus manent, vitales temperatos & nutritios succos inquinant, ut omnis horum massa reddatur intemperata, omnesque in corpore motus ac functiones vitium capiant.

## §. VI.

Hecticarum & lentarum cur frequens nidus mesenterii.

Porro lentarum & hecticarum febrium nidum frequentissime esse in mesenterio, & ratione, & experientia habemus confirmatum. Recte enim jam pridem notavit *Fernelius* & ex eo *Sennertus*, in nulla universi corporis parte, tam plurimos, latentes etiam morbos, lentas febres, errantes, diarrhoeas, choleras, scorbutum, melancholiam, cachexiam, hydropem, intermittentes quoque contumaces, figere sedem, quam in mesenterio. Causa autem magnæ hujus ad morbos concipiendos dispositionis nulla alia, quam quia tardus & impeditus admodum per viscus hoc succorum & sanguinis progressus, stagna-

gnationes & stases facillime inducens. Nam vena portæ, pulsu destituta, sanguinem ex mesenterio reducem recipit, ac vice arteriæ fungens, eundem vehit ad hepar, quod quum lentius fiat, in mesaraicis etiam vasis ponitur obex, gignuntur stagnationes, infarctus, quin quandoque plane extravasationes. Dein hæmorrhoidalis vena, ob perpendiculararem ductum & longius ab exortu remotum situm, tarde admodum reducit sanguinem ad portæ venam, ac facit, ut is sapius in mesocolo, crassis intestinis, maximeque recto, stagnet vasaque cum dolore distendat. Ipso in mesenterio propter nervosarum & musculosarum tunicarum defectum, sanguinis cursus plane non adjuvatur & urgetur, sed vasa potius inter duplicatam cellulosa membranam discurrentia, pinguedine tecta, perpetua relaxatione, tunc sunt remissioris & facile cedunt sanguini in ipsis accumulato. Chylosa etiam lymphadum per lactiferos sic dictos canales innumeros, in capillares tubulos circa glandulas fissos, impeditius fertur, ac in ipsis glandulis ab exilissimis venulis recipitur, his in angustiis facile hæret, nec ea propter mirum, mesenterii glandulas sæpe infarciri, intumescere, indurari ac in scirrhus plane degenerare.

## §. VII.

Licet autem ipse hic tardior succorum per mesenterii compagem meatus, hanc corpori præstet utilitatem, ut humorum & mole & intemperie peccantium excretioni serviat, & quidem sanguinis per hæmorrhoides internas, ac ferolarum, mucidarum ac fermentescibilium sordium, per intestinorum glandulas innumeras; eandem tamen ob causam accidit, ut quævis fere humorum, tam quoad quantitatem & qualitatem, quam etiam motum vitia, in mesenterium redundent idque male afficiant. Inprimis plethora nullam partem gravius lædit quam mesenterium, ac nimia distensione, vasorum tonum & elaterem debilitando, ibi stagnat & cum detrimento plus justo coacervatur. Nam quo major in mesente-

*Propter  
humorum  
in eo sta-  
gnatio-  
nem &  
impurita-  
tem.*



rio sanguinis stagnatio, eo magis increfcit ipfius impuritas; quo major vero sanguinis & lymphæ fordities, eo magis functiones in corpore labefactantur, nutritio imminuitur, vires elanguescunt, intestinus in succis motus augetur, arteriæ cum corde ad auctiorem & celeriorum motum extimulantur & sic febris accenditur.

## §. IIX.

*A suppressis mensibus hæmorrhoidibus, diarrhoeis & febribus.*

Quæ quum ita sint, ratio est in proclivi, quare suppresso, aut deficiente mensium in feminis fluxu, notante Hippocrate lib. II. prædict. §. XIII. periculosa tabida, id est, hectica febris, emergant, cholerosos, aut febris icterica albæ nomine, passim obvia. Quare porro in viris subsistente, insufficiente, aut plane præpostere cohibito hæmorrhoidum stillicidio, juxta eundem Hippocratem Sect. VI. aph. XII. tabes, id est hectica, generetur. Cur etiam, ut supra jam meminimus, constitutis salutaribus alvi profluviis, quibus sæpe acuti morbi finiuntur & quæ crebro critice certis anni temporibus naturæ beneficio succedunt, tabida & periculosa febris subnascantur. Neque minus causa patescit, cur tam perniciosum & ad chronicas, lentas etiam & hecticas febres ingignendas nihil sit aptius, quam, si quando in corporibus præsertim plethoricis, cacochymicis item & hypochondriacis, ubi jam admodum tarda & impedita sanguinis per mesenterium & connexa viscera progressio, intempestive adstringentibus, etiam famigeratissimo chinæ cortice sistuntur febres intermittentes, quæ in his salutarem ad superfluum consumptionem, vasorum obstructions expediendas & liberum sanguinis progressum reddendum habent facultatem quibusque oppressis, infarctus in mesenterii tubulis, oppilationes, humorum stagnatio & impuritas increfcunt, ac postea liberale chronicis & assiduis febribus aliisque morbofis passionibus pabulum præbent.

*Abscessus in mesenterio febrium causa.*

## §. IX.

Neque vero tantum ad stagnationes & obstructions disposito-

dispositum admodum est mesenterium, verum etiam ad sup-  
purationes & abscessus concipiendos, quibus perpetuo fere ac-  
cedit intemperies quædam febrilis. Sunt quidem plures, qui  
autumant, inflammationes, sine quibus nulla suppuratio, nul-  
lusque abscessus fieri potest, in mesenterio non habere locum,  
quia in eo nec dolor acutus, nec ardor, perpetui inflamma-  
tionum comites, observentur. Verum essentialis inflam-  
mationis ratio non ardore & dolore continetur, sed stasi  
humoris sanguinei in vasis alienis facta, & staseos potius pro-  
ductum est dolor cum ardore, si illa in parte nervosa, exqui-  
sitioris sensus consistit. Stases autem & extravasationes hu-  
morum cum oriundis inde suppuracionibus, perquam com-  
mode fieri possunt in mesenterio, ob decubitus ibi solennem,  
dum vel ex arteriolarum minutis ramulis sanguis sæpe cum  
impetu in laterales tubulos, e quorum numero etiam pin-  
guedinosi, urgetur, vel etiam ipsa hæc lateralia vascula ab  
impetu humorum rumpuntur & contentum liquidum effun-  
dunt. Ne dicam, nullibi facilius & commodius pus gigni,  
quam in partibus pinguedine uberius obsessis, eo quod ipsa  
pinguedo, motu intestino & putrido humoris extravasati,  
promptissime in liquamen saniosum convertitur.

#### §. X.

Igitur frequentiores, ut vulgo putatur, in mesenterio sunt *Eorum si-*  
abscessus, cognoscendi ex febre continua hectica, dolore *gna &*  
gravativo & fixo in abdomine & saniosæ materiæ per alvum *causa.*  
cum intestinorum dolore & ardore excretionem. Quæ autem  
ad ingignendos hos faciunt, notavi multa. Observavi fre-  
quentius, in plethoricis, plethorico-cacochymicis, nec non  
hypochondriacis, a vehementi ira præsertim paullo ante, vel  
post cibum, tanto magis accedente simul refrigeratione, cor-  
pus languore fuisse affectum universali & successisse febres  
tabificas exitiosas. Idem vidi in iis, quæ validioribus pellen-  
tibus abortum procurare intenderunt, quando Medici mensi-  
um suppressione laborantes calidis & fortioribus emmenago-  
gis,

gis, vel purgantibus exceperunt, nec non in viris, quando hæmorrhoidalem fluxum, natura repugnante minusque proclivi, aloeticis aliisque calidis pellentibus emovere fuerunt conñiti. Novi etiam, crebrius subortas esse has ex abscessu febres, in sanguine & succis plenis, a vehementiori insueta corporis ad validum usque sudorem exercitatione, subsequente postea improvida refrigeratione corporis totius, ac inprimis pedum, quorum ingens cum abdomine consensio.

## §. XI.

Generan-  
di ratio  
& decur-  
sus.

Nimirum tam valido & vehementi, sive per animi affectus, sive pharmaca, sive corporis exercitationem, motu, sanguis in minima mesenterii vascula cum impetu urgetur, stagnat ibi, in alienos tubulos vadit, subsistit ibi atque corrumpitur. Hinc prima origo suppurationis, quæ dein propter motum intestinum latius serpit, vicina arrodit, exedit, ut ex abscessu minori fiat major, ampla cavitas magnumque apostema. Quin materia saniosa corrupta, a venis resorpta & sanguini insinuata, sæpe etiam ad alia emunctoria, glandulas tracheales, nec non renes, fertur. Vnde amplo in mesenterio apostemati jungitur sæpe urinæ fluxus purulentus, vel etiam sputum purulentum, integris renibus salvoque pulmone. Quandoque ipsum pus pondere suo per mesenterii poros descendit ad intestina connexa, cavum ipsorum subit sicque alvo expurgatur. Quandoque etiam apostema majus dehiscit tandem, & præcedente horrore, interdum etiam rigore, cum superveniente æstu, perrupto involucro, effunditur. Quod si in loco excretioni minus idoneo contingit, atrocia quasi colica tormina oboriuntur, si in cavum abdominis, interanea quæ tangit, male afficit, rodit & gangrænam iisdem inducit, si vero in intestinorum cavitatem, pus copiosum simul & semel per alvum exit. De qua puris excretionem historias consignantur *Horstius lib. XIV. obs. XXV. & XXVI. Bartholinus Cent. II. epist. 23. Cent. VI. epist. pag. 490. Cent. IV. hist. pag. 96. nec non Tulpius lib. II. obs. XXXVI.*

## §. XII.



§. XII.

Febres autem quæ grandes ejusmodi abscessus in mesenterio æque ac aliis visceribus, hepate, pancreate, renibus, vesicula & utero, comitantur & sequuntur, non sunt mitēs & lenes, sed graves, quæ vires & succos corporis consumunt omnes, heclicæ lethales. Quæ quomodo incipiant, decurrant & quibus symptomatibus stipentur, accurate & ex vero prodidit Hippocrates lib. de intern. affect. pag. 209. febris, inquit, debilis invadere incipit & rigor, & dolent pectora ad dorsum, aliquando etiam tussis premit acuta & exspuit salivam multam liquidam & salsam. Et hæc quidem in principio morbi; in progressu vero corpus attenuatur, cruribus exceptis. Hæc enim intumescunt & pedes, & ungues contrahuntur, ex humeris autem tenuis & debilis est, & fauces velut lanugine implentur, & velut per arundinem sibilat, & fortiter sunt per totum morbum, & multa impotentia corpus habet. Hic quum sic habuerit, in anno corruptus male perit, verum studium quam maxime adhibere oportet ac reficere.

§. XIII.

Aliud lentæ remissioris & occultæ febris genus est infantibus familiarissimum. Jungitur cum insigni abdominis tumore, superiorum marcore, tussi sicca, virium prostratione, inappetentia & vago æstu, post cibum sumtum & circa vespæram ingravescente, alvo interdum adstricta, interdum etiam fluxa, alba multa & mucida dimittente. Nascitur hæc febris quandoque a succo chyloso nimis viscido, tenaci, villosam intestinorum tunicam & minima lacteorum oscula obstruente, quo inflatio intestinorum & chylosa diarrhœa inducitur. Nonnunquam ortum trahit a lymphâ nimis viscida, lenta, quæ glandulas mesenterii farcit, obstruit ac magis magisque accumulata mirum distendit. Occasionem autem adgliscientes hæc febres potissimum præbent nimia infantum voracitas, cibi qui chylum reddunt crassum, defectus tenuis potus corporisque refrigeratio. Quæ vero corripuerunt, diu

detinent corpora, nec sicuti omnes, quæ ex obstructione & glandularum nerveæ substantiæ nimia expansione oboriuntur febres, periculo carent, sed nisi convenienti medicina occurratur cum vivendi ratione, infantes perimunt, inventis post mortem plerumque glandulis mesenterii ingentis magnitudinis, intestinis inflatis & tumidis ac pulmonibus corruptis.

## §. XIV.

*Mara-  
smus se-  
num.*

Quæ senibus solennis atque fatalis est hectica, græco nomine dicitur *μαρasmus*. In hoc lente attenuatur corpus, appetitus perit, vires sensim consumuntur, ossa carne privantur, ut instar sceleti pelle induti appareant, os siccum est, saliva glutinosa, exterior cutis cortex friget, riget, arefcit, interiora ardent, pulsus durus & frequens est, somnus parvus & non reficiens, spiritus ægre ducitur, vox rauca fit, lingua exsiccata & salsa lenta pituita incrustata sape, ac omnia hæc sensim sensimque ingravescent, donec post dimidium circiter anni vitam eripiant ipsam. Generatio senilis hujus hecticæ sic nobis concipienda videtur. Senes ob vitam motus experientem & excretionem in omnibus emunctoriis, præsertim subcutaneo, languescunt, alvumque tardiozem, omissam etiam ex vano metu haud raro suetam sanguinis missionem, ingentem subinde sanguinis & impurorum humorum sibi colligunt copiam hac præsentem, tardissima fit succorum per mesenterium, omentum, per hepar quoque, lienem & intestina progressus, vasa farciuntur, obstruuntur, sequuntur indurationes & demum corruptiones, febrium chronicarum pernicialium genetrices paratissima.

## §. XV.

*Hectica  
stomachi-  
ca & in-  
testinalis.*

Demum lentæ febris species adhuc superest, parum ab auctoribus notata, quæ nobis stomachica audit & intestinalis. Ortum hæc ducit a tunicarum ventriculi & intestinorum erosione, inducta vel ab acri bilioso mordaci succo, in ipso corpore genito, vel ab assumptis acrioribus, rosiva virtute præditis. Testatur enim experientia, post choleram, vel vehemen-

men-

mentem iracundiam, item dysentericum morbum, longas sæpe & exitiales succrescere febres. Venena assumpta stomachum cum intestinis corrodere, novit nemo non. De exulcerato stomacho a forti purgante, cum maximo post cibum dolore, testis est *Bartholinus Cent. VI. hist. 21.* Idem faciunt emetica improvide data, ipsa salia amara purgantia, vel sola liberalius exquisitius sentientibus oblata, vel, uti imprudens quorundam consilium, acidulis indita adhuc & sumta. Sed difficulter hæc febres, quoad suas causas & sedem, dignoscuntur & difficulter etiam sanationem admittunt. Nam læsis arrosisque ex parte intestinorum tunicis, omne quod assumitur, præsertim falsedine, aut acore imbutum, vel etiam mole nimium, eadem male afficit, spasmos, eructationes, tormina facit, alvus interdum laxa, interdum stricta est, corpus simul tabescit, mox horror & rigor, mox æstus, mox frigidus, mox calidus sudor tenet, cum celeri pulsu ipsaque symptomata certis horis periodice redeunt & ingravescent, quin nisi congruis remediis tempestive occurratur, morbus fit longus & capitalis.

§. XVI.

Ceterum lentæ hæc & tabificæ febres ex longis sunt mor-signa lebis, qui ægros diu tenent, & pro constitutione corporis la-thalia & borantis, modo citius, modo serius finem sortiuntur. Lenta mortis quidem, si tempestive occurratur, medicationem admittit, he-cause. catica autem raro & perfecta plane non. Mortis autem indicium in lethali heclica ferunt, pulsuum continuo celeres & debiles ictus, summa appetitus & virium quoque maxima prostratio, ita ut laborantes nec corpus movere, nec in situ erecto permanere possint, facies Hippocratica, urina pauca, rubra, vel oleoginosa, sine sibilo emissæ, capillorum defluvium, alvi fluxus, sudor effusus & pedum tumor, quippe quæ de succorum partim consumptione, partim colliquativa dissolutione testimonium præbent. Qui demum moriuntur, magnam & insuperabilem viscerum labem post mortem dissecti exhibent. Quandoque enim adsunt ingentes cum amplis cavi-



tatibus in visceribus abscessus, in pulmone, mesenterio, hepate & pancreate, quandoque etiam in utero, ventriculo, renibus, nec non membranis peritonæi, abscessus deprehenduntur, vel magni tumores scirrhusi, aut ingentis magnitudinis steatomata; quandoque etiam tumores glandularum in mesenterio, vel tubercula & vomica in pulmonibus, hepatis, quoque lienis, vel pancreatis scirrhescentiæ, omenti & intestinorum sphacelationes & putrium humorum extravasationes in interaneis offenduntur.

### CURATIO.

#### CVM CAUTELIS ET OBSERVATIONIBVS CLINICIS.

##### §. I.

*Curatio  
lente ex  
crudita-  
ribus.*

Quum variæ tabidarum febrium sint causæ, variæ sedes, hæ primo omnium recte investigandæ & iisdem medicatio accommodanda. Igitur quando ex prava digestionem & indigestionem crudis ac lentis primarum viarum succis, post morbos febris ejusmodi succrescit, cognoscenda ex languore, interno æstu, continua ad sudandum proclivitate, in volis manuum præsertim ac plantis pedum, eo dirigenda curatio, ut prima regio a sordibus, febris fomite, liberetur. Perfici potest hoc pro circumstantiarum ratione leni emetico, quale præbet radix hypecacuanhæ, in pulvere, aut infuso data, & testatur *Lindanus*, se uno vomitorio & hinc cum elixir proprietatis, intra quatuor dies, curasse hecticam. Si autem præstat materiam vitiosam per os inferius educere simulque digestionem prospicere, ex usu sunt salia sic dicta neutra, digestiva, terra scilicet foliata tartari, nitrum antimoniatum, sal polychrestum, tartarus vitriolatus, solutio oculorum cancri, sal Sedlicense, vel sola, vel cum dimidia parte pulveris rhabbari electi mixta, parcius, sed crebrius, cum sufficienti vehiculo oblata. Eandem blande laxantem simulque egregie robo-

roborantem virtutem habent pilulæ balsamicæ, a *Bescherô* dictæ, quæ ea propter utiliter aliquoties, sed minori dosi, deglutendæ. Expurgato autem alimentari canali, subjungenda postea analeptica & stomachica, inter quæ præ reliquis commendamus essentiam chaccarillæ & gentianæ rubræ, item elixir nostrum stomachale, cum spiritu salis, aut nitri dulci, paulo ante cibum quotidie sumenda, non neglecto commodo corporis motu & salubri potu, præcipuo harum febrium præsidio.

§. II.

Eadem hæc medendi methodus apprime est accommo- <sup>Post mor-</sup>  
da in principio illarum gliscentium febrium, quæ post intem- <sup>bos & fe-</sup>  
pestive oppressas intermittentes, aut suffocatas præpostere <sup>bres sup-</sup>  
harum recidivas obrepunt. Si autem his nolit discedere len- <sup>pressus.</sup>  
ta febris, optimum est consilium ut ipsa prior febris resusci-  
tetur, tanto magis si suspicio est infarctus viscerum & me-  
fenterii, ut in cachecticis & hypochondriacis. Prisca jam  
hæc fuit *Celsi* methodus, quam *lib. III. cap. IX.* describit: *in*  
*hoc casu cura Medici esse debet, ut morbum muet. Fortasse*  
*enim curationi opportunior fiet. Sape igitur ex aqua frigida,*  
*cui oleum sit adjectum, corpus ejus pertractandum est, quoni-*  
*am interdum sic evenit, ut horror oriatur & fiat initium quod-*  
*dam novi motus. At, pergit, si diu frigus est, & torpor, &*  
*jactatio corporis, non alienum est, in ipsa febre dare mulsi, tres*  
*aut quatuor cyathos, vel cum cibo vinum bene dilutum. In-*  
*tenditur enim sape ex eo febris, & major oritur calor, simul &*  
*priora tollit mala, & spem remissionis, inque ea curationis,*  
*ostendit. Sed, concludit, est circumspecti hominis, & novare*  
*interdum, & augere morbum, & febres accendere, quia cura-*  
*tionem, ubi id, quod est, non recipit, potest recipere id, quod*  
*futurum est. Nam sicuti auctior sanguinis circulus in inter-*  
*mittente sæpius optima est medicina causæ, quæ febrem effi-*  
*cit: sic etiam lentæ febris causam, quæ frequentissime latibu-*  
*lis partium solidarum, glandulis maxime & vasis mesaraicis,*

altius infixa est, expedit ac tollit. Hinc si intermittentibus, præsertim quotidianæ succedit lenta febris, intermittens mox revocata, quod aliquoties a vento boreali, aspero, lumbis liberius admisso, accidisse novi, calor intensior redditus, adhibitis simul congruis incidentibus & temperantibus remediis, morbum cum tempore ex voto solvit.

### §. III.

*Ex vitio*

*hypochondriacorum.*

Quando in plethorico-cachochymicis, cachecticis & scorbuticis, a mensium, vel hæmorrhoidum obstructione, nimia voracitate, mala diæta, potuum spirituosorum abusu corporisq; refrigeratione, lentescentes hæc febres oboriuntur, alia medendi via ineunda & usurpanda ea, quæ viscera sanguinea, hepar, lien, mesenterium, vasa & glandulas ab obstructione liberant & expeditum sanguinis & humorum per abdominis, & maxime mesenterii vasa, comineatum procurant. Hunc in finem spectatæ virtutis aquarum mineralium, tam acidularum, quam thermalium, usus. Ipse ego longo usu & experientia edoctus scribo, quod ad eradicandos ejusmodi lentos morbos, non certiusprehenderim auxilium, fontibus medicatis, & idem proprio exemplo confirmat *Thonerus observat. pag. 173.* Præ reliquis autem hoc nomine salubritatis laudem ferunt, ex thermis Emsenses & Wisbadenses, ex acidulis Schvvalbacenses & Selteranæ. Opus tamen est ut debito ordine, tempore ac dosi usurpentur, junctis simul idoneis remediis, quæ digestionem juvant, spurcis corporis succis temperatam balsamicam indolem reddunt & sordium e corpore egressum secundant. Ubi autem salubrium harum aquarum copia non datur, surroganda alia similis virtutis præsidia. Ego quidem loco illarum sæpe cum fructu usus sum decocto ex jusculo carnis vitulinæ tenui, cum radice cichorei, fœniculi, asparagi, graminis, taraxaci & scorzonæræ, ita quidem, ut quotidie ejus mensuram, per aliquot hebdomades bibere jusserim, & ante potum assumere medicamentum martiale probe elaboratum, cujus generis suggerit tinctura martialis, cum succo pom-



pomorum Borsdorfianorum, cydoniorum, nec non aurantiorum, item tinctura martis *Zwelferi*, ex vitriolo martis & terra foliata tartari cum spiritu vini extracta, nec non tinctura florum salis ammoniaci martialium, qui cum hæmatite parantur, si cum spiritu vini purissimo, vel melius corticibus aurantiorum imbuto, in tincturam aurei coloris, saporis gratissimi, virtutis præstantissimæ extrahantur. Sed necessarium est, ut tum sub horum, tum aquarum medicatarum usu, exquisita vivendi ratio & salubris diætâ accedat, simulque corporis motus imperetur.

S. IV.

Quæ ab intestinorum & ventriculi erosione accidit febris *Ab erosione ventriculi & intestinorum.* lenta tabescens, omnia acia, salsa, acida, stimulantia, ceu venenum experitur, ipsum Rhenanum vinum propter acorem non fert, dulcia etiam & fermentescibilia, nec non omnes difficilioris solutionis cibi, eandem exacerbant. Curatio vero difficillima est, nec alia poscit, quam demulcentia & roborantia. Ego aliquoties decoctum lactis cum ligno sassafras & cascarillæ cortice, aut floribus chamomillæ & summitatibus millefolii, quotidie ad mensuram potum profecisse novi. Tum quoque radices althææ & juscula cum oryza & lacte decocta proficiunt, tragacantha etiam cum aqua menthæ soluta. Conducunt præterea clysteres ex lacte, cum vitello ovi, terebinthina & melle, aut alii emollientes cum sirupo de althæa *Fernelii*. Et quando spasmi simul in abdomine urgent, egregie eosdem demulcent pilulæ nobis usitatæ, antispasmodicæ, ex extracto chamomillæ, millefolii, oleo nucistæ, extracto croci & castorei.

S. V.

Porro gliscens illa & tabifica febris, quæ oritur in iis, a succo qui diuturno animi affectu, mœrore, cura, nimio labore, virum & gilia, inedia, crebro & intempestivo veneris exercitio, a nimia salivatione, a fluore albo & gonorrhœa diuturna, ab effluvio defectu. flori alvi profluvio, lactatione nimia, ulceribus multum purulentæ

rulenta materia plorantibus, & vires & roscidos succos perdidierunt, omnia sanguinem commoventia & alvum stimulantia, motum etiam corporis impensiores, alimenta quoque gravis materia nimiumque, ut ita dicam, substantifica, interdicunt, & poscit potius animi corporisque quietem, alimenta & medicamenta temperatiora, quæ acrimoniam demulcent, calorem restinguunt, blande nutriunt & vires labascentes refocillant. Horum in numero sunt emulsiones ex amygdalis dulcibus, pineis, feminibus quatuor frigidis majoribus, cum decocto cornu cervi, aqua rosarum & cinnamomi cydoniata confectæ, lac asininum & muliebre solum, aut caprillum, vel vaccinum decoctum, cum succo cancrorum fluviatilium, jus pulli cum ptisana mixtum, ptisana decocta cum cancris fluviatilibus, vel etiam testudinibus nemorosis contusis, ex commendatione potissimum *Amati Lusitani Cent. II. curat. LIII.* qui curavit hecticum per pullorum gallinaceorum testudinibus nemoralibus saginatorum usum & lactis asinini potum. Sunt qui ostreas commendant, si stomachus fert, & confirmat hoc notabili exemplo virginis viginti annorum ex pulmonum labe hecticæ, *Lindanus, supra Hartmannum*, quæ largo & diuturno ostrearum esu, tam perfecte convaluit, ut postea diu supervixerit & octo liberos pepererit. Vinum nonnisi modice concedatur, & hoc quidem Neccarinum, aut Mosellanum, lymphatum. Accedat quoque motio corporis lenis, per gestationes & deambulationem lentam.

## §. VI.

*Ab inebriantibus spirituosorum abusu.*

Quando harum febrium origo est a nimio abusu liquorum inebriantium, vini, spiritus vini, aquarum sic dictarum vitæ, vini adusti, cerevisiæ quoque spirituosioris, cum corporis contabescencia; tunc pariter vitentur omnia calefacientia, spirituosas, analepticas, incidentia pituitam & stomachica, cum cerevisiæ potu, sed usurpetur loco potus decoctum avenaceum, methodo Lovveriana paratum, ex avena, radice cichorei, floribus papaveris rhœados & paxillo nitri antimoniati.

niati. Tum quoque utile serum lactis, cum pauxillo nitri, item lac ebutyratum, quibus multum tribuunt *Piens de febb. part. II. pag. 61. & Barbatus de sangu. & sero pag. 110.* His etiam conducunt ptisanæ cum hordeo & cichoreo, & affirmat *Borellus Cent. IV. obs. 89.* multos hecticos, tantum non desperatos, solo frequenti hordeatorum usu, fuisse restitutos. Neque minus locum habere possunt emulsiones dilutiores, ac gelatinosa, cum succo citri condita.

## §. VII.

Si, uti frequentius incidit, harum febrium origo in femi- *Ab inter-*  
nis est a subita mensium suppressione, per potum frigidum, *cepto*  
refrigerationem, aut terrorem, ocyssime vena pedis aperienda & decoctum quoddam resolvens, ex radice cichorei, herba fonchi, floribus bellidis minoris & sambuci propinandum, *mensium.*  
& omittenda omnia fortiora emmenagoga. Quod si autem prognata ab hac causa lenta vel hectica febris, diu jam corpus tabe & fervore afflixit, neutiquam suadenda, sed potius interdicens est sanguinis missio, quia vires nimium debilitat. Ubi etiam a partus tempore menses plane substituerunt & vera jam adest hectica, cum atrophia, tussi, diarrhœa, pectoris difficultate, universali corporis languore & calore lento consumente, non de remediis menses pellentibus cogitandum, sed symptomata contrarium potius indicant. Idem tenendum de illa tabifica debilitante febre, quæ a fluxu hæmorrhoidali retento, aut obstructo, ortum ducit. Tum quippe, *Et hæ-*  
*morrhoi-*  
si vires & succi jam consumti, imprudens plane est molimen, *dum suc-*  
*cessu.*  
ad emovendum fluxum evacuantibus & pellentibus aloëticis, aut sanguinis missione in pede uti. Observavi enim sanguinem valde fluidum & coccinei coloris fuisse evocatum, sed paullo post febrem accensam, vires prostratas, somnum turbatum & citius, quam quidem fieri potuisset, ad lethalem eventum morbum promotum.



## §. IIX.

*Marasmi senilis tractatio.* Quæ senibus solennis hectica, marasmus dicta, melius avertitur, quam curatur. Quum vero attenta observatione constet, senes duplici ex causa tabificæ feбри implicari, scilicet, vel ex plethora, sive potius sanguine & crasso, & copioso, abdominis viscera ipsumque mesenterium infarciendo & obstruente, vel ex cacochymia, si copia feri impuri falsi, ob insufficientem ipsius, maxime per cutem, excretionem, ad binas has causas dirigenda utique cura præservatoria. Quod si itaque senex vitæ quietæ & sedentiariæ addictus, appetitu tamen ciborum adhuc valens, omissa, vel plane neglecta fuerit alias sanguinis missione, vel emanante etiam spontanea sanguinis excretionem, & metus est, ne incurrat in lentum, continuum, debilitantem & tabefacientem calorem; id quam maxime agendum Medico, ut sanguinis plenitudinem, tempeſtiva venæſectione minuat, diluentes salubres potus largius bibere suadeat, abſtinentiam a cibis nimium nutrientibus ac convenientem corporis motum serio injungat. Si vero senum succi impuris & a blanda naturali indole alienis particulis scatent; nihil aliud agendum, quæ ut per clementissima laxantia, rhabarbarina, mannata & passulata, sordes, spurcitiem humorum foventes, evocentur & temperati roſcidi succi rursus ingenerentur, per usum gelatarum & lactinia, maximeque asininum lac, quod utique senili ætati, ob demulcentem, aperientem & leniter evacuantem facultatem, est saluberrimum.

## §. IX.

*Tabis infantum medicatio.* Quæ infantili ac puerili ætati infesta est ac funesta lentescens febris, relinquitur potissimum post variolas & morbillos, ventre simul tumefacto, superioribus autem penitus contabescentibus & in dissectis eadem defunctis, mesenterium plerumque tumoribus duris, scirrhis & steatomatibus, præsertim circa venas quæ ad portam excurrunt, & pulmones tuberculis ac vomicis conspiciuntur obsessi. In hac consul-  
tius

tius etiam mali insultum avertere, quam præsens abigere, quod nunquam non irritum esse solet atque frustraneum. Quæ autem tabes in infantibus ortum trahit ex nimia voracitate, sive addiphagia & refrigeratione corporis, medicamentum admittit. Ego quidem non certius in hac novi auxilium, quam externe usum balneorum aquæ dulcis temperatorum, aliquandiu continuatum, & interne, ad expediendas obstructions glandularum, venarum mesaraicarum & lactearum, crebriorem, sed parciolem usum liquoris salini aperitivi, ex sale tartari, nitro, arcano duplicato, æquali pondere mixtis, & addita dimidia parte salis ammoniaci, cerevisiæ potandæ instillati.

## §. X.

In omni autem hectica haud postrema eo tendit indicatio, ut roscidum illud humidum, quod calor continuus non modo ex sanguine, sed etiam ex tubulis solidis, & unacum hoc ipsam tandem carnem atque pinguedinem absumit, resarciatur. Huic scopo quam maxime satisfaciunt, alimenta medicinali simul virtute instructa, inter quæ palmam fert lac ipsum. Nam priscum est Hippocratis Sect. V. aph. 64. præceptum: *convenit lac exhibere tabescentibus, non valde multum febrientibus, & in febribus longis, & debilibus, & præter rationem consumtis.* Optimum humanum, quod promptius consumptum restituit humidum & calorem extinguit, idque ex mammillis suctum, ne ab aëre vitietur, quo hecticam curatam esse, fidem facit Forestus lib. V. obs. X. Asininum minus quidem nutrit, sed magis refrigerat, calorem temperat, abstergit & aperit, ejusque præstabilem facultatem laudat mirifice Ballonius lib. I. pag. 236. integro consilio pro illustri Principe, qui pronus erat ad tabem. Cardanus fol. 323. *dubium non est*, ait, *quin tota sanitas tabidi consistat in adhibitione lactis asinini.* Et Aretæus lib. II. de cur. acut. tabis curam ita instituere suadet: *si quis in tabem prolabitur, tunc terendum tempus non est quiete & victu tenui, sed ager ad*

*motiones traducendus, per gestationes, frictiones & lavacra, quo vita residuum a morte vindicetur, augeatur & recreetur. Pro- pinandum vero etiam est lac, maxime mulieris, qua proxime peperit puerumque nutrit. Hi namque alimento, ut nuper in lucem edui pueri, egent. Si lactis humani copia non datur, asina, quæ non pridem peperit, lac accipito. Tenuè enim & fluxile huiusmodi lac. Efficacius nutrit caprillum & vaccinum, sed gravius est multumque caseosæ substantiæ habet, ideoque ne ventriculum male afficiat, corrigendum.*

## §. XI.

*Qua me-  
thodo sit  
usurpan-  
dum.*

Mihi præ reliquis placuit Hippocratis lacte utendi me-  
thodus, quam de intern. affect. pag. 209. sic tradidit: *dan-  
dum est & lac asininum coctum ad suppurationem, bibat etiam  
crudum lac bubulum, tertia aque mulsæ parte admixtum, per  
XLV. dies, admixto etiam origano.* Recte enim gravis hic  
auctor passim ad lenem purgationem commendat lac asininum  
coctum, quia tal ipsi inest dulce instar sacchari, abstergens  
leniter & laxans, quod coctione diffilato humido, concen-  
tratur magis. Origanum autem adjicere præcepit procul du-  
bio ad roborandum stomachum & genus nervosum debilita-  
tum. Ego, si lac asininum haberi nequit, ita lactis curam  
adornare soleo, ut præcipiam primum, per duos, vel tres  
dies mane potare lac, e vaccis herbis recentibus & appropria-  
tis pastis mulctum, ad libram unam, in qua uncia mannæ, aut  
sacchari rosati, vel conservæ rosarum dissoluta. Dein men-  
suram folius lactis quotidie bibere præcipio, addendo saccha-  
ri unciam dimidiam & nitri drachmam dimidiam. Pro cir-  
cumstantiarum ratione, præsertim ubi suspicio labis in mesen-  
terio, aut exulcerationis in viscere interno, lacti confundo  
ad dimidias, vel tertias, aquam, aut puram fontanam, aut  
longe melius Selteranam mineralem. Hac vero deficiente,  
aquam communem infundere suadeo cum veronica, soncho,  
pulmonaria, hepatica, musco pulmonario, tussilagine, he-  
dera



dera terrestri, scolopendrio, capillis veneris, floribus hyperici & rosarum, & infusum hoc cum tantundem lactis, vel caprilli, vel bubuli calide bibere, adjecto saccharo, & pro meliori abstersione, aliquot guttis olei tartari per deliquium. Cura hæc minimum per sex hebdomades continuanda, ac interea vitanda omnia quæ stomachum gravant, debilitant & lac coagulant. Vinum quoque ex toto circumcidendum, & non aliud ad stomachum fovendum concedendum, quam parcum Hungaricum, aut mulsum ex melle Borussico confectum.

## §. XII.

Antequam tamen cura lactis instituat, videndum est, *Et sub* an ventriculus illud ferre possit. Sunt enim nonnulli, qui *quibus* lac natura penitus averfatur. Notavi etiam, quod qui diætæ vinosæ dediti, cerevisiam largius potant, lac commodè ferre nequeant. Neque accommodum est hypochondriacis, neque si febris vehementissima & cephalalgia juncta. Si stomachus languidus & obstructa mesaraica vasa, corrumpitur, facile in vappam abit magnaue creat incommoda. Videndum igitur, ne in ventriculo desideat, ad quod avertendum, *Galenus lib. X. simpl. medic.* præcipit, ut coquatur & chalybs ignitus, aut filices candentes, injiciantur. Tutissimum autem lac asininum, sero plus redundans, minusque caseosæ substantiæ habens, quod etiam *Galenus* in hectica præfert & cujus saluberrimam virtutem peculiari dissertatione, *de mirabili lactis asinini usu in medendo* excussi. Quod si tamen asinini lactis copia non est, substitui potest serum lactis dulce, methodo a nobis descripta in dissertatione *de seri lactis virtute longe saluberrima* paratum. Sunt etiam, qui lactis serum in B. M. destillant & prolectam destillatione aquam mirifice dilaudant, tam potam, quam loco vehiculi assumendorum medicamentorum.

## §. XIII.

Porro in hisce suspectis febribus providendum, ut crasis & mixtio ipsius sanguinis, ab intima dissolutione & collitione *Adstringentia & leniter roborantia pro-* qua-sunt.

quatione elementorum; quam continuus calor minatur, vindicetur & æquilibrium inter calidum & humidum conserve-  
tur. Hunc in finem salubria; a Medicis passim laudata lenio-  
ra adstringentia & roborantia. Celebres hoc nomine tinctu-  
ræ, sive potius solutiones coralliorum, aut matris perlarum,  
cum acido subtili & naturæ amico, uti est succus citri, berbe-  
rum, anrantiorum, vel pomorum Chinenfium. Utilis quo-  
que tinctura rosarum, cum aqua rosarum & phlegmate vitrioli  
parata. Quæ leniter adstringunt & roborant, sunt species de  
hyacintho, quæ cum aliquot granis coralliorum & nitri, col-  
liquativos sudores egregie compescunt. Magnæ etiam vir-  
tutis elixir nostrum balsamicum temperatum, ex gummatibus  
resinosis temperatis & extractis, sine vini spiritu paratum. Nec  
omittendus chaccarillæ & ipse quoque chinæ cortex, si cum  
sirupo acetositis citri, aut nucis Indicæ, adjecto nitro, in  
electuarii formam redigitur. Proficit etiam bolus rubra fa-  
brilis, cum conserva, vel julepo rosarum subacta. Hæc enim  
omnia ad levandas ejusmodi lentas febres, si prius humorum  
& viarum vitio prospectum, eximiæ virtutis, eorumque re-  
ctus usus merito commendandus. Quin novi, plures, & he-  
cticos, & phthificos, his diu fuisse servatos.

## §. XIV.

Non sa-  
turnina  
metalli-  
ca.

Quæ autem a Chymiatriis ad hecticum calorem & ad-  
versus sudores passim laudantur saturnina, encomia minus su-  
stinent, sed propter metallicam, adstrictivam, nervis inimi-  
cam virtutem, tono ventriculi & intestinorum sunt contraria  
& certius ac plus nocent, quam prosunt. Hinc rejiciendum  
saturni saccharum, & quæ præ omnibus celebratur, parata ex  
hoc antiphthifica tinctura *Grammani*. Antihecticum vero  
*Poterii*, si rite ex stanno puro, nitro & antimonio paratur  
& cum emulsionibus datur, non tam noxium est, ut quidam  
putant, sed ob blandam roborantem diaphoreticam virtutem,  
utile omnino. Neque enim stannum, propter blandum quod  
fovet sulphur, nervis est inimicum, nec adstrictivum, uti qui-  
dem

dem plumbum. Gravis de salutari facultate antihectici huius testis est *Muralius* disertis verbis in *M. N. C. Dec. II. An. I. obs. CIX.* ita scribens: *diaphoreticum joviale, sive antihecticum Poterii, ad demulcendam acritudinem humorum matricem, & nervos irritantium, mirum quantum valet. Idem uterum corroborat, saepe ex emaciatis & debilibus, quadratos & robustos facit.*

## §. XV.

Balneorum in hecticis & lentis frequens, praesertim Balneo-  
apud Veteres, commendatio. *Sennertus* ex *Galeno* metho-  
rum usus dum iisdem utendi pluribus exhibet. Instar omnium vero atque  
de eorum vario usu locus est *Alpini, de Med. method. lib. VI. utilitas.*  
dignus, qui totus huc transcribatur. De externis, scribit,  
medicamentis balnea conveniunt, ex aqua dulci, aut ex aqua  
alterata althaea, matva, violis & aliis similibus. In Aegypto  
ex lacte asinino & camelino, vel equino, balnea tepida institu-  
unt pro Magnatibus. Epithemata iidem atque inunctiones  
commendantur. Ex balneis tepida conveniunt atque frigida.  
Illa humectant solidas partes, fuligines, fumidaque excremen-  
ta digerunt corpusque recte transpirabile reddunt, & remissa  
caliditate, etiam calorem hebetant. Hac refrigerant, cutem  
densant, virtutem, calorem augendo, roborant. Sed non in ex-  
carnibus corporibus & valde praelanguidis, tutum erit, uti ad-  
modum frigidis balneis, quando nedum hac calorem augebunt,  
sed quinimmo praelanguidum extinguunt. In robustis vero e-  
runt utilisima. Robusti bis in die, scilicet mane & vespere, an-  
te cibum, hisce balneis utentur, semel vero debiles. Nonnulli  
non vehementer frigida balnea, sed lenissima frigiditatis, utilio-  
ra & magis tutia esse volunt. Ideoque primum aegrotos in bal-  
neum temperate calidum ducunt & mox in leviter frigidum,  
ita ut tepidum potius sit, sive leviuscule frigidum. Aegyptii  
& Arabes uti solent balneis ex aqua Nili fluminis, ex lacte ca-  
melino, vel equino, asinino, vel caprino; item thoraci, hepati,  
ventriculo, renibus, ex lacte, oleo violato rosatoque tepido, aut  
ex



ex succo lactuca, junci, endivia, portulaca, polygoni, lenticula palustris, nenupharis & similia, cum modico lactis & croci, ad penetrationem, admovent epithemata. Sed tenendum omnino in genere de balneis: eadem commodè habere locum in principio morbi & quando a viribus fractis pendet, nec non in lenta infantum febre, quia emolliunt, demulcent, rigidas fibras laxant & simul humectant; nihil autem proficiunt in progressu morbi, sique putredo, abscessus & exulceratio interna jam præsto sunt.

## §. XVI.

Motus  
commen-  
datur.

Ex præcipuis veteres & molestas has febres expugnandas præsidii, est motus corporisque exercitatio. Veteres jam, Hippocrates & Aretæus, in tabe curanda mirifice commendarunt varia motuum genera, deambulationem, vecturam, gestationem, peregrinationem & navigationem, quin Hippocrates lib. de intern. affect. §. XXXIV. pag. 238. præcipit: si quis validus fuerit, per triginta dies ad ligna secanda ablegetur, & summis humeris lætetur, & interdum deambulet, & vesperi dormiat. Sed saluberrima & accommodatissima motus species equitatio, aut vectura in curru, quibus, perpetua corporis succussatione, sanguinis progressus per mesenterium egregie adjuvatur. Multi imprimis sunt in laudanda equitationis utilitate celeberrimi Angli, Sydenham & Morion. Ille quidem opp pag. 524. & 781. non veretur affirmare, equitationem esse in hectica & phthisi specificum sine pari, eoque certius, quo neque mercurius in lue venerea, neque cortex Peruvianus in febribus intermittentibus, efficacius aut certius. Et Morion exercit. de phthis. pag. 26. ita graphice disserit: nullum magis conveniens remedium, quam quotidiana ad moderatos usque sudores protracta equitatio est, in febribus lentis, hecticis, ex vitio maxime ventriculi, ex perversa forte febrium intermittentium tractatione, nimio intempestivoque figentium, præcipitantium & adstringentium abusu, frigido potu calenti corpori superfuso &c. quarum præternaturalis æstus corpo-

corporis laudabiles succas depascit, ex ventriculi & intestinorum saburra acida lenta simul & viscida, meatus obstruente præter naturam; utpote quaviscosus lentior, sive effoetus chylus, qui vasa & habitum corporis jam infertur, æquabili succussione discontinuatur, excernitur, ut appetitus iterum restituatur, novus chylus laudabilis & copiosior elaboretur. Expedit tamen innuere, in lentis autem & frequentem apprimè utilem esse, in hecticis vero stricte sic dictis moderatior sit.

## §. XVII.

Tandem, quicquid in lentis his & tabidis præstandum, Mature id mature faciendum omne. Neglecta enim hac opportuni. Subveniente, accedente medentis, vel laborantis errore & morbo diu. endum. tius protracto, irrita prorsus atque frustranea est medicatio, & fere semper in hecticam transitus fit lethalem. Qui autem his febribus jam detinentur, autumnus semper pejus habent, ob languidiorem naturæ in actibus secretoriis & depuratoriis virtutem. Quin, quia circa æquinoctia ordinario subitæ insalubres fiunt aeris & cœli mutationes, plerumque tum non modo gravius ægrotant, sed & decedunt hectici incurabiles. Igitur necessarium est, ut circa hæc tempora exactam victus servent rationem, animum tranquillum habeant, aeris injurias vitent & a Medico quoque consilium petant.

## ENARRATIONES MORBORUM.

## OBSERVATIO. I.

Vir quadragenarius major, phlegmatico-languineus, a Lente fe-  
multis jam annis computationibus in seram usque noctem in- bris in bi-  
dullerat, modo cerevisiam, modo vinum, modo vini spiritum- culo cu-  
bibens, parum vero appetens. A duobus autem mensibus vali- rata re-  
da affectus erat tussis, somnum omnem arcens, cum inten- petens in  
so æstu vespere ingravescente, ægra spiratione, viriū dejectio phthisin  
ne & corporis consumptione, nec non copioso per tussim muci transiit  
lethalem.

(IV.)

D d d d

scree-

screatu. Meum per literas exquirebat consilium, sed nolui primum manum admoveere, uti non facile soleo in longis ejusmodi & desperatis morbis & qui jam varia Medicorum artificia experti. Quum autem intercederet vir honoratus, mihi amicissimus, suasi, ut biberet cerevisiam medicatam hanc: recipe herbæ hepaticæ pulmonariæ, hederæ terrestres, scabiolæ, cardui benedicti, veronicæ, agrimonix, tussilaginis, mulci pulmonarii, florum hyperici ana manipulos duos, rhabbari uncias duas. M. conc. indantur sacculo & ad fermentationem suspendantur in quinquaginta mensuris cerevisiæ recentis. Exhibui quoque pulverem ex matre perlarum, antihectico Poterii, lapidibus cancrorum & nitro, cum emulsione dilutiori ex amygdalis & pineis. Dedi porro consilium, ut largiter sorbillaret juscula tenuia, ex carne vitulina, cum radice scorzonæræ & cichorei decocta. His per aliquot hebdomades usurpatis, nunciatum mihi, egregium accessisse levamen. Hinc suasi, ut ului insisteret adhuc per mensem, quo etiam cum periculoso morbo in gratiam rediit. Sed quum suctum vitæ genus bibulum nihilosecius sectaretur, multisque domesticis curis afficeretur, anno circumacto, post gravem iram incidit in hymoptysin, quam sequuta phthisis hectica tandemque mors.

#### *Epicrisis.*

Qui ex nimio potu sibi phthisicum & hecticum morbum contraxerunt, omne lactis genus fastidiunt, Hinc in nostro concessi quidem cerevisiam, sed medicatam, per herbas leniter ioborantes, balsamicas, consolidantes & sanguinem purificantes. Hac igitur labes viscerum, maximeque pulmonum atonia, sublata. Sæpe enim hecticum hoc malum in principio a sola atonia pendet, sub qua, & secretiones, & excretiones, rite succedere nequeunt, impuritatibus, largius ab ejusmodi bibulis heroibus collectarum. Et profecto ego testari possum quod decocta ejusmodi specierum, ex aqua, vel cerevisia, addito quandoq; melle, in chronicis ejusmodi lentis febribus



bus præstiterint mira, si modo aliquandiu continuata, quin longe plus, quam pretiosa, singulari arte & labore confecta. Sed promptus omnino mali recursus, nisi exacta vitæ victusque ratione, arceatur & viscerum imbecillitas penitus emendetur.

## OBSERVATIO II.

Iuvenis literarum studiosissimus, ob teneram a nativitate corporis constitutionem, in catarrhosas defluxiones, diarrhoeas, tusses, phthisin etiam pronus, animo quoque admodum sensibilis, tempore vernali afficiebatur tussi ferina, tum epidemia, primum sicca, dein humida, cum interno æstu, intercurrente horripilatione & accedente virium, ob somni defectum, prostratione. Dabantur leniora laxantia, mannata, rhabbarbarina, linctus pectorales, pulveres item & elixiria pectoralia, sed sine singulari levamine. Exactis sic sex & pluribus hebdomadibus, heclica imminere visa; hinc suasi ptisanæ, ex rasura cornu cervi, radice scorzonæræ, hordeo mundo ac semine foeniculi, cum æquali parte lactis bubuli, potum quotidie ad mensuram, ita, ut mane dimidiam & pomeridie iterum dimidiam biberet. Sed æger, quo plus, eo melius, putans, quotidie vel duas mensuras ingurgitavit, ventriculo tamen firmo adhuc, haud male. Sumsit quoque subinde pulverem ex spermate ceti, lapidibus cancrorum, floribus sulphuris, saccharo & pauxillo nitri. His paucis & evporistis tantum profectum, ut notabile paulo post sentiret auxilium, sensim postea symptomata discesserunt omnia, tussis placata, æstus restinctus & appetitus cum somno rediit.

### Epicrisis.

Non penitus, sicut in hydropico, sic etiam in heclico malo, desperandum est, si vitium fluidarum nondum transit in labem & corruptionem ipsorum viscerum, inflammatio nem scilicet, ulcerationem, aut scirrhum. Felix igitur est Medicus, qui hæc bene cognoscit. Sic enim curationem bonis avibus suscipere potest, quæ, si feliciter cedita, famam & glori-

am inde reportat. Magna adversus difficiles & longos morbos facultas in ejusmodi temperatis, evaporistis domesticis, diluentibus & humectantibus remediis, quin longe præstabilior, quam in pharmaceuticis cunctis. Medici in eo plerumque delinquant, quod si tussis humida valida adest, phthisin esse putant, eaque propter pectoralia multa adhibent, quum tamen sæpe sola humorum acrimonia horumque ad pulmones remissos decubitus, causa sit tussis vehementioris cum secreta copioso, & dulcia pingua relaxantia ob id plus noceant, quam profint. Lactis autem cum aqua diu continuato usu veteres jam, *Hippocrates & Aretæus*, tabem persanarunt. Exstat quoque in *M. N. C. Dec. II. An. IX. obs. 189.* de viro hecticico desperato viso, solo potu aquæ frigida curato observatio *Burgii*, qui B. parentis mei anno MDCLXIV. tuit discipulus, ipsiusque effigiem, clavi pharmaceuticæ præfixam, carmine decoravit.

## OBSERVATIO III.

*Mesenterii ab-  
scessus diarrhæa  
saniosa  
solutus.*

Miles quidam, facie lividus, corpore macilentus & languidus, pulsum tamen celerem cum quadam duritie exhibens, conquerebatur de alvi fluxu per tres continuos menses ipsum adeo detinente, ut quotidie, octies, vel decies, desidere cogeretur, secedentibus nonnunquam, ut naturaliter fieri solet, excrementis, nonnunquam vero saniosa, nonnunquam sanguinolenta materia, sine scybalis, appetentia ciborum simul imminuta faucibusque aridis. Inquirenti in tam chronici mali causam, respondit: se graviter aliquando in sinistro dorsi & thoracis latere verberibus esse percussum, ut locus etiam sugillatus comparuerit & dolor successerit impenitus, præterlapsis autem aliquot diebus, doluisse hypochondrium sinistrum ibique supra os ilei protuberasse tumorem, aliquot hebdomades subsistentem, donec abortis in ventre torminibus, alvus sponte fuerit soluta, multaue saniosa, foetida, atro etiam sanguine tincta, copiosis secesserint dejectionibus. Ex eo quidem tumorem subsedisse & dolorem quoque evanuisse,

sed

led diarrhoeam perstitisse & adhuc ipsum mirum exercere ac vires absumere. Dimissus igitur est consilio, ut serum lactis dulce, nostra methodo paratum quotidie ad mensuram unam, nec non infusum, ex scabiosa, veronica, fanicula, mentha, melissa, millefolio, floribus hyperici & papaveris erratici frequentius potaret. Quibus etiam effectum, ut post aliquot hebdomadam decursum rediens, gratus profiteretur, parciores longe esse dejectiones, corpus vegetius, meliora omnia, nec de perfecta impetranda sanitate dubium.

*Epicrisis.*

Nullum certe est dubium, quin in hoc abscessus fuerit in mesenterii compage obortus, qui deinum ruptus, effudit in intestinorum cavum saniem & cruorem, per ani secessum excretum. Qui vero factum, ut a superiorum percussione, in abdominis penetralibus inductum apostema, disquisitione omnino dignum. Nos quidem ab impedita sanguinis in partibus plagis gravius contusis circulatione, mali ducimus natales, unde factum, ut in homine plethorico sanguis majori copia fuerit delatus ad mesenterii diverticulum, ibidemque collectus, demum putrescere coeperit & in abscessum concesserit. In mesenterio enim saepius oboriri stagnationem, si in remotioribus partibus sanguinis progressus interceptus, non novum. Ipsi novimus, hoc facto, mesenterium cum omento putre & sphacelatum fuisse inventum; vulnere lethali diaphragmati inflicto, cruorem vasa mesenterii perrupisse & abdomen inundasse, & in asthma spasmodico, a polypo in appendicis cordi canalibus, mesenterium itidem sanguine multo oppletum, vasa ipsius distenta partim, partim plane disrupta, comparuisse.

OBSERVATIO IV.

Vir erat macilentæ & cholericæ constitutionis, qui ex hæreditaria quadam & nativa dispositione pulmonum alebat vitium, ac præterea ob nimias lucubrationes vitamque nimis

*Heftica  
phthisica  
lethalis.*



sedentariam variasque animi ex ira commotiones, corporis & stomachi sibi contraxerat imbecillitatem. Hic ab aliquot jam annis magnam pituitæ viscidæ copiam secreta eiecerat, hæcque ejectio mirum demum copia increvit, & per duos fere menses, cum lenta febre, spirandi difficultate, viriumque jactura, nec non exquisito sub urinæ emissionem ardore, duravit. Tum quidem æger emulsionibus, jusculis medicatis & decoctis demulcentibus, interpositis clementer alvum laxantibus, cum sanitate in gratiam rediit; exacto vero circiter anno, eidem malo denuo implicitus est. Alium igitur in consilium adscivit medicum, qui licet semper adfuisset anxia respiratio, tussim tamen non phthysicam, sed ex stomacho æstuante & hypochondriacum symptoma esse judicavit, putavitque, cessatura omnia, si tempestivus prodiret hæmorrhoidum fluxus. Variis demum incassum adhibitis, de vena secanda consilium dedit floridumque e pede extraxit sanguinem. Sed eodem adhuc die vesperi ægrum horror per universum corpus incessit, subsequente intenso æstu, nocte insomni, virium jactura gravi & perfecta accessit hæctica, qua etiam e vita mense Martio discessit.

#### *Epicrisis.*

Qui ex parentibus phthysicis geniti sunt, iis per totam fere vitam semper debilis corporis constitutio, ut languescat ventriculi digestio, & ipsi in catarrhos, ex levi aeris vitio, lento cum calore, proni sint, quin facillime, nisi regimen circa nonnaturalium rerum usum exquisite observent, in phthysin & hæcticam incidunt. Hic æger, Collega & amicus noster valetudinariam diu duxit vitam & aliquoties circa æquinoctia phthysica tussi cum febre laboravit; DEI tamen auxilio, datorum a nobis remediorum ope, convaluit. Tandem vero se commisit Medico, qui perfectam morbi curationem brevi pollicitus est. Et quum a plethora & hæmorrhoidum fluxu impedito omnia pathemata pullulare putaret, a venæsectione cepit initium, sed male hæc cessit. Inde enim mox pessime

peffime habuit, & in phthificam hecticamque incidit tuffim lethalem, frustra omnibus datis remediis. Discant igitur, qui plethoram ubique crepant; in debili & hectico corpore nunquam utilem esse venæfectionem & salutarem, quia per continuum calorem sanguis jam consumtus & succi potius ingignendi sunt, quam subtrahendi. Sed plura in similibus casibus notavi delicta. Obversatur adhuc animo exemplum ferentissimæ personæ vix vigesimum ætatis annum egressæ, quæ a matre phthifica genita & ipsa phthisi periit. Nimirum quum ex puerperio novissime superato admodum debilis, in curru aperto, incitato equorum cursu per aliquot horas vecta, aerem valde frigidum, vento agitatam, ad pectus admisisset, mox de catarrhis, tussi anhelosa, licca, lassitudine corporis & sudore nocturno conquesta est. Medicus catarrhalem febrem esse autumans, pectoralia opposuit dulcia, indices vero hæc symptomata & calor consumens vires, creverunt. Hinc quia menses nondum iterum prodierant, venam incidere suavit, quo longe debiliior facta, & placide haud ita multo post ex hac vita decesit. Errant igitur medici vehementer, qui nullum discrimen faciunt inter mensium obstructionem, quæ a copia sanguinis & infarctu viscerum est, ubi venæfectio juvat, & inter eam, quæ ex sanguinis defectu venit, uti fit in phthisi & hectica, ubi utique sanguinem detrahare, qui ordinarie deficit in hecticis, nil aliud est, ac mortem promovere.

## OBSERVATIO V.

Vir illustris, Regi a consiliis, quadragenario major, ita *Hectica* tura longus & macilentus, hypochondriacis pathematibus & *ex mesenterii ab-* pariori hæmorrhoidum fluxui obnoxius, post iram vehementiorem, perlensit totius corporis languorem, cum dolore *scessu diarrhoea* pressorio, circa primam lumborum vertebram, abdominis torminibus, æstu interno, vesperi invalescente, inappetentia, *purulenta soluta.* alvo simul clausa & flatibus rusticibusque ad superiora regurgitantibus. Secta fuit vena & dati pulveres digestivi, a blorb-

bentes atque nitroli. Nihil tamen opis allatum. Ventris potius dolores cum aestu interno increverunt, carnes ac vires consumserunt, interdum abdomen mirum intumuit a flatibus & præcordia tenuit anxietas summa. Sic duos exegit menses, multisque Medicis & medicamentis usus, heclicus visus fuit, tantum non conclamatus. Ipsa tamen natura tandem curationis aperuit viam, secedente per alvum materia saniosa multa, quæ etiam apparuit in urina. Hoc facto, calor quidem & dolor factus mitior, appetitus quoque instauratus. Sed quia purulentus hic alvus fluxus, longius quam per tres menses successit, cum insigni virium debilitate corporisque marcore, indicium præbuit haud fallax grandis in mesenterio abscessus. Interim quum æger exquisitam diætam servaret, juscula gelatinosa, lac asininum, bubulum cum herbis vulnerariis coctum, & caprillum cum Selteranis mixtū, potaret, simulque pulverem ex semine lycopodii, mulco pulmonario, urtica mortua, tussilagine, semine cymini, nucista & saccharo, in emulsione ex amygdalis & pineis subinde sumeret, factum est, ut sensim vires redirent, ejectio materiæ per alvum ac tussim minueretur, & ipse, præter spem omnium, convalesceret, adjuncto postmodum victu exacto & regimine congruo.

#### *Epicrisis.*

Hypochondriaci & hæmorrhoidarii in mesenterii morbos, inflammationes & abscessus delabuntur facile. In his enim jam tum mesaraica vasa sanguine farta & humoribus sunt distenta, tardissimusque per eadem commeatus. Nostro sine dubio, a gravi ira, accidit sanguinis extravasatio, inflammatio & inde suppuratio. Parva autem suppuratio, brevi potest ampliari & latius progredi in mesenterii compage, largiter obfessa pinguedine, quæ in liquamen saniosum facile liquefcit. Quod vero purulenta materia alvo expurgata, tribuendum naturæ beneficio. Et quod in urina comparuit pus, a venis resorptum & per renale crebrum excre-

tum,



tum, eodemque modo etiam successit puris scretatus, integris pulmonibus renibusque. Quin novi, utero ulcerato, per asperam arteriam rejectum fuisse pus, illæsis plane pulmonibus. Soli etiam naturæ debetur sanitas recuperata. Nec minus providentiæ divinæ, si tam periculose laborans invenit Medicum, qui morbum perite & leniter tractare novit. Sed quia ejusmodi abscessus perquam facile recrudescunt, exacte ad sanitatis regulas vita instituenda & vitanda cum cura cuncta, quæ ad mali recursum facere possunt.

## OBSERVATIO VI.

Femina triginta annorum, tenera, victum tenuem, mol- *Lenta fe-*  
lem, per multos annos suetum, cum crasso & duro permuta- *bris post*  
rat & carnes infumatas piscesque salitos liberaliter ingesserat. *tertianā*  
Incidit hinc primum in tertianam notham, a qua post men- *curata.*  
sem liberata, ad stomachum fulciendum usa est tinctura ape-  
ritiva *Mæbii*, ex spiritu salis, cum sale tartari, torna solis  
tincta. Hac adeo aucta appetentia, ut vix famem sedare  
posset. Paulo post persensit virium lapsum appetitusque pro-  
strationem, cum æstu interno ac phlogosi, pulsu vesperi ac  
post cibum semper multum increbescente, successit tandem  
languor universi corporis pedumque tumor ac dolor contu-  
fivus. Medicum igitur accivit. Qui, quum primam regio-  
nem saburra acidorum humorum obsessam esse recte con-  
cluderet, lene dedit emeticum, ex tartari emetici uno & di-  
midio grano, aquæ menthæ uncia & julepi rosarum drachma.  
Assumpto hoc, ingens copia viscidæ amurcæ viridissimæ, instar  
æruginis aris, vomitu rejecta, quæ instillato oleo tartari per  
deliquium, flavum induit colorem, luculento indicio, ex bile  
& acido corrosivo eandem esse constatam. Mitior inde red-  
ditus calor & molestus ossium dolor complacatus, vires quo-  
que reparatæ. Nihilominus, ad reliquum exturbandum, tertio  
die iterato datum hoc pharmacum, & evocata tam per supe-  
rius, quam inferius os, similis indolis recrementa. Postea  
(IV.) Eccc vero

vero datum elixirium nostrum balsamicum stomachale & pulveres præcipitantes cum duplicato arcano, tam salutari effectu, ut brevi post febris hæc cum omnibus symptomatibus discederet & ægra cum valetudine in gratiam rediret.

*Epicrisis.*

Ortum duxit lenta hæc febris ex primæ regionis cruditatibus, quas ingenuit voracitas, post febres superatas solennis & usu spiritus salis adaucta. Licet enim aperitiva *Mæbii* tinctura stomachi vitiis appetitum excitando & digestionem facilitando, egregie opituletur; ubi tamen ventriculus plus appetit, quam coquere potest, noxam potius affert, quam emolumentum. Recte igitur datum vomitorium, qua saburra acido-biliofa, morbi causa exturbata, sicque simul sublata symptomata cuncta.

OBSERVATIO VII.

*Marasmus senilis.*

Novi senem octuagenarium, robustæ naturæ & ob nimiam sanguinis redundantiam singulis mensibus hæmorrhoidum fluxui obnoxium, ceterum bene valentem & bene appetentem, inprimis quum quotidie vini liberalem haustum biberet cum oblectamento. Hic tandem autumnno, confecto itinere & pota cerevisia minus defœcata, ingestis quoque aliis fermentescentibus, digestionis turbas & flatulentias expertus est, substitit paulo post hæmorrhoidum stillicidium, appetitus periit, vires successive conciderunt, ructus facti continui, cum conatu ad vomendum, os siccatum, alvus obserata, pulsus celer redditus ac debilis. Hæc durarunt per duos menses, & graviora indies facta, tandem frustra adhibitis omnibus, vitæ attulerunt finem.

*Epicrisis.*

Senes levi ex causa & errore commisso, in graves, immo funestas, ni mature succurratur, incidere possunt affectiones. Quando enim sanguis hæmorrhoidalis, evacuari solitus, retinetur, neque per tempestivam venæsectionem ad liberum circuitum traducitur, stagnat in visceribus & ad corruptionem

vergens, putridam talem febrem, quæ in senibus marasmi nomine venit, ingignit.

## OBSERVATIO IIX.

Vir quadragenarius, tener constitutione, post longum <sup>Hectica</sup> animi moerorem & vitam sedentariam, incidit in languorem <sup>ex corru-</sup> virium, corporis marcorem, appetitus prostrationem, calo-<sup>ptione</sup> rem præternaturalem, cum pulsu debili & frequenti, somno <sup>sphacelo-</sup> parco & interrupto, facie plumbea, oris siccitate perpetua & <sup>sa inter-</sup> sudore matutino. Quum his per sex septimanas fuisset deten-<sup>na lethali-</sup> tus, ob alvum adstrictam sumsit purgans, ex diagrydii sulphurati gr. II. cum tartaro vitriolato, quo multum dejecit & diutius quam per octiduum. Inde vires adeo conciderunt, ut animus facile deficeret in situ erectiori, calor etiam increbuit & accessit tandem summa præcordiorum anxietas, ad quam levandam vena aperta & aliquot uncie emissæ sanguinis fluidi & floridi. Licet autem anxietates hoc facto levarentur, æger tamen, ob virium plenarium lapsum, animam haud ita multo post efflavit.

*Epicrisis.*

Hectica hæc febris est, enata procul dubio, a sphacelo-  
sa visceris cujusdam, ac uti videtur hepatis, corruptione. Non enim novum est, quod in languidioribus & diuturno moerore affectis, viscera ob sanguinem stagnantem abeant in putredinem, ac teste cadaverum sectione compareant nigra, tanto magis, si vita accessit sedentaria. Signa ejusmodi corruptionis internæ sunt, plenaria appetitus & virium prostratio, somnus nunquam reficiens, facies livida plumbea, carnes flaccidæ, conatus ad vomendum & colliquativus sudor. In nostro notatu inprimis dignum, quod ab unica exigua purgantis dosi incompefcibilis alvi fluxus inductus. Neque tamen effectus hic tam purgantis virtuti, quam potius intestinorum inflammationi & humorum acredini tribuendus. Caveat igitur Medicus circumspectus, ne, ubi motu intestino



continuo vires consumtæ & massa sanguinis recrémentitiis humoribus gravis, quippiam drastici purgantis præbeat & per-versa incurrat judicia.

## OBSERVATIO IX.

*Lenta  
febris  
curata.*

Femina sexaginta & trium annorum, tenera admodum, ante quinque menses terrore fuerat perculsa gravi & confestim molestant tractionem & tensionem in artubus persense-rat. Ante tres menses supra claviculam sub musculo mastoi-deo in utroque latere exortus tumor, qui rebellis fuit, nec ullis cedere voluit remediis. Interea lenta & vires consu-mens febricula, ab aliquot jam mensibus ægram incessit, cum ardore, in volis manuum & plantis pedum, præsertim circa mediam noctem affligens. Accesserunt per intervalla capitis pulsantes & tensivi dolores, qui sub cute, modo huc, modo illuc discurrerunt, ad cervicem, quin ad gingivas usque. In artubus sæpe tractiones fibrarum musculosarum, oculis conspiciendæ, cum dolore lascinante adfuerunt. Nausea quoque cum anxietate, nec non tormina ventris obscura, nonnun-quam afflixerunt, alvi secessu ut plurimum soluta. Appetitus fuit prostratus, urina crassa, turbida, rubra cum sedimento & cuticula oleaginosa, præsertim paroxysmo finito secessit. Omnia autem hæc symptomata, mox secundo, mox tertio die invaluerunt, cum pulsu celeriori, qui tamen frequens semper fuit, sed exiguus.

*Epicrisis.*

Affectus hic merito lenta consumens febris dicendus. Originem dubio procul traxit a vehementi terrore, cujus tanta vis est, ut, præsertim in cacochymico corpore, totam œconomiam motuum, tam vitalium, quam secretoriorum & excretoriorum, pervertat, nervosarum quoque & fibrosarum partium systema valde debilitet & ad spasmos, contractiones & dolores disponat. Eidem terrori etiam debetur glandularum colli tumor, qui ad lentæ febris generationem multum contulit. *Hippocrates* enim jam eas febres, quæ glandula-

dularum tumoribus accedunt, lentas & periculi non expertes judicavit, tum quod sub musculo crasso siti sint intractabiles, tum quod nervos vicinos distendendo, febrilibus spasmis subministrarent occasionem. In curando hoc morbo primum fuit, ut primæ viæ a fordibus repurgarentur. Hinc magnesia cum sale Epsomenfi ad drachmam dimidiam data, cum lacte amygdalino mannato, & clyster injectus ex decocto avenaceo, manna & chamomillæ floribus. Mane jejuno ventriculo potum caponis brodium, cui incoctæ radices petroselini, foeniculi, cichorii, herba nasturtii aquatici, addito cancerorum fluviatilium succo. Oblatus tum quoque pulvis ex cancerorum lapillis, nitro & solutione oculorum cancri. Potui ordinario servii ptisana. Exterior glandulis tumidis & dolentibus inpositum emplastrum diachylon simplex, cum spermate ceti, oleo hyoscyami, croco & camphora. Et ad artuum dolores complacandos, linimentum discutiens & antispasmodicum inunctum. His ægra per DEI gratiam, intra mensem, ex ancipiti levata & febris persanata.

## OBSERVATIO X.

Juvenis melancholico-cholericus, vigesimum annum *Hectica* egressus, comotationibus & ebrietati intemperantissime de- *in juvene* ditus, aliquoties hæmoptysin passus fuerat, cum pectoris *bibulo* angustia & quasi ebullientis sanguinis sensu circa præcordia, *curata,* semper tamen liberatus tempestiva venæsectione, pediluvii & congruis temperantibus atque nitrosis. Accidit vero, ut vehementi ira aliquoties commoveretur, quam sequuta notabilis virium & appetitus prostratio, spirandi difficultas, somnus inquietus, sudor matutinus, tussis vehemens, cum copioso ad libram minimum quotidie secretu, pulsus celer, a meridie potissimum ad medium noctis, cum calore in plantis pedum & volis manuum, urina turbida rubra, interdum cum sedimento, interdum tenui, corpore simul contabescente. Sic per duos menses, varia Medicorum consilia expertus est &

artificia, ex pectoralibus, antifebrilibus & refrigerantibus, sed frustra. Tandem nostrum petiit consilium, vix tamen dubiam, rebus sic comparatis, salutis spem facere potuimus. Interim lactis suasi potum, quod quotidie bis cum decocto fabarum coffée hausit, loco potus bibit decoctum ex radice scorzonerae, cichorii & rasura cornu cervi, cum passulis minoribus, potavit quoque Selteranas cum lacte ad mensuram quotidie, sumsit subinde gelatinam cornu cervi & usurpavit pulverem ex radice ireos Florentinae, liquiritiae, lapidibus cancrorum, nitro & saccharo. His per mensem alternatim usurpatis, melius habere coepit, aestus mitior factus & appetitus rediit. Hinc continuavit lactis potum & pulveris usum, subinde quoque juscula ex carne vitulina sumsit, simulque appetentior placentarum, ex iis, quae minus graves & viscidae, liberaliter quotidie comedit. Sic tandem praeter omnium spem symptomata complacata & aeger tantum non desperatus, binis mensibus exactis, surrexit sensimque convaluit ac biennium supervixit sanus & integer. Sed quum postea antiquum obtineret & liquores spirituosos, cerevisiam, vinum, maximeque spiritus ardentes, ingurgitaret effusius, nocte intempesta perquam frigida e computatione ebrius domum tendens, in platea subito concidit, ac domum portatus, morte extinctus est subita.

#### *Epicrisis.*

Ex raris hecticae curationibus est haec. Aderant enim omnia hecticae febris signa. Sed quia primum acciti Medici adversus phthisicum malum pectoralibus & dulcibus tantum pugnant, nec humidum deficiens refarcire, nec humorum acrimoniam demulcere laborant, parum potuerunt proficere. Ipse enim eventus per remedia procuratus docuit, causam hujus febris magis in humorum vitio eorumque viscositate & acrimonia fuisse positam, quam in labe, corruptione, aut exulceratione visceris. Patet igitur: in hectica febre non semper spem esse abjiciendam, si in juvenili aetate, subito,



to, ex prægressa mala diæta incidit, uti quidem heic factum est.

Ceterum de febribus lentis & hecticis plures jam prodidi observationes in *Medicina consultatoria* Tom. II. Dec. II. cas. III. pag. 65. de phthisi & hectica. cas. VI. pag. 86. de febre lenta ex male curata intermittente. Dec. IV. cas. VI. pag. 185. de febre lenta cum cachexia succedente malæ curationi febris intermittens. Tom. IV. Dec. II. cas. VII. de febre lenta desperata per lac asininum curata. Tom. V. Dec. IV. cas. IIX. pag. 291. de hæmoptysi cum febre lenta post tussim graviolem. Tom. VI. Dec. I. cas. I. de tussi pulmonali phthifica cum calore hectico demum funesta, quas evolvendas commendo.

## CAPVT XIV.

DE

## FEBRIBVS SYMPTOMATICIS.

## §. I.

**S**ymptomaticæ febres dicuntur eæ, quæ aliis morbis primariis, vel fonticis externis læsionibus, seu symptomata, ob systema nervorum inde male affectum & gravius irritatum, accedunt, nec typum exquisitum servant. Sicut enim omnis generis febres nervosi maxime generis affectiones sunt, & a varii generis causis, hoc impensius affligentibus, stimulantibus & commoventibus, originem ducunt; sic etiam eodem ex fonte derivandæ symptomaticæ, quibus inducendis causæ velificantur pariter multæ.

## §. II.

Ex iis, quæ aliis morbis adjunguntur, notabilis maxime illa symptomatica, seu secundaria febris, quæ in variolis obfervatur. Nimirum quando post quartum diem primaria febris, expulsa ad corporis habitum exanthematica materia, illa pri-mariis accedunt, defer-

deferbuit, nono ut plurimum die, quo pustulae suppurari & maturescere incipiunt, ob impensum qui inde suscitatur ardorem atque dolorem, nova accenditur febris, cum pulsum celeritate, aestu interno, siti, vigilia, inquietudine, quin delirio, quæ undecimo die haud raro laborantes necat, præsertim si adultiores & confluentibus obsessi. Dein dolores arthritici, rhevmatici, podagra, chiragra, ischiatis, nec non erysipelas in primis capitis, semper incipiunt cum insultu febrili, frigore & aestu, sub quo ad cutim & articulos agitur ex interaneis acris recrementitia materia, ibique acerbos suscitatur dolores, qui novam cient febrem, eo graviolem, quo graviores ipsi. In dentium quoque gravi dolore, maximeque difficili infantum dentitione, jungitur, ob cruciatum, frequentissime febris symptomaticæ, quæ periculi non expers, quin in teneris sæpe epilepticæ convulsiones sequuntur. Hæmorrhoidibus porro cœcis impensius dolentibus, sæpe febris, cum horripilatione, vigilia & tremore partium complicatur. Neque minus glandulis induratis, tumentibus & dolentibus febrile symptoma accedere solet. Nullum etiam dubium, quin in pestilentia, si anthrax, seu carbunculus, qui tumor est ardens & acutissime dolens in musculosis partibus, febris accendatur majusque intentet periculum.

## §. III.

*Vel ex-  
ternis la-  
sonibus.*

In puerperis præterea, tertio ut plurimum a partu die, febris supervenit symptomatica, lactea dicta, cujus origo nulla alia, quam quod ob uterum, enixo partu, iterum contractum, magnus sanguinis ad mammâs fit appulsus, quo corporibus glandulosis & fibris nerveis male affectis, dolor inducitur tensivus, febrilem insultum ciens. Si abscessus & apostemata fiunt in partibus, præsertim nervosis & glandulosis, in inguine bubones, aut in axillaribus & mammariis tumores apostematodes, complicantur febres, sæpe gravissimæ & cum dolore junctæ. Idem accidit, quando pars exquisitoris sensus ambustionem graviolem & ampliolem patitur. Neque minus

minus ex symptomaticis febribus sunt illæ sic dictæ vulnerariæ, quæ læsionibus ac vulneribus, manuum præsertim & pedum, nec non aliarum nervosarum partium, pericranii potissimum & meningum, accedunt, quæ etiam fiunt, quando tendines vel nervi, sub venæsectione improvide punguntur, vel aliis acutis instrumentis læduntur, eodem modo ac evenire solet, si pleura, peritonæum, aut intestina sauciantur. Quin si vulnera & læsiones partium acutius sentientium, acribus & causticis medicamentis, injectis aut inspersis, tractantur, intenduntur non modo dolores, sed & haud raro febres ardentes & continuæ ingignuntur. Tanto certius autem tantoque majori cum periculo hoc accidit, quando nervosis partibus communicatur plane venenum, uti fit in morsu canis rabidi, nec non quando mercurius sublimatus, aut arsenicum, carcinomatibus induntur. Demum non prætereunda illa febris, supra omiſſa, quæ vermibus & calculo accedit. Non enim adeo insolens in verminantibus febris, putrida dicenda merito, quæ irregularis admodum, cum nausea, abdominis torminibus, urina limosa, alvo ut plurimum laxa. Quæ autem calculo jungitur, oritur a doloribus acutis, tum maxime, quando per uretheres nervosas molitur transitum.

#### §. IV.

Ita autem omnes hæ symptomaticæ & continuæ febres sunt *sunt cito comparatæ*, ut universam œconomiam functionum, vitalium *compe-* inprimis & naturalium, pervertant, vires frangant multaque *scenda* exitialia symptomata, deliria, convulsiones & epilepsias, inducere possint. Plane omni tamen destituuntur utilitate, nec sicuti aliæ febres, removendæ & vincendæ causæ servant, multo minus sufficiunt. Hinc utique peritus Medicus eo dirigere debet in earum curatione medicationem, ut cito anomalos hos febriles motus compescat eorumq; vehementiam ocysſime retundat. Longe facilius enim & melius hoc in symptomaticis hisce perfici potest febribus, quam quidem primariis.

(IV.)

Ffff

rius



riis; eo quod illæ tantummodo a tensione & spastica strictura nervosarum partium, tanquam a causa immediata, proficiscuntur; hæ vero a causa materiali, non cito transeunte, sed permanente, ortum ducunt.

## §. V.

*Quid utile si a læsione partis nervosæ externæ.*

Curatio ipsa sic instituenda, ut causis amoliendis sit opposita. Quod si igitur a læsione, aut vulneratione partium nervosarum & tendinosarum, tam internarum, quam externarum, maximeque ipsius capitis, insultus accidit febrilis, nullum præsentius & securius auxilium, sanguinis missione, & quidem in parte propinqua instituta. Vulnerariæ enim hæ sic dictæ febres, oriuntur potissimum a sanguine effuso, in partibus sauciatis decumbente. Expediit vero, ut mature id fiat, præsertim in iis, qui sanguine abundant. Post venam sectam, discutientium, resolventium & diaphoreticorum usus longe efficacior, quam hac neglecta. Nos quæ commendamus habemus potiones ex aqua scordii, cardui benedicti, chærefolii, scabiosæ, aceto destillato, aqua theriacali, lapidibus cancrorum, antimonio diaphoretico, mixtura simplici cum sirupo acetositis citri, adjecto interdum pulvere lumbricorum terrestrium, interdum sanguine hirci. Melius adhuc vinum bonæ notæ Rhenanum, cum succo cancrorum fluviatilium mixtum, addita lapidum cancrorum drachma & theriacæ drachma dimidia. Sic enim conflatur potio, ad inflammationem & sphacelationem arcendam, virtutis præstantissima.

## §. VI.

*Si a doloribus partium sensibilibus.*

Quando symptomatida febris ab atroci dolore, partium præsertim nervosarum & sensibilibus, accidit; omnia quæ sine noxa dolorem levant & sedant ex usu sunt, id est, ea quæ blanda virtute vaporosa anodyna pollent. Horum classē ducunt flores aquarum fragrantium, uti tilia, primula veris, acaciæ, liliorum convallium, alborum, sambuci, rosarum, pav-

paveris rhaados, pœonia, nymphaea, nec non blanda papaveracea, emulio scilicet ex seminibus quatuor frigidis majoribus, cum semine & sirupo papaveris albi, & maxime omnium liquor noster anodynus mineralis. Laudatissimi enim hæc in dentitione difficili, calculo & colica cum febre sunt usus. Neque etiam, nisi irritis his, si necessitas urget, confugiendum ad opiata & narcotica, massam pilularum de cynoglossa, diacodion montanum, laudanum cydoniatum *Helmontii*, *Sydenhami* & quæ plures hujus farinae compositiones. Quando dolori ex inflammatione supervenit symptoma febris; interne diaphoretica cum nitrosis mixta, omnia fere reliqua virtute antecellunt, quia nihil magis inflammationem discutit, quam nitrum, præsertim cum fixis diaphoreticis & camphora mixtum, & qua discussa, & dolor cessat, & febris.

Et in-  
flamma-  
tionem  
stipanti-  
bus.

## §. VII.

Quæ a causa externorum topicorum usum admittente, inducitur symptomatica febris, præter interna, exterius etiam poscit demulcentia, dolorem mitigantia & fibras duras strictas mollientia & relaxantia. Sunt hæc maxime necessaria in tumoribus venarum hæmorrhoidalium, in tumoribus & doloribus artuum, glandularum inguinalium tumore venereo, in tumentibus mammis, colli glandulis, nec non si sub infelici venæsectione punctus nervus aut tendo, si animal rabidum, aut insectum intulit læsionem. His in pathematibus eximie conducunt cataplasmata ex ficibus, radice & foliis liliorum alborum, melle, farina foenu græci, cepis tostis, vitello ovi, lacte & cremore lactis, cum croco; deinde nobili pollet virtute emplastrum diachylon simplex, mixtum cum sufficienti quantitate croci, vel cum spermate ceti & oleo hyoscyami; porro dolores egregie mulcent & spasmus laxant vesicæ, decocto emolliente plenæ & parti afflictæ crebrius calide impositæ; neque ad temperandum ardorem &

stricturam remittendam inutilis est mucilago seminis psyllii, cydoniorum, aut lini, cum aqua rosarum facta & crebrius illita.

## ENARRATIONES MORBORVM.

### OBSERVATIO I.

*Febris*

*vermino-  
sa.*

Virgo tenerioris constitutionis, quatuordecim annorum, mensium fluxum parciissime experta, incidit in febrem, continuo, lento calore per duas hebdomades affligentem, cum tussi sicca, & alvi fluxu, quo multa foetida cinericei coloris excernebat, languor occupabat totum corpus & facies pallido foedabatur colore, accedebant quoque crebrius dolores acuti circa spurias costas, urina erat pauca & crassum sedimentum deponebat. Judicabatur lenta febris, a mensium obstructione prognata; ideoque ad emovendos hos varia a mulierculis ingerebantur. Vocatus ego, quæsi: num forsitan antea vermibus laborarit? dixerunt: ipsam dulcibus & placentis admodum oblectari, atque etiam ante aliquot menses lumbricos quosdam per alvum excrevisse. Exhibui igitur potionem ex rhabarbari drachma, seminis santonici drachma dimidia, salis tartari scrupulo, aquæ florum acaciæ unciis sex, spiritus vitrioli guttis xx, infusus in calido loco, de qua dimidiam partem pro dosi sumsit. Expurgatis sic leniter primis viis, ptisanam pro potu ordinario dedi hanc: recipe hordei mundi manipulos duos, radicis scorzonæræ, rasuræ cornu cervi, radicis cichorii ana unciam, herbæ scorodii manipulum unum, coque in aquæ fontanæ mensuris quatuor per horam, colaturæ adde sirupi acetositis citri uncias duas. M. Interpositus quoque interdum fuit usus pulveris, ex pulvere seminis santonici, cornu cervi usti, rhabarbari ana drachma una, nitri purificati, salis polychrestii ana scrupulis duobus, qui ad scrupulum una vice sumtus. His per



per mensem & ultra usurpatis, egregie convaluit, licet nulla amplius lumbricorum succederet excretio.

*Epicrifs.*

Febres verminosæ a lentis & hæcticis differunt in eo, quod hæ post cibum sumtum & vesperi ingravescunt, in illis vero hoc non observatur. Deinde quoque febres ex verminibus junctum plerumque habent alvi fluxum, quo foetida & cinerea recrementa secedunt, urina turbida cum limoso sedimento mingitur, in lentis autem & hæcticis hæc non præsto sunt. Discerni tamen hæ febres inter se debent ex causis antecedentibus, victu maxime, ex dulcibus, lacticiniis, aliis viscosis & fermentescentibus, optime vero si jam antecesserunt lumbrici. In medicatione autem, si febris complicatur cum alvi fluxu, abstinendum ab anthelminticis, validioribus purgantibus, a mercurialibus, a sagapeno, asa foetida, tanaceto, quæ alias specifica adversus vermes, sed utendum acidulis cum amaris mixtis. Acida enim non modo calori, sed & putredini verminosæ egregie resistunt. Plerumque tamen vermes non excernuntur, si febris juncta, quia æstu febrili dissolvuntur in putridum magma. Ego etiam tali in casu cum fructu usus sum potu acidularum Selteranarum, correctarum prius spiritu vitrioli, instillatis mensuræ triginta ipsius guttis, quo laxantem acquirunt virtutem. Quæ pro diversa ratione ætatis & corporis, majori, vel minori dosi quotidie offerri possunt.

OBSERVATIO II.

Juveni viginti circiter annorum, macilento & sensus ex-*Febri ex* quisitoris, forte scalpellum librarium e manu exciderat in pe-*punctura* dis dorsum, partemque hanc tendinosam cuspide acuta pu-*tendinosâ* pugerat & sauciarat. Postero die, antea perfecte sanus, in-*pedis.* currit acutum partis læsæ dolorem, cum febre, siti, præcordiorum anxietate, vigilia, quin mentis quadam alienatione.

Missus tum, quia plethoricus erat, illico sanguis e brachii vena & data emulio ex amygdalis dulcibus & semine papaveris albi, cum aqua florum sambuci, tiliae & acaciae parata, quam tam solam, quam cum pulvere ex matre perlarum, lapidibus cancrorum & nitro sumsit. Oblata etiam mixtura diaphoretica & discutiens, cum diascordio *Fracastorii*. Et exterius vulnuscule partique dolenti impositum emplastrum nostrum discutiens & anodynum. Quibus per aliquot dies usurpatis, febris cum omnibus symptomatibus discessit.

### *Epicrisis.*

Quotidiana testatur experientia, quam periculosa sint nervosarum partium laesiones & quam perniciose invehant symptomata. Nulla autem alia horum omnium reddi potest ratio, quam quod universa nervorum compages, una tantum nervosa parte gravius laesa, consentiat, & motus inordinati vehementes in hac excitati, per totum nervorum systema facile propagentur, uti fusius deduxi in *tomo III Med. ration. systemat. Sect. I. cap. V. pag. 175. sqq.* Discimus vero etiam ex hac observatione, morborum causas, non tantum in materiae nocentis quantitate, aut qualitate, consistere, verum saepius etiam motu vitioso & inordinato niti. Atque adeo perperam agunt Medici, qui in ejusmodi morbis ad humorum correctionem, aut evacuationem, animum & medicationem dirigunt. Praecipuum potius tum in curando sibi vindicant locum, quae motibus hisce turbulentis complacandis serviunt, quorum in numero cum reliquis anodynis sunt potissimum opiata correctae, quae alias minus quadrant, ubi perniciose quantitas sola, vel qualitati noxiae nupta, in causa est.

Febris  
buboni  
accedens.

### OBSERVATIO III.

Juvenis viginti aliquot annorum, sanguineo-cholericus,  
in

in Academia solertius Veneri & Baccho, quam Musis litarat & ante biennium sub conflictu cum sodali vulnus acceperat in thorace, quod consolidatum, pectoris quandam gravitatem & difficilem sub ascensu acclivium, aut ambulatione incitatore, spirationem reliquerat. Hic vere initiante con-  
queri coepit de virium languore, capitis dolore, inappetentia, somni defectu, calore febrili, modo vesperi, modo noctu, post levem horripilationem, ipsum infestante, subsequente mane sudore largo, admodum debilitante, cum majori respirationis difficultate & dolore in loco veteris circa mammillam vulneris. Medicum igitur in consilium vocavit, qui mixturis discutientibus & diaphoreticis, emulsionibus demulcentibus & refrigerantibus, pulveribus quoque temperantibus cum succo citri, febrem oppugnavit, interpolitis subinde laxantibus blandis mannatis & rhabarbarinis & data pro potu ptisana. Sed frustra. Licet enim & capitis dolor evanesceret, sudores matutini & febris, vehementia tantisper minuerentur, respiratio quoque liberior redderetur & appetitus melior, insultus tamen febrilis persistit semper, post mediam noctem accedens & sudore discedens, relicto miro corporis languore & debilitate, ut lecto etiam affigeretur. Hinc Medicus, dissolutionis ægri vitæ rationis non ignarus, forsân occultatam causam subesse suspicari coepit & in eam serio inquirere. Confessus igitur tandem est æger, in inguine dextro, durum quid protuberare, sed levem admodum ex eo se sentire dolorem, & credere, esse forsân ejusmodi tumorem, quem dicunt *eine VVachs-Beule*. Erat autem venereus bubo, qui impositis emollientibus, maturuit, & apertus magnam fudit puris copiam, quo evacuato, febris insensim magis magisque remisit, omniaque symptomata discesserunt, donec æger, traducto intra tres hebdomades ad consolidationem abscessu, penitus ad sanitatem rediret.



*Epicrisis.*

Ex hac historia id tantum occurrit notandum, quod febres ex glandularum tumoribus ortæ, teste ipso *Hippocrate*, perniciosæ sint, maxime omnium autem, quando causa tumoris materia virulentæ indolis, uti in bubonibus venereis, ubi in curando, non modo ad febris impetum compescendum, sed & ad venenum e corpore eliminandum, respicere decet Medicum. Dein meretur & illud notari, quod partes olim a vulnere quodam læsæ internæ, a contracto postea morbo, vel febre, rursus præ aliis pejus afficiantur & pathemata ibi affligere soleant extraordinaria, manifesto indicio, diu latitare posse partis imbecillitatem & labem, facile exacerbandam.





















